

Lerérún Búngiu To Lánina Iséri Darádu

Garifuna New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

SAN MATEO.....	4
SAN MARCOS.....	37
SAN LUCAS.....	58
SAN JUAN	93
HECHOS	118
ROMANOS.....	149
1 CORINTIOS	164
2 CORINTIOS	179
GÁLATAS	189
EFESIOS	195
FILIPENSES.....	200
COLOSENSES	204
1 TESALONICENSES	208
2 TESALONICENSES	211
1 TIMOTEO.....	213
2 TIMOTEO.....	217
TITO	220
FILEMÓN	222
HEBREOS.....	223
SANTIAGO	234
1 PEDRO	238
2 PEDRO	242
1 JUAN	245
2 JUAN	249
3 JUAN	250
JUDAS.....	251
APOCALIPSIS	253

SAN MATEO

Linébaanfaangu Jesúsu (Lc 3.23-38)

1 Niján jiri linébaanfaangu Jesucristu le jádaangiñe-bei meja ladúgawagun David luma Abrahám.
² Abrahám lúguchibei Isáac, Isáac lúguchi Jacób, Jacób lúguchi Judá jáu lamúleni, ³ Judá lúguchi Fáres luma Zára, Tamar tugúya jáguchu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isaí, ⁶ Isaí lúguchi urúei David, urúei David túma tó meja lúmari Urías, jagía lagúbürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácaz, Ácaz lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúleni lídan dan le janáanwagunbei Israelítagu adáurawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél, ¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catoúrusuñanu lubeiti linébaanfaangu Jesúsu lúmagiñe Abrahám lúmoun David, catoúrusu lúmagiñe David lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagúriajoun Crístu.

Lagúriajoun Crístu (Lc 2.1-7)

¹⁸ Ítara líña ligáburi lagúriajoun Jesucristu. María to lúguchu, gadáraduñoun luma José lun tamárieidun luma, lubáragiñeti jaganoún jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubei wügúri buídu tigáburi José le tadári, májati lasúbudirúniwa le asúseredubei tun María, busén-rügüti lígirunun, míchugunga tidúnrun. ²⁰ Dan le niján lubei arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwéne-di, ába laríñagun lun.

—José, ladúgawagun David, manúfudebá lun berésibirunun María queisi búmari, ladúga irájü le lúnbei tagáraüduni, lúmagiñe Sífiri Sándu liábin. ²¹ Tagáraü-duba ában irájü, ábame bíchuguni líri Jesúsu. Ítara lúba líri ladúga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdüdü ában irájü, Emanuél, ligíaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwéne-di ligía, ába ladúgüni le lubei ánjeli ligía lun, ába lerésibirunun María queisi lúmari, ²⁵ masúbudirungaloun quei wúri darí tagúriajani furúmiñeti tiraú, ába líchuguni líri Jesúsu.

Jachúlürün chu táu aríjei Jesúsu

2 Lídan fulásu le gíribei Belén, lumúanrugu Judéa, ñi lagúriajoua Jesúsu dán meja le Heródes lan urúeibe lídan jageíra juríu. Ábati jachúlürün fiú wügúriña chu táu ubúrugun Jerusalén lueigiñe oúbaü le ñigiñe lubei laboucha wéyu. ² Ába jálügüdajan.

—¿Jageísan jarúeite juríu le agúriajoubei? Aríja wamáaru luwáruguman le ñigiñe lubei láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábati lagúarun joun sun jábutigu fadirigu lídan jafíñen juríu, jáma ja arúfudajabalin lílürudun Moisés joun gürígia, ába lálügüdaguniña jalíabei lan libíti fulásu lagúriajoua Crístu. ⁵ Ába jaríñagun lun.

—Belén, le lumúanrugubei Judéa, ladúga ítara líña labúrüdüni proféta.

⁶ Amúrü Belén, lumúanruguna Judéa, amúrü ában lídaangiñe ubúrugun weírigutimaati lídan múa le, láu sun biñúraü,

ladúga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábati lagúarun Heródes joun chu táu arámudaguagü, ába lálügüdüniña luágutima dan le tarúfudaguagüle warúguma túngua joun. ⁸ Ábati louñajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñúdün námuga gíñe ájuduragua lun.

⁹ Lárigiñe jagáambuni chu táu lerérun urúei, ába jóudin. Warúguma bugáti to jaríjuboun le ñígiñe lubei láfuara wéyu, ába tídin jabá jabá, darí taráramun loúgiñe fulásu le ñí lubei irájü le. ¹⁰ Dan le jaríjinun chu táu ja warúguma, ába jagúndaaragun sarágu. ¹¹ Dánti le jebélurun tídoun múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti. ¹² Lárigiñe, ába jawísarúniwa lídan jawéne-di lun magíribudun jamá ñígiñe lubei Heródes, ába jagíribudun jageíroun lídaangiñe ámu úma.

Anúrajani lun Ejíptoun

¹³ Lárigiñe jóudin chu táu jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladúga láluaajaali Heródes irájü le lun láfaruni jilágubei.

¹⁴ Ábati lásaarun José, ába lanúgüni irájü táu sun lúguchu áriebu ligía, ába lídin jáu Ejíptoun. ¹⁵ Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmu-lugugiñe proféta. “Sagá numuti Niraú Ejíptogiñe.”

Láfaraguágüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagáñidun, ába loúnajan áfaraguaña sun irájüñü ja biáma tíña irúmu jáu lun únabun, ja aganoubaña Belén lúma sun fulásu geyégua láu, según dan le jaríñagubei chu táu luágu lagúriajoúniwa irájü ligía. ¹⁷ Ítara líña lagúnfulirun le labúrújabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu,

umálali ligía tumálali Raquél, to ayájuboun jarigi tirájüñü,

mabúseeruntu lun támalijoún ladúga jilágua jamá.

¹⁹ Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába laríñagun lun.

²⁰ —Sarába, barúbei irájü le táu sun lúguchu, giríbu jumá jageíroun Israelítagu ladúga jilágua ja abúseerubaña meja jáfaruni irájü le.

²¹ Ába lásaarun José, ába lanúgüni irájü táu sun lúguchu jageíroun Israelítagu. ²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñíjin, ába laríñawagúniwa lun lídan uwénedi lun lídin Galiléoun. ²³ Lachúlürün ñi, ába lídin agánawa lídan fulásu le giríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jaríñagubei proféta luágu Nazarétna lan Jesúsu.

Lapúrichijan Juan le abásteragüdejabei lídan fulásu mageírawati

(Mr 1.1-8; Lc 3.1-9, 15-17; Jn 1.19-28)

3 Lídoun dan ligía, ába liábin Juan le abásteragüdejabei apúrichija lídan fulásu mageírawati, Judéa, ² ába laríñagun lídan lapúrichijan.

—Sáansi jumei jóuserun, ladúga yaráfaali larúeijan Búngiu.

³ Juan le, ligía le uágubei meja labúrúja proféta Isaías ítara.

Agaambúati lumálali ában gürígia agúaraja lídan fulásu mageírawati ítara.

“Aráanse jumóun janígi lubá liábin Wabúreme, queisi ladárarúniwa úma surúti.”

⁴ Lanáangun Juan, láutu lúra caméyu, liábin lagúruga liránaagua, guéru, chigágaru leígubaña lúma síruudu le áraabuna. ⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambe lapúrichijan, ⁶ dántija le jagúfeseruni jafígoun, ába labásteragüdüniña lídan dúna le giríbei Jordán.

⁷ Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu ñúbintiña lun jabásterun, ába laríñagun joun.

—Jarásan jéwe jugúya le! ¿Ca awísarubadün lun janúrajan luei lanárime afáyeiragülei luágu figoú le lúnbei liábin? ⁸ Oúsera jumá buídu, arijúa lámuga furáangu luágu sáansigua lan ligáburi jóuserun.

⁹ Mapántajan jugúyame, aríñaga jídaangua.

“Linébaanfaangu Abrahám wagía”, ladúga naríñajare jun luágu gayára lan ladúgün Búngiu linébaanfaangu Abrahám lídaangiñe dúbü le. ¹⁰ Madíseeli lagúnfulirun le laríñagubei Búngiu, luágu yaráfaali lan lidáni abeichúni luágu figoú, aráanseeru jaráwa lun lánchujóun wéwe, áni sun wéwe le mabústeri lin, chaúnwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáali lan ligáburi jóuserun, ánjeinti le lúnbei liábin narígi, labásteragüdübadün láu Síffiri Sán-du, áni lafáyeiragüdübadün luágu figoú queisi láu wá-tu geméti. Gabáfuti nuei darí lun madúna nan ni lun narágachunun ligeídin. ¹² Nújeinjaru lichóbulin lújaburug, larúmadagüdübei türígu, ábame lanúadiruni lídaangiñe sagádi mábeijali. Ábame lareíduni türígu, ábame láguduni sagádi le mábeijali lídan wátu geméti le méñeguchadíbei.

Labásterun Jesúsu

(Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachúlürün luágun dúna le giríbei Jordán le ñí lubei Juan lun labásteragüdüni. ¹⁴ Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdüni, zamúrü lubei ñúbin nun lun nabásteragüdüniibu?

¹⁵ Ába laríñagun Jesúsu lun.

—Ítara lúba guetó, ladúga lúnti wadúgüni le lubeíbei Búngiu.

Ába labásteragüdüni Juan Jesúsu, ¹⁶ lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷ Ába lagaambún ába umálali siélugiñe le aríñagubei.

—Niraú le jínsiñebei nun le, le áubei oúnwenbun lan nugúndan.

Loúchaguni Máfia Jesúsu

(Mr 1.12-13; Lc 4.1-13)

4 Ába lanúgüni Sífiri Sándu Jesúsu lídoun fulásu mageírawati lun loúchaguni Máfia.

² Lárigiñe leréderun Jesúsu bián-wein wéyu lúma bián-wein áriebe meíginga, ába lálámachun. ³ Ábati liábin Máfia lubádun, ába laríñagun lun lun loúchaguni.

—Ánjein liraú bubei Búngiu, salíguagüdabeí dúbü le feínme.

⁴ Ába loúnabun Jesúsu.

—Taríñajare Lerérun Búngiu. “Mámarügübeí táu fein labágarida güriá, labágariduba giñe láu sun dimúrei le laríñagubei Búngiu.”

⁵ Ábati lanúgüni Máfia Jesúsu Jerusaléoun, ubúrugu le sándubei joun juríu, ába laweínragüdüni tábulugun témpulu, ⁶ ába laríñagun lun.

—Ánjein liraú bubei Búngiu, chubába yágiñe lun únabun, ladúga taríñajare Lerérun Búngiu.

Laríñaguba Búngiu joun láni ánjeligu lun jóuni-girunibu.

Janúgübadibu jájaburugu lun machúgeragun lan bugúdi luágu dúbü.

⁷ Ába loúnabuni Jesúsu.

—Aríñagatu giñe Lerérun Búngiu. “Móuchaguabeí Babúreme Búngiu.”

⁸ Ába lanúgüni Máfia Jesúsu luágun ában wúbü íñuti, ába larúfuduni sun arúejani le ubouágubei lun, lúma buri luweírigin, ⁹ ába laríñagun lun.

—Níchugubei sun le bun ánjabu ájuduragua nun.

¹⁰ Ábati laríñagun Jesúsu lun.

—¡Beíba nueí, Máfial! ladúga taríñajare Lerérun Búngiu. “Lún-rügüba Babúreme Búngiu bájuduragua, lún-rügüba giñe besériwida.”

¹¹ Ábati ladísedun Máfia lueí, ába jayábin ánjeligu es-ériwidei.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

¹² Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun. ¹³ Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabolón lúma Nef-talí. ¹⁴ Lasúseredunbei sun le lun lagúnfulirun le labúrújabeí meja Isaías, lé meja proféta.

¹⁵ Lageíra Zabolón lúma Nef-talí,

lídan úma lubádu barána, lueígiñe oúbaü le nígiñe lubeí láfuara wéyu libíti Jordán,

Galiléa le ní lubei jagánawa ja mámabaña juríu.

¹⁶ Jugúya lé meja lídaanbei lubúriga aríjaadün ában oúnwenbun larúgounga, jugúya lé meja lídaanbei lamúñounga le lánina oúweni, jarúgoungagüdawaali jáu.

¹⁷ Lúmagiñe dan ligía, ába lagúmeserun Jesúsu apúrichija ní itara.

—Sáansi jumeí jigáburi, ladúga yaráfaali larúeijan Búngiu.

Lagúarun Jesúsu joun gádürü esénijatiña lun lánime disípulugu

(Mr 1.16-20; Lc 5.1-11)

¹⁸ Eíbugeina líña Jesúsu lárú lárú dúna Galiléa, ligía laríjin bián gamúlenuguátiña, ában jádaangiñe, Simón le méme giríbei Pédro, le ában, Andrés. Esénijani jabá-garíbei, jáguruñati. ¹⁹ Ábati laríñagun Jesúsu joun.

—Falá jumana, ábame mesénijanjadün lan úduraü, anáajarúgaadünme güriá nun lun nánigume.

²⁰ Furése furése ába jígirunun jasénin, ába jóudin lú-ma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi ará-madajoun jasénin. Ába lagúarun Jesúsu joun lun lánime disípulugu, ²² lídan óra ligía ába jígirunun ugúnein, ígira jáguchi, ába jóudin lúma Jesúsu.

Larúfudajan Jesúsu joun sarágu güriá

(Lc 6.17-19)

²³ Ábajei leíbuguni Jesúsu sun Galiléa arúfudajeina tí-dan buri jalígilisin juríu to lídaanboun ságü fulásu.

Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti güriá. ²⁴ Ába lagaambúniwa luágu Jesúsu lídan sun Síria, ába janúgüniña sun ja asúfurirubaña láu ámuñegueinarügü sándi, igárigu, ja gawágubaña lagúbüri espíritu, ja gouwejadibaña, jáma ja derégü-daaña úgubu, ába lareídaguagüdüniña. ²⁵ Sarágu jáña güriá afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lú-ma lueígiñe oúbaü le nígiñe lubeí laboucha wéyu libíti Jordán.

Lapúrichijan Jesúsu wúbüwaügügiñe

5 Dan le laríjinaliña Jesúsu sun güriá jagía, ába laweínrun luágun ában wúbü, ába lañúrun ní. Ábati jóundaragun láni disípulugu geyégua láu, ² ába lagúmeserun arúfudaja joun itara.

³ —Fuleíseiwatün jugúya le asúbudirubalin luágu mégei jumáni lídejan Búngiu lun jadúgüni le labúseerubei, ladúga méreengunbei jun lun jebélurun lídoun larúeijan Búngiu siélu.

⁴ Fuleíseiwatün jugúya le jíruubei, ladúga líchuguba Búngiu gurásu jun.

⁵ Fuleiseiwatün jugúya le únabugubei, ladúga jerésibirubei le uágubei laríñaga Búngiu luágu líchugubei lan jun.

⁶ Fuleiseiwatün jugúya le weíribei jabúseerun lúaradagun jabágaridun, ladúga líderagubadün Búngiu lun jadúgüni.

⁷ Fuleiseiwatün jugúya le gudémejabubei, ladúga gudémebadün gíñe lun Búngiu.

⁸ Fuleiseiwatün jugúya le jarúmabei anígi, ladúga jaríjubei Búngiu.

⁹ Fuleiseiwatün jugúya le áfaagubei lun jámalijan sun cátei, ladúga lagúarubadün Búngiu queísi lirájüñü.

¹⁰ Fuleiseiwatün jugúya le asúfurirubei eíbaajóuni luágu lúaragun jibágarí, ladúga jebéluruba lídoun larúeijan Búngiu siélu.

¹¹ Fuleiseiwatün dan le janábagunün gürígia, eíbaaja jamaún, aríñaga jagía sun luwúyeri iyéeni juágu, nueígiñe. ¹² Gúndaañu jumá, ladúga jerésibiruba ában oúnwenbun fáyeiti siélu, ítara líñá meja gíñe jeibaa-jóuniwa profétagu ja ñúbinbaña jubáragiñe.

Ítara jíña queísi sálu lúma lámpu lun ubou

(Mr 9.50; Lc 14.34-35)

¹³ Ába lasígirun Jesúsu aríñaga.

—Ítara jíña quei sálu joun lílana ubou le lun jeréderuniña lueí jagádeirun, ánjein leféridira sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadúgüraguni gürígia.

¹⁴ Ítara jíña quei lámpu joun lílana ubou le. Ában ubúrugu le luáguti ában wúbü siñáti larámudagun, furáanguti larijóuniwa. ¹⁵ Mebedúnti gíñe ában lámpu lun líchugúniwa tábugiñe ában gáfu, luágu dábula líchugúya lun larúgoungadágüdün jáu sun ja múnadabaña. ¹⁶ Ítara jumá gíñe, durúnguagüda jumeí jilámpun jádan gürígia, lun dánme lan jaríjini buíti le jadúgübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷ Marítagua jumátia luágu niábiña lan agídareililúrudun Moisés, ni le jarúfudajabei profétagu, máma niábiña agídareí, niábiña arúfudei líla le tímatimaati. ¹⁸ Ninárün lubeíti jáu luágu níjeingua rügáali ligía lan siélu lúma ubou, magídarúnwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹ Ligía, le lubeí íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadúgüni líbe le ladúgübei, ñúraüraübei lanügúniwa yágüta siélu lídan larúeijan Búngiu. Ánjeinti le ñúdünbei láu sún buri gumádi lídan lúaragun, ítara gíñe larúfudajan, weíribei lanügúniwa yágüta siélu. ²⁰ Naríñajare jun luágu ánjein lan mabuídun ligáburí jóuserun sarágu weíyaasu jaweí arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi

(Lc 12.57-59)

²¹ Agáamba jumáali luágu aríñawagúya lán meja joun binádu jagúbürigu lun máfarajan jamá, ladúga furúmiegurügü lan le áfarajati, lagúseragüdúwaba.

²² Wel, naríñajare jun luágu furúmiegurügü lan le agáñiduti lúma gürígia líledi lagúseragüdúwaba. Le anábuti gürígia líledi lagúseragüdúbei luweírín-ágei lúrudu, le aríñaguti lun gürígia líledi, “íbidiougua táu”, luáguñein úma lun máfiougatin. ²³ Ítara líña lubeíti, ánjein banúga bedéweejan luágun lání Búngiu latárü, báu ñi ába barítaguni luágu níjein lan cátei lídan furúmiegurügü gürígia bubá, ²⁴ ígirabeí le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárígiñemeti, gayáraajalime bagíribudun luágun latárü íchigei bedéweejan.

²⁵ Ánjein abúseera ában gürígia lanügünibu ligíbugiñoun lúrudu, belúba lídoun úarani lúma luágu jeíbuguniwagu lueí ledéregerunibu lun agúseragüdüti, ledéregerabume agúseragüdüti lun polisía, ábame badaürün. ²⁶ Ninárün báu, máfuridunbadibu ñígiñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷ Agáambaadün luágu aríñawagúya lán meja. “Magámarida jumá jámari ámu, adultériu líra.” ²⁸ Áu naríñajare jun luágu furúmiegurügü lan le awámadirutu ában wúri, adúgaali adultériu túma tídan lanígi.

²⁹ Ánjabu lubeíti lafígoungüda bágu le lueígiñebei bouñwenren, sagábei, fíbei díse, buítimaati lun beféridirun ában lídaangiñe umégeguni le buágubei sügú láu bídin láu sun búgubu máfiougatin. ³⁰ Ánjein bújabu lubeí le bouñwenren afígoungüdubadibu, düürübei, fíbei díse, buítimaati lun leféridirün ában lídaangiñe umégeguni le buágubei sügú láu bídin láu sun búgubu máfiougatin.

Larúfudajan Jesúsu luágu ígiraguni

(Mt 19.9; Mr 10.11-12; Lc 16.18)

³¹ Aríñawagúati meja gíñe luágu furúmiegurügü lan le ígirutu lúmari lúnti líchugun gárada lánina ígiraguni tun. ³² Áu naríñajare jun luágu furúmiegurügü lan wügúri ígirutu lúmari, ánjein máma lubeí ladúga tagámaridun ligíbuagun, ába taganoún lúma ámu wügúri, adúgagüda lumútu furúmiñeti wügúri adultériu. Le gíñe agámaridutu wúri ígiraguaaru ladúgüña gíñe adultériu.

Larúfudajan Jesúsu luágu áfiñuruni

³³ Agáambaadün gíñe luágu aríñawagúya lán meja joun binádu agúbürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴ Áu naríñajare jun luágu moún lumuti lan jáfiñurun ni ca uágu—ni luágu siélu ladúga ñi lan lañúura Búngiu, ³⁵ ni luágu múa ladúga ñi lan líchigei Búngiu lugúdi, ni luágu Jerusalén ladúga ligía lubúrugutebei Warúeite

Búngiu le weírigubei, ³⁶ ni luágu jichúgü ladúga siñáti ni jájarudagüdüni ni jáuridagüdüni ában idiburi.

³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmagiñeti Máfia.

Larúfudajan Jesúsu luágu láguyugüdüniwa wuríbani (Lc 6.29-30)

³⁸ Agáambaadün luágu aríñawagúa lán meja. “Águu luágu águu, ári luágu ári.” ³⁹ Áu naríñajare jun lun máguyugüdüni jumá wuríbani luágu wuríbani, lubáragiñe líra, ánjein íchiga mútu agúfudein luágu ában louba jigíbu, rúya jumeí le ában oubaü lun. ⁴⁰ Le áluguti lanúgünün ligíbugiñoun lúruđu tueígiñe jisímisin, ígira jumeí lun gíñe lanúgünün jabíte. ⁴¹ Ánjaün lafósura ában gürígia lun janúgünün ában anúgünün ában máili, barújumei bián máili. ⁴² Furúmieguarügü le amúriajati ában cátei júma, rújumei lun, míchiga jumeí gíñe janágan luágun le afúredeijati júma.

Ísiñejabuni joun áganiñu (Lc 6.27-28, 32-36)

⁴³ Agáambaadün gíñe luágu aríñawagúa lán meja. “Jínsiñelá bumáda bun, liyéreegudame bágani bun.” ⁴⁴ Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabei jayúmajan jubá, adúga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei ouserunün. ⁴⁵ Ítara lúba jagáburiduña lan queísi lirájüñü Júguchi Búngiu le siélubei, ligía óunaja lumúti wéyu joun buítiña jáma wuríbatiña, óunajaleí júya dándu joun múaraantiña queísi joun úaratiña. ⁴⁶ Ánjein já rügúbaña lubeí jínsiñejabúbaña jun ínsiñe-da jun, ¿cábaga fáyeiti jerésibira luágu líra? Adúga jamúti gíñe ja agúburajabalin liseínsuna gumádi ítara. ⁴⁷ Ánjein jóun rügúñein lubeí jumádagu jayoúragua, ¿ca buíti jadúgübei láu líra? Íbini ja ibídiñejabúbaña lun Búngiu adúga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

Larúfudajan Jesúsu luágu ladügün cátei buíti

6 Ába lasígirun Jesúsu arúfudaja joun gürígia wúbüwaügügiñe, laríñaga.
—Toúnigi jumá lueí jadúgün cátei buíti jagíbugiñe gürígia lúnrügu jaríjinün. Ánjein jadúga ítara, míchubei Júguchi Búngiu le siélubei fáyeiti buíti jun. ² Ligía, dánme lubeí jíderagun ában gudémeti, masúbudiragüda jumeí lun sun ubou quei jadúga ja biánguabaña igíbu ligílisirugu lúma úmadarugu. Jagía, jadúgüni líra lúnrügu jadímurejan gürígia buídu jawágu. Ninárün jáu luágu láu lan jadúgüni líra, ibíja jamáali jafáyeiruája. ³ Dan le jíchugun ában cátei lun gudémeti, masúbudiraleí ni lubuídun-ágei jumáda, ⁴ adúga jumeí lábugiñe libídiñewa. Júguchi Búngiu le aríjubalin le jadúgübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburi ayúmuraguni lun Búngiu (Lc 11.2-4)

⁵ Dan gíñe le jayúmuragun lun Búngiu, mítaran jumá quei ja biánguabaña igíbu ja jínsiñebei joun lun jayúmuragun rára tídan jalígilisin juríu lúma lídan legéyedun úma lun jaríjiniña gürígia. Ninárün jáu luágu láu lan jadúgüni líra ibíja jamáali jafáyeiruája. ⁶ Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjubalin le jadúgübei lídan límanin, líchuguba jafáyeiruája. ⁷ Lídan le jayúmuragun, máguyuguagüda jumá luágu dimúrei le málati quei jadúga ja ibídiñejabúbaña lun Búngiu, jarítaguatiñati luágu lagáambúbaña lan Búngiu ladúga líbe jadímurejan. ⁸ Mítaran jumá lubeíti quei jagía, ladúga lubáragiñe jayúmuragun lun Búngiu subúdi láali ca lan jabúseerubei. ⁹ Ítara lúba lubeíti jayúmuragun.

Wáguchi Búngiu le siélubei, inébewalá bíri. ¹⁰ Núbinlá bidáani lun barúeijan ya ubouágu, adúgüwalá bugúndan ubouágu quei ladúgüniwa bugúndan siélu. ¹¹ Rúba fein buídurügütu woun lun wéyu le ugúñebei, ¹² ferúdnabeí wuríbati le adúga wamáalibeí quei ferúdna wamániña ja adúgübaña wuríbati woun. ¹³ Mígira báwa lun wáburujan lídoun wuríbani, dísegúdarügü báwa lueí, ladúga amúrú le arúeijabei, amúrú le Súntibeí Gabáfu, amúrú le weírigubei lun sun dan. Ítaralá. ¹⁴ Ítara líña lubeíti, ánjaña ferúdna jumá ámu luágu wuríbati le adúga jamáalibeí jun, ferúdna lubádün gíñe Júguchi Búngiu le siélubei, ¹⁵ ánjein úa ferúdna jumá ámu, úabei gíñe ferúdna láani Júguchi Búngiu jífígoun.

Larúfudajan Jesúsu luágu ayúnaruni

¹⁶ Ába laríñagun Jesúsu.
—Jugúya, dánme le jayúnarun, marúfuda jumá lírun igíbu quei jadúga biángua tigíbu, jagía jadúgünbalin ítara lun jaríjini gürígia luágu jayúnaruña lan. Ninárün jáu luágu láu lan jadúgüni líra ibíja jamáali jafáyeiruája. ¹⁷ Ánjein jugúya, dan le jayúnarun, amúriga jumeí jídihuri, chibá jumeíme jigíbu, ¹⁸ meféen jamámuga gürígia luágu jayúnaruña lan. Júguchirügúba Búngiu le júmabei ñi geféen luágu jayúnaruña lan, ábameti líchugun jafáyeiruája.

Írisini siélu (Lc 12.33-34)

¹⁹ Moúndaragua jumá írisini ya ubouágu le ñí lubei gayára lan jájüchün jamútiri áni gayára ligía lagájüdüni ámu luwúyeri írisini, le gíñe ñíjin lubeí gayára lan jebélorun jíwerutiña lun jíwerujan. ²⁰ Oúndaragua jumá írisini siélu, le ñí lubei siñá lan jájüchün jamútiri,

magájüdadi ni cáta, mebélú jagía jíwerutiña íweruja ñi.
²¹ Le ñí lumuti jírísín, ñíñoun gíñe janígi.

Lilámpun úgubu (Lc 11.34-36)

²² Ítara líña bágu quei ában lámpu lun búgubu, án-
 jein lubeíti buídu lubeí bágu, aríja ligía luágún irísini
 siélu, camá jamuga jarúgoungabei gíñe láu sun
 búgubu, áni buídubei gíñe sun bigáburi. ²³ Ánjein sán-
 di lubeí bágu, aríja ligía luágún irísini ya ubouágu,
 camá jamuga lídaanbei lubúriga sun búgubu, áni
 wuríbabei gíñe bigáburi. Ánjein ñúbin larúgounga le
 bídaanbei lun lubúrigame, ¡luweírín méfuna líwurín
 lubúriga ligía!

Búngiu lúma seínsu (Lc 16.13)

²⁴ Úati ni ában gayáraati lesériwidun joun biáma
 iyúbudirigu, ladúga lísiñeduba ában jádaangiñe lun,
 liyéreegudáme le ában lun, úaraguabei lúma ában já-
 daangiñe, líchigame mebéreseni luágu le ában. Siñáti
 lesériwidúniwa lun Búngiu lúma lun seínsu.

Toúnigi lumútiña Búngiu lirájüñü (Lc 12.22-31)

²⁵ Naríñajare lubeíti jun, madíjeri jumá luágu cába
 lan jeíga o cába lan játa lun jabágaridun, ni tuágu
 anáanguni to lúnboun jadáürunun. ¿Máfunagi
 gebégitimaati ibágari sügú láu eígini, gebégi úgubu
 sügú táu anáanguni? ²⁶ Aríja jumá joun dunúru ja ája-
 majabaña garábalirugu. mábunagun jáña, malúbajan,
 mareídun jameí alúbajani lídan lágei, láu sun líra, rúti
 Júguchi le siélubei eígini joun. ¡Sarágu gebégitima
 jumá sügú jáu dunúru! ²⁷ ¿Cáteigi jídaangiñe
 gayáraabei líchugun bián ugúdi lánwoun lúgubu, ca
 lan lanárimebei láfaagun luágu?

²⁸ ¿Ca uágu jadíjerida tuágu anáanguni? Aríja jumá
 ída líña lan laweínamudun fulúri. láu sun mawádigi-
 mari lan, madúgün ligía gamísa, ²⁹ ni méja urúei Sa-
 lomón láu sun luwéndegun, mawéndentí meja
 ladáüragun quei fulúri. ³⁰ Ánjeinti daúguagüda lubálin
 Búngiu jídurú ítara le ugúñebei lájücha, jarúgabei
 yebe lagudúña, ¿gúbumésan líderaguajün lougua
 tafíñen jugúya le? ³¹ Madíjerida jumá lubeíti aríñaga.
 “¿Cába weíga?” o “¿Cába wáta?” o “¿Cába wadáura?”
³² Gürígia ja lánigu ubou le, luágu rügúñeín buri cátei
 le jarítagua, ánjein jugúya, níjein júguchi Búngiu siélu
 le subúdirububei cátei lan jemégeirubei. ³³ Seríwi jumá
 lun Búngiu furúmiñe, áluaja jumeí ibágari surúti le
 áubei lagúndaara, ábame líchuguni sun le
 jemégeirubei jun. ³⁴ Madíjerida jumá lubeíti luágu jarú-
 ga, ladúga barú lumuti gíñe jarúga lidíjeridüna lú-
 magua. Ságü ában wéyu gíbeti cátei lun.

Míchiga jumá jadúnrun ámu (Lc 6.37-38, 41-42)

7 Ába lasígirun Jesúsu aríñaga joun gürígia
 wúbüwaügügiñe.

—Míchiga jumá jadúnrun ámu, míchugun lámuga
 gíñe Búngiu jidúnrun, ² ladúga quei ligáburi jíchugun
 jadúnrun ámu, ítara lúba gíñe líchugun Búngiu jidún-
 run, le áubei jamísuraja, láuba gíñe lamísurajaün
 Búngiu. ³ ¿Ída lubásan gayára lan jaríjini liraúraü ífei le
 lídaanbei lágu jamúlen áni masándi jumúti durúsu le
 lídaanbei jágu? ⁴ ¿O ída lúba gayára lan jaríñagun lun
 jamúlen. “Sagáneí liraúraü ífei le lídaanbei bágu,” áni
 níjein ában durúsu lídan jágu? ⁵ ¡Biángua tigíbu jugúya
 le! Sagájumei durúsu le lídaanbei jágu furúmiñe, ítara
 lúba gayára lan jaríjin buídu lun jaságaruni liraúraü ífei
 le lídaanbei lágu jamúlen.

⁶ Míchiga jumeí arúfudajani luáguti asálbaruni joun
 gürígia ja gáñitiña, garábagua jáñein juágún quei oún-
 li lun jágürünün. Míchiga jumeí gíñe arúfudajani ligía
 le gebégibeí sarágu joun gürígia ja búirujuduátiña,
 dügúgua jañálin.

Agáamba lumúti Búngiu wamúriajan lúma (Lc 11.9-13, 6.31)

⁷ Jamúriaja lúma Búngiu, ábame líchugun jun, jálua-
 ja, ábame jadárirun, daúnjuma luágu béna, ábame
 lánjunrenchún jun. ⁸ Ladúga le amúriajati, abíjati, le
 áluguti, daríti, le adaúnjati luágu béna, jurénwati lun.

⁹ Níjein funági ában jídaangiñe gayáraati líchugun
 ában dübü lun lisáani dan le lamúriajan fein lúma?
¹⁰ ¿o líchugun lan ában jéwe lun dan le lamúriajan údu-
 raü lúma? ¹¹ Ánjein lubeíti láu lubeí sun wuríba jumá,
 gíchigaditün cátei buíti joun jisáanigu, ¡gúbuméti líchi-
 ga Júguchi Búngiu le siélubei cátei buíti joun ja amúri-
 ajatiña lúma!

¹² Súnwandanlá lubeíti jadúgün joun ámu quei le
 jabúseerubei lun jadúgüni jun, ladúga ligía laríñagubei
 lilúrudun Moisés túma jalíburun profétagu.

Bürúraüti lubéneri siélu (Lc 13.24)

¹³ Belújuma lídaangiñe béna le bürúraübei. Béna lú-
 ma úma le anúgübei gürígia lídoun féridi, tuléburí líña,
 gabáranouga ñi, áni sarágu jáña ebélurutiña lí-
 daangiñe. ¹⁴ Ánjeinti béna lúma úma le anúgübei gürí-
 gia lídoun ibágari le magúmchaditi, bürúraü líña,
 murúgua, míbetiñati adáriruti.

Luágu cátei le wadúgübei lasúbudirúa cátawa lan (Lc 6.43-44)

¹⁵ Toúnigi jumá jaweí yéetiña ja aríñagubaña luágu
 lerérun lan Búngiu jadímureja. Jayábin jun quei
 mudún bougudigiñe jabíti, ánjein múnadagiñe, ítara
 jáña quei anímaalu gáñitiña. ¹⁶ Jugúya, gayáraabei
 jasúbudiruniña luágu le jadúgübei, malúbajountu
 beíbei lídaangiñe jíyu, ni ígo lídaangiñe guríbiyuwa.
¹⁷ Sun lubeíti wéwe le buíti, buíti lin, wéwe le wuríbati,
 wuríbati lin. ¹⁸ Wéwe le buíti, siñáti wuríba lan lin,
 wéwe le wuríbati, siñáti gíñe buídu lan lin. ¹⁹ Sun wéwe
 le mabuídunti lin, chaúnwati, ába lágudúniwa.
²⁰ Jasúbudirubaña lubeíti yéetiña jagía luágu le
 jadúgübei.

Másubaña ebélura lídoun arúejani le siélubei
(Lc 13.25-27)

²¹ ‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesúsu. ‘Ja rügúbaña adúgubalin lugúndan Nóguchi Búngiu le siélubei ebélura. ²² Dánme lachúlürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijati-wa mejátia luágu bíri, sagá wagía espíritugu wuríbatiña lídan bíri, adúga wagía sarágu miláguru lídan bíri.” ²³ Ábame naríñagun joun. “Íbídiñegubeiñadün nun, díse jumá nueí, jugúya le adúga jumáalibe le wuríbabeí.”

Jawúyeri gürígia ja agáambubalin lerérun Búngiu
(Lc 6.47-49; Mr 1.22)

²⁴ ‘Le agáambutina, adúgaleí le nubeíbei, ítara líña quei ában wügúri gunfaráandati le adúgübei lúban ligíbuagu dúbü. ²⁵ Ába liábingua júya, ába liñúrún dúna, fúgua garábali tuágun múna tugúya, meíguaduntu ladúga luáguñein lan dúbü tuágaburi. ²⁶ Ánjeinti le agáambutina, madúgün lumúti le nubeíbei, ában wügúri íbídiougua táu ligía, le ábunagubei ligíbuagu ságoun. ²⁷ Ába liábingua júya, iñúra dúna, fúgua garábali tuágun múna tugúya, ¡ma lanárime táburujan!

²⁸ Dan lásurun ladímurejan Jesúsu, ¡ma luweírín janígi gürígia láu le larúfudajabeí! ²⁹ Ladúga láu lan ubáfu larúfudaja, máma quei arúfudajatiña lilúrudun Moisés.

Lareídaguagüdüni Jesúsu ában gawáguti gumeín le mareídaguadibeí
(Mr 1.40-45; Lc 5.12-16)

8 Dan le larárirunbei Jesúsu lueígiñe wúbü, sarágu jáña gürígia afálaruti. ² Ába liábin ában wügúri gawáguti gumeín le mareídaguadibeí, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguagüdüni.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía.

⁴ Ába laríñagun Jesúsu lun.

—Maríñaga beítia ni ca un, ñúdünrügüba arúfudagua búngua lun fádiri, rúbeíme edéweejani le uágubei laríñaga Moisés, lun jaríjini gürígia luágu areídaguadibu lan.

Lareídaguagüdüni Jesúsu lumúsun ában gumándan Rómána
(Lc 7.1-10)

⁵ Dan le lebélurun Jesúsu lídoun fulásu le gíríbei Capernaúm, ába liábin ában gumándan Rómána lubároun, ⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába laríñagun Jesúsu lun.

—Neíbuga agáranija lun.

⁸ Ába louñabun gumándan.

—Nabúreme, madúnatina lun bebélurun núbiñoun, aríñagarügübeí dimúrei, ábame lareídagun numúsun.

⁹ Naríñagubaa lin líra ladúga nugúya lábugiñeñadina gíñe gumádi le íñutimaati, áni añájein gíñe súdaara lábugiñe nagúmadijan. Dan le naríñagun lun ában jádaangiñe lun lídin, ñúdünti, dan le naríñagun lun ában lun liábin, ñúbinti, dan le naríñagun lun numúsun lun ladúgün furúmieguarügü cátei, adúga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweírídun lanígi, ába laríñagun joun ja afálarubalin.

—Ninárün jáu luágu madárigidina lan wügúri weíri tafíñen ni jádan numútuniña Israelítagu quei wügúri le. ¹¹ Naríñajare jun luágu sarágujaba lan já meja íbídiñejabubaña lun Búngiu ñúbintiña lueígiñe oúbaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu. ¹² Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírín-ágei lubúriga, ábame jayájuaan, ábame lacúnrinjan jári le luweírín jagárigu.

¹³ Ába laríñagun Jesúsu lun gumándan ligía.

—Beíba búbiñoun, le uágubei baffíñera, ladügúba bun.

Ába lareídagun músu ligía lídan óra ligía.

Lareídaguagüdüni Jesúsu límenidi Pédro
(Mr 1.29-31; Lc 4.38-39)

¹⁴ Ába lídin Jesúsu lúbiñe Pédro, ába ladárirunún límenidi Pédro roun láu abíruaü. ¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun eseríwidaña.

Lareídaguagüdüni Jesúsu sarágu sánditiña
(Mr 1.32-34; Lc 4.40-41)

¹⁶ Dan le lagúñedunbei, ába janúgün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jaweí láurügü ában dimúrei, areídaguagüda láña sun ja sándibaña.

¹⁷ Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barú lumuti wadébilin, gidálei wasándigu.”

Já yebe abúseerubaña jafálaruni Jesúsu
(Lc 9.57-62)

¹⁸ Dan le laríjin Jesúsu luágu sarágu jáña lan gürígia geyégu láu, ába líchugun dimúrei lun jájñuragun ligía jáma láni disípulugu loubáfurugun dúna. ¹⁹ Ába layárafadun ában arúfudajati lilúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

²⁰ Ába loúnabuni Jesúsu.

—Darítiña gasígamu júyu lun jaganouñ ñi, gádibutiña gíñe dunúru, ánjeinti áu le Wügúri Garaúwarügüti, madáritina ni jalába lan nabálachagüdei nichúgü.

²¹ Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen núguchi, buná neíme, ábame nafálarunibu.

²² Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu.

Lagálumaruni Jesúsu garábali lúma lugúdi barána

(Mr 4.35-41; Lc 8.22-25)

²³ Ába ladinun Jesúsu tídon ugúnein, ába jóudin láni disípulugu lúma. ²⁴ Sódini ába láfuragun ában garábali jéreti, ába lebélujan lugúdi barána tídon ugúnein. Larúmuguñati Jesúsu. ²⁵ Ába jagágudajani láni disípulugu, ába jaríñagun lun.

—¡Wabúreme, séfu báwa! ¡Wadíbiragua!

²⁶ Ába loúnabuniña.

—¿Cásan uágu janúfudeda? ¡Loúgua tafíñen jugúya le!

Ába lásaarun, ába ladeínjan lun garábali lúma barána, ába lagálumadun. ²⁷ Ába laweíridun janígi, ába jaríñagun.

—¿Cáteisan wügúri le, agáamba lubálin garábali lúma barána?

Laságarun Jesúsu espíritugu wuríbatiña jádaangiñe bián wügúriña Gadárana

(Mr 5.1-20; Lc 8.26-39)

²⁸ Dan le lachúlürün Jesúsu loubáfurugu dúna, jageíroun Gadárana, ába jáfuridun bián wügúriña lídaangiñe buri umúajaü achigíti luágu dúbü, ába jayábin luágun. Biángubei jagía, jáuñanu espíritugu wuríbatiña áni janárimetiti jagáñi darí lun siñá lan jásügürün gürigia lídaangiñe úma ligía. ²⁹ Ábati jagúarajan ítara.

—¿Cásan uágu bemétera wámoun, Jesúsu Liraú Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰ Níñanu sarágu búruju eíga madíse nígiñe, ³¹ ába jayúmuragun espíritugu wuríbatiña ja lun Jesúsu, jaríñaga lun.

—Ánjawa baságara, ígirabá lun webélurun jádoun búruju ja.

³² Ába laríñagun Jesúsu joun.

—¡Jeíbati jádoun!

Ába jáfuridun espíritugu wuríbatiña jagía jádaangiñe wügúriña jagía, ába jebélurun jádoun búruju, ába jáguragun búruju jagía jóungua luegiñe ában gudúungu, ába jáburujan dúnarugun, ába jañáradagun.

³³ Ába janúfudedagun ja ónigirubaliña búruju, ába jeíbaagun, jachúlün aúdübü, ába jabájüdaguni le asúseredubei joun búruju lúma joun wügúriña jábuga jáubaña espíritugu wuríbatiña. ³⁴ Ábati jayábin

sun lílana fulásu ligía lúmoun Jesúsu, ába jayúmurgun lun lun láfuridun jageíragiñe.

Lareídaguagüdün Jesúsu ában wügúri derégüdaali

(Mr 2.1-12; Lc 5.17-26)

⁹ Ábati ladinun Jesúsu tídon ugúnein tugúya, ába lánjiñuragun loubáfurugun dúna, ába lachúlürün lageíroun. ² Ába janúgün ában wügúri derégüdaali lun, roun tídan lubárari. Dan le laríjinbalin Jesúsu luweírin jafíñen, ába laríñagun lun sánditi ligía.

—Ragúba gurásu, niraú, ferúduawati bifígoun.

³ Níñanuti jádaangiñe arúfudajatiña lilúrudun Moisés, aríñagutiña jóunguarügü. “Lanábaguñeigan wügúri le Búngiu láu dimúrei le laríñagubei.” ⁴ Queíti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? ⁵ ¿Cátimasan ménreengúnbei laríñawagúniwa. “Ferúduawati bifígoun”, ódi “Sarába, beíbuga”? ⁶ Narúfu-daaliti jun luágu gabáfu nan, áu le Wügúri Garaúwarügüti, lun ferúduna nan figoú.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun. ⁸ Dan le jaríjinbaalin gürigia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügúriña.

Lagúarun Jesúsu lun Matéo lun lánime disípulu

(Mr 2.13-17; Lc 5.27-32)

⁹ Ába lídin Jesúsu nígiñe, ába laríjinina, áu le gírubei Matéo, le abúrújabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu nígiñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰ Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafígountiña eíga lúma úara jáma láni disípulugu. ¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

—¿Ída liñásan leíginbei jumáesturun jáma agúbura-jatiña liseínsuna gumádi lúma jáma ámu gafígountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia. ¹³ Furéndeí jumeíca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdün anímaalu nun.” Máma niábiña álujaña ja magádiebaña ligíbugiñe Búngiu, niábiña álujaña gafígountiña lun jasáansiruni ligáburu jóuserun.

Jálügüdüni Jesúsu libúgürü ayúnaruni

(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdajabei disípulugu, ába jaríñagun lun Jesúsu.

—¿Ánsan wagía jáma fariséogu ayúnara wabei sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larúfudajan lúma binádu, laríñaga.

—¿Gayáraati funági jírúñu jamá ja amísurajoubaña lídoun ában mariei dan le niján lan adári jáma ñi? Lachúlürüba wéyu lun lúadun adári jáma, ligíaalime jayúnarun.

¹⁶ Siñáti táfadajoún gamísa ñulújaru táu murúsun to derégiru ladúga dánme le tacháwaragun to deré-giruboun ábame tajeíridagun to ñulújaruboun, ába-timámeti laweíridun jeíríti. ¹⁷ Siñáti gíñe léserúniwa bínu le isérigili lídoun guéru le binádujali, ánjein adúgúwa ítara, ábame lafaúnchün guéru dánme le liñúrun bínu, féridiwa ligíameti guéru, féridiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraú Jáiro túma wúri to agúurubarun lanáangun Jesú- SU

(Mr 5.21-43; Lc 8.40-56)

¹⁸ Dan ñíñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñúdün lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu. ²⁰ Ñíñounti ában wúri úmada sánditu, dúusu irúmu táu láu lésejan jítaü tídaangiñe, ába tayárafadun lun Jesúsu lanágangiñe, ába tagúurun luágu táru lanáangun, ²¹ taríñaga túnguarügü. “Láurügü nagúurun tuágu lanáangun nareídaguba.”

²² Ába lagáragun Jesúsu, ába laríjinun, ába laríñagun tun.

—Ragúba gurásu niraú, areídaguaadibu ladúga bafíñen.

Lúmagiñe óra ligía ába tareídagun.

²³ Dan le lachúlürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábunajani, añája gürígia areíncha, ²⁴ ába laríñagun joun.

—Furíjuma yágiñe, moúnwengiru irájü to, tarú-muguña.

Ába jéjerajan láu. ²⁵ Dan le furígüda láaña sun gürí-gia, ába lebélorun, ába lárügüdüni tújabu irájü tugúya, ába tásaarun. ²⁶ Ába labúruchagun luágu le asúsere-dubei lídan sun fulásu ligía.

Lareídagugüdüni Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügüríña maríjintiña lárígi, agúarajeina ítara.

—¡Gudéme wamá bun, amúrü le ladúgawagun David!

²⁸ Dan lebélorun Jesúsu múnadoun, ába jachúlürün maríjintiña jagía lúmoun, ába laríñagun joun.

—¿Afíñetün luágu gayára lan nareídagugüdüni? Ába jaríñagun.

—Ánja, afíñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburi jafíñen.

³⁰ Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹ Quei jáfuridun ñígiñe, ába jabájüdaguni le ladúgübei Jesúsu lídan sun fulásu geyégua láu.

Lareídagugüdüni Jesúsu ában meréngaditi

³² Dan le áfurideina jamá, ligía jayábin fiú gürígia láu ában wügürí meréngaditi, gawáguti ában espíritu wuríbati, ába jayábin láu lun Jesúsu. ³³ Lárígiñe lasá-garuni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janí-gi gürígia, ába jaríñagun.

—Maríjinañajágiwiwa líbe le jageíra Israelítagu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritu gawáguti wuríbatiña laságaja Jesúsu espíritu gawáguti wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalígílin juríu, apúrichijeí ugánu buíti luáguti arúejani le lánina síelu, areídagugüdeina sun luwúyeri sándi lúma gáriti. ³⁶ Dan laríjiniña gürígia, ába jagúdemedagun lun, ladúga nidíjeri jamá, magúraa-sun jagía, camá mudún ja moúniritiña. ³⁷ Ába laríñagun joun láni disípulugu jabúgürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni loúguatiña ñadágimeintiña. ³⁸ Lúnti lubeíti jamúri-ajan lúma Labúreme nádü lun loúnajan ñadágimeintiña lun japúrichijan joun.

Láni Jesúsu dúusu disípulugu

(Mr 3.13-19; Lc 6.12-16)

10 Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritu gawáguti wuríbatiña jaweí gürígia lúma lun jareídagugüdüni sun luwúyeri sándi lúma gáriti. ² Niján jírí dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³ Felípe, Bartolomé, Tomás, núma, áu Matéo le agúburajabeí meja liseínsuna gumádi, Jacóbo le liraú Álfeo, Lébeo, le méme gíribei Tadéo, ⁴ Simón—ában meja wügürí áfaaguti lun jawáanserun juríu, lúma Júdas Is-caríóte, le alúgurubalin Jesúsu.

Loúnajaniña Jesúsu disípulugu apúrichija

(Mr 6.7-13; Lc 9.1-6)

⁵ Dan loúnajabaliña Jesúsu dúusu ja apúrichija, ába laríñagun joun ítara.

—Mídin jumá le ñí jamuti ja mámabaña juríu, mebélú jugúyame lídoun buri fulásu le láni Samária, ⁶ jabúgürülá gürígia féridijaña ja Israelítagu jídin. ⁷ Jeí-ba, apúrichijeina luágu yaráfali lan larúejan Búngiu.

⁸ Areídagugüda jumáña ja gawágutiña gumeín luágu

jára, jáma ja gawágutiña ámu luwúyeri sándi, sarágü-da jumá jiláaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹Manúga jumá seínsu, ¹⁰manúgün jugúyame lágei ni cáta. Ábanrügütá simísí janúga, manúgün jugúyame sabádu ni bádun, ladúga le ñadágimeinbei garíchati lun leigin lídaangiñe luwádigimari.

¹¹Dánme le jachúlürün lídoun ában ubúru o ában lan liraúraü fulásu, ábame jálugun gürígia ja ánjatiña lun jerésibirunün ñi, ábame jeréderun jáma jábiñe darí jídin. ¹²Dánme jebélurun tídoun ában múna, ábame jabúsurun, ayúmuragueina magádiei jawágu tílana múna tugúya. ¹³Ánjaün jerésibira tílana múna tugúya, ígira jumeí jabúsurun jáma, ánjaün merésibirun jamá, giríbugüda jumeí busúguaü ligía lun úa lan magádiei joun. ¹⁴Ánjaüti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuridun calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun joúngua. ¹⁵Ninárün jáu luágu dánme lan le lachúlürün wéyu lánina agúseruni, weiritimaabei jasúfurirun lílana fulásu ligía sügú láu jasúfurirun lílana Sodóma lúma Gomórra.

Élbaajoúni le lúnbei jasúfuriruni láni Jesúsu disípulugu

¹⁶Noúnajaadüntia quei mudún jagánaguóun aní-maalu gáñitiña. Aráanseñu jumá lubeíti ítara quei jéwe, áni ítara jumá quei únjun madúgünga wuríbani.

¹⁷Toúnigi jumá ladúga j juríu. ¹⁸Janügúwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámabaña juríu. ¹⁹Dánme le jederegerúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladúga dánme lachúlürün óra lun jadímurejan, líchugubei Búngiu le lúnbei jaríñaguni jun. ²⁰Mámaba jugúya adímureja, láni Jóguchi Búngiu Espíritu, ligíaba adímureja jídaangiñe.

²¹Jalúgurubaña wügúriña jabíriña guánarü lun jafarún jilágubei, alúgura jamáñame agúbürigu jasáanigu, garábagua jagíame isáanigu jawágun jagúbürigu lun jáfaragüdüniña. ²²Jeyéregudúba lun sun ubou nueígiñe, áni le derégüdaguati darí lúmoun lagúmunchun libágari, lebéuruba siélun. ²³Dánme le jeíbaajoún lídan ában fulásu, ábame janúrajan lídoun ámu, ninárün jáu, niábinyaba, áu le Wügúri Garaúwarügüti, lubáragiñe jeíbuguni sún buri jabúrugute Israelítagu.

²⁴Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun.

²⁵Lúnti gúndan lan disípulu láu lachúlürün ítarada quei lumáesturun, lúma músu quei liyúbudiri. Ánjein aríñawagúa lubeí nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc 12.2-9)

²⁶'Ligía manúfudeda jumá lubeí jaweí gürígia,' líña Jesúsu joun láni disípulugu lubáragiñe loúnajaniña apúrichija. 'Úati cáte darúguati láu lun machúlaagun-bei lan, úa ni cáta le arámudagúati lun masúbudirún-wabei lan. ²⁷Le naríñagubei jun lídan lubúriga aríñaga jumeí lídan larúgounga, le naríñagubei jun ibídiñoun joun ámu, wágua jumeí íñugiñe tibíti múna. ²⁸Manúfudeda jumá jaweí ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

²⁹'¿Malúgurúntiña funági bián jarájüñü dunúru luágu ában liraúraü seínsu? Áni máburujantu ni ában jádaangiñe múarugun ánjein mabúseerun lubeí Jóguchi Búngiu. ³⁰Ásta ídiburi le jábulugubei, abájüdüwati ában ában. ³¹Manúfude jumá lubeíti, gebégitün sügú jáu dunúru.

Ja mayéedagúnbaña láu Jesúsu jagíbugiñe gürígia

(Lc 12.8-9)

³²'Sun ja arúfudagutiña joúngua jagíbugiñe gürígia luágu númagiñeñánu lan, naríñaguba gíñe ligíbugiñe Nóguchi Búngiu le siélubei luágu nánigu jamá. ³³Ja ayéedagutiña náu jagíbugiñe gürígia, nayéedaguba gíñe jáu ligíbugiñe Nóguchi Búngiu le siélubei.

Le busénbei lun lafálaruni Jesúsu

(Lc 12.51-53, 14.26-27)

³⁴'Marítagua jumátia luágu niábiña lan lúnrügü níchugun gáluma ubouágu, máma niábiña íchiga gáluma, niábiña íchiga wuríbu. ³⁵Láu niábin, jafánreinraguba ja mafíñebaña nuágu jáma ja afíñebaña nuágu, lawúribujaba wügúri lúma lóguchi, isáani túma túguchu, ídiñu túma tágürü, ³⁶lagáganiraguba cáda ában jáma lidújeñu.

³⁷'Le jínsiñejabuti lun lóguchi o lóguchu sügú láu nísíñe lun, madúna lumúti nánigu lan, le jínsiñejabuti joun lirájüñü sügú láu nísíñe lun, madúna lumúti gíñe nánigu lan. ³⁸Le mawándunti asúfuriruni líbe lasúfurirúniwa luágu gurúwa lun lafálarunina, madúna lumúti nánigu lan. ³⁹Le busénbei leséfuragun lúngua ya ubouágu leféridirubei ibágari le magúmuchadibi siélu, ánjein le ánjabei leféridiragun lúngua ya ubouágu nueígiñe, libíjubei ibágari magúmuchaditi siélu.

Ja lúnbaña jerésibiruni jafáyeiruaaja lúmagiñe Búngiu

(Mr 9.41)

⁴⁰'Le erésibirutün resíbi lumútiña, le erésibirutina resíbi lumúti le oúnajabalina. ⁴¹Le erésibiruti ában proféta ladúga liábin láu líri Búngiu, lerésibirubei afáyeiruaaja le libíjubei ában proféta, le erésibiruti ában wügúri buíti ladúga lubuídun, lerésibirubei afáyeiruaaja le lerésibirubei ában wügúri buíti.

⁴²Furúmieguarügü le íchuguti ában wéru dúna dilíti

lun ában jádaangiñe únabugutiña ja ladúga nánigu jamá, libíjuba lafáyeirua ja lúmagiñe Búngiu.

Ja loúnajabaña Juan le abásteragüdajabei adímureja lúma Jesúsu
(Lc 7.18-35)

11 Dan le lásurunbei laríñaguni Jesúsu le lúnbei jadúgüni láni disípulugu, ába lídin nígiñe lun larúfudajan, apúrichija ligíame lídan buri fulásu geyégua láu ubúrugu le Capernaúm.

² Dan ligía, furísunruguñein Juan, ába lagáambun luágu sun le ladúgübei Crístu. ³ Ába loúnajan biáma jádaangiñe láni disípulugu aríjei Jesúsu lun jálügüdüni ítara.

—¿Amúrü Crístubei le lúnbei liábin ódi lúnti wagúraban ámu?

⁴ Ába laríñagun Jesúsu joun.

—Jeíba jaríñageime le jaríjubei lúma le jagáambubei lun Juan. ⁵ Jabájüdagúame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoúa luágu ugánu buíti le lánina asábaruni joun gudémetiña. ⁶ Áni fuleiseiwati le meféridirunbalin lafíñen nuágu.

⁷ Dan le jóudin, ába lagúmeserun Jesúsu adímureja joun gürígia luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügúri le medéraaguagüdünti larítagan queísi ában mabúru le lánjingichun garábalí?

⁸ Ánjein máma lubei líña, ¿cáti jídinbei aríja? ¿Ában wügúri wéndeti ladáüragun? Subúsi jun luágu ja lan wéndeabaña adáüragun, tídaañanu lan jában urúeigu.

⁹ ¿Cáteiti jídinbei aríja? ¿Ában proféta? Ánja, ligía, áni ában wügúri weíriguti sügú láu ában proféta Juan.

¹⁰ Ligía le uágubei taríñaga Lerérun Búngiu.

Noúnajañein noúnagüle bubáragiñe, lun laráansejani úma bubá.

¹¹ Ninárün jáu, jádan sun gürígia, úagili ni ában weíriguti lueí Juan le abásteragüdajabei, láu sun líra, le únabutimaabei lídan arúejani le siélubei weírítimaati lueí le anúgarügübalin ugánu luágu arúejani ligía.

¹² Lúmagiñe dan le liábinbei Juan le abásteragüdajabei darí lúmoun dan le, murúgu jáña gürígia áluga jebélurun lídoun larúeijan Búngiu. Ja ebélurubaña, ragú jamuti jabára ñi queísi ában cátei le gebégiti sarágu. ¹³ Lílurudun Moisés jáma sun profétagu, adímurejatiñá meja luágu larúeijan Búngiu, láu liábin Juan, ába lagúmeserun jerérun profétagu jagía luágu larúeijan Búngiu agúnfulira. ¹⁴ Ánjeinti busén jubei jafíñerun, Juan ligía proféta Elías lé meja lúnbei liábin lubáragiñe liábin arúejani ligía. ¹⁵ Ja garígeirugubaña lun jagáambun, agáamba jamá.

¹⁶ ¿Cábasan úma núradaguágüdaña gürígia ja lánina dan le? Magúndaatiña ni ca áu, ítara jáña quei irájüñü ja añúrubaña adíbirija mágidirugu, ába jagúarajan joun jibirigu ítara. ¹⁷ “Íñaajatiwa fídu jun, mabínajantün, erémuja wagía urému jírtu jun,

mayájuntün.” ¹⁸ Ladúga liábin Juan meígin líña buídu quei leígin furúmieguarügü, mátun, ába jaríñagun luágu níjein lan espíritu wuríbati lídan. ¹⁹ Lárígiñe, ába niábin, áu le Wügúri Garaúwarügüti, jou áu quei leígin furúmieguarügü, gurá, ába jaríñagun luágu geígadi nan, gátadi, jamáda áu gafígountiña jáma agúbura-jatiña liseínsuna gumádi. Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Lílana buri fulásu ja magáambadibaña
(Lc 10.13-15)

²⁰ Ábati lagúmeserun Jesúsu adeínja joun gürígia lídan fulásu buri le ñi lubei meja ladúgei líbe-ágei láni miláguru, ladúga masáansirun jamágili lan jóuserun. Ába laríñagun.

²¹ —¿Fugíabu jugúya Corazínna! ¿Fugíabu jugúya Bet-sáidana! Lun jamúga lídan lan ubúrugu le gíribei Tíro lúma Sidón ladúgüwa miláguru buri le adúgübei jagánagua, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi. ²² Naríñajare jun luágu dánme lan lachúlürün wéyu lánina agúseraguni, weírítimaabei jabeichún sügú jáu ja Tírobaña jáma ja Sidónbaña. ²³ Amúrüti ubúrugu le Capernaúm, ¿jarítaguatibu luágu weírígubadibu lan queísi siélu? Maweírígünbadibu ítara quei maweírígün lan máfiougati. Ladúga lun jamúga lídan lan ubúrugu Sodóma ladúgüwa miláguru le adúgübei bídan, níjeingua jamúga fulásu ligía lúmoun dan le. ²⁴ Naríñajare jun luágu lídan lánme wéyu lánina agúseraguni, weírítimaabei jabeichún sügú jáu Sodómana.

Jigoúgu lun Jesúsu, eméraagua jumámuga
(Lc 10.21-22)

²⁵ Lídan dan ligía, ába laríñagun Jesúsu lun Búngiu.

—Adímurejatina buíti buágu, Nóguchi le Labúremebei siélu lúma uboú, ladúga barámuduni buri cátei le jawéi chu táu jáma gunfaráandatiña, ába barúfuduni joun ja mafúnrendeirungiñabaña queísi irájüñü. ²⁶ Ánja, Nóguchi, ladúga ítara líña lan babúseeruni.

²⁷ ‘Derége láali Nóguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni.

²⁸ Jigoúgu númoun, sun jugúya ja bucháañabaña uágu lárígi juwádigimari lúma lijürü janúgün, eméraaguagüda námugaün. ²⁹ Resíbi jumeí narúfudajan, furéndei jugúyame númagiñe, láu gagúraasun nan, ñulú tugúya nanígi, ábame jadárirun eméraaguni tun juwáni. ³⁰ Ménreengunti lun jesériwidun nun, juáliti gíñe anúgüni le níchugubei jun lun janúgüni.

Játünjan disípulugu túrígu lídan wéyu le eméraaguagülei
(Mr 2.23-28; Lc 6.1-5)

12 Luágu ában wéyu le eméraaguagülei eíbugeina líña Jesúsu jáma láni disípulugu labádinagua

nádü. Ába jalámachun láni disípulugu, ába jätünjan lílewe türígu, ába jeígini líla. ² Dan le jaríjini fariséogu cátei le, ába jaríñagun lun Jesúsu.

—Añájata báni disípulugu adúga wadágimanu le moún lumuti ladügún lídan wéyu le eméraaguagülei.

³ Ába laríñagun joun.

—¿Malíjangidün luágu lé meja ladügübei David luágu ában dan, dan le lálámachunbei, ligía jáma ja úarabaña lúma? ⁴ Ába lebélorun tídon lúban Búngiu, ába leígin tídaangiñe fein to sagráuboun to moun luboún yebe leíginun, ni ligía ni ja úarabaña lúma, fádírigo rügúñanu lun jeíginun fein tugúya según lilúrudun Moisés, áni mámati figoú le ladügübei David ligíbugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádírigo tídan lúban Búngiu lídan wéyu le eméraaguagülei áni máma figoú? ⁶ Naríñajare jun luágu níjein lan ában weíriguti sügú táu lúban Búngiu ya, áu. ⁷ Jugúya, úagili gunfaráanda jumáni le laríñagubei Búngiu tídan Lerérún. “Jímein numúti lun gudémejabu jumá sügú láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madúgünbaña ni cáta wuríbati. ⁸ Gabáfutina gíñe, áu le Wügúri Garaúwarügüti, lun naríñagun cába lan gayára ladügúniwa lídan wéyu le eméraaguagülei.

Wügúri le jilálabei ában lújabu

(Mr 3.1-6; Lc 6.6-11)

⁹ Ába lídin Jesúsu ñígiñe, ába lebélorun tídon jalgílisin juríu. ¹⁰ Níñein ában wügúri jiláali ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijóun lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galúgün lubeí ában mudún, ába teíquadun lídon ában wélu wéyu le eméraaguagülei, lun mídinbei lan aságaroun? ¹² ¡Ma gebégitimaati ában wügúri sügú táu ában mudún! Gayáraati lubeíti ladügún buíti lídan wéyu le eméraaguagülei.

¹³ Ába laríñagun lun wügúri ligía.

—Tulébei bújabu.

Dan le látuleruni, ába lareídagun quei le ában. ¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu gürígia, ába lareídaguagüdüniña sun sánditiña. ¹⁶ Ábaja laríñagun joun lun maríñagun jamáni cáteinein lan. ¹⁷ Lasúsere-dunbei líra lun lagúnfulirun lé meja laríñagubei proféta Isaías.

¹⁸ Níjan numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu, ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹ Mageíndagunbei, magúaragun, mareínjabei úmada.

²⁰ Gudémejabubei joun gürígia ja gudémebaña queísi ában mabúru le barúguaali, lúma joun ja débilibaña lídan jafíñen queísi ában lámpu le ñegúmemeeli.

Ítara méme lúba daríme adúga láali larúeijan le úaraguabei.

²¹ Ábame jíchuguni ja mámabaña juríu jeménigi luágu.

Laríñawagún luágu lubáfu lan Máfia lúmabei Jesúsu

(Mr 3.19-30; Lc 11.14-23, 12.10)

²² Ábati lanügúniwa ában wügúri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía. ²³ Ába laweíridun janígi sun ja ñibaña, ába jaríñagun.

—¿Níjan funásan ladúgawagunbei David?

²⁴ Dan le jagáambunbalin fariséogu cátei le, ába jaríñagun.

—Wügúri le, láu lubáfu Beelzebú, le Máfia, le jábuti espíritugu wuríbatiña laságajaña.

²⁵ Quei subúdi láani Jesúsu le jaritagubei, ába laríñagun joun.

—Furúmieguarügü arúeijani le afánreinraguti lun jageíndagun jámagua, lagúnrinchaguba, ánjaña gíñe afáreinragua lílana ában ubúru o ában lan familia ladúga wuríbu, siñábei jadúrarun. ²⁶ Ítara líña giñéti, ánjein laságaru Máfia máfia guánarügü, ligía guánarügü afánreinragubei, áni jída lubáti ladúrarun lubáfu ítara? ²⁷ Jugúya, aríñagatün luágu láu lan lubáfu Beelzebú, o Máfia, naságaja espíritugu wuríbatiña, ánjein ítara líña lubeí, ¿cáti íchugubei ubáfu joun ja jániugu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá. ²⁸ Áu, láu lubáfu láni Búngiu Espíritu naságaja espíritugu wuríbatiña. Arúfuda lumúti líra luágu chúlújali lan larúeijan Búngiu jídon.

²⁹ ¿Ída lubági gayára lan lebélorun ában gürígia lúbíñoun ában wügúri jéreti lun lanügüni lílagu ánjein magúragun lan furúmiñe? Ítara rügúñein lun gayára lan lanügüni lílagu.

³⁰ ‘Le mámabei númagiñe, náganiñein, le míderagun lumútina, güríngua lumúti le nadügübei.

³¹ ‘Jugúya aríñagatün luágu láu lan lubáfu Máfia naságaja espíritugu wuríbatiña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdnawa lan sun figoú lúma sun wuríbati le jaríñagubei gürígia, ánjein lun jadímurejan wuríbati luágu Sífiri Sándu, siñábei ferúdnawa lan figoú líra. ³² Furúmieguarügü gíñe le aríñaguti furúmieguarügü cátei wuríbati nuágu, áu le Wügúri Garaúwarügüti, gayáraati ferúdnawa lan, ánjeinti le adímurejati wuríbati luágu lubáfu Sífiri Sándu le ní-

daanbei, úabei ferúdunawa lan ni lídan ubou le, ni lídan le ában.

Luágu lin ídibu lasúbudirúa ca lan luwúyeribei

(Lc 6.43-45)

³³ Ánjein buídu lubeí ídibu, buídubei gíñe lin, ánjein mabuídun lubeí ídibu, mabuídunbei gíñe lin. Luágu lin ídibu lasúbudirúa ca lan luwúyeribei. ³⁴ ¡Jarásan jéwe jugúya le! Siñáti jadímurejan cátei buíti, wuríbatüangan. Cátei le buínbei tídan anígi, ligía laríñagubei iyúmaü. ³⁵ Wügúri le buídubei, cátei buíti laríñagubei ladúga tídaañein lan lanígi ubuíduni, wügúri le wuríbabei, cátei wuríbati laríñagubei ladúga tídaañein lanígi wuríbani. ³⁶ Naríñajare jun luágu dánme lan lachúlürün luwéyuri agúseruni, sun gürígia geféenbaña luágu sun dimúrei málati le jaríñagubei, ³⁷ ladúga luáguba le baríñagubei bagúseragüdüwa, ligíaba arúfudei ánjein gadúnrun bubeí lúmoun madúnrun ban.

Jamúriajan gürígia wuríbatíña seíni láuti miláguru

(Mr 8.12; Lc 11.29-32)

³⁸ Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badúgün ában seíni le láuti miláguru luágu lúmagiñe lan Búngiu biábin.

³⁹ Ába laríñagun Jesúsu joun.

—Gürígia wuríbatíña áni magúnfuliruntiña amúriajatiña seíni láuti miláguru, míchugúnbei ámu seíni joun lueí le asúseredubei lun proféta Jonás. ⁴⁰ Ladúga queí leréderun Jonás úrüwa wéyu úrüwa áriebu lurágeirugu údu, ítara lúba gíñe neréderun, áu le Wügúri Garaúwarügüti, lídan numúaja úrüwa wéyu, úrüwa áriebu, según ligáburu jabájüdüni juríu dan. ⁴¹ Já meja aganoúbaña Nínive jásaaruba lídan luwéyuri agúseruni dánme jagúseragüdüniwa gürígia ja lánina dan le, ábame jíchugun jadúnrun ladúga sáansiguati jagáburu Nínivena dan le lapúrichianbalin Jonás lugánute Búngiu joun, áni anája áu, ában weíriguti sügú láu Jonás, áni májatün jagáambunina. ⁴² Tásaaruba gíñe lurúeitena Súru lídan luwéyuri agúseruni dánme le jagúseragüdüniwa gürígia ja lánina dan le, ábame tíchugun jadúnrun, ladúga ñúbintu lídaangiñe lidíse-ágei ubou lun tagáambuni lichú láu Salomón, áni anája áu, ában weíriguti sügú láu Salomón, áni májatün jagáambunina.

Espíritu wuríbati le agíribuduti

(Lc 11.24-26)

⁴³ Dan le láfuridun ában espíritu wuríbati lídaangiñe ában gürígia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíribuda tídoun núban to ñígiñe lubeí náfurida.” Dan le lagíribudun, ába ladáriruni gürígia buga ligía queísi ában múna to málatu, abú-dajoúaar, aráanserúa. ⁴⁵ Ábati lídin, ába liábin jáu sédü espíritugu wuríbatimaatiña sügú láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügú láu meja furúmiñe. Ítara lúba

giñéti lasúseredun joun gürígia wuríbatíña ja lánina dan le.

Lúguchu Jesúsu jáma lamúlen

(Mr 3.31-35; Lc 8.19-21)

⁴⁶ Ñígili Jesúsu adímureja joun gürígia, ligía tiábin lúguchu jáu lamúlen. Ába jeréderun bougudi, buséntiña yebe jadímurejan lúma. ⁴⁷ Ába laríñawagún lun Jesúsu.

—Nuján búguchu jáma bamúlen ya bougudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹ Ába larífudun jawágun láni disípulugu, ába laríñagun.

—Añája nóguchubaña, jagía gíñe namúlenubaña,

⁵⁰ ladúga furúmieguarügü le adúgüti lugúndan

Núguchi le siélubei, ligía namúlenbei, nítu, nóguchu.

Jémpulu luáguti ábunaguti

(Mr 4.1-9; Lc 8.4-8)

13 Wéyu ligía, ába láfuridun Jesúsu múnadagiñe, ába lañúurun láru dúna. ² Quei jagíbedagun

gürígia le ñí lubei, ába ládinun tídoun ában ugúnein, ába lañúurun, ába jeréderun sun gürígia láru dúna.

³ Ába larífudajan sarágu cátei joun láu jémpulu, ába laríñagun.

—Ñíñein ában ábunaguti, ába láfuridun ábunagua.

⁴ Lídan afúrujeina láani líla nádü, ába láburujan lídaangiñe luágun úma, ába jayábin dunúru, ába jeígini.

⁵ Líbiri, ába láburujan labádinaguóun dúbü le ñí lumuti úa lan sarágu múa, ába laboučhun furése ladúga majúllin lan múa. ⁶ Dan le lásüdüwéyu, ába lásaürün

queíti málagüle lan, ába loúnwen. ⁷ Líbiri ílaü, ába láburujan labádinaguóun jíyu, ába laweínamudun jíyu

úara lúma, ába láfaruni. ⁸ Níñein lídaangiñe, áburujati lídoun múa buíti, alúbajouáti buídu, níjein lídaangiñe,

íchuguti san águu luágu cáda ában águu, líbiri rúti úrüwa-wein, líbiri darándi. ⁹ Jugúya le garígeirugubei

lan jagáambun, agáamba jumána.

Ca lan laníchigubei jémpulu le

(Mr 4.10-12; Lc 8.9-10)

¹⁰ Ábati jayábin disípulugu, ába jaríñagun lun Jesúsu.

—¿Cásan uágu badímureja joun gürígia láu jémpulu?

¹¹ Ába laríñagun joun.

—Jugúya, subúdigüda láali Búngiu sun cátei ará-mudaguati le lánina larúeijan jun, ánjein jagía, siñáti jasúbudiruni. ¹² Le agúnfuliruti lúma inárüni le lagáambubei, líchugúba lánwoun lun, ánjein le maténiruti

lun, gidáwarügübei murúsun larúgounga le lúmabei lueí. ¹³ Ligía nadímurejanbei joun láu jémpulu ladúga

aríja jamáni le nadúgübei, ába jeréderun camá maríjintiña, agáamba jameí le naríñagubei, ába

jeréderun úaga gunfaráanda jamá camá jamuga magáambuntiña. ¹⁴ Jawágu lagúnfulira lé meja

laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá,

jaríjuba, ibídiñebei jun ca lan lílabei le jaríjubei,
¹⁵ ladúga deréeru janígi,
 wuríbaaliti jagáambun,
 murúñu líña jágu,
 lun maríjin jumá láu,
 magáambun láu jarígeirugu,
 úa gunfaráanda jumá táu janígi,
 magáragun jugúyame nun lun
 nareídaguagüdüñ.

¹⁶ Ánjeinti jugúya le nánigubei, fuleíseiwatün ladúga aríjatün láu jágu, agáamba jugúya láu jarígeirugu.

¹⁷ Ninárün jáu, sarágu jañá meja profétagu jáma ámu gürígia gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséñtiña jamúga meja jagáambuni le jagáambubei jugúya, magáambun jamúti.

Lafúnraanguagüdüni Jesúsu jémpulu luáguti ábunaguti

(Mr 4.13-20; Lc 8.11-15)

¹⁸ Agáamba jumeñti le lílabei jémpulu luáguti ábunaguti. ¹⁹ Ja agáambubalin ugánu luáguti arúejani le lánina siélu áni úati gunfaráanda jamáni, ítara jáña quei úma le ídounbei láburuja lídaangiñe líla nádü, ába liábin Máfia, ába laságaruni ugánu buíti le ábunúbei tídaangiñe janígi. ²⁰ Dúbü le ñíjin lubeí láburuja ílaü, ítara líña quei gürígia ja agáambubalin ugánu, ába jerésibiruni láu ugúndani, ²¹ quei márügüdüñ lubeí buídu tídan janígi, madúrati jádan. Dánti le lachúlürün dan lun jóuchawagún lúma jeíbaa-jóun lueígiñe ugánu ligía, ába leíquadun jarúna. ²² Jíyu le ñíjin lubeí láburuja ílaü, ítara líña quei gürígia ja agáambubalin ugánu, weíritimaati jafúudun luágu cátei le lánina ibágarí le, ába leyéeduniña írsini. Sun le, ába láfaruni ugánu tídaangiñe janígi, mígiruntiti lun lalúbajoún jádan gürígia jagía. ²³ Múa buíti le ñíjin lubeí láburuja ílaü, ítara líña quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, ítara jáña quei ílaü le íchugubei san águu luágu ában, jíbiri quei le íchugubei úrúwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴ Ábaya líchuguni Jesúsu jémpulu le joun.
 —Arúejani le lánina siélu, ítara líña quei ában wügúri le ábunagubei ílaü buíti lídan lufúlasun, ²⁵ dan añája lan sun ja ñíbaña arúmuga, ába lebélorun ában lágani labúreme fulásu ligía, ába lánunun jíduru wuríbati labádinagua türígu, ába lídin. ²⁶ Dan le laweínamudun türígu ába legélewejan, ába gíñe lachúlaagun jíduru wuríbati. ²⁷ Ába jóúdin músu, ába jaríñagun lun jayúbudiri. “Wayúbudiri, ánjein buídu lubeí ílaü le bábunagubei bumúanrugu, zjalágiñésan lasálira jíduru wuríbati le?” ²⁸ Ába laríñagun iyúbudiri joun. “Ladúga ában ágani le.” Ábati jaríñagun músu lun. “¿Buséñtibu lun wájulajani jíduru wuríbati le?” ²⁹ Ába laríñagun joun. “Uá, ladúga dánme jájulajani jíduru wuríbati, julá jíñein lin gíñe türígu úara lúma. ³⁰ Ígiragubei jumeí lun

laweínamudun úara daríme lidáani alúbajani, ábame naríñagun joun ñadágimeintiña lun jájulajani jíduru wuríbati furúmiñe, ábame jagúraguni lun lágudúniwa, lárigiñeme, ábame jareíduni türígu tídan lágei.”

Jémpulu luáguti tíla mostása

(Mr 4.30-32; Lc 13.18-19)

³¹ Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lánunubei ában wügúri lufúlasunrugu.

³² Tíla mostása, ligía ílaü ñúraütimaabei lídaangiñe sun ílaü, áni dan labouúchun, ligía weíritimaabei lídaangiñe sun nádü, ába liábin lun ábanbei lan wéwe weíríti darí lun jayábin dunúru adúga jádibu luágu lílímun.

Jémpulu luáguti ísi

(Lc 13.20-21)

³³ Rúlumuti gíñe jémpulu le joun.

—Ítara líña arúejani le lánina siélu quei ísi le tagúbudubei ában wúri tídan úrúwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr 4.33-34)

³⁴ Láu jémpulu laríñagei Jesúsu sun cátei le joun gürígia, maríñagunti ni cáta joun mayúsurunga jémpulu.

³⁵ Sun cátei le, lun lagúnfulirun le laríñagubei meja Búngiu liyúmulugugiñe proféta.

Nadímurejaba láu jémpulu jun, nafúnraanguagüdübei cátei lé buri meja ará-mudaguabei jun lúmagiñe nadúgüni ubou.

Lafúnraanguagüdüni Jesúsu jémpulu le luáguti jíduru wuríbati labádinagua türígu

³⁶ Ába louñajaniña Jesúsu gürígia jábiñoun, ába lebélorun múnadoun, ába jayábin láni disípulugu, ába jaríñagun lun.

—Furáanguagüdebei jémpulu le luáguti jíduru wuríbati woun.

³⁷ Ába laríñagun Jesúsu joun.

—Áu le Wügúri Garaúwarügüti, áu le ábunagubalin ílaü buíti, ³⁸ múa, ligía uboubei, ílaü buíti, jagía gürígia ja lílana larúeijan Búngiu, jíduru wuríbati, jagía gürígia ja lánigu Máfia, ³⁹ áganiti le ábunubalin jíduru wuríbati, Máfia méme, alúbajani, ligía lagúmunchunbei ubou, ja alúbajabaña, ánjeligu. ⁴⁰ Ítara quei labúda-jóúniwa jíduru wuríbati ába lágurún wáturugun lun lágudun, ítara lúba gíñe lasúseredun dánme lagúmunchun ubou, ⁴¹ áu le Wügúri Garaúwarügüti, nouñajabaña náni ánjeligu aságaraña sun ja afgoungüdübaña ámu, jáma ja adúgübaña wuríbati, lídaangiñe narúeijan, ⁴² ábame jácharaguniña lídoun wátu geméti lánina máfiougati. Ábame jayájuañan ñi, ábame lacúnrinjan jári. ⁴³ Jámeti adúgübalin le lubeíbei Búngiu, ábame jámiridun quei wéyu lídan larúeijan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

⁴⁴ Ítara líña arúejani le lánina siélu quei irísini le arámudúañubei lábugiñe múa. Ladárirei ában wügúri irísini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérta le weíribei ebégi

⁴⁵ Ítara líña gíñe arúejani le lánina siélu quei ában alúgurajati le eíbugañajabei áluaja pérta fínuti, ⁴⁶ dánti ladárirun ában le weíriri lebégi, ába lídin, ába lalúguruni sun le lúmabei, ába lagáñijani pérta ligía.

Jémpulu tuáguti séni

⁴⁷ Ítara líña gíñe arúejani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸ Dan tabuínchun, ába jacháwarunun es-énijatiña lárún béya, ába jañúurun ñi anúdajaña údu-raü, ába jareiduniña ja buídubaña, ába jachágaruniña ja wuríbabaña. ⁴⁹ Ítara lúba dánme lagúmchun ubou, jayábiba ánjeligu lun jafánreinruniña ja buídubaña já-daangiñe ja wuríbabaña. ⁵⁰ Ábame jádaruniña ja wuríbabaña lídoun wátu geméti lánina máfiougati, ñiba lubei jayájuaaja, acúnrijame jári.

Írísini buri iséri lúma binádu

⁵¹ Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵² Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísini lun líchuguni joun tílana lúban dan le jemégeiruni, queígubeirügü, gayáraati larúfudajan joun güri-gia luágu lilúrudun Moisés lúma gíñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr 6.1-6; Lc 4.16-30)

⁵³ Dan lagúmchunbei líchuguni Jesúsu jémpulu buri le, ába lídin ñígiñe, ⁵⁴ ába lachúlürün lageíroun. Ába lagúmeserun arúfudaja tídan jalígilisin juríu to lídaan-boun fulásu ligía, ába laweíridun janígi güri-gia, ába jaríñagun.

—¿Jalíasan lafúnrendeirei wügúri le sun lichú áu le? ¿Ída liñásan gayára láani miláguru buri le adúga? ⁵⁵ Liraúga saráfangei le, María lúguchuboun, líbugaña Jacóbo, José, Simón lúma Júdas, ⁵⁶ ya gíñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷ Ába jamájarun lun jerésibiruni. Ába laríñagun Jesúsu joun.

—Sun güri-gia jínsiñeti ában proféta joun, mámarü-gaali ligía lídaangiñeti fulásu le ñi jabei o tílana lan jában.

⁵⁸ Madúgüntiti sarágu miláguru ñi ladúga mafíñen jamá luágu.

Louñwen Juan le abásteragüdjabei

(Mr 6.14-29; Lc 9.7-9)

14 Lídan dan ligía, ába lagáambun Heródes, le gumándan lídan fulásu le gíribei Galiléa, luágu Jesúsu, ² ába laríñagun joun ja lúmabaña.

—Juan le abásteragüdjabei le, sará jádaangiñe jiláaña, ligía gabáfu lubei lun ladágun miláguru.

³ Lé meja susérelibe, daúlumuti meja Heródes Juan, ába lagúraguágüdüni láu güri-gia tueígiñe Heródias tó meja lúmari Felípe, le lamúlen. ⁴ Aríñagaali meja Juan lun Heródes luágu moun láni lagámaridunun lúmari lamúlen, madúgüti Heródes gásu láu.

⁵ Buséti yebéti Heródes láfaruni Juan jilágubei, ladúga lanúfude jawei güri-gia, madúgun lumúti ladúga sun lan güri-gia afíñetiña luágu proféta lan Juan. ⁶ Dánti le efédujani luágu lagúnfulirun Heródes irúmu, ába tiábin tiraü Heródias, ába tabínajan jagíbugiñe amísurajóutiña, léti línsiñe tabínajan lun Heródes, ⁷ ába laríñagun tun láu fiñún luágu líchugubei lan furúmiengarügü cátei le tamúriajan lúma tun. ⁸ Ábati taríñagun túguchu tun lun tamúriajani lálbulugu Juan le abáste jilágubei, ladúga, lun jíchuguni tun lídan ában asíedu, ába tamúriajani lúma ítara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jamei amísurajóutiña, ába laríñagun lun líchugúniwa tun. ¹⁰ Ábati laríñagun lun ladúrürúniwa lálbulugu Juan furísunrugu, ¹¹ ába janúgüni lídan ában asíedu, ába líchugúniwa tun irájü tugúya, ába tíchuguni tun túguchu.

¹² Ábati jayábin l-íñagun tun láu fiñún luágu lanigu Juan, ába janúgüni lúgubu, ába jábununi, lárígiñe, ába jóudin awísarei Jesúsu.

Líchugun Jesúsu eíginu joun seíngü mílu wügúriña

(Mr 6.30-44; Lc 9.10-17; Jn 6.1-14)

¹³ Dan lagáambuni Jesúsu cátei le, ába lídin ñígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni güri-gia, ába jáfuridun lídaangiñe buri aúdü, ába jóudin lárígi, eíbu. ¹⁴ Dan larárirun Jesúsu tídaangiñe ugúnein, ába laríjin luágu sarágu jaña lan güri-gia jagía, ába jagúdemedagun lun, ába lareídaguagüdüniña ja sándibaña jádan. ¹⁵ Queíti agúñedeinaali lubei, ába jaríñagun láni Jesúsu disípulugu lun.

—Dárüjalitia áni úatiña güri-gia aganoútiña lídan fulásu le. Oúnaja báña güri-gia ja, ñúdüñ jamámuga lídoun buri lirájüñü fulásu yaráfa agáñija eíginu lun jeígin.

¹⁶ Ába laríñagun Jesúsu joun.

—Mídinbaña, rújuma eíginu joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barújumoun nun ñájoun.

¹⁹ Ába laríñagun joun gürígia lun jañúurun luágu jí-duru. Ába lanúgünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidis-ípulugu, ába jafánreinjanun jádan gürígia. ²⁰ Sun jagía joútiña quimúle, lárigiñe, ába jabuínchagüdü dúusu faníñe táu to ígiragutu. ²¹ Seíngüñanu mílu wügúriña eigiñe, mabájüdünga wúriña jáma irájüñü.

Leibugun Jesúsu ligíbuagu dúna

(Mr 6.45-52; Jn 6.16-21)

²² Ába loúnajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun ní-ján lan oúnajaña gürígia águyu. ²³ Lásun loúnajaniña, ába laweínrun lábugua luágun wúbü ayúmuragua lun Búngiu. Dan le lagúñedunbei, ñíñein Jesúsu lábugua, ²⁴ sun núnguran tan ugúnein lamídan dúna. Ába lá-farajan lugúdi barána tuágu ugúnein ladúga tubárouñein lan garábali. ²⁵ Ába liábin Jesúsu jawágun lubá larúgan, eíbugeina ligíbuagu dúna. ²⁶ Dan jaríjini láni disípulugu eíbugeina ligíbuagu dúna, ába janú-fudedagun, ába jagúaragun láu anúfudei.

—¡Úfiaü!

²⁷ Ába ladímurejan Jesúsu joun, ába laríñagun joun.

—¡Ragújuma anígi, áu le, manúfudeda jumá!

²⁸ Ába laríñagun Pédro lun.

—Nabúreme, ánjein amúrü lubeí, eíbugagüda bána gíñe ligíbuagu dúna chúlú le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna. ³⁰ Dan le lasándiruni lére garábali ába lanúfudeda-gun, ába lagúmeserun abúlucha, ába lagúaragun.

—¡Séfu bána Nabúreme!

³¹ Ába lárügüdüni Jesúsu lújabu, ába laríñagun lun.

—¡Loúguati gíñe bafíñen! ¿Ca uágu laloúguada bafíñen?

³² Dan jádinun tídoun ugúnein, ába lagálumadun garábali. ³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraú ban Búngiu.

Lareídaguagüdüniña Jesúsu sánditiña Genésaret

(Mr 6.53-56)

³⁴ Ába jánjiñuraguni dúna, ába jachúlürün Genésaret. ³⁵ Dan le jíchugunbei lílana fulásu fe luágu Jesúsu lan, ába jabúruchaguagüdüni lídan sun fulásu ligía, ába janúgüniña sun sánditiña le ñíjin lubeí. ³⁶ Ába jayú-muragun lun lun lígirun lúnrügü jagúuruni táru lanáangun, sun ja agúurubarun, areídaguátiña.

Cátei le marúmadagüdünbaliña gürígia ligíbugiñe

Búngiu

(Mr 7.1-23)

¹⁵ Ába jayábin fiú fariséogu jáma arúfudajatiña lilúrudun Moisés, ñúbintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jáalachagunbalin báni disípulugu binádu jagáburi weiyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti gíñe jáalachagunbalin lerérun Búngiu lun jafálaruni binádu jigáburi? ⁴ Laríñajare Búngiu. “Inébe jamá bagúbürigu bun, le anábagubaliña lagúbürigu, jilála.” ⁵ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu.

“Siñáti níderagunibu ladúga sun le nómabei, aríña-gaadina luágu lun lan níchuguni lun Búngiu”, ⁶ luágu furúmieguarügü lan le aríñaguti ítara, mámaali lan lúnti líderaguniña lagúbürigu. Láu líra mebégigüda jumáali lagúmadijan Búngiu lun jafálaruni binádu jigáburi. ⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárurügü gürígia ja jíchiga inébesi nun, líña Búngiu,

ánjein tídan janígi, mebéresentiña náu.

⁹ Málati jájuduragun nun,

ladúga le rügüñein jagúmadijan wügúriña jarúfudaja.

¹⁰ Ábati lagúarun joun gürígia, ába laríñagun joun.

—Agáamba jumá, gunfaráanda jugúyame. ¹¹ Máma eígini le leígubei gürígia adügübalin lun marúman lan ligíbugiñe Búngiu, dimúrei wuríbati le laríñagubei wügúri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jig-gu wuríba lan láburujan dimúrei le baríñagubei joun fariséogu?

¹³ Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴ Ígira jumáña, maríjintiña ja adúndejetiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangugüdabeí jémpulu le woun.

¹⁶ Ába laríñagun Jesúsu.

—¿Úati gíñe gunfaráanda jumá? ¹⁷ ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lí-daangiñe úgubu? ¹⁸ Ánjein dimúrei le áfuridubei lí-daangiñe iyúmaü, tídaangiñe anígi liábin, ligíati adügübalin wügúri lun marúman lan ligíbugiñe Búngiu, ¹⁹ ladúga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰ Ligía buri cátei le adügübalin wügúri lun marúman lan, ánjeinti leigíniwa machibúnga újabu

según jagáburi juríu marúmadagüdün lumúti ligíbugiñe Búngiu.

Ában wúri teréncha to affñeruboun luágu Jesúsu
(Mr 7.24-30)

²¹ Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón. ²² Ñíñoun ában wúri jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladúgawagun Davíd, gudémená bun! Níjein ában espíritu wuríbati tuágu nisáani, weíriti tasúfurirun lurúma.

²³ Mounabun lumútu Jesúsu. Ábati jayábin disípulugu, ába jayúmuragun lun, ába jaríñagun.

—Adúgabei le tamúriajabei búma, ladúga nuteíntia agúarajeina wárigi.

²⁴ Ába laríñagun Jesúsu.

—Joun rügúñein gürígia féridijaña ja Israelítagu lou-najana Búngiu lun níderaguniña.

²⁵ Ába tiábin wúri tugúya, ába tájuduragun ligíbugiñe, ába taríñagun.

—¡Nabúreme, íderagua bána!

²⁶ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

²⁷ Ába taríñagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

²⁸ Ábati laríñagun Jesúsu tun.

—Wúri, ¡weíriti gíñe baffñen! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdün Jesúsu sarágu sánditiña

²⁹ Ába láfuridun Jesúsu ñígiñe, ába lachúlürün lárundúna Galiléa, lárigiñe, ába laweínrun luágun ában wúbü, ába lañúurun ñi. ³⁰ Ába jayábin sarágu gürígia le ñíjin lubeí barúina jagía meíbuguntiña, maríñintiña, maríñaguntiña, danímaati jarúna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídagugüdüniña. ³¹ Ába laweíridun janígi gürígia láu jaríjin adímurejaña jamá já meja maríñagadibaña, areídagua ja danímaabaña arúna, eíbuga ja meíbuguñajabaña, aríja ja maríñajabaña. Ába jagúmeserun adímureja weírigu luágu Jabúngiute Israelítagu.

Líchugun Jesúsu eígini joun gádürü mílu wügúriña
(Mr 8.1-10)

³² Ábati lagúarun Jesúsu joun láni disípulugu, ába laríñagun joun.

—Gudémetiña gürígia ja nun ladúga úrúwaali wéyu jáu núma ya áni úaali ni cáta jáma lun jeígin. Mabúseeruntina noúnajaniña jábiñoun meíginga, dagá líñein falálaü jawágu úmada.

³³ Ábati jaríñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñi lumuti úa jamá aganoútiña?

³⁴ Ába lálügüdüniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

³⁵ Ába laríñagun joun gürígia lun jañúurun múarugu, ³⁶ ába lanúgünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia. ³⁷ Jouñiña sún-gubei quimúle, buíngüda gíñe sédü faníñe táu to ígiraguboun. ³⁸ ¡Gádürüñanu mílu wügúriña eígitiña, mabájüdünga wúriña jáma irájüñü! ³⁹ Lárigiñe, ába louñajaniña Jesúsu gürígia águyu, ába ladinun tídoun ugúnein, ába lídin louñawagun Mágdala.

Jamúriajan fariséogu jáma saduséogu ában seíni le láuti miláguru

(Mr 8.11-13; Lc 12.54-56)

16 Ába jóudin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, afíñe jamámuga luágu lúmagiñe lan Búngiu liábin. ² Ába laríñagun joun.

—Rábounwéyu, ába jaríñagun. “Buídubei dan ladúga funáti siélu.” ³ Bináafin, ába jaríñagun. “Wuríbabei dan ugúñe ladúga funáñu líña siélu áni jamúñounga.” ¡Biángua tigíbu jugúya le! Subúdiñi luáguti ligáburi dan jun, áni ibídiñeti jun luágu chúlújali lan lidáani asálbaruni. ⁴ Gürígia wuríbatiña, múaraantiña ja, amúriajatiña seíni láuti miláguru lun jaffñerun luágu áu lan anúgübei asálbaruni joun gürígia. Wel, marúfudúnbei ámu seíni joun lueí liseíni Jonás.

Ába lígiruniña, ába lídin.

Ítara líña jarúfudajan fariséogu quei ísi

(Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janúgün fein. ⁶ Ábati laríñagun Jesúsu joun.

—Tóunigigua jumátia júngua lueí jísite fariséogu jáma saduséogu.

⁷ Ába jagúmeserun disípulugu aríñaga jámagua.

—Ladúgatia manúgün wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma?

¡Louguati gíñe jafíñen! ⁹ ¿Uágili gunfaráanda jumá, marítagn jugúya tuágu seíngü fein to nafánreinjaboun jádan seíngü mílu wügúriña lúma átiriñein lan faníñe táu ígiragutu? ¹⁰ ¿Bulfeiguatün funásan tuágu sédü fein to nafánreinjaboun jádan gádürü mílu wügúriña lúma átiriñein lan faníñe táu ígiragutu?

¹¹ ¿Ída líñági meféen jubeí luágu máma lan tuágu fein nadímureja dan le naríñagunbei jun lun jóunigiragun júngua lueí jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei

(Mr 8.27-30; Lc 9.18-21)

¹³ Dan le lachúlürün Jesúsu ubúругu Cesaréa le Filípo ába lálügüdüniña láni disípulugu.

—¿Cátanasan lídan jarítangun gürígia, áu le Wügúri Garaúwarügüti?

¹⁴ Ába jaríñagun.

—Añájein aríñagutiña luágu Juan lan lé meja abásteragüdjabeí amúrü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídan jarítangun?

¹⁶ Ába laríñagun Simón Pédro lun.

—Crístu le Liraú Búngiu le wíwanbei amúrü, le ñúbinbei asálbaraña gürígia ubouágu.

¹⁷ Ába laríñagun Jesúsu lun.

—Fuleiseiwatibu Simón, liraú Jonás, ladúga máma lasúbudirágüdüni ni ába gürígia cátei le bun, lasúbudirágüdüni Nóguchi Búngiu le siélubei bun. ¹⁸ Naríñajare bun luágu Pédro lan amúrü, líla íri ligía, “dúbü”, luágu-ba ébuu le nábunaguoun nilígílisin, áni ni íbini ouweni mabáfubei tuágu. ¹⁹ Níchugubei ligélen arúejani le lánina siélu bun, le cátei le uáguti baríñaga luágu moun lan jadügüni affíñetiña, ligía gíñe uágubei laríñaga Búngiu luágu siñá lan ladügüniwa, le cátei le uáguti baríñaga luágu gayára lan ladügüniwa, ligía gíñe le uágubei laríñaga Búngiu luágu gayára lan ladügüniwa.

²⁰ Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsu luágu loúnwen

(Mr 8.31-9.1; Lc 9.22-27)

²¹ Lúmagiñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu gíñe jasúfuriragüdübei lan wügúriña weírigitíña lídan jaffíñen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágu láfarúba lan jilágubei, áni lásaaruba lan luágu lúruwan wéyu. ²² Ába ladíñurun Pédro láu Jesúsu ñígíñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügüniwa lugúndan Búngiu. Masáminaruntibu quei Búngiu, basáminarun quei wügúri.

²⁴ Ábati laríñagun Jesúsu joun láni disípulugu.

—Le busénti lafálarunina, buléileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanügüni ában wügúri lugúruwan, falálana. ²⁵ Ladúga le abúseeruti leséfuragun lúnga

ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libíjubei ibágari le magúmuchaditi siélu.

²⁶ ¿Cági ju lan lun gürígia lagáñeiruni sun le lánina ubou le, leféridireime lubára siélu? Úati ni cáta lánina ubou le áuti gayára lan lagáñijan gürígia ubáraü siélu.

²⁷ Nagíribuduba, áu le Wügúri Garaúwarügüti, úara jáma náni ánjeligu, niábinba láu uweíriginu le meme láni Nóguchi. Ábamei nafáyeiruniña gürígia quei ligáburu le adúga jamáalibeí. ²⁸ Ninárün jáu luágu añájein lan jádaangiñe ja yábaña guetó, mouñwenbaña daríme jaríjini liábin narúejan, áu le Wügúri Garaúwarügüti.

Lámuñedagun Iaríjín Jesúsu

(Mr 9.2-13; Lc 9.28-36)

17 Sísi wéyu lárigiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wúbü íñuti, jagía rügüñanu ñi.

² Ába lámuñedagun Iaríjín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jaríjini Moisés lúma Elías (já meja abágaridubaña lídan dan le sügüjalibeí) ayánuja lúma Jesúsu. ⁴ Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adúga wagíame úruwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába loúburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraú le jñsiñebei nun, le aúbei ouñwenbun lan nugúndan, adúga jumeí le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírín janúfude. ⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jaríjínbei, maríjinjaña ámu lueídügü Jesúsu.

⁹ Dan le arárireina jamáni wúbü, ába laríñagun Jesúsu joun.

—Mabájudagua jumeítia cátei le aríja jumáalibeí lun ni ában daríme saráadina, áu le Wügúri Garaúwarügüti, lídaangiñe ouweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágu amúrü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹² áni naríñajare jun luágu ñúbinjali lan Elías, masúbudirun jamúti gürígia, adúgarügü jamúti sun le jabúseerubei láu. Ítara lúba gíñe jasúfuriragüdüniña, áu le Wügúri Garaúwarügüti.

¹³ Ábati jasúbudiruni disípulugu luágu Juan lan lé meja abásteragüdjabeí, ligía lan Elíasbei le uágubei ladímureja Jesúsu.

Lareídaguagüdün Jesúsu ában irájü goúwejaditi

(Mr 9.14-29; Lc 9.37-43)

¹⁴ Dan le jachúlürünbei le ñijin jabeí gürígia, ába liábin ában wügúri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudémelá nisáani bun, goúwejaditi, weírititi lasúfurirun, níjein dan jeíguati wáturugun, níjein dan dúnarugun. ¹⁶ Barú numuti ñájoun joun báni disípulugu, siñá jamuti areídaguagüda.

¹⁷ Ába loúnabun Jesúsu.

—¿Gürígia mafíñeraditiña, gürígia wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jí-daanbei? Barújumei irájü ligía ñájoun.

¹⁸ Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmagiñe óra ligía, ába lareídagun irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladúga liloúguan jafíñen. Ninárün jáu luágu ánjein lan ibíja jubeí fe íbini ñúraüraü lan quei ában tágu mostása, jaríñaguba lun wúbü le. “Gidába yágiñe, beíba lídoun ámu fulásu”, ábame lagídarun wúbü ligía. Úabei ni cáta jásiñerun ánjein ibíja jubeí fe le tímati-maati. ²¹ Ánjeinti jíbe espíritugu ja, láu rügúñein ayú-muraguni lun Búngiu lúma ayúnaruni gayára lan jasá-garúniwa.

Ladímurejaanya Jesúsu luágu loúnwen

(Mr 9.30-32; Lc 9.43-45)

²² Dan le eíbugeina jamá úara loúbawagu Galiléa, ába laríñagun Jesúsu joun luágu ledéregerúaba lan, ligía le Wügúri Garaúwarügüti, jájaburugun wügúriña wuríbatíña, ²³ ábame jáfaruni jilágubei, áni lásaaruba lan lídaangiñe óuweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachúlürün Jesúsu jáma láni disípulugu Capernaúm, ába jóudin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába loúnabun Pédro, ába laríñagun lun.

—Afáyeijati.

Dánti lebélurun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúbura-jabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubeíti jafáyeijan, áu le Liraú Búngiu, moún lumuti nafáyeijan tiseínsuna lúban Núguchi. ²⁷ Lun magáñidagüdün wamá ni ában, beíba, ábame bachúrunun bürúnjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buí-durügübei lun bafáyeijan wawougua láu, ábame bafáyeiruni.

¿Cáteisán weírigutimaabei lídan larúeijan Búngiu?

(Mr 9.33-37; Lc 9.46-48)

18 Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisán weírigutimaabei lídan larúeijan Búngiu?

² Ába lanügün Jesúsu ában irájü, ába líchuguni jamí-dan jámagua, ³ ába laríñagun.

—Ninárün jáu luágu ánjaün lan mayábin lun jí-taradun quei irájüñü, mebélubadün lídoun larúeijan Búngiu. ⁴ Ítara líña lubeíti, le ñúraüti lanáangun lúngua, ñúbin ligía lun ítarabei lan quei ában irájü, ligía weírigutimaabei lídan arúeijani le lánina siélu. ⁵ Gürí-gia gíñe le erésibiruti ában irájü lídan níri resíbi lumúti-na gíñe.

Luríban lafígoungüdúniwa ában gürígia

(Mr 9.42-48; Lc 17.1-2)

⁶ Furúmieguarügü le afígoungüdüti ában já-daangiñe ja isérigiñabaña lídan jafíñen nuágu, buítimaati jamúga lun lun lagurúniwa baránajoun láu ában oúnwenbun dúbü le amúligülei güráñu luágu ligíina sügú láu ladügüni cátei líra. ⁷ ¿Wuríbati lun ubou, níjein lán buri cátei le afígoungüdúbaliña gürígia! Súnwandan ñíbei lan, áni ífugiábu le wügúri le lébunabei!

⁸ Ligía ánjein lubeí lafígoungüdúbadi buíbeí bújabu o bugúdi lan, dürúbei, fíbei díse buáriu, buítimaati lun bebélurun siélun májabuga o magúdiga, sügú láu badarún láu biángubei bújabu lúma biángubei bugúdi máfiougatin le ní lubei wátu le méñeguchadibei. ⁹ Ánjein bágu lubeí afígoungüdúbadi buíbeí, fíbei díse buáriu, buítimaati lun bebélurun siélun máguga sügú láu badarún láu biángubei bágu máfiougatin.

Jémpulu tuáguti mudún to eféridiruboun

(Lc 15.3-7)

¹⁰ Manúga jumá ni ában jádaangiñe ja únabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu afíñetiña ja súnwandan. ¹¹ Ladúga asálbarei le féridijalibei yebe niábin, áu le Wügúri Garaúwarügüti.

¹² ¿Ída líña jaríjin lun? Ánjein añájein lubeí san mudún lúma ában wügúri, teféridira ában jádaangiñe, ¿ma lígirubaña jíbiri luágu wúbü, ábame lídin álujoun to ayúridaguboun? ¹³ Ánjounti ladárra, choúruti luágu gúndaabei lan táu sügú jáu ja mayúridagunbaña.

¹⁴ Ítara líña giñeti, mabúseerunti Júguchi Búngiu le siélubei lun leféridirun ni ában jádaangiñe únabugutiña ja.

Ligáburi ferúdunawa jamá idújeñu lueígiñe Jesucristu
(Lc 17.3)

¹⁵ Ánjein adúga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adúga gásu báu, gamádaguayáadün. ¹⁶ Ánjein madúgün gásu báu, ábame banúgün ában o bián gürígia jánwoun lun sun lan le aríñawagúti, añájein jamámuga ámu geféentiña luágu. ¹⁷ Ánjein madúgün gásu jáu, ábame baríñaguni lun jadámurin afíñetiña, ánjein madúgün gásu láu adámurini, ábame banúgüni quei ában maffíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

¹⁸ Ninárün jáu luágu le lan cátei le uáguti jaríñaga jugúya disípulugu luágu moun lan jadúgüni afíñetiña, ligía gíñe uágubei laríñaga Búngiu luágu siñá lan ladúgüniwa, le cátei le uágubei jaríñaga luágu gayára lan ladúgüniwa, ligía gíñe le uágubei laríñaga Búngiu luágu gayára lan ladúgüniwa.

¹⁹ Naríñajare gíñe jun luágu ánjaña lan úarada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun, ²⁰ ladúga le ñi jamuti biáma o úrúwa oundaragu lídan níri, anájein ñi jamídaangua.

²¹ Ába layárafadun Pédro lun Jesús, ába laríñagun lun.

—Nabúreme, ¿átiribeísan weíyaasu ladúgün nibíri ában wuríbani nun lun ferúduna méme náani? Darí sédü weíyaasu?

²² Ába laríñagun Jesús lun.

—Maríñaguntina bun luágu darí lan sédü weíyaasu lúnti ferúduna báani, darí úrúwa-wein-díisi weíyaasu sédü.

Jémpulu luáguti músu le májabei ferúduna lan

²³ Ligía ítara líña lubei arúejani le lánina siélu quei ában urúei le ñúbinbei lun laráansejan luágu seínsu jáma lumúsuniña. ²⁴ Lagúmesera adúgei, ába janúgün ában le adúweirubalin sarágu míñun fiádürü, ²⁵ quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan. ²⁶ Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷ Ába lagúdemedagun lun urúei, ába ferúduna láani ladúweiruni, ába lígiragüdüni. ²⁸ Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligiina, ába lagúmeserun achócurei, ába laríñagun lun. “Fáyeibeí le badúweirubalina.” ²⁹ Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰ Májati le ában, ñúdünrügü ligía ába ládaruni furísunrugun darí lafáyeiruni ladúweijan. ³¹ Dan le jaríjinbaalin ja jíbiri músu cátei le, ába lagáridun joun sarágu, ába jóudin, ába jabájüdaguni lun urúei. ³² Ába loúnajan urúei ougei, ába laríña-

gun lun. “¡Músu wuríbatí! Ferúduna numúti sun badúweijan ladúga bayúmuragun nun. ³³ Lúnti yebe gíñe gudéme lan bouba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesús aríñageina.

—Ítara lúba gíñe ladúga Nóguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

Larúfudajan Jesús libúgürü ígiraguni

(Mr 10.1-12; Lc 16.18)

19 Lárigiñe laríñaguni Jesús sun cátei le, ába lídin Galiléagiñe lun loúbawagun Judéa le lueígiñebei oubaü le ñígiñe lubei laboucha wéyu libíti Jordán.

² Sarágu jáña gürígia afálaruti, ába lareídaguagüdüniña sánditiña ñi.

³ Ábati jayábin fiú fariséogu lúmoun Jesús aluga jáburugüdüni tídoun sádara, ába jálügüdüni.

—¿Según barítagun, gayáaatísan lígirunun gürígia lúmari lueígiñe furúmiegurügü cátei?

⁴ Ába loúnabun Jesús.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladúgünbaliña Búngiu gürígia, adúga lumúti wügúri, adúga wúri? ⁵ Aríñagati gíñe. “Ligía lígirubei lubei wügúri lúguchi túma lúguchu lun laganouniwa túma lúmari, ábame jeréderun quei ábanrügü.” ⁶ Mámaaña lubefti biáma, ábanrúgaaña. Ligía moun lubei lafánreinraguni wügúri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugüniwa gárada lánina ígiraguni tun wúri lun tígirún?

⁸ Ába laríñagun Jesús joun.

—Ladúga tidére janígi lánjarunbei Búngiu lun jígiragun jáma júmarigu, máma líña meja furúmiñe.

⁹ Naríñajare jun luágu furúmiegurügü lan le ígirutu lúmari ába lagámaridun ámu, ladúgüña adultériu, mámarúgaali ligía ladúga tagámaridun ligíbuagun, le gíñe agámariduti wúri to ígiraguaaru, ladúgüña gíñe adultériu.

¹⁰ Ábati jaríñagun láni disípulugu lun.

—Ánjein ítara líña lubei luáguti wügúri túma lúmari, buítimaati lubei lun magámaridun jamá gürígia.

¹¹ Ába laríñagun Jesús joun.

—Másutiña gayára jabágaridun mámariga, ja rügúñanu únbaña rújali lan Búngiu ubáfu.

¹² Amuñegueinarügüti lébuna magámaridun jamá wügúriña, añájein, ítargubeíñanu lúmagiñe jagúriajoún, jíbiri, adúgúwarügüti joun, jíbiri, reideitiña magámaridunga lun jedéregeregagun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü

(Mr 10.13-16; Lc 18.15-17)

¹³ Ába janügúniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeínja joun ja anáajabaliña. ¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladúga ja jarúmabaña afíñe quei irájüñü, jagía lílana arúejani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

Ladímurejan ában wügúri ñúraügili lúma Jesúsu

(Mr 10.17-31; Lc 18.18-30)

¹⁶ Ába lídin ában wügúri ñúraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadúgüni lun nibíjini ibágari le magúmuchaditi?

¹⁷ Ába laríñagun Jesúsu lun.

—¿Ca uágu baríñaga nun “buíti”? Ában rügúñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

¹⁸ Ába laríñagun wügúri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá wúri gámaritu, míwerujabá, madímurejabá iyéeni luágu ni ában, ¹⁹ in-ébe jamá bagúbürigu bun, jínsiñe jagíame gürígia bíledigu bun quei bínsiñegua búngua.

²⁰ Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin írisini siélu, ábame biábin, ábame bafálarunina.

²² Dan lagáambunbalin wügúri ligía cátei le, májati, ladúga weíribalin Jesúsu cába lan ladúgti lírisin, ába lídin láu íruni.

²³ Ábati laríñagun Jesúsu joun láni disípulugu.

—Nínárün jáu luágu jénreengu lan lun lebélorun ában rísiti lídoun arúejani le lánina siélu. ²⁴ Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügú láu lebélorun ában rísiti lídoun arúejani le lánina siélu.

²⁵ Dan jagáambuni disípulugu cátei le, ába laweíridun jan-balin Jesúsu cába lan ladúgigi sarágu, ába jálügüdagun jámagua.

—¿Cáteiti gayáraabei lasálbarun?

²⁶ Ába laríñaguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayára lumúti sun cátei adúga.

²⁷ Ábati laríñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸ Ába laríñagun Jesúsu joun.

—Nínárün jáu luágu lídan lánme dan ligía dánme iséri lan sun cátei, dánme le nañúurun, áu le Wügúri Garaúwarügüti luágu nála yágüta siélu lun narúejan láu sun nuweírigun, jugúya le afálarubalina jañúuruba gíñe luágu dúusu jalaú lun jagúseragüdüniña dúusugubei láni Israél türíbu. ²⁹ Súnti ja ígiraañábaña jában, o jamúlenu, o játunu, o jagúbürigu, o jasáanigu, o jamúan, nuágu, jerésibiruba san weíyaasu lánwoun, resíbi jameíme ibágari magúmuchaditi. ³⁰ Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúnibaña guetó, jagíaba furúmiñe.

Jémpulu jawáguti ñadágimeintiña

20 Ába laríñagun Jesúsu.

—Ítara líña arúejani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu. ² Ába ladúgün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu. ³ Lárigiñe, ábaya láfuridun quei buri ladaúnrün néfu bináafin, ábaya ladárirun ámu wügúriña mafísiutetiña, mágidirugu. ⁴ Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába jóúdin. ⁵ Ábaya láfuridun amídirugu, furí ligía ladaúnrün úrúwa rábounwéyu, ligía méme ladúga. ⁶ Quei buri ladaúnrün seíngü rábounwéyu, ábaya lídin mágidirugu, ábaya ladárirun wügúriña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷ Ába jaríñagun lun. “Úgagili ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.” ⁹ Ábati jayábin ja atátirubaña ñadágimein quei buri ladaúnrün seíngü rábounwéyu, ába jibíjin fiádürü cáda ában. ¹⁰ Lárigiñe, dan le lachúlürün jadáani ja atátirubaña furúmiñe, ába jarítagun luágu gíbetimaabei lan jabíjin. Ába gíñe jabíjin fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñúbinbaña agúmujoúni, ában rügúñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísüga sun wéyu.” ¹³ Ába loúnabun labúreme ichári, ába laríñagun lun ában jádaangiñe. “Numáda, máma nadúgüña ni murúsun maríchaü jun. ¿Ma funági luágu ában fiádürü jadúga darádu núma?” ¹⁴ Barújumei jiseínsun, jeíba. Nafáyeirunüna ja atátirubaña agúmujoúni quei nafáyeirunün ladúga ítara líña lan nabúseerun. ¹⁵ ¿Maríchatina funági lun nadúgüni le nabúseerun láu niseínsun? ¿Ódi gimúgatün ladúga nubuídun?” ¹⁶ Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñábaña guetó, jagíaba

agúmujoúni. Ladúga sarágu jáña agúarútiña áni mí-betiña anúadirútiña.

Ladímurejaanya Jesúsu luágu loúnwen

(Mr 10.32-34; Lc 18.31-34)

¹⁷ Dan le niján lan Jesúsu luágu úma lun Jerusaléoun, ába ladíñurun jáu láni dúusu disípulugu jawei ja jíbiri gürígia ja luágubaña úma úara jáma, ába laríñagun joun.

¹⁸ —Quei lubei jaríjini, aweínreina wáña Jerusaléoun le ñíba lubei nedégerúa, áu le Wügúri Garaúwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiadirunina lun noúnwen. ¹⁹ Ábame jedégerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe ouweni luágu lúrúwan wéyu.

Le tamúriajabei jáguchu Jacóbo láu Juan lúma Jesúsu

(Mr 10.35-45)

²⁰ Ábati tíabin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleisei lúma. ²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe bouwenren, ában lueígiñe bubaúna yágüta lídan barúeijan.

²² Ába laríñagun Jesúsu joun.

—Ibídiñeti jun ca lan jamúriajabei. ¿Gayáraati jawánduni luweírni igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabei.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe noúnwenren lúma lueígiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalin jíbiri díisi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguarügü jdaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ ítara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu.

Lareídaguagüdün Jesúsu bián maríjintiña

(Mr 10.46-52; Lc 18.35-43)

²⁹ Dan le áfurideina jabei Jesúsu jáma láni disípulugu Jericógiñe, sarágu jáña gürígia afálaruti Jesúsu.

³⁰ Níñanu bián maríjintiña ñun lárú úma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladúgawagun Davíd, gudéme wamá bun!

³¹ Ába jadeínjan gürígia joun lun jámanichun, ligíati-ma jagúaragun.

—¡Wabúreme, ladúgawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadúgün jun?

³³ Ába jaríñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

Lebélurun Jesúsu Jerusaléoun

(Mr 11.1-11; Lc 19.28-40; Jn 12.12-19)

21 Dan le yaráfaaña lubei lun Jerusalén, ába jachúlürün ligíbugiñe fulásu le gíribei Betfajé, le únabubei libíti wúbü le Olívos, ² ába laríñagun Jesúsu joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, jadáriruba ában burígü güráñu ñi láu ában liraúraü burígü túma, ábame jafáragaduniña, ábame janúgüniña nun. ³ Ánjein ñi adímurejati jun lueígiñe jadúgüni, ábame jaríñagun lun luágu busén lániña Jesúsu, luágu láguyugüdúbaña lan.

⁴ Lasúseredunbei líra lun lagúnfulirun lé meja laríñagubei proféta dan le labúrújanbei ítara.

⁵ Aríñaga jumá lun ubúrugü Sión.

“Niteín Burúeite bun láu únabuni, waríñu lanágawagu ában burígü, waríñu luágu ában liraúraü burígü, ánimaalu anájati ílaü.”

⁶ Ába jóúdin disípulugu, ába jadúgüni quei laríñaguni Jesúsu joun. ⁷ Ába janúgünun burígü tugúya láu sun tiraü, ába jíchugunun janáangun jawágu, ába lawárirun Jesúsu. ⁸ Sarágu jañáti gürígia, ába jábudunun janáangun luágu úma, jíbiri, ába jáchujan tilímun wéwe, ába jíchaajani luágu úma. ⁹ Dándu gürígia ja ubáraúbaña quei ja árigibaña, ába jagúmeserun agúaraja.

—¡Uweírighuni lun ladúgawagun urúei Davíd! ¡Biníwati wügúri le ñúbinbei lídan líri Wabúreme Búngiu! ¡Uweírighuni lun Búngiu!

¹⁰ Dan lebélurun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisán gürígia le?

¹¹ Ába jaríñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünun Jesúsu témpulu

(Mr 11.15-19; Lc 19.45-48; Jn 2.13-22)

¹² Lárigiñe, ába lebéllurun Jesúsu tídon lání Búngiu témpulu, ába labúgaguniña sun alúgurajatiña jáma agáñijatiña ja ñibaña. Ába lagáraguni dábula buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába laríñagun joun.

—Laríñajare Búngiu tídan Lerérun. “Núban fulásu le ñí lubei gayára lan jayúmuragun gürígia nun”, ánjein jugúya, barú jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña. ¹⁵ Dan le jaríjinbaalin jábutigu fádirigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweiriguni lun ladúgawagun urúei Davíd!”, ába jagáñidun. ¹⁶ Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ñí lubei laríñawagúla lun Búngiu. Adúgaadibu lun jerémujan ñúbürigiña jáma irájüñü ja machúlaagiña, cátei buíti buágu?

¹⁷ Ába lígiriñe, ába lídin ubúrugugiñe lun Betánioun, ába lásügürüni áriebe ñi.

Líñaragunun Jesúsu tídibu ígo to míinboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lálámachun. ¹⁹ Ába laríjin ában tídibu ígo láru úma, ába lídin tuágun, madáriti ni cáta tuágu lueídügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaürün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaürübei tídibu ígo to ítara oúfun?

²¹ Ába laríñagun Jesúsu joun.

—Nínárün jáu, ánjaün affíñe le gumúti, mámarügubei líbe le nadúgübei tun tídibu ígo to gayára jumá adúga, gayáraabei jaríñagun lun wúbü le. “Gidába yágiñe, dabúba baránajoun”, ábame lasúseredun. ²² Súnme gíñe cátei le jamúriajan lúma Búngiu, ánjein affíñe jubei, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebéllurun Jesúsu témpulurugun, dan niján lan arúfudaja ñi, ába jayábin jábutigu fádirigu jáma wügúriña ábutigu lídan jafíñen juríu, ába jaríñagun lun.

—¿Aríñagabeí woun ca lan biríchabei lun badúgüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün gíñe ában cátei, ánjein jóunaba nun, ábame naríñaguni jun ca lan áu ubáfu nadúgei buri cátei le. ²⁵ ¿Ca óunajabalin Juan abásteragúdaja? ¿Búngiu, ódi wügúriña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu mafíñerun wabeí lun.

²⁶ Ánjawa aríñaga luágu jóunajan lan wügúriña, jóuserubadiwa gürígia wuríba ladúga súngeubei affíñetiña luágu proféta lán.

²⁷ Ábati jaríñagun lun Jesúsu.

—Íbídiñeti woun.

Ába giñeti laríñagun joun.

—Maríñagun nubeí giñeti jun ca lan áu ubáfu nadúgei buri cátei le.

Jémpulu jawágutí bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Níñein ában wügúri, bíamañanu lisáanigu. Ába laríñagun lun ában jádaangiñe. “Niraú, beíba ñadágimein ugúñe lídan talúbajóun ninádirigu.”

²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítangun, ába lídin ñadágimein. ³⁰ Lárigiñe, ába lídin úguchili aríjei le ában, aríñageinaleí le méme laríñagubei buga lun le furúmiñeti lun. Ába loúnabun le. “Ánja, nídiba.” Mídin-ti. ³¹ Aríñaga jumeí nun, ¿cági jádaangiñe bíangubei adúgübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Nínárün jáu luágu choúrutima lan jebéllurun agúburajatiña liseínsuna gumádi jáma jórugun lídoun larúeijan Búngiu sùgú jáu, ³² ladúga ñúbinti Juan le abásteragúdajabei arúfudaja jun ída lúba lan ligáburu jabágaridun, mafíñeruntün lun, ánjañati ja agúbura-jabaña liseínsuna gumádi jáma jórugun, affíñeratiña lun. Jugúya, láu sun aríja jumáni sun líra, masáansiragunti jigáburu lun jafíñerun lun.

Jémpulu jawágutí ñadágimeintiña ja wuríbabaña

(Mr 12.1-12; Lc 20.9-19)

³³ Agáamba jumeí ábaya jémpulu le. Luágutí ában wügúri labúreme ában ichári, ában lábunagun tídibu beíbei lichárirugu, ába ladúgün baríeru láu, adúga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani ichári joun ñadágimeintiña, ába lídin adúga weíyaasu. ³⁴ Dan le lachúlürün dan lun alúba-jani, ába loúnajan jádaangiñe lumúsuniña amúriajei lufánran jámagiñe ñadágimeintiña. ³⁵ Ábarüga jarügüdüniña ñadágimeintiña músu jagía, buleísei

jamei ában, áfara jamei ában jilágubei, rúgua jagía dúbü luágu le ában. ³⁶ Ábaya loúnajan labúreme ichári gíbetimaajaña sügú jáu ja loúnajabaña furúmiñe, ligía méme jadúga ñadágimeintiña joun.

³⁷ Agúmujoúni, ába loúnajani liraú, ába laríñagun lúnguarügü. “Inébebei niraú joun.” ³⁸ Dan le jaríjin-baalín ñadágimeintiña liraú, ába jaríñagun jámagua. “Nijánba le erésibirei alágan, wáfaraali jilágubei, reidei wamámuga láu alágan.” ³⁹ Ábati jarügüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdjagan Jesúsu.

—Dánmeti liábin labúreme ichári, ¿cábagi ladúga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatíña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntíña jedéregeruni lufánran lun lídaangiñe alúbajani lídan dan.

⁴² Ábati laríñagun Jesúsu joun.

—¿Malíjañaña jumágiru Lerérun Búngiu? Taríñajare nuágu.

Le meja dúbü le mabúseerun jabeí ábunagutiña, ligiaali furúmiñeti.

Wabúreme Búngiu adúgübalin lun furúmiñebei lan, áni aríja wamúti quei ában cátei weíriguti.

⁴³ Ligía naríñagunbei jun luágu lagídarúba lan larúeijan Búngiu jueí, jugúya le weírigubei lídan jafíñen juríu, ábame líchugúniwa joun gürígia ja edéregeruti alúbajani le lání larúeijan Búngiu. ⁴⁴ Ánjeinti áu, le dúbü ligía, furúmiéguarügü le eíguaduti nuágun lañaúrudagúba, léti uáguti leíguada nigáñi, lagúmuchaaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádírigo jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. ⁴⁶ Ábati jabúseerún yebe jarügüdüni, madúgün jamúti ladúga janáfude jawei gürígia, ladúga afíñe jamá gürígia luágu proféta lan.

Jémpulu luáguti maríei

22 Ábaya lagúmeserun Jesúsu adímureja joun láu jémpulu, ába laríñagun joun.

² —Nijánya ában jémpulu luáguti arúeijani le lánina síelu. Níñein ában urúei adúgüti ában fédu lubá lamárieidun lisáani. ³ Ába loúnajaniña lumúsuniña ougaña amísurajoútiña, májatiña amísurajoútiña jayábin. ⁴ Ábaya loúnajan ámu músu, ába laríñagun joun.

“Aríñaga jumá joun amísurajoútiña luágu aráanseeli lan eíginí. Áfaragüda náaña bágasu jáma nilúgüniña anímaalugu dibúnetiña, aráanseeli sun cátei, lun jayábin maríeirugu.” ⁵ Madúgüntíña amísurajoútiña gásu. Ába lídin ában jádaangiñe lichárigu, ñüdün ában adúga ámu wadágimanu, ⁶ ja jíbiri, ába jarügüdüniña lumúsuniña urúei, ába jóuseruniña wuríba, ába jáfara-guniña jilágubei. ⁷ Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸ Ába laríñagun

joun lumúsuniña. “Aráanseeli sun cátei lun maríei, áni amísurajoútiña jagúra madúnamatiña lun jamísurajoúniwa. ⁹ Jeíba lubeíti luágu buri larígei úma, ábame jamísurajaniña sun ja úmatiña jadúnragua.” ¹⁰ Ába jóudin músu luágu buri úma, ába jóundaruniña sun ja úmabaña jadúnragua, buítiña jáma wuríbatíña, ába tabuínchun múna jáu gürígia.

¹¹ Ábati lebélorun urúei aríjaña amísurajoútiña, ába laríjin ában wügúri le madáuragunti quei lun ában maríei ñi. ¹² Ába laríñagun lun. “Numáda, ¿ída liñági bebélorunbei ñájoun madáuragunga quei lun ában maríei?” Maní ligía. ¹³ Ába laríñagun urúei joun ja eténirubaña lún buri dábula. “Gürágu jumei lugúdi lúma lújabu, fíjumei lídoun lubúriga le bougudíbei, le ñíba lubei layájuaja, acúnrijame lári.” ¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebélurun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi

(Mr 12.13-17; Lc 20.20-26)

¹⁵ Ába jóudin fariséogu, ába júradun aríja cába lan gayára lan jadúgün lun jaríñagagüdüni Jesúsu cátei le uáguti gayára lan jadárirun lidúnrun. ¹⁶ Ábati jóunajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladúga ni cáta lan luweírigan gürígia bun. ¹⁷ Rúbei lubeíti barítangun woun. ¿Búitisan lun lafáyeirúniwa seínsu lun urúei Rómana ódi mabuídunti?

¹⁸ Aríagu líña Jesúsu lun luríba jayúmajan, ába laríñagun joun.

—¿Bíangua tigíbu jugúya le! ¿Ca uágu jíchaaja sádara nubá? ¹⁹ Arúfuda jumei seínsu le áubei lafáyeijoúa liseínsuna gumádi nun.

Ába janúgün ában seínsu le denáriu lun. ²⁰ Dan laríjini, ába lálügüdüniña.

—¿Ca iyáwa le luágubei seínsu le, lúma íri le bürúwañubei luágu?

²¹ Ába jaríñagun lun.

—Lání urúei Rómana.

Ábati laríñagun Jesúsu joun.

—Rújumeiti lání urúei lun urúei, rújumeime lání Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába jóudin.

Álügüdjani libúgürü ásaaruni lídaangiñe ouweni

(Mr 12.18-27; Lc 20.27-40)

²³ Wéyu méme ligía, ába jóudin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe ouweni. Ábati jaríñagun lun Jesúsu.

²⁴ —Maésturu, aríñagatí meja Moisés luágu ánjein lan ouwe ában wügúri le maríeiti masáaniguga táu lúmari, lúnti lan lamárieidun lamúlen túma wúri to ueiboun louwe, lun gasáanigu lan táu lun líbugaña le

ouwebei. ²⁵ Wel, ñíñanu méjati sédū gamúlenuguátiña ya wádan, ába lamárieidun le furúmiñeti, ába loúnwen. Quei masáanigu lubei táu lúmari, ába lígurunun lun lamúlen. ²⁶ Ligía méme suséreti lun jabíaman, lárigiñe lun júrwun darí lúmoun jasédun. ²⁷ Lárigiñe, ába gíñe touñwen wúri. ²⁸ Dánmeti jásaarun lídaangiñe ouweni, ¿cábati úmari wúri tugúya jádaangiñe sédū gamúlenuguátiña ja, lárigiñe maríei jamá sun jagía túma?

²⁹ Ába laríñagun Jesúsu joun.

—Bulfeiguatūn ladúga libídiñe tuáguti Lerérun Búngiu jun, ni luáguti lubáfu Búngiu. ³⁰ Dánme le jásaarun jiláaña lúnya jabágaridun, ámulalime jabágarí, magámaridun jába, míchugun jamáñame jasáanigu lun maríei, queisi magámaridun jamá ánjeligu siélu. ³¹ Ánjeinti luágu sará jamá jiláaña lúnya jabágaridun, ¿malíjan jumágili le laríñagubei Búngiu gúanarú jun? Ítara líña laríñagun. ³² “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeiti, ánjein jamúga jiláaña jáña lubei wúgúriña jagía lun sun dan, maríñagunti jamúgati Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wínwangiña.

³³ Dan jagáambunbalin gúriña cátei le, ába laweíridun janígi láu le larífudajabei.

Gumádi le weírigutimaabei

(Mr 12.28-34)

³⁴ Dan le jasúbudirunbalin fariséogu luágu manígüda láaña lan Jesúsu saduséogu, ába jóundaragun, ³⁵ ñíñein ában jádaangiñe le arífudajati lilúrudun Moisés, abúseeruti laríjin lábun Jesúsu, ába laríñagun lun.

³⁶ —Maésturu, ¿cásan gumádi weírigutimaabei lídan lilúrudun Búngiu?

³⁷ Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.” ³⁸ Niján gumádi weírigutimaabei, furúmiñeti gíñe lídaangiñe sun lugúmadin Búngiu. ³⁹ Áni le libíaman lídan uweíriguni lenége le, itara líña. “Jínsiñe jamá bíbirigu bun quei bínsiñegua búngua.” ⁴⁰ Bián gumádi le, ligía ébuubei lun sun lilúrudun Moisés lúma jarífudajan profétagu.

¿Ca adúgawagun Crístu?

(Mr 12.35-37; Lc 20.41-44)

⁴¹ Sun añája lan fariséogu oundaragu, ⁴² ába laríñagun Jesúsu joun.

—¿Cásan jaritagubei libúgürü Crístu le lanúadirubei Búngiu lun lasálbaruniña gúriña? ¿Cásan adúgawagun?

Ába jaríñagun lun.

—Ladúgawagun Davíd.

⁴³ Ábati laríñagun Jesúsu joun.

—¿Ída liñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴ Laríñajare Búngiu lun Nabúreme.

“Ñurúba núma lueígiñe noúnwenren

daríme níchuguniña báganiñu bújaburugun.”

⁴⁵ ¿Ída lubáti ladúgawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati loúnabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

Líchugun Jesúsu jadúnrun fariséogu jáma arífudajatiña lilúrudun Moisés

(Mr 12.38-40; Lc 11.37-54, 20.45-47)

23 Ábati laríñagun Jesúsu joun láni disípulugu jáma jíbiri gúriña ja ñíbaña.

² —Gabáfutiña arífudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeiti, adúga jumeíme sun le jaríñagunbei jun, le jadúgübei, mafálara jumeí ladúga aríñagatiña ában cátei, jadúga ámu. ⁴ Rújamuti gumádi joun gúriña queisi anúgüni júrüti le siñábei lanügúniwa, ánjein jagía, madúgüntiña ni cáta lun jéderaguniña gúriña luágu buri anúgüni lánina lúrudu le jíchugubei jawágu. ⁵ Jadúgüni sun cátei lun jaríjiña gúriña. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarúna, lúma lun jadáuragun anáanguni to durúrutu. ⁶ Buséntiña járügüdüni lubuídun-ágei ubáraü lídan eígni lúma jalaú le jála weírigutiña tídan jalígilisin. ⁷ Buséntiña lun jabúsurun gúriña joun láu sarágu inébesi úmada, lun gíñe lagúarúniwa joun, “maésturugu”.

⁸ Ánjein jugúya, mígira jumá lun laríñawagúniwa jun, “maésturugu”, ladúga sun jugúya ában jáu, áni ában rügúñein gíñe Jumaésturun, áu le Crístubei. ⁹ Maríña-ga jumá gíñe “núguchi” lun ni ában wúgúri ubouágu lídan ligáburi jagúaruni Búngiu le siélubei “Núguchi”.

¹⁰ Mígirun jugúyame lun laríñawagúniwa jun “ábutigu” ladúga Crístu rügúñein jábuti. ¹¹ Le esériwidubei joun jíbiri, ligía weírigutimaabei jídan, ¹² ladúga le anáanguti lúngua weíri, lúnabudagüdüwaba, ánjein le anáanguti lúngua únabu, laweíridagüdüwaba.

¹³ ¿Fugiábugu jugúya arífudajatiña lilúrudun Moisés jáma fariséogu! ¿Biángua tigíbu!, ladúga darú jumuti lubéneri arúejani le lánina siélu luei jebélurun ámu, mebélu jugúyati, mígirun lun jebélurun ja busénbaña jebélurun.

¹⁴ ¿Fugiábugu jugúya, arífudajatiña lilúrudun Moisés jáma fariséogu! ¿Biángua tigíbu! Gídá jumutu jában wúriña ja jiláaña úmari jaweí, lúnti ibidiñewa lan, ába jadáagun ayúmuraguni lun Búngiu le migínaguti. Ligía weíritimaabei lubei jasúfurirun lueígiñe.

¹⁵ ¿Fugiábugu jugúya arífudajatiña lilúrudun Moisés jáma fariséogu! ¿Biángua tigíbu! Eíbuga jumúti múa, áfayaja jumeí barána áluaja gúriña lun jánigume, dánti le íbija jumáali le jabúseerubei, ába jadúgüniña gúriña jagía bián weíyaasu lúntima jóúdin máfiougati sügú jáu.

¹⁶ ¿Fugiábugu jugúya, adúndejetiña maríjintiña! Aríñagatūn luágu le lan gúriña íchuguti dimúrei, ánjein áfiñura tuágu témpulu mála lan líra, áni ánjein lan áfiñura luágu tigóluna témpulu, aná lan líra, lúnti lan

lagúnfulirun. ¹⁷ ¡Ibidiougua líña jáu, maríjin! ¿Cági weírigutimaabei, gólu ódi témpulu to adúgüboun lun sagráubei lan gólu? ¹⁸ Aríñagatün gíñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdüwabei luágu latárü, aná lan líra, lúnti lan lagúnfulirun. ¹⁹ ¡Ibidiougua líña jáu, maríjin! ¿Cági weírigutimaabei, cátei le luágubei latárü ódi latárü le adúgübalin cátei ligía lun sagráubei lan? ²⁰ Le áfiñurubei luágu latárü, máma rügñein luágu latárü láfiñurun, láfiñuruña gíñe luágu sun le ligibuagubei latárü. ²¹ Le gíñe áfiñurubei tuágu témpulu, máma rügñein gíñe tuágu témpulu láfiñura, láfiñuruña gíñe luágu Búngiu le aganoúbei títan. ²² Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaú ligía.

²³ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, quei buri lun jadúgüni sun cátei láu úaraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadúgüni, mígirunga jumeíme jadúgüni le líbiri. ²⁴ ¡Jugúya, adúndejatiña maríjintiña jugúya le, áseija jumúti ában mínimíni áni julútün ában caméyu!

²⁵ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün lun jarítangun gürígia luágu buídu lan jigáburí. Ítara jíña quei wéru lúma asíedu le jachíbubei bougudigiñe libíti, ánjein múnadagiñe jibíti, buin jíña láu buri luweínamuágu lúma íweruni. ²⁶ Fariséogu maríjintiña. jarúmagüda jumeí wéru lúma asíedu lurágeirugugiñe furúmiñe, ábame gíñe larúmadun bougudigiñe libíti.

²⁷ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijoúti láu jarúti bougudigiñe libíti, buídumeraüti laríjin, ánjein lurágeirugugiñe, buín líña láu jábu jiláaña lúma sun luwúyeri iwíyei. ²⁸ Ítara jíña, bougudigiñe jibíti, ma lubúidun jaríjiniwa jagíbugiñe gürígia, ánjein múnadagiñe, buín jíña láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dúbü arítaguagüleime luágu jamúaja profétagu, wéndegüda jumeí umúajaü le jáni gürígia já meja buídubaña.

³⁰ Ábati jaríñagun. “Lun jamúga meja awánjeinjadiwa lan le jadáani binádu wagúbürigu, míderagun wamútiña jamúga áfaraguaña profétagu.” ³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía. ³² ¡Gumújumeiti jadúgüni le meja jagúmeserubei binádu jagúbürigu adúga!

³³ ¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati? ³⁴ Ligía nouñajaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe,

dágua jumáñame jíbiri luágu gurúwa, bei jumáñame jíbiri tídan jalígilisin juríu, eíbaaja jumáñame lídan sun fulásu. ³⁵ Ítara lúba láburijan dúru juágun luágu sun jítaü le áwiyurubei jádaangiñe sun wügúriña buítiña ja jáfarawagúbaña, lúmagiñe meja Abél le richáguabei darí lúmoun Zacarías, liraú Berequías lé meja jáfarubei tabádinagua témpulu lúma latárü. ³⁶ Ninárün jáu luágu láburijaba lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén

(Lc 13.34-35)

³⁷ ¡O jugúya Jerusalénna! ¡Áfaragua jumáaña profétagu, chúgua jugúya dúbü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁸ Ígira láadün Búngiu, ³⁹ áni naríñajare jun luágu maríjindügüya jumáadina lan queisi jasálbaragüle daríme lachúlürün dan lun jaríñagun. “Biníwate le ñúbinbei lídan líri Wabúreme Búngiu.”

Laríñagun Jesúsu luágu tagúnrinchawagúba lan témpulu

(Mr 13.1-2; Lc 21.5-6)

24 Dan le láfuridun Jesúsu témpulurugugiñe, leibuga yebe, ligía jayábin láni disípulugu lúmoun, ába jarúfudun tuágun témpulu lun. ² Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuagu dúbü, tagúnrichawagúba sun to.

Seíni buri lubáragiñe lagúmuchun ubou

(Mr 13.3-23; Lc 21.7-24, 17.22-24)

³ Ábati jóudin luágu wúbü Olívos, dánti ñun lan Jesúsu ñi, ába jóudin láni disípulugu agúlülüja lúma, ába jaríñagun lun.

—Buséntiwa lun baríñaguni woun ídaba lan tagúnrinchawagúba témpulu. ¿Cába liseíni bagíribudun ubouagun, lúma lagúmuchagüle?

⁴ Ába laríñagun Jesúsu joun.

—Tóunigi jumá lun úa lan ayéedutün, ⁵ ladúga sarágujaba ñúbintiña aríñageina. “Áu Crístubei”, áni sarágujaba jayéedun. ⁶ Jugúya jagáambuba lamúri wuríbu yaráfa jun lúma ugánu luagutí buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle ubou líra. ⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, járabaganáli lídan sarágu fulásu. ⁸ Sun líra lagúmesejarügügili le lúnbei lasúfurirúniwa.

⁹ ¡Jugúyati, jedéregurúaba lun lúrudu lun jasúfurirawagüdü, lun gíñe jáfarawagúniwa jilágubei, jiyéeregudúba lun sun ubou nueígiñe. ¹⁰ Lídaanme dan ligía, sarágujaba eféridiruti jafíñen nuágu, ábame jeyéeregudün jóuniwagua, ábame jalúguragun jóuniwagua. ¹¹ Jachúlaaguba sarágu yéetiña aríñaga luágu

profétagu jamá áni sarágujaba gürígia jayéedun.

¹² Níbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua.

¹³ Le asígiruti derégüdagu darí lúmoun lagúmujoún, lasálbarúba. ¹⁴ Lapúrichijóuba ugánu buíti le luáguti larúeijan Búngiu lídan sun uboú lun lasúbudirúniwa lídan sun fulásu, ligíaalímeti lagúmuchun uboú.

¹⁵ Abúrújatí meja proféta Daniél luágu cátei iyéereguti le gagúnrinchaguagüdadabei, dánme le jaríjin chúlújali lan cátei le lídoun fulásu le sánduti—le alíijabei, gunfaráandalá—, ¹⁶ jámeti Judéabaña, lúntime janúrajan luágun buri wúbü. ¹⁷ Léme tábulugubei lúban wéyu ligía, maráriralá aságara ni cáta múnadagiñe, ¹⁸ le áraabubei, magríribudalá ni abúdoun lanáangu. ¹⁹ ¡Fugiábugume wúriña ja dageínatiña o ja lan gasáanigutiña ja gurágiña lídounme wéyu ligía!

²⁰ Amúria ja jumá lúma Búngiu lun máma lan lídan lidíliga ni lídan luwéyuri eméaaguni janúraja. ²¹ Ladúga ñíbei sarágu sáfuri le úagili líbe lúmagiñe lagúmeserun uboú, úabei gíñe lárigiñe. ²² Lun jamúga madúraagun lubeí lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ “Ánjein lubeíti aríñawagua jun. “Niján Crístu” o “Ningitán lan”, mafíñera jumá, ²⁴ ladúga jayábinba ayéejatiña lun jarúfudagun jóungua camá Crístu, camá buri profétagu, áni jadáaguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára. ²⁵ Aríñaga náali le jun lubáragiñe lasúseredun, ²⁶ ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, mafíñera jumá. ²⁷ Quei laríjiniwa labírichagun lueígiñe ában oúbaü libíti siélu lun luágun le ában, ítara lúba dánme le niábin, aú le Wügúri Garaúwarügüti. ²⁸ Ábame láburujan ligáñi Búngiu jawágun gafígountiña quei wadúbi luágun úgubu jiláali.

Seíni buri lubáragiñe lagríbudun Crístu uboúagun

(Mr 13.24-37; Lc 21.25-33, 17.26-30, 34-36)

²⁹ Lárigiñerügüme lásügürün wéyu buri lánina sáfuri ligía, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladádagarun sun siélu. ³⁰ Ábame jaríjini niseíni siélu, súnme gürígia wuríbatiña uboúagu, jayájuajaba láu jaríjini niábinya, áu le Wügúri Garaúwarügüti, lídan juánriñu siéluigiñe láu oúnwenbun ubáfu lúma uweírugini. ³¹ Dánme línwirúniwa fídu rein, ábame noúnajaniña náni ánjeligu ja siélubaña lun jóundaruniña nánigu ja anúadira náañabaña lídaangiñe gádürü larígei uboú.

³² Furéndeí jumeí jémpulu le tuáguti tídibu ígo. Dan le ñulúgili tilímun, ába laboúchun tubána, subúdi jumúti luágu yaráfaali lan lubáchouga. ³³ Ítara méme, dánme gíñe jaríjini sún buri cátei le, subúdi jumeí luágu yaráfaali lan niábin. ³⁴ Ninárün jáu, luágu lagúnrinchawagúba lan sun ubúrugu le Jerusalén lubárag-

iñe jóuwegun gürígia ja lánina dan le. ³⁵ Lagúmuchaguba siélu lúma uboú, ánjein nerérun, merédebei magúnfulirúnga.

³⁶ “Ánjeinti luágu wéyu lúma óra le lúnbei nagríribudun uboúagun, ibídiñeti ni ca un, ni joun ánjeligu ja siélubaña, ni nun, áu le Liraú Búngiu, Búngiu rügúñein Úguchili asúbudirei.

³⁷ Ítara queí meja lasúseredun lídan meja lidáani Noé, ítara lúba gíñe dánme le niábin, áu le Wügúri Garaúwarügüti. ³⁸ Lídan meja dan ligía, lubáragiñe ladíbirun uboú, jerédera meja gürígia eíga, áta, amárieidagua, íchaajaña jasáanigu lun maríei, darí wéyu le lebélorunbei Noé tídoun ugúnein. ³⁹ Meféentiña, darí ladíbirun uboú, ába jañáradagun súngebui. Ítara lúba gíñe dánme niábinya, áu le Wügúri Garaúwarügüti uboúagun. ⁴⁰ Lídaanme dan ligía, ñíbaña bián wügúriña áraabu, lanúgúba ában, igirúame le ában según jafíñen nuágu. ⁴¹ Níbaña bián wúriña amúlija, tanúgúba ában, igirúame to ában.

⁴² “Agágudúañu jumá, ladúga ibídiñeti jun cába lan óra niábin, áu le Jabúreme. ⁴³ Subúdi jumeí le, luágu ánjein lan jamúga lasúbudira tabúreme ában muna cába lan óra liábin jíweruti áriebu, leréderuña jamúga marúmugunga, mígirunti jamúga lun lebélorúniwa íweruja lúbiñe. ⁴⁴ Ligía aráanseñu jumá lubeí, ladúga léme óra magáradajan jumá, ligíame niábin, áu le Wügúri Garaúwarügüti.

Músu le úaraguabei, lúma le múaragúnbei

(Lc 12.41-48)

⁴⁵ Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eíginí joun lídan dan. ⁴⁶ Gúndaabei músu le dánme le liábin liyúbudiri ánjein ladárida agúnfulira lúma lífisiute. ⁴⁷ Ninárün jáu luágu líchugubei lan liyúbudiri lun laríjin láu lumégen. ⁴⁸ Ánjein ában lubeí wügúri wuríbati músu ligía, ábame larítangun luágu lúgili lan liábin liyúbudiri, ⁴⁹ ábame lagúmeserun oúserañe jíbiri músu wuríba, reídei ligíame eíga lúma áta jáma bacháruatiña, ⁵⁰ ábame liábin liyúbudiri lídan wéyu le magúrabun láani, lídan óra le ibídiñeti lun. ⁵¹ Ábame líchuguni luweírín-ágei abeichúni luágu, lasiadireime lun máfiougatin úara jáma biángua tigibu, ábame layájun, acúnrijame lári.

Jémpulu jawáguni díisi wúriña irájüñü

25 Ába laríñagun Jesúsu.

—Ítara lubáti arúeijani le lánina siélu quei díisi wúriña irájüñü ja anúgúbaña jalámpun le gálati gási, ába jáfuridun lun jadúnragun lúma adári, ñúdün jamámuga úara lúma maríeirugun. ² Seíngü jádaangiñe, maráanseruntiña, seíngü aráansetiña. ³ Ja maráanserunbaña, dan le janúgünbalin jalámpun, manúgüntiña ámu gási lueí le lídaanbei jalámpun, ⁴ ánjañati ja aráansebaña, barútiña jabúdein láu gási bougudin lueí le lídaanbei jalámpun. ⁵ Queísiti ladárasarun adári, ába ladábudunga jágu súngebui, ába jarúmugun. ⁶ Queí buri luágu amídi áriebu, ligía

lagaambúniwa agúaraguni. “Niteín adári, furíjuma adúnraguei.”⁷ Sun wúríña irájüñü jagía, ába jásaarunga, ába jagúmeserun aráansejei jalámpun.⁸ Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladúga léñeguchuña walámpun.”⁹ Ába jaríñagun ja aráansebaña joun. “Siñáti, ladúga louguabei woun, louguame jun. Jeíbagubei le ní lubei lalúgurajoúa agáñija jumámuga júngua.”¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma maríeirugun, ába ladaurúniwa béna.¹¹ Lárigiñe, ligía jachúlürün jíbiri wúríña irájüñü jagía, ába jaríñagun. “¡Wabúreme, wabúreme, darábei béna wabá!”¹² Ába laríñagun joun. “Ninárün jáu, ibídiñetün nun.”

¹³ Ábati laríñagun Jesúsu joun.

—Agágudúañu jumá, ladúga ibídiñeti jun cába lan wéyu, ni cába lan óra nagíribudun, áu le Wügúri Garaúwarügüti, ubouágun.

Jémpulu luáguti seínsu

¹⁴ Ítara líña arúejani le lánina siélu quei ában wügúri le dan lébei laráansejan lun ladúgün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaaan.

¹⁵ Lun ában jádaangiñe, rúti quei buri seíngü-mílu fiádürü, quei buri bián-mílu lun ában, quei buri mílu lun ában. Lafánreinjani joun quei jabáfu lun jawádigi-mariduni. Ábati lídin luágu luweíyasun.¹⁶ Le músu le erésibirubei seíngü-mílu fiádürü, ába luwádigi-mariduni, ába lagáñeirun seíngü-mílu fiádürü ligíbuagun.¹⁷ Ítara méme le erésibirubei bián-mílu, gáñeiti bián-mílu lánwoun.¹⁸ Ánjeinti le erésibirubei mílu, ába lídin, ába lachígin ában júyu, ába larámuduni liseínsun liyúbudiri ñi.

¹⁹ Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu.

²⁰ Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.”²¹ Ába laríñagun iyúbudiri lun. “Buíti, ában músu buíti amúrü, úaragua, quei úaragua bubei lídan le murúsunrügüti, níchiga gíbetimaati lábugiñe baríaaan. Queímoun, gúnda amúrúme úara núma.”²² Lárigiñe, ába liábin le erésibirubei bián-mílu fiádürü, ába laríñagun.

“Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.”²³ Ába laríñagun liyúbudiri lun. “Buíti, ában músu buíti amúrü, úaragua, quei úaragua bubei lídan le murúsunrügüti, níchiga gíbeti lábugiñe baríaaan. Queímoun, gúnda amúrúme úara núma.”²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügúri ban jéreguti, alúbaja ban le ní lumuti mábunagun ban, abúdaja amúrü le ní lumuti machágarun ban ni cáta.”²⁵ Ligía nanúfudedunbei, ába nídin arámudei biseínsun lábugiñe múa. Niján le báni.”

²⁶ Ába laríñagun iyúbudiri lun. “Músu wuríbati, mouñti. Subúdigubei bíñein luágu alúbaja nan le ní lubei mábunagun nan, abúdaja áu le ní lubei machágajan nan ni cáta.”²⁷ Ligía lúnti lubei jamúga bíchuguni niseínsun báncürugun lun dan lan jamúga nagíribudun, nerésibiruni le náni láu agáñeiruni.”

²⁸ Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei díisi-mílu,²⁹ ladúga le adúgübei buíti láu le lúmabei, líchugúba lánwoun lun, ábanme lígiragun lun, ánjein le madúgübei buíti láu murúsun le lúmabei, lagídarúaba lueí.”³⁰ Músuti mouñti le, fíjumei lídoun lubúriga le bougudibeí, le ñíba lubei layájuaja, acúnrijame lári.”

Jagúseragüdúniwa sun gürígia

³¹ ‘Dánme nagíribudun, áu le Wügúri Garaúwarügüti, ubouágun, niábinba quei urúei geyégu ánjeligu náu, ábame nañúurun luágu nála láu uweíriguni lun nagúseragüdúniña sun gürígia.³² Ábame jóundaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóuniri mudún, mudún jádaangiñe gábara.³³ Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaúna.³⁴ Naríñagame joun ja lueígiñebaña noúnwenren. “Jigoúgu, jugúya le biní laalíbei Nóguchi, resíbi jumei arúejani le aráanserúbei jubá lúmagiñe ladúgüni Búngiu ubou. ³⁵ Ladúga dan le nalámachunbei, rúntün eíginini nun, dan le namágürabudunbei, rúntün dúna nun, dan le eíbugañaja nubei quei chúlúdügüti, rúntün múna nun.³⁶ Dagáti manáanguni nuágu, rúntün anáanguni nun, dan le nasándirunbei, ñúdúntün aríjana, dan le nadaürünbei, ñúdúntün aríjana.”³⁷ Ábamei jaríñagun richáguatiña jagía nun. “Wabúreme, ¿ida bugagí waríjabu láu ilámaü, ába wíchugun eíginini bun? ¿ida bugagí waríjabu láu mágürabu, ába wíchugun dúna bun?³⁸ ¿ida bugagí waríjabu quei chúlúdügüti, ába wíchugun múna bun? ¿o manáangunga, ába wíchugun anáanguni bun?³⁹ ¿ida bugagí waríjabu láu sándi o furísunrugu, ába wouúdin aríjabu?”⁴⁰ Ábame naríñagun joun. “Ninárün jáu, furúmiegurügü cátei le jadúgübei lun ában jádaangiñe namúlenu, ca lan lúnabunbei, nun méme jadúgei.”

⁴¹ ‘Naríñagamei joun ja lueígiñebaña nubaúna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méñeguchadibeí, le aráanserúbei lubá Máfia jáu lánigu.”⁴² Ladúga dan le nalámachunbei, míchutün eíginini nun, dan le namágürabudunbei, míchutün dúna nun.⁴³ Eíbugatina quei chúlúdügüti, míchutün múna nun, mégeitina anáanguni, míchutün nun, sánditina, daúwa áu, mídin-tün aríjana.”⁴⁴ Ábame jaríñagun wuríbatiña jagía nun. “Wabúreme, ¿ida bugagí waríjabu láu ilámaü o mágürabu, o quei chúlúdügüti, o manáangunga, o láu sándi, o furísunrugu, míderagun wamútibu?”

⁴⁵ Naríñagame joun. “Ninárün jáu, luágu furúmiegurügü lan cátei le madúgün jubei joun gürí-

gia, ca lan lúnabunbei, madúgün jumúti gíñe nun.”
⁴⁶ Ábame ti joúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame joúdin siélun lun jagúndaarun ñi lun sun dan.

Aráansejani lun lárügüdúniwa Jesúsu
 (Mr 14.1-2; Lc 22.1-2; Jn 11.45-53)

26 Dan aríñaga láali Jesúsu sun cátei le, ába laríñagun joun láni disípulugu.

²—Quei jasúbudiruni, bián wéyu lárigiñe le, ligíame fédu le páscua, áni nedéregerúaba, áu le Wügúri Garaúwarügüti, lun nádarawagún luágu gurúwa.

³ Ába joúndaragun jábutigu fádorigu, arúfudajatiña lilúrudun Moisés, jáma wügúriña weírigutiña lídan jafíñen juríu tigíbugiñe lúban Gáifasi, fádori le íñuti-maabei. ⁴ Ñi jaráanseja luágu Jesúsu lun járügüdüni láu yéguau, lun jáfaruni jilágubei. ⁵ Jaríñagati.

—Máma látia fédurugu lueí jachágaragun gürigia.

Tájuduraguni ában wúri lálbulugu Jesúsu
 (Mr 14.3-9; Jn 12.1-8)

⁶ Betániañein Jesúsu, lúbiñe Simón lé meja gawágubei gumeín luágu sun lúra, ⁷ ába tiábin ában wúri luágun, gámeina tugúya ában lágei ibíñei le weíruti lisérun. Dan luáguñein lan dábula Jesúsu, ába téseruni ibíñei ligía lálbulugun. ⁸ Dan jaríjinbaalin disípulugu cátei le, ába jamágundarun, ába jaríñagun.

—¿Cámesan leféridirúa le ítara? ⁹ Gayáraati jamúgagu lálugurúniwa le luágu sarágu seínsu lun jíder-awagún gudémetiña.

¹⁰ Ába lagáambuni Jesúsu le jaríñagubei, ába laríñagun joun.

—¿Ca uágu jañáwurija tun wúri to? Cátei buíti le tadúgübei. ¹¹ Súnwandan yábaña lan gudémetiña júma, ánjein áu, mámaba súnwandan júma nan. ¹² Le tadúgübei wúri to láu téseruni ibíñei le nuágun, taráanseruñádina lubá nábulúniwa. ¹³ Ninárün jáu luágu le lan ñi lumuti lapúrichijoúa ugánu luáguti asá-baruni lídan sun uboú, labájüdawagúaba gíñe le tadúgübei wúri to, lun larítawagún tuágu.

Lalúguruni Júdas Jesúsu
 (Mr 14.10-11; Lc 22.3-6)

¹⁴ Ába lídin ában jádaangiñe dúusu disípulugu, le gíribei Júdas Iscarióte, adímureja jáma jábutigu fádorigu. ¹⁵ Ába laríñagun joun.

—¿Atiríbei jíchugun nun ánjein nedéregera Jesúsu jun?

Ába jíchugun darándi murúsun pláta lun. ¹⁶ Lúmag-iñeti óra ligía, ába lálujan Júdas ída lúba lan luwúyeri ledéregeruni Jesúsu joun.

Lagúmujoún leígin Jesúsu jáma lánigu
 (Mr 14.12-25; Lc 22.7-23; Jn 13.21-30, 1 Co 11.23-26)

¹⁷ Le furúmiñeti wéyu lídan fédu le ñi lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jalía babúseera waráanserun lun ñíba lan wadúgei eígin le lánina páscua?

¹⁸ Ába laríñagun joun.

—Jeíba ubúru, lúbiñe ítaga wügúri, ábame jaríñagun lun. “Ítara líña laríñagun Maésturu. Yaráaali nórate, búbiñeba nefédujei páscua jáma náni disípulugu.”

¹⁹ Ába jadúgüni disípulugu quei laríñaguni Jesúsu joun, ába jaráanseruni eígin le lánina páscua.

²⁰ Dan le lagúñedunbei, ába lañúurun Jesúsu luágu dábula jáma lánini dúusu disípulugu, ²¹ súnti añája lan eíga, ába laríñagun joun.

—Ninárün jáu luágu lálugurubadina lan ában jí-daangiñe.

²² Ábati jajírudagun, ába jagúmeserun álügüdeí ában ában.

—Nabúreme, ¿nugúya funásan?

²³ Ába laríñagun joun.

—Le éderuti leígan fein núma lídan asíedu, ligiába alúgurana. ²⁴ Nídiña, áu le Wügúri Garaúwarügüti, luágu úma le uágubei taríñaga Lerérun Búngiu, áni ífugíabutia wügúri le alúgurutina! Buítimaati jamúga lun magúriaajoágubei lan.

²⁵ Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

²⁶ Dan añája lan eíga, ába lanúgünun Jesúsu fein lú-jaburugu, ába leteíngiruni Búngiu tuágu, lásun lagúbachagunun, ába líchugunun joun láni disípulugu, aríñageina.

—Joújuma, nógubu le.

²⁷ Lárigiñe, ába lárügüdün ában wéru buin táu di-weín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. ²⁸ Níta le, le añúuragüdübalin iséri darádu, le gíñe áwiyrubei joun sarágu gürigia lun ferúduawa lan jafígoun. ²⁹ Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nóguchi Búngiu yágüta siélu.

Laríñaguni Jesúsu luágu leyéedaguba lan Pédro láu
 (Mr 14.26-31; Lc 22.31-34; Jn 13.36-38)

³⁰ Lárigiñe jerémujani urému luágu Búngiu, ába joúdin luágu wúbü Olívos. ³¹ Ába laríñagun Jesúsu joun láni disípulugu.

—Sun jugúya, jasándiraguba júngua láu magúraasuni nuágu áriebe le, ladúga laríñajare tidan Lerérun Búngiu. “Náfarubei joúniri mudún jilágubei, ábame jeréderun mudún chagágu.” ³² Lárigiñeme násaarun lídaangiñe ouweni lúnnya nabágaridun, nídiba Galiléa jubáragiñe.

³³ Ába laríñagun Pédro lun.

—Gayáraati járügüdün súngebei magúraasuni buágu, nugúya no.

³⁴ Ábati laríñagun Jesúsu lun.

—Ninárün báu luágu áriebe méme lan le, lubáragiñe layúgurujan gáyu, beyéedaguba náu úrúwa weíyaasu.
³⁵ Ába laríñagun Pédro lun.

—Gayáraati nouñwen búma, meyéedagunbadina báu.

Ligia méme gíñe jaríñaga sun disípulugu.

Layúmuragun Jesúsu lun Búngiu, Getsemaní

(Mr 14.32-42; Lc 22.39-46)

³⁶ Ábati lachúlürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanúgüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi. ³⁸ Ábati laríñagun joun.

—Sandítina ában íruni le lánina ouweni tídan nuwáni. Reídei jumá ya, agágudúañu jugúyame núma.

³⁹ Ábati lídin Jesúsu lubáruaguoun mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubeí, adúgabá lun masúfurirun náani cátei le lúnbei nasúfuriruni, mámalá quei nabúseerun, queílá babúseerun.

⁴⁰ Ábati lagíribudun le ñíjin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátisán buga jeréderun agágudúañu núma ni ában óra? ⁴¹ Agágudúañu jumá, ayúmuragua jugúyame, máburujan jumámuga lídoun ínchajóuni lun jeféridiruni jafíñen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Núguchi, ánjein siñá lubei masúfurirun náani le lúnbei nasúfuriruni, adúgúwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladúga weírjali lidábu jágu. ⁴⁴ Ába lígiruniña, ábaya lídin ayúmuragua luágu lúrwán weíyaasu, aríñageina méme dimúrei ligía. ⁴⁵ Ábati lídin le ñíjin jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chúlújali óra lun nederegeruniwa, áu le Wügúri Garaúwarügüti, jájaburugun gafígountiña. ⁴⁶ Sarájuma, queímoun lubároun le lúnbei lalúgurunina, niteeli.

Janúgüni Jesúsu adáüra

(Mr 14.43-50; Lc 22.47-53; Jn 18.2-11)

⁴⁷ Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürgía táu efeín lúma wéwe. Jayábin lueígiñe jóubadina jábutigu fádiri jáma wügúriña weírigutiña lídan jafíñen juríu. ⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layárafadun lun Jesúsu, ába laríñagun.

—¡Buíti gúñoun, maésturu!

Ába lachúuruní. ⁵⁰ Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janúgüni adáüra.

⁵¹ Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵² Ába laríñagun Jesúsu lun.

—Areídaboún befeínte, ladúga sun ja áfarajatiña táu efeín, táuba gíñe efeín jáfarúa. ⁵³ ¿Ibídiñeti bun luágu ánjana lan jamúga busén, gayára lan namúriaian úrúwa-wein-díisi-mílu jádaangiñe láni Núguchi ánjeligu, áni loúnajañanu lan jamúga? ⁵⁴ Lun jamúga nadúgüni ítara, ¿ida lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

⁵⁵ Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdüniña camá jamuga jíwerutina? Ságüñaja wéyu ñañúurun témpulurugu jagánagua arúfudaja, madaú jumútina. ⁵⁶ Wel, lasúseredunbei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúrudu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ja adáürübalin Jesúsu, ába janúgüni ligíbugiñoun Gáifasi, fádiri le íñutimaabei, le ñí lubei adámurigu jamá arúfudajatiña lilúrudun Moisés jáma wügúriña weírigutiña lídan jafíñen juríu. ⁵⁸ Ánjeinti Pédro, falá lumuti dísegiñe darí túbúrürugun lúban fádiri le íñutimaabei le ñíjin lubeí lebélera, ába leréderun ñun jáma ouñigirutiña témpulu lun laríjin jalába lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasiadiruni lun loúnwen, ⁶⁰ madáritiña, láu sun sarágu jáña lan gürgía ñúdüntiña aríñaga iyéeni luágu. Agúmujóuni, ligía jayábin biáma yéetiña íchiga fe luágu, ⁶¹ ába jaríñagun.

—Aríñagati wügúri le luágu gayára lan lagúnrichagunun láni Búngiu témpulu, ábaya lánme laráramagüdünnun lídan úrúwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntibusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabei woun ánjein amúru lubeí Crístubei le Liraú Búngiu, le lanúadirubei Búngiu lun lasálbaruniña gürgía ubouágu.

⁶⁴ Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjubadina lan, áu le Wügúri Garaúwarügüti, ñun lueígiñe loúnwenren Búngiu le Súnti Gabáfu, jaríjubei gíñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáan-gun, le ligáñi, ába laríñagun.

—¡Anába láali wügúri le Búngiu láu lerérun!
Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶ ¿ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuereguni ligíbu, buleisei jameí, jíbiri, ába jagáyuajan ligíbuagun, ⁶⁸ ába jaríñagun lun.

—Quei amúrú lan Crístubei, ¡aríñaga beígia ca lan agáyuajabei buágu!

Jaríñagunbei lun ítara ladúga gürágu líña lan lágu.

Laríñagun Pédro luágu ibídiñe lan Jesúsu lun

(Mr 14.66-72; Lc 22.56-62; Jn 18.15-18, 25-27)

⁶⁹ Súnti lasúseredun sun cátei le, ñun líña Pédro boúgudi túbúrürugun lúban fádiri le íñutimaabei, ába tíabin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súngebei, ába laríñagun.

—Íbídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein gíñe Jesúsu le Nazarétna.

⁷² Ábaya leyéedagun Pédro láu fiñún, ába laríñagun. —Íbídiñeti wügúri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amúrú, arijúati luágu ligáburi badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Íbídiñeti gürígia ligía nun!

Lídan méme óra ligía, ába layúgurujan ában gáyu.

⁷⁵ Ábati larítagnun Pédro luágu le laríñagubei Jesúsu lun. “Beyéedaguba náu úrúwa weiyaasu lubáragiñe layúgurujan gáyu.” Ába láfuridun Pédro ñígiñe, ába layájuajan láu igárigu.

Ledéregerúniwa Jesúsu lun Piláto

(Mr 15.1; Lc 23.1-2; Jn 18.28-32)

27 Dan larúgadunbei, ába jadámuridagun sun jábutigu fádirigu jáma wügúriña weírigitíña lídan jafíñen juríu aríja cába lan jadúga lun lasíadirúniwa Jesúsu. ² Ába janúgüni gürágu, ába jedéregeruni lun Póncio Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu síadi jamáali lan Jesúsu lun loúnwen, ába laságürijan, ába láguyugüdüni darándi murúsun pláta ligía joun jábutigu fádirigu lúma joun wügúriña weírigitíña, ⁴ ába laríñagun joun.

—Afigounjaadina láu nedéregerun ában wügúri madúnrunti lun loúnwen.

Ába jaríñagun lun.

—¿Cámegi le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídon gáfu to lágei liseínsuna Búngiu ladúga lebégi ouweni.

⁷ Ába júaradun lun lagáñijoún lufúlasun ában wügúri le adáagubei barámbi láu seínsu ligía lun jábunajoún teréncha ñi. ⁸ Ligía Lufúlasun Jítaü lubeí líribei fulásu ligía chúlú lúmoun dan le. ⁹ Ítara líña lagúnfulirun le meja laríñagubei proféta Jeremías. “Barú jamuti darándi murúsun pláta ligía, ebégi le jíchugubei Israelítagu luágu wügúri ligía, ¹⁰ ába jagáñijani lufúlasun ában wügúri le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr 15.2-5; Lc 23.3-5; Jn 18.33-38)

¹¹ Barúwati Jesúsu ligíbugiñoun gumádimati, le güríbei Piláto, le álügüdübalin.

—¿Amúrúsan Jarúeitebei Juríu?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügúriña weírigitíña lidúnrun, moúnabuntija Jesúsu ni cáta. ¹³ Ábati laríñagun Piláto lun.

—¿Magáambun bumútisan le jaríñagubei buágu?

¹⁴ Moúnabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen

(Mr 15.6-20; Lc 23.13-25; Jn 18.38-19.16)

¹⁵ Gagáburi lumúti mejáti gumádimati lígiragüdüñ ában adaürúti joun gürígia lídan fédu, furúmieguarügü adaürúti le jamúriajan lúma.

¹⁶ Níñeinti ában adaürúti, díseti leíbaajan líri, gíríti Barabási, ¹⁷ dánti le adámuriñujaña lan sun gürígia, ába lálügüdüniña Piláto.

—¿Ca jabúseerubei nígiragüdüñ jun, Barabási, ódi Jesúsu le únbei laríñawagua Crístu?

¹⁸ Líridubalin gíñe Jesúsu ladúga subúdi láali lan luágu ladúga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madúgabá ni cáta láu gürígia úaraguati le, ladúga gewéreditina buga ában uwénedi wuríbati áriebu buga ladúga gürígia le.”

²⁰ Ába jádaruni jábutigu fádirigu jáma wügúriña weírigitíña jádoun gürígia lun jamúriajan lun láfuridun Barabási, lun lafarún Jesúsu. ²¹ Ábaya ladímurejan gumádimati joun sun gürígia jagía, ába laríñagun joun.

—¿Ca jádaangiñe bíangubei jabúseerubei lun nígiragüdüñ jun?

Ába jaríñagun.

—Barabási.

²² Ába laríñagun Piláto joun.

—¿Cábatí nadúga láu Jesúsu le únbei laríñawagúa Crístu?

Ába jóunabun súngubei.

—¡Dáguabeí luágu gurúwa!

²³ Ába laríñagun Piláto joun.

—¿Cáti wuríbati ladúgübeí?

Ábatima jagúaragun.

—¡Dáguabeí luágu gurúwa!

²⁴ Dan le laríjinbalin Piláto luágu siñá lan ladúgün ni cáta lueídúgüya chagáguaü, ába lamúriajan dúna, ába lachíbuni lújabu jagíbugiñe gürígia, aríñageina.

—Máma áu lúnbei naríjin láu loúnwen wügúri madúnrunti le, jugúya lun jaríjini ñi.

²⁵ Ába jaríñagun sun gürígia.

—¡Wagía jáma warájüñü, wanúgüba furúmieguarügü dúru wawóuguoun luágu loúnwen!

²⁶ Ábati lígiragüdüni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

²⁷ Lárígiñe, ába janúgüni lisúdaaranigu gumádimati Jesúsu tídoun lúban Piláto, ába jóundaraguagüdüniña sun súdaara geyégua láu. ²⁸ Ába jarágachunun lanáangun, ába jíchugun ában anáanguni funátu luágu, ²⁹ ába jíchugun ában rídi láuti jíyu lábulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰ Ába gíñe jásuereguni, janúgeija mabúru ligía, jíchaaguei lábulugu. ³¹ Lárígiñe jéjerajan láu ítara, ába jagídarunun anáanguni funátu lueí, ába jadáürunun lanáangun luágu. Ába janúgüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

³² Dan le áfurideina jáña lan, ába jadúnragun lúma ában wügúri Ciréne, gíríti Simón, ába jafósuruni lun lanúgüni lugúruwan Jesúsu.

³³ Ítara líña jachúlürün lídoun ában fulásu gíríti Gólgota, líla líra, Lufúlasun Lábu Ichúgü. ³⁴ Ñi jíchiga diweín láu árani tídan lun Jesúsu lun látunun, jóucharügü lumútu, mátun lumútu.

³⁵ Dan le dágua jamáali luágu gurúwa, ába jájurerun súdaara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labúrüjabei proféta. “Ájureratiña ubúnuruni lun jaríjin cába lan jádaangiñe erédera táu nanáangun.” ³⁶ Ába jañúurun ñi lun jóunigiruni. ³⁷ Ába jíchugun ában abúrújóuni loúgiñe lichúgü le ñí lubei laríñaga ca lan lidúnrunbei. Abúrújóuni ligía ítara líña. “Jesúsu le, le jarúeitebei juríu.”

³⁸ Dáwaguatiña gíñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúna. ³⁹ Já buriti ásügürübaña ñígiñe, ába janábuni, ába jánjingichuni jachúgü, ⁴⁰ aríñageina.

—Bugúya le gayáraabei bágurunun témpulu ábaya baráramagüdünnun lídan úrúwa wéyu, sálbaguabá

búngua. Ánjein Liraú bubei Búngiu, raríba lueígiñe gurúwa.

⁴¹ Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügúriña weírigitíña, láu, ábaja jaríñagun jámagua.

⁴² —Sálbati ámu, ánjein lúngua, siñáti lasálbaragun. Ánjein ligía lubei Jarúeitebei Israelítagu, raríla lueígiñe gurúwa, afíñe wamámuga luágu. ⁴³ Rúlaali lafíñen luágu Búngiu, sálbaleíti Búngiu guetó ánjein inárüni lubei luágu jínsiñe lan lun, quei aríñagaali lan woun luágu Liraú lan Búngiu.

⁴⁴ Anába jamúti gíñe jíwerutiña ja dáwaguñubaña luágu jagúruwan úara lúma.

Loúnwen Jesúsu

(Mr 15.33-41; Lc 23.44-49; Jn 19.28-30)

⁴⁵ Ábati labúrigadun sun fulásu lúmagiñe amídirugu darí ladaúnrun úrúwa rábounwéyu. ⁴⁶ Queí buri óra méme ligía, ába lagúaragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Ñíñanu agáambuti jádaangiñe ja ñíbaña, ába jaríñagun.

—Lagúajaña wügúri le lun proféta Elías.

⁴⁸ Ába lídin ában jádaangiñe eíbaagueina anúga ában mudúsi, lárígiñe ladúduragüdüni táu diweín garújütu ába líchuguni luágu ában wéwe, ába línchunun lun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabei, waríja ánjein ñúbin Elías asálbarei.

⁵⁰ Ábaya ladúgün Jesúsu ában agúaraguni jéreti, ábati loúnwen. ⁵¹ Lídan óra ligía, ába tajeíridagun tubélu témpulu lídan bián murúsun, íñugiñe lun únabun. Ába ladágarun ában jarabaganáli, ába láwarajan dúbü. ⁵² Ába lánjunrenchúnga umújaü, ágyuyuguatiña sarágu jádaangiñe afíñetiña luágu Búngiu já meja jiláguaañábaña. ⁵³ Ába jáfuridunga lídaangiñe jamúaja lárígiñe lásaarun Jesúsu lídaangiñe ouweni. Ába jebélurun lídoun ubúru Jerusalén le biníwabei, le ñí lubei jaríjaña sarágu gürígia.

⁵⁴ Léti jábuti súdaara jáma súdaara ja oúnigirubalin Jesúsu, dan jasándirunbalin jarabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraú Búngiu wügúri le.

⁵⁵ Ñíñanu sarágu wúríña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶ Ñíñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr 15.42-47; Lc 23.50-56; Jn 19.38-42)

⁵⁷ Dan le agúñedeina líña lubei, ába liábin ában wügúri rísiti gíríti José, lídaangiñeti fulásu le gíríbei Arimatéa, jádaangiñeti gíñe ja afálarubalin Jesúsu.

⁵⁸ Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun,

⁵⁹ ába lanúgüni José, ába louburaguni tídan ában gamísa jarúmatu. ⁶⁰ Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weíriti luágu lubéneri, ába lídin. ⁶¹ Níñounti María Magdaléna túma to ában María ñun ligíbugiñe umúajaü.

Oúnigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraguni, ába jóúdin jábutigu fádirigu jáma fariséogu aríjei Piláto, ⁶³ ába jaríñagun lun.

—Wábuti, jarítagua wamúti luágu aríñaga lán meja yeeti ligíra dán meja moungwengili luágu lásaaruba lan luágu lúrwun wéyu lárigiñe louwun. ⁶⁴ Oúna-jagubeibá achoúrrei umúajaü daríme lúrwun wéyu, mayábin jamámuga láni disípulugu áriebe íwerujei lúgubu, ábame jaríñagun joun güriña luágu saráli lan. Weíritimaajalímeti lagúmujoun iyéeni le sügú láu le furúmiñeti.

⁶⁵ Ába laríñagun Piláto joun.

—Barújuma fiú súdaara, jeíba choúru jumeí umúajaü le lubuídun-ágei juáraati.

⁶⁶ Ábati jóúdin, ába jachóururuni dübü le luágubei umúajaü, ába jígiruniña súdaara lun jóunigiruni.

Lásaarun Jesúsu lídaangiñe ouweni

(Mr 16.1-8; Lc 24.1-12; Jn 20.1-10)

28 Dan le lásügürünbei luwéyuri eméraguni áni arúgadeina líña dimáasu, ába jóúdin María Magdaléna túma to ában María aríjei umúajaü. ² Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siélugiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu. ³ Miríti ánjeli ligía quei ában labírijanoúga, tiábin lanáangun, jarú jarú. ⁴ Dan le jaríjinbalin súdaara, ába jadádagarun láu anúfudei, ába jeréderun camá jiláguaaña. ⁵ Ábati laríñagun ánjeli ligía joun würiña jagía.

—Manúfude jumá. Subúsi nun luágu jáluajañein lan Jesúsu le ádarawagúbei luágu gurúwa. ⁶ Uati ya, saráli quei laríñaguni. Jigoúgu jaríjei fulásu le ñíjin lubei líchugúa, ⁷ ábame jídin furése, ábame jaríñagun joun láni disípulugu luágu saráli lan, luágu níngiran

lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸ Ába jóúdin würiña jagía oufudagueina, láu anúfudei lúma sarágu ugúndani, ába jóúdin eíbaagueina aríñagei joun disípulugu. ⁹ Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi. ¹⁰ Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súdaara

¹¹ Dan le jóúdiña lubei würiña, ligía jóúdin já-daangiñe súdaara ja oúnigirubaña, ába jóúdin ubúruugu, ába jabájüdaguni le asúseredubei joun jábutigu fádirigu. ¹² Ába jóúdin ábutigu ja adímureja jáma wügüriña weirigutiña lídan jafíñen juríu lun jebélurun jáma lídoun ában úarani, ába jíchugun sarágu seínsu joun súdaara, ¹³ ába jaríñagun joun.

—Jaríñagame luágu dan lan le anjúnja lan arúmuga áriebe, ába lan jayábin láni Jesúsu disípulugu, ába jíwerujani lúgubu. ¹⁴ Anjein lasúbudira gumádimati cátei le, wadímurejaba luágu jáni fuleísei lúma lun madügún lan ni cáta jáu.

¹⁵ Ábati jerésibiruni súdaara jagía seínsu, ába jóúdin adúgei le uágubei laríñawagúa joun. Ítara liñáti jaríñaguni juríu chúlú lúmoun dan le.

Líchugun Jesúsu jadásin disípulugu

(Mr 16.14-18; Lc 24.36-49; Jn 20.19-23)

¹⁶ Ába lubeiti jóúdin únsu disípulugu Galiléoun luágu wúbü lé meja uágubei laríñaga Jesúsu joun lun jóúdin.

¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, louguati jafíñen luágu ligía lan. ¹⁸ Ába liábin Jesúsu jawágun, ába laríñagun joun.

—Rúaali sun ubáfu nun siélu lúma ubouágu. ¹⁹ Jeíbati jabúgürü güriña ja lílana sun fulásu, adúga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumeí luágu anájein lan júma ságü wéyu daríme lagúmochun ubou. Ítaralá.

SAN MARCOS

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

1 Niján ugánu buíti luágu Jesucrístu, le Liraú Búngiu, ² latátira láu lagúnfulirúniwa dimúrei lé meja labúrűjabei proféta Isaías, laríñaga. Niján noúnagüle, líña Búngiu, noúnajañein bubáragiñe, amúrű le Niraú,

lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa úma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñúbinbaña lun luágu lúnti lan jasáansiruni ligáburi jóuserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambebei lapúrichijan. Dántija le jagúferuni jafígoun, ábajei labásteragüdüniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagúrűga lamídan, guéru, chigángaru leígibaña lúma síruudu le áraabuna. ⁷ Laríñagaja joun gürígia lídan lapúrichijan.

—Liábinba ában le gabáfutimaati nárigiñe, weíríti lubáfu nueí darí lun madúna nan ni lun nélemuchun afáragadei tagúrűga ligeídin. ⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdüni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu quei jamúga ában únjun. ¹¹ Ában lagaambúniwa ában umálali siélugiñe aríñaguti.

—Amúrű niraú le jínsiñebei nun, gúndaatina báu.

Loučhaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanűgüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába loučhaguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíribei Galiléa

(Mt 4.12-17; Lc 4.14-15)

¹⁴ Lárigiñe ladaürűniwa Juan, ába lídin Jesúsu Galiléa apúrichije ugánu buíti lúmagiñeti Búngiu. ¹⁵ Ába laríñagun.

—Chülűjali dan lun lagúmeserun larúeijan Búngiu, sáansi jumeí ligáburi jóuserun, afíñe jumá luágu ugánu le lánina asálbaruni lídaangiñe figóu.

Lagúarun Jesúsu joun gádürű esénijatiña lun jafálaruni

(Mt 4.18-22; Lc 5.1-11)

¹⁶ Luágu ában wéyu, eíbugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribe, jáguruñati óra ligía. ¹⁷ Ába laríñagun joun.

—Jigoúgu nárigi, falá jumana, madíajanjadünme úduraü, gürígiajañame jadíaja nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraú Zebedéo, láu sun Juan le lamúlen, tídaañanu ában ugúnein arámada joun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

Ában gürígia gawáguti ában espíritu wuríbatí

(Lc 4.31-37)

²¹ Ába jachúlürűn lídoun fulásu le gíribei Capernaúm lídan wéyu le eméraaguagülei, ába lebélorun Jesúsu tídoun jalígílisin jurú, ába lagúmeserun arúfudaja joun.

²² Weíríti janígi gürígia láu sun le laríñagubei Jesúsu joun ladúga larúfudajan joun láu ubáfu, máma quei arúfudajatiña lilúrudun Moisés. ²³ Ñíñein ában wügúri tídan ligílisi tugúya láu ában espíritu wuríbatí, ába lagúaragun.

²⁴ —¿Cámesan bemétera wámoun, Jesúsu Nazarét-na? ¿Biábiñasan lun bagúnrichaguniwa? Subúdi numúti cátabu lan, láu amúrű lan Búngiu Irájű le sándubei.

²⁵ Ába ladeínjan Jesúsu lun espíritu wuríbatí ligía, ába laríñagun lun.

—¡Maníba, furíba lídaangiñe gürígia le!

²⁶ Ába louwe jagüdüni espíritu wuríbatí gürígia ligía, ába láfuridun lídaangiñe, wágueina. ²⁷ Sun ja ñibaña, ába laweíridun janígi, ába jálügüdagun jámagua.

—¿Cáteisán le? ¿Cáteisán iséri arúfudajani le? ¡Gürígia le, gabáfuti lun gíñe lagúmadiruniña espíritu wurí-batiña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

Lareídaguagüdüni Jesúsu límenidi Simón Pédro

(Mt 8.14-15; Lc 4.38-39)

²⁹ Dan le jáfuridunbei tídaangiñe ligílisi tugúya, ába lídin Jesúsu luma Jacóbo láu Juan jábiñe Simón luma Andrés. ³⁰ Roun tiñáti límenidi Simón, tabíruajaña, ába jaríñagun lun Jesúsu luágu sándiñoun lan. ³¹ Ábati lídin tuágun, ába lárügüdüni tújabu, ába liñúragunun, lídan meme óra ligía ába tareídagun, ába tásaarun, ába teténirun joun.

Lareídaguagüdüni Jesúsu sarágu sánditiña

(Mt 8.16-17; Lc 4.40-41)

³² Dan le lálüdüni wéyu, gúñeeli, ába janügúniwa sun sánditiña jáma sun ja gawágubaña espíritugu wurí-batiña lun Jesúsu, ³³ ába jóundaragun sun lílana fulásu lubádu béna. ³⁴ Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wurí-batiña jawei güri-gia. Mí-giruntijati lun jadímurejan espíritugu jagía, ladúga subúdi jamáni cáteiñein lan.

Lapúrichijan Jesúsu Galiléa

(Lc 4.42-44)

³⁵ Lubá larúgan, dan le búrigagili, ába lásaarun Jesúsu, ába láfuridun bougudin lueí ubúru-gu lídoun ában fulásu le mageírawati lun layúmuragun lun Búngiu ñi. ³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu güri-gia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladúga lun napúrichijan lídan sun fulásu niábin ubouágun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wurí-batiña jawei güri-gia.

Lareídaguagüdüni Jesúsu ában gawáguti gumeín luágu sun lúra

(Mt 8.1-4; Lc 5.12-16)

⁴⁰ Ába liábin ában güri-gia sánditi láu gumeín luágu sun lúra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdüniña ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía.

⁴³ Ábati lounajani Jesúsu ñígiñe láu ában furése, aríñageina lun.

⁴⁴ —Mabájüdagubeítia lun ni ában, ñúdünrügü-bá arúfudagua búngua lun jafádirin juríu, ábame

bíchuguni badágaragüdüni luágu barúmadun queísi laríñagun lilúrudun Moisés. Ítara lúba jaríjini güri-gia luágu areídaguadibu lan.

⁴⁵ Ábarüga lídin, ába labájüdagun sun le asúsere-dubei lun joun sun güri-gia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá güri-gia. Láu sun líra, ñúbin mémetiña lídaangiñe sun fulásu aríjei.

Lareídaguagüdüni Jesúsu ában wügúri le derégüdaali lúgubu

(Mt 9.1-8; Lc 5.17-26)

2 Átiri wéyu lárigiñe, ába lagíribudun Jesúsu Capernaúm, ába jagáambun güri-gia luágu giríbujali lan. ² Ába jóundaragun sarágu güri-gia darí lun mabáaraña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun. ³ Ñíñein apúrichija, ligía jayábin gádürü wügúriña barúina jagía ában wügúri le derégüdaali lúgubu. ⁴ Queísiti siñá lubei jachúlürün le ñí lubei Jesúsu ladúga jíbe güri-gia, ába jagídarun murúsun lueigiñe tábulugu múna lougiñe le ñí lubei Jesúsu, ába jarárigüdüni sánditi ñígiñe tídan lubá-rari. ⁵ Dan le laríjinalin Jesúsu jafíñen, ába laríñagun lun le sándibe.

—Niraú, ferú-dunawaali bifígoun.

⁶ Ñíñanu jádaangiñe arúfudajatiña lilúrudun Moisés ja ñunbaña ñi, ába jasáminarun. ⁷ “¿Cásan uágu ladímureja güri-gia le ítara? Lanábaguei-ga le Búngiu, ladúga úati ni ában gayáraati ferúduna lan figoú lueídügüya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferú-dunawaali bifígoun”, o laríñawagún lun. “Sarába, budáboun bubá-rari, beíba”? ¹⁰ Narúfudaaliti jun luágu gabáfu nan, áu le Wügúri Garaúwarügüti lun ferúduna nan figoú.

Ába laríñagun lun sánditi.

¹¹ —Sarába, budáboun bubá-rari, beíba águyu.

¹² Ába lásaarun sánditi lídan óra ligía, ába labú-dunun lubá-rari, ába láfuridun ñígiñe, aríagu sun ja ñíbaña lun. Weíríti janígi ja ñíbaña luágu cátei le, ába jíchugun uweiriguni lun Búngiu, aríñageina.

—¡Maríjijajá-gidiwa cátei ítara buríti!

Lagúarun Jesúsu lun Leví lun lánigume

(Mt 9.9-13; Lc 5.27-32)

¹³ Ñígiñe, ábaya lídin Jesúsu láru dúna, dan le jayárafadun sarágu güri-gia lubá-dun, ába larúfudajan joun. ¹⁴ Lásun larúfudajan joun, ába lasígiruni leíbugun, ába laríjini Leví, le liraú Álfeo, ñun líña le ñí lubei lagúburajoúa liseínsuna gumá-di. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

¹⁵ Murúsun óra lárigiñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumá-di, jáma ámu gafígountiña ñun luágu dá-bula úara luma, jáma láni disípulugu, ladúga sarágu jáña

afálaruti. ¹⁶Ja arúfudajatiña lilúrudun Moisés, jáma fariséogu, dan le jaríjinbalin eíga jáma sun wuríbatíña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígonutiña?

¹⁷Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti níabiña áluaja gürígia buítiña ligíbugiñe Búngiu, níabiña áluajaña ja gafígounbaña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Lc 5.33-39)

¹⁸Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú gürígia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

¹⁹Ába loúnabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le níjein lan adári ñi jáma? Ánjein níjein lubeí adári ñi, siñáti jayúnarun, lúnti jeígin.

²⁰Lachúlürüba dan lun lanügúniwa adári jámagiñe, ligíameti jadáani lun jayúnarun.

²¹‘Máfadajóuntu anáanguni binádujaru táu gamísa to macháwaragungiru, ladúga le méme tífe gamísa to macháwaragungiru tajeíridaguboun to binádujaruboun dánme le tacháwaragun, laweíridatimaabati jeíríti. ²²Meserúnwati gíñe bínu le isérigili lídoun ában ágei guéru le binádujali ladúga laboúchagubei bínu iséri guéru binádu dánme le liñúrún. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei

(Mt 12.1-8; Lc 6.1-5)

²³Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguaü, ába játüjan láni disípulugu türígu dan le jásügürün. ²⁴Ába jaríñagun fariséogu lun Jesúsu.

—¡Aríjabá joun bánígu! ¿Cásan uágu jadúga wadági-manu le moún lumuti ladügúniwa lídan wéyu le eméraaguagülei?

²⁵Ába laríñagun joun.

—¿Malíjangidün luágu le ladügübei Davíd luágu ában dan, dan le lalámachunbei, ligía jáu sun líbirigu? ²⁶Ába lebéllurun ligílisirugun dan le Abiatár lan fádiri le íñutimaabei, ába leíginun fein to sagraúboun, to majóuboun jeíginun ámu gürígia jaweídügüya fádírugu según lilúrudun Moisés, áni ru ligía joun gürígia ja lúmabaña. Mámati figoú le ladügübei Davíd ligíbugiñe Búngiu.

²⁷Ába gíñe laríñagun Jesúsu joun.

—Lun wügüri ladügúwa wéyu le eméraaguagülei, máma wügüri adügúwabei lun wéyu ligía. ²⁸Ligía gabáfutina gíñe, áu le Wügüri Garaúwarügüti, lun naríñagun cába lan gayára ladügúniwa lídan wéyu le eméraaguagülei.

Ában wügüri jiláali ában lújabu

(Mt 12.9-14; Lc 6.6-11)

³Ábaya lebéllurun Jesúsu tídoun ában jalígílin juriú, ñíñeinti ában wügüri jiláali ában lújabu. ²Jaríjati ja ñíbaña ánjein lagáranijaba lubeí Jesúsu lun lídan wéyu le eméraaguagülei, lun jadárirun lidúnrun. ³Ába laríñagun Jesúsu lun le jiláalibeí újabu.

—Sarába, ráramabá ya jagíbugiñe súnigubei.

⁴Ába lálügüdüniña ja jíbiri.

—¿Cátei lúnbei ladügúniwa lídan wéyu le eméraaguagülei, lun jíderawagúniwa gürígia ódi lun ladügúniwa wuríbati joun, lun leséfurúniwa jabágari ódi lun jígirúniwa lun jóunwen?

Sun jagía, ába jámanichun. ⁵Ábati laríaguniña Jesúsu láu igáñi lúma írúni ladúga tidére janígi. Ába laríñagun lun wügüri ligía.

—Tulébei bújabu.

Ába látuleruni, ába lareídagun. ⁶Ába jáfuridun fariséogu, ába jagúmeserun adímureja jámagua jáma gíñe lánigu Heródes ída lúba lan jáfaruni Jesúsu jilágubei.

Sarágu gürígia lárú dúna

⁷Ába lídin Jesúsu jáu láni disípulugu lárú dúna, ába jafálaruni sarágu gürígia Galiléana. ⁸Dan le lagaambúnbei luágu óunwenbun buri cátei le ladügübei, ába jayábingua gürígia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini. ⁹Ligía laríñagunbei Jesúsu joun láni disípulugu lun aráanseñu jamá ában ugúnein lubá lueí jámuruduni sarágu gürígia jagía, ¹⁰ladúga queí gíbeeña lan lareídaguagüdün, sun sánditiña, ába jáguragun jóungua luágun lúnrügü jagúuruni lun lareídaguagüdüniña. ¹¹Dántija le jaríjini ja gawágubaña espíritugu wuríbatíña, ábaja jájuduragun ligíbugiñe, ába jagúaragun espíritugu jádaangiñe.

—Liraú Búngiu amúrü.

¹²Ába lewéridiruniña Jesúsu lun maríñagun jamá cáteiñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³Lárigiñe, ába lamúdeirun Jesúsu luágun ában wúbü ñí lubei lagúara joun ja labúseerubaña queísi loúnagülegu, ába jayábin lun. ¹⁴Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni. ¹⁵Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatíña. ¹⁶Niján jíri dúusu wügüriña jagía. Simón, le únbei lagúaja Jesúsu

Pédro, ¹⁷ Jacóbo láu Juan le lamúlen, ja lirájüñü Zebedéo, ja únbaña lagúaja Jesúsu Boanérges—míni lan líra, Lirájüñü Wayújururu, ¹⁸ Andrés, Felípe, Bartolomé, Matéo, Tomás, Jacóbo le liraú Álfeó, Tadéo, Simón—ában meja wügúri le áfaaguti lun jawáanserun juríu, ¹⁹ lúma Júdas Iscarióte le alúgu-rubalin Jesúsu.

Aríñagatiña luágu lubáfu lan Máfia lúmabei Jesúsu
(Mt 12.22-32; Lc 11.14-23, 12.10)

Lárigiñe, ába jagíribudun járigouñ, ába jebélurun tí-doun ában múna, ²⁰ ábaya jóundaragun sarágu güri-gia ñi darí lun madáani jamá ni lun jeigin. ²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janúgüni, ladúga jaríñagun güri-gia luágu wuríbaali lan lichúgü.

²² Ñíñanu arúfudajatiña lilúrudun Moisés ja achúlürübaña Jerusaléngiñe, ába jaríñagun.

—Wügúri le, níjein Beelzebú, le Máfia, le jábuti es-píritugu wuríbatiña, lúma, láu lubáfu Máfia laságaja espíritugu wuríbatiña.

²³ Ábati lagúarun Jesúsu joun lun jayárafadun lubá-dun, ába líchugun ában jémpulu joun, ába laríñagun.

—¿Ída lúba gayára lan laságaruni Máfia Máfia guá-narügü? ²⁴ Furúmieguarügü arúejani le afánreinraguti lun jageíndagun jámagua, lagúnrinchaguba, ²⁵ áni án-jein fánreingujaña lubei idújeñu ladúga wuríbu já-daangua, siñábei jadúrarun idújeñu jagía queísi idú-jeñu. ²⁶ Ánjein lubei jamúgati afáreinragua Máfia, lageíndaguame lúmagua, siñábei ladúrarun, lagú-muchagülerügübei le.

²⁷ Úati ni ában lun lebélorun lúbiñoun ában wügúri le jéreti lun lanúgüni lílagu ánjein magúragun lan wügúri jéreti ligía furúmiñe. Ítara rügüñein gayára lan lanúgüni lílagu.

²⁸ Láu sun ninárün naríñagun jun luágu gayára lan ferúdnawa lan sun figou lúma sun wuríbani le laríñagubei güri-gia, ²⁹ lueídügüya lun jadímurejan wuríbati luágu Sífiri Sándu, siñábei ferúdnawa lan figou líra, leréderuba lidúnrun lun sun dan.

³⁰ Laríñagunbalin Jesúsu líra, ladúga jaríñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu
(Mt 12.46-50; Lc 8.19-21)

³¹ Lárigiñe, ába tachúlürün lúguchu Jesúsu jáu lamúlenu tubádun múna to ñí lubei Jesúsu, ába jeréderun bougudi, ába jóunagüdün luágu. ³² Játi ñún-baña geyégu láu Jesúsu, ába jaríñagun lun.

—Nurántia búguchu jáu bamúlenu bougudi, jálua-jañádibu.

³³ Ába laríñagun joun.

—¿Cági nóguchuboun jáu namúlenu?

³⁴ Ába laríñagun jawágun ja ñúnbaña geyégu láu, ába laríñagun.

³⁵ —Añája nóguchu jáu namúlenu, ladúga furúmieguarügü ja adúgüti lugúndan Búngiu, jagía namúlenubaña, nítunu, nóguchu.

Jémpulu luágu ábunaguti
(Mt 13.1-9; Lc 8.4-8)

4 Ábaya lagúmeserun Jesúsu arúfudaja láru dúna, ába jóundaragun sarágu güri-gia le ñí lubei. Quei gíbeyaaña lan güri-gia ñi, ába ládinun Jesúsu tídoun ában ugúnein to ñíboun dúnarugu. Ába lañúurun ñi, ába jeréderun sun güri-gia láru béya. ² Ábati larúfudaja-jan sarágu cátei joun láu jémpulu, laríñaga joun.

³ —Agáamba jumána. Níñein ában ábunaguti, ába lá-furidun ábunagua. ⁴ Lídan afúrujeina láani líla nádü, ába láburujan murúsun lídaangiñe luágun úma, ába jayábin dunúru, ába jeígini. ⁵ Líbiri, ába láburujan labá-dinaguouñ dúbü le ñí lumuti úa lan sarágu múa, ába labouchun furése ladúga majúllilin lan múa. ⁶ Dan le lásüdün wéyu, ába lásaürün, queíti málagüle lan, ába loúnwen. ⁷ Líbiri ílaü, ába láburujan labádinaguouñ jíyu, ába laweínamudun jíyu úara lúma, ába lañaradaguagüdüni, magíinduntiti nádü ligía. ⁸ Níjeinti lídaangiñe, áburujati lídoun múa buíti, ába labouchun, ába laweínamudun, ¡ma lubuídun alúbajoúti lí-daangiñe! Níjein lídaangiñe, íchuguti darándi águu luágu cáda ában águu, líbiri rúti ürüwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun güri-gia láu jémpulu
(Mt 13.10-17; Lc 8.9-10)

¹⁰ Lárigiñe, dan le leréderunbei Jesúsu lábugua, ába jayábin láni dúusu disípulugu jama jíbiri lánigu, ába jálügüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei ará-mudaguati le lánina larúejian jun, ánjaña ja mebére-senbaña láu lerérun, láu jémpulu laríñawagúa cátei luágu larúejian joun, ¹² lun dánme lan jaríjin, ibídiñe lámuga joun ca lan laníchigubei cátei le jaríjubei, dán-me jagáambun, úa lámuga gunfaráanda jamá, lun lásiñerun jagíribudun lun Búngiu lun ferúdnawa lan jafígoun.

Lafúnraanguagüdüni Jesúsu jémpulu luágu ábunaguti

(Mt 13.18-23; Lc 8.11-15)

¹³ Ába laríñagun joun.

—¿Úatisan gunfaráanda jumáni le? ¿Ída lubágu gun-faráanda jumáni líbiri jémpulu? ¹⁴ Le ábunagubalin líla nádü, ítara líña quei le apúrichijabalin Lerérun Búngiu. ¹⁵ Añájein güri-gia, ítara jáña quei úma le uágunbei láburuja lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi. ¹⁶ Jíbiri güri-gia, ítara jáña quei dúbü le abádinaguouñbei lábu-ruja lídaangiñe líla nádü, ába jagáambuni Lerérun Búngiu, ába jerésibiruni láu ugúndani. ¹⁷ Quei márügüdün lubei Lerérun Búngiu tídan janígi buídu,

madúrati jádan, dánti le larijiniwa jábun, o jeíbaajouiniwa lan lueigiñe Lerérun Búngiu, magúraasuntiña.

¹⁸ Jayábin jíbiri, itara jáña quei jýyu le abádinaguounbei láburuja lídaangiñe líla nádü, ába jagáambuni Lerérun Búngiu, ¹⁹ weíritimaati jafúudun luágu cátei le lánina ibágari le, ába leyéeduniña írsini. Sun le, ába láfaruni Lerérun Búngiu tídaangiñe janígi, mígiruntiti lun lalúbajouin jádan gürígia jagía. ²⁰ Añájein gíñe gürígia, itara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajouati cátei buíti jádaangiñe. Buíti jagáburi quei líla nádü le íchugubei darándi águu luágu ában, o úrúwa-wein, o san.

Jémpulu luáguti lámpu

(Lc 8.16-18)

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábulu líchugúu lun larúgoungadágüdün múnada. ²² Úati lubeíti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati gíñe joun.

—Toúnigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun. ²⁵ Ítara líña, gürígia le aténirubei buídu lun nerérun, gunfaráandatima lumúti, ánjeinti le meténibeí lun, labúlieidubei sun le agáamba lálalbei.

Jémpulu luáguti nádü le aweíridubei

²⁶ Aríñagati gíñe Jesúsu.

—Ítara líña larúeijan Búngiu quei le asúseredubei lun ában wügúri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chúlú dan ába labouóchun nádü, ába laweíridun, ibídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, nígiñe ába legélewejan, nígiñe ába labuínchun ílewei láu ílaü. ²⁹ Dánti le funáali líla nádü, ába látüjouiniwa ladúga chúlújali lan dan lun lalúbajouin.

Jémpulu luáguti tíla mostása

(Mt 13.31-32; Lc 13.18-19)

³⁰ Aríñagati gíñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun? ³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraütimaabei ubouágu, ³² dan le labunún, ába laweíridun, ligía weíritimaabei tídaangiñe sun nádü, weínamuti lílímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu

(Mt 13.34-35)

³³ Ítara líñájei larúfudajan Jesúsu luágu larúeijan Búngiu joun láu sarágu jémpulu líbe le darí le ní lumuti gayára lan gunfaráanda jamá. ³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagüdüni sun jémpulu joun láni disípulugu dan le jagárügü lan lúma.

Lagálumaruni Jesúsu garábali lúma lugúdi barána

(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába laríñagun Jesúsu joun láni disípulugu.

—Queímoun loubáfurugun dúna.

³⁶ Ábati jígiruniña bürúbünu gürígia jagía, ába janúgüni Jesúsu tídan ugúnein to gádaanbaliña. Níñoun buri gíñe ámu ugúnein úara jáma. ³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuínchun láu dúna. ³⁸ Larúmuguñati Jesúsu tiyúna ugúnein baláñu tuágu ában ichúgübarari. Ába jagágudajani, ába jaríñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeínjan lun garábali, ába laríñagun lun barána.

—¡Maníba! ¡Derégüdagubá!

Ába lagálumadun garábali, ába darángila lan sun cátei. ⁴⁰ Ábati laríñagun joun láni disípulugu.

—¿Cásan uágu luweírinbei janúfude? ¿Cásan uágu mafíñen jubei?

⁴¹ Ába jeréderun láu luweírin janígi, ába jálügüdagun jamagua.

—¿Cátei funásan le, garábali lúma barána ñúdüntiña láu le lubeíbei?

Ában wügúri Gadárana le gawágubei máfianu

(Mt 8.28-34; Lc 8.26-39)

5 Ába jachúlürün loubáfurugun dúna lídoun fulásu le gíribei Gadára. ² Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigíti luágu dúbü luágun, wügúri ligía gawáguti ában espíritu wuríbati. ³ Lídan jabára jiláaña lagánoua áni úati ni ában gayáraati lagúraguni, ni láu güríngüri. ⁴ Güráguañája jamáali láu güríngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni.

⁵ Súnwandanja leíbugun áriebu wéyuagu agúarajeina luágu buri wúbü lúma buri lídan jabára jiláaña íbiagua lúngua láu dúbü. ⁶ Dan le larijinbalin gürígia ligía Jesúsu dísegiñein, ába leíbaagun lubároun, ába lájuduragun ligíbugiñe, ⁷ ába lagúaragun lun.

—¿Cásan uágu bemétera númoun, Jesúsu Liraú Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Laríñagunbei itara ladúga guméseeli lan Jesúsu aríñaga lun.

—;Espíritu wuríbati, ígirabeí gürígia le!

⁹ Ába lálügüdüni Jesúsu.

—¿Ca bíri?

Ába louñabun.

—Lejión níña ladúga gíbetiwa.

¹⁰ Ába jayúmuragun espíritugu jagía lun Jesúsu lun moúnajan lániña bougudin lueí fulásu ligía. ¹¹ Queíti níñanu lan sarágu büíruju eíga ñi luágu wúbü, ¹² ába jayúmuragun espíritugu wuríbatiña jagía lun.

—Oúnaja báwa jádoun büíruju jára, rúba úma woun lun webélurun jádoun.

¹³ Ábati líchugun Jesúsu úma joun, ába jáfuridun lueí gürígia ligía, ába jebélurun jádoun büíruju. Níñanu jawára bián-mílu büíruju. Ába jáguragun büíruju jagía jóungua lueígiñe ában gudúngu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büíruju jagía, ába jeíbaagun abájüdaguei le asúseredubei ubúruju lúma áraabu. Ába jayábingua gürígia aríjei ca lan asúseredubei. ¹⁵ Dan le jachúlürünbei le ñi lubei Jesúsu, ába jaríjini gürígia lé meja gawágubei espíritugu wuríbatiña ñun líña, táuñein gíñe lanáangun, areídaguaali, ába janúfudedagun. ¹⁶ Játi aríjubalin, ába jabájüdaguni le asúseredubei lun gürígia lé buga gawágubei espíritugu wuríbatiña lúma jawáguti büíruju, joun. ¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídoun ugúnein, ába layúmuragun wügúri lé buga gawágubei espíritugu wuríbatiña lun lun lídin lúma, ¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladúgübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladúgübei Jesúsu láu lídan sun fulásu Decápolis, ába laweíridun janígi súnigubei.

Liraú Jáiro, túma wúri to agúurubarun lanáangun Jesúsu

(Mt 9.18-26; Lc 8.40-56)

²¹ Dan le lagíribudunbei Jesúsu tídan ugúnein loubáfurugun dúna, ába jayábingua bürúbünu gürígia le níjin lubei, ába leréderun ñi láru dúna. ²² Ábati liábin ában jádaangiñe tábuti jalígilisin juríu, gíriti Jáiro. Dan le laríjinbalin wügúri le Jesúsu, ába lájuduragun lubádu lugúdi, ²³ ába layúmuragun lun ítara.

—Nújein niraú touwe, queímoun bíchigei bújabu tuágu, areídagua támuga, moúnwen támuga.

²⁴ Ába lídin Jesúsu lúma, sarágu jáña gürígia afálarutiña, ába buriti jámurudaguni Jesúsu. ²⁵ Jádaanti sarágu gürígia ja, níñoun ában wúri sánditu, dúusu irúmu táu láu lésejan jítaü tídaangiñe. ²⁶ Súfurijaru sarágu jámagiñe surúsiagu áni gásta táali sun le túmati, mareídaguntu, gáwoun gueínarügü. ²⁷ Ligía tagáambun ladímurejóun luágu Jesúsu, ába tiábin lanáangiñe jádan sarágu gürígia, ába tagúurunun lanáangun, ²⁸ ladúga taríñagun túnguarügü.

“Láurügüme nagúurunun lanáangun nareídaguba.”

²⁹ Lídan óra ligía, ába leréderun lésejan jítaü tueí, ába tasándiragun túngua luágu areídaguuaru lan. ³⁰ Ábati lasándiruni Jesúsu luágu areídaguagüdaali lan gürígia láu lubáfu, ába lagáragun jawágun gürígia ja lanáangiñeña, ába lálügüdajan.

—¿Ca agúurubei tuágu nanáangun?

³¹ Ába jaríñagun láni disípulugu lun.

—Ariágu biñátia lun jíbe gürígia ya luágu murúgu jáña lan, ¿álügüdajágidibu ca lan agúurubei buágu?

³² Ába laríaajan Jesúsu áluaja ca lan agúurubei luágu.

³³ Ába tiábin wúri tugúya adádagareina láu anúfudei, subúdiñuteí le asúseredubei tun, ába tájuduragun ligíbugiñe, ába taríñaguni sun inárüni lun. ³⁴ Ába laríñagun Jesúsu tun.

—Niraú, areídaguaadibu ladúga bafíñen. Beíba láu darángilaü, areídaguañu lídaangiñe bisándi.

³⁵ Nígili Jesúsu adímureja, ligía jayábin lúbiñegiñe wügúri lé buga ñúdünbei oúgei luágu tisándi liraú, ába jaríñagun lun túguchi irájü tugúya.

—Jilátia biraú, ¿ca uágu bebéreseja lun maésturu guetó?

³⁶ Agáamba lumúti Jesúsu le jaríñagubei, ába laríñagun lun wügúri ligía.

—Manúfudedabá, afíñerügübá.

³⁷ Májatiti jóúdin ámu lúma lueídügüya Pédro, Jacóbo lúma Juan le lamúlen Jacóbo. ³⁸ Dan le lachúlürünbei lúbiñoun wügúri ligía, ába laríjini chagáguaü jáma gürígia ja ayájubaña, agúaraja. ³⁹ Ába lebéllurun, ába laríñagun joun.

—¿Cásan uágu jareíncha, ayájua buri jugúya ítara? Moúnwentutia irájü to, tarúmuguña.

⁴⁰ Ába jéjerajan láu. Ábati láfuridagüdúniña Jesúsu súnigubei nígiñe, ába lanúgüni túguchi irájü túma túguchu jáma ja ñúdünbaña lúma, ába lebéllurun le níjin tubei irájü. ⁴¹ Ába lárügüdüni tújabu, ába laríñagun tun.

—Talíta, cúmi—líla líra. Niraú, sarába.

⁴² Lídan óra ligía, ába tásaarun irájü tugúya, ába teíbugun. Weíyaraüjaru, dúusu irúmu táu. Ába laweíridun janígi gürígia ja ñibaña. ⁴³ Ába líchugun Jesúsu dimúrei derégüdati joun lun mabájüdagun jamáni ni ca un, ába laríñagun joun lun jíchugun eíginu tun.

Jesúsu lídan fulásu le Nazarét

(Mt 13.53-58; Lc 4.16-30)

6 Ába lídin Jesúsu nígiñe, ába lagíribudun lageíroun, ába jóúdin láni disípulugu lúma. ² Dan lachúlürün wéyu le eméaaguagülei, ába larífudajan tídan jalígilisin juríu, sarágu jáña gürígia agáambeí, ába laweíridun janígi láu larífudajan, ába jaríñagun.

—¿Jalía funásan lafúnrendeirei gürígia le sun le? ¿Cáteisan lichú áu le luágubei? ¿Ída liñásan gayára lubei ladáagun miláguru? ³ Saráfangeiga le tiraú María le, líbugaña Jacóbo, José, Júdas, lúma Simón, ñáñanu gíñe lítunu wáma.

Ába jíchugun mabájüdüni luágu. ⁴ Ába laríñagun Jesúsú joun.

—Sun gürígia, gúndaatiña láu ában proféta jaweídügüya ja lupaísanun jáma lidújeñu, jáma ja tílana lúban, jagía rügüñanu íchiga mabájüdüni luágu.

⁵ Ligía lásiñerunbei ladúgün ámu miláguru ñi lueídügüya líchugun lújabu jawágu biñáraü sánditiña, ába lareídaguagüdüniña. ⁶ Weírititi lanígi láu mafíñen jamá. Lárigiñe, ába leíbuguni lirájüñü fulásu, arúfudajeina.

Loúnajaniña Jesúsú lání disípulugu apúrichija

(Mt 10.5-15; Lc 9.1-6)

⁷ Ába loúnajan jawágu lání dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatiña.

⁸ Rúti dimúrei joun lun manúgün jamá ni cáta luágu jeíbugun lueídügüya bádun, moún lumuti janúgün ni fein, ni ságü, ni seínsu, ⁹ lun geídi tan jasábadun, lun mabíaman tan jasímisin. ¹⁰ Ába gíñe laríñagun joun.

—Dánme le jebélurun lídoun ában fulásu apúsaraja, reidei jumá ñi tídan ában méme múna darí jáfuridun lídaangiñe fulásu ligía. ¹¹ Ánjaüti merésibirúniwa lídan ában fulásu, mája jagía jagáambunün, furíjuma ñígiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachúlürün luwéyuri Búngiu lun lagúseragüdüniña sun gürígia, maweíribei jabeichúniwa Sodómana jáma Gomórrana quei lílana fulásu le merésibirunbalün.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburu jóuserun. ¹³ Sagátiña gíñe sarágu espíritugu wuríbatiña jaweí gürígia, jurúgua jagía aílí jawágu sarágu sánditiña, ába jareídaguagüdüniña.

Loúnwen Juan le abásteragüdjabei

(Mt 14.1-12; Lc 9.7-9)

¹⁴ Queíti eíbaajali lubeí luáguti Jesúsú lídan sun fulásu, ába gíñe lachúlürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabei lídaangiñe oúweni, ligía luweírínbei lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadúrüragüdübei ichúgü, saráaya lídaangiñe oúweni.

¹⁷ Lé meja asúseredubei, oúnajali meja Heródes adáürei Juan, ába lagúraguni láu güríngüri furísunrugu tadúga Heródias. Wúri tugúya, lúmari meja Felípe, le lamúlen Heródes, ába lanúgünun Heródes lúmarime. ¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéreegudun Juan tun Heródias, ába tabúseerun táfaruni jilágubei, ²⁰ siñá tumuti ladúga subúdi lan lun Heródes luágu ában lan wügüri le eíbuguti buídu lúma Búngiu Juan, áni ában lan wügüri esériwiduti lun Búngiu, janúfudetiti lueí. Ligía mája lubeí lun tadúgün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. ²¹ Ába tadáriruni Heródias ticháansin dan le lagúnfulirun Heródes irúmu, ába ladúgün fédu joun gumádimatiña jáma jábutigu súdaara jáma ámu buri gürígia weírigutiña ja Galiléabaña. ²² Ába tebélurun tiraú Heródias ñí lubei fédu le, ába tabínajan, gúndaatiti Heródes jáma sun ja ñíbaña eíga lúma láu tabínajan irájü to, ába laríñagun tun.

—Amúriajabei le babúseerun núma, níchugubei bun.

²³ Rúlumuti lerérun tun luágu líchugubei lan furúmieguarügü cátei le tamúriajan lúma tun, gayára lan lamídan lan fulásu le ñí lubei larúeijan tamúriaja.

²⁴ Ába táfuridun, ába taríñagun tun túguchu.

—¿Cábasan namúriaja lúma?

Ába taríñagun tun.

—Amúriajabei lábulugu Juan le abásteragüdjabei lúma.

²⁵ Ába tebélurun irájü to furése le ñíjin lubeí urúei, ába taríñagun lun.

—Buséntina lun bíchuguni lábulugu Juan le abásteragüdjabei nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan lerérun áni agáambagu jáña amísurajóutiña lun, májati lun míchu lubeí lan le tamúriajabei lúma tun.

²⁷ Furése furése, ába loúnajan urúei ában súdaara láu dimúrei lun lanúgüni lábulugu Juan lun. ²⁸ Ába lídin súdaara ligía furísunrugu, ába ladúrürüni lábulugu Juan, ába lanúgüni lídan ában asíedu. Ába líchuguni tun irájü tugúya, ába tíchuguni tun túguchu.

²⁹ Dan le jagáambunbalin lánigu Juan, ába jayábin lun janúgüni lúgubu, ába jábununi.

Leígagüdüni Jesúsú seíngü mílu wügüriña

(Mt 14.13-21; Lc 9.10-17; Jn 6.1-14)

³⁰ Lárigiñe jagíribudun lání Jesúsú apóstolugu, ába jóundaragun lúma, ába jabájüdaguni sun le jadúgübei lúma le jarúfudajabei, lun. ³¹ Ába laríñagun Jesúsú joun.

—Jigoúgu, queímoun weméraagua lídan ában fulásu le mageírawati.

Laríñagubaalin líra ladúga ñíñanu sarágu gürígia, jíbiri ñúdüni, jíbiri ñúbin, darí lun madáani lan Jesúsú jáma lání disípulugu ni lun jeígin. ³² Ába jóúdin tídan ába ugúnein lídoun ában fulásu mageírawati.

³³ Sarágu jáña aríjiti jóúdin, dan le jasúbudiruni luágu níjein lan Jesúsú jádan, ába jeíbaagun geyégua láu lagúnu lídaangiñe sun lirájüñü fulásu, ába jachúlürün lubáragiñe lachúlürün Jesúsú jáu lání disípulugu.

³⁴ Dan le larárirunbei Jesúsú tídaangiñe ugúnein, ába laríjin sarágu gürígia jagúrabañañe, ába jagúdemedagun lun ladúga ítara jáña lan quei mudún

ja moúniritiña. Ába lagúmeserun arúfudaja sarágu cátei joun. ³⁵ Dan le dárüjali, ába jayábin láni disípulugu, ába jaríñagun lun.

—Dárüjalitia áni úatiña aganoútiña lídan fulásu le. ³⁶ Oúnaja báña gürígia ja lun jóudin lídoun buri lirájüñü fulásu le yaráfabei lun jagáñijan fein, ladúga úati ni cáta ya lun jeigin.

³⁷ Ába laríñagun Jesúsu.

—Rújuma eígin joun.

Ába jaríñagun lun.

—¿Gayáraati funági woúdin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngebui.

³⁸ Laríñaga Jesúsu joun.

—¿Átiriñongi fein júma? Jeíba aríjoun.

Dan le jaríjinun, ába jaríñagun lun.

—Seíngü fein júma bián úduraü.

³⁹ Ába lañúragüdüniña gürígia sagádirugu. ⁴⁰ Ába jañúurun san san lúma dimí san, queísi laríñagun joun. ⁴¹ Ába lanúgunun Jesúsu seíngü fein to lújaburugu júma bián úduraü ja, ába laríjin siélun, ába leteín-giruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan gürígia jagía, fánrein jamáña gíñe bián úduraü jagía jádan súngebui.

⁴² Jóutiña sun jagía químule. ⁴³ Lárigiñe, ába jabuínchagüdüni dúusu faníñe láu tífe fein lúma úduraü ígíragúti. ⁴⁴ Seíngüñanu mílu wügúriña eígitiña, mabájüdünga würiña júma irájüñü.

Leíbugun Jesúsu ligíbuagu dúna

(Mt 14.22-27; Jn 6.16-21)

⁴⁵ Ába ladinagüdüniña Jesúsu láni disípulugu tídoun ugúnein lun jánjiñuragun lubá lun jachúlürün Betsáida, sun niján lan ayoúragua joun gürígia. ⁴⁶ Dan le ñúdüñjaña, ába lídin luágu wúbü ayúmuragua lun Búngiu. ⁴⁷ Dan le lagúñedunbei, lamídaanjaru dúna ugúnein jáu disípulugu, Jesúsu rugáali lábugua múarugu. ⁴⁸ Ába laríjin luágu jénreenguja lan joun lun jénjunjan ladúga jabárouñein lan garábali. Lubá larúgan, ába lídin Jesúsu jawágun eíbugeina ligíbuagu dúna, lásügürá yebe jáu. ⁴⁹ Dan le jaríjini eíbuga ligíbuagu dúna, ába jarítangun luágu úfiaü lan, ába jagúaragun, ⁵⁰ ladúga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

⁵¹ Ába ladinun tídoun ugúnein jámoun, ába lagálumadun garábali. Ába laweíridun janígi láu, ⁵² ladúga úgíli lan gunfaráanda jamáni miláguru le ladúgübei táu fein, luágu gabáfu lan lun sun cátei, derégili jachúgü.

Lareídaguagüdüniña Jesúsu sánditiña Genésaret

(Mt 14.34-36)

⁵³ Ába jánjiñuraguni dúna, ába jachúlürün Genésaret, ába jagúrúnun ugúnein láru dúna. ⁵⁴ Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan. ⁵⁵ Ába jeíbaagun lídoun sun fulásu

aríñaga luágu chúlújali lan, ába jagúmeserun gürígia anáaja sánditiña tídan jabárrari le ñíjin lubei jagáamba luágu níjein lan Jesúsu ñi. ⁵⁶ Súnti fulásu ñíjin lumúti lebélura, ubúrugú yebe, lirájüñü yebe fulásu, áraabu yebe, ába jíchaajóun sánditiña úmada, ába jamúriajan lúma lun lígiruniña lúnrügü jagúurun sánditiña jagía luágu táru lanáangun. Súnti ja agúurubaña luágu, areídaguatiña.

Cátei le adúgübalin gürígia lun marúman lan ligíbugiñe Búngiu

(Mt 15.1-20)

7 Ába jayábin fariséogu júma jádaangiñe arúfudajatiña lilúrudun Moisés ja ñúbinbaña Jerusaléngiñe, luágun Jesúsu. ² Ába jaríjin luágu añajein lan jádaangiñe disípulugu machíbun jamúti jájabu lubá jeigin según jagáburi juríu. ³ (Falá jamuti fariséogu júma jíbiri juríu binádu jagáburi binádu jagúbürigu lun meígin jamá, machíbunga jameí jájabu sarágu weíyaasu. ⁴ Dan le jayábin mágidirugugiñe, meíginbaña magúnfulirunga jagía láu jachíbuni jájabu. Níjein buri gíñe sarágu luwúyerigu igáburi jafálarun, queí buri lachibúniwa wéru, soúdiéru, boulu, asíedu.) ⁵ Ábati jálügüdüni fariséogu júma arúfudajatiña lilúrudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagúbürigu, jeiginbei láu liwíye jájabu?

⁶ Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi luei le áubei jarúfudagua júnga. Aríñagati.

Gürígia ja, jayumárurügü jíchiga inébesi nun, líña Búngiu,

ánjein tídan janígi, mebésentiña náu.

⁷ Málali jájuduragun nun, ladúga lé rügúñein jagúmadijan wügúriña jarúfudaja.

⁸ Ába laríñagun Jesúsu.

—Ígira jumáli lagúmadijan Búngiu lun jafálaruni binádu jagáburi binádu gürígia. lachibúniwa soúdiéru, wéru, lúma cátei líbeina líra. ⁹ ¡Maésturugu gíñe buítiña jugúya, ígira jumúti lagúmadijan Búngiu lun jafálaruni binádu jigáburi! ¹⁰ Aríñagatí meja Moisés.

“Inébe jamá bagúbürigu bun, le anábagubaliña lagúbürigu, jilála.” ¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchi. “Siñáti níderagunibu ladúga sun le nómabei, aríñagaadina luágu lun lan níchuguni lun Búngiu”, ¹² luágu furúmieguarügü lan le aríñaguti ítara, mámaali lan lúnti líderaguniña lagúbürigu. ¹³ Láu líra, mebégigüda jumáli lagúmadijan Búngiu lun jafálaruni binádu jigáburi, adúga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja ñíbaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfuridubei tí-

daangiñe lanígi gürígia, ligía aríbadagüdübalin ligíbugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígiriñiña Jesúsu gürígia jagía, ába lebélu-run múnadoun, ába jálügüdüni láni disípulugu luágu jémpulu le. ¹⁸ Ába laríñagun joun.

—¿Úati lubeí gíñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun gürígia siñá lan laríbadagüdüni ¹⁹ ladúga mebelúti tídoun lanígi, lurágeirugun lebélu-
ra, ñígiñe ábaya láfuridun lídaangiñe?

Láu líra laríñaguña luágu sun lan eígin, jarúmati.

²⁰ Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti, ²¹ ladúga lídaangiñe gürígia o tídaangiñe lanígi láfurida lagúbüri samínaü, adultériu, salúfuri, áfarajaní, ²² íwerujaní, wámajabúni, iyéreejabúni, iyéeni, marícharagun lan ibágari, gimúgaü, marásualugú, anáanguni únguaü, medéraaguaguduni. ²³ Sún buri cátei wuríbati le, tídaangiñe lanígi gürígia liábin, ligíati mabuí-dandagüdübalin ligíbugiñe Búngiu.

Ában wúri teréncha to afíñeruboun luágu Jesúsu

(Mt 15.21-28)

²⁴ Ába lídin Jesúsu ñígiñe louúbawagun Tíro lúma Sidón. Ába lebélu-run tídoun ában múna áni mabúseerunti yebe lun lasúbudiruni ni ában. Siñáti larámudagun, ²⁵ furése, ába tagáambun ában wúri luágu, túguchu ában irájü gawágutu ában espíritu wuríbati. Ába tiábin, ába tájuduragun ligíbugiñe Jesúsu. ²⁶ Wúri tugúya, máma juríu, Síro-Feniciána. Ába tamúriaian lúma Jesúsu lun laságaruni espíritu wuríbati le tueí tiraü. ²⁷ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

²⁸ Ába toúnabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

²⁹ Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbati tídaangiñe biraü.

³⁰ Dan le tachúlürun múnada, ába tadárirunun irájü tídan gabána, furíjali espíritu wuríbati tídaangiñe.

Lareídaguagüdüni Jesúsu ában magáambaditi, maríñagadi

³¹ Ába láfuridun Jesúsu louúbawagugiñe Tíro, ába lásügürün Sidóngiñe lúma lídaangiñe buri fulásu láni-na Decápolis, ába lachúlürün luágun barána Galiléa.

³² Ñi janúga ában wügúri magáambaditi, dagádaga lerérun lun, ába jamúriaian lúma lun líchuguni lújabu luágu lun lareídaguagüdüni. ³³ Ába ladíñurun Jesúsu ñígiñe láu jaweí gürígia, ába ládaruni bián lirájüñü lújabu larígeirugun, ába lásuerun, ába lájurudunun

liñéñe láu arúrei. ³⁴ Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

³⁵ Ába lánjunrenchun larígeirugu magáambaditi ligía, ába tánjingichun liñéñe lun ladímurejan buídu. ³⁶ Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligíatima jabájüdaguni. ³⁷ Ábati buri laweíridun janígi sarágu, ába jaríñagun.

—Adúga lumúti sun cátei buídu, darí lun lagáambagüdüniña magáambaditiña, adímuregüda láña maríñagaditiña.

Leígagüdüni Jesúsu gádürü mílu gürígia

(Mt 15.32-39)

8 Lídan dan ligía, ábaya jóundaragun sarágu gürígia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña gürígia ja nun ladúga úrúwa wéyu jáu núma ya áni úaali ni cáta jáma lun jeígin. ³ Ánjaña nouñaja ágyu meíginga, ladágaruba falálaü jawágu úmada, ladúga añájein jádaangiñe, díseti ñígiñe lumúti jayábin.

⁴ Ába jóunabuni láni disípulugu.

—¿Ída lubáti jeígagüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúragüdüniña gürígia múarugu, ába lanügünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrurusujanun, ába líchugunun joun láni disípulugu, ába jafánreinjanun jádan gürígia jagía. ⁷ Níñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña. ⁸ Joútiña sun jagía químule, buíngüdagíña sédü faníñe táu tífe to ígiraguboun. ⁹ Yaráfañanu joun gádürü mílu wügúriña. Ába louñajaniña Jesúsu ágyu, ¹⁰ ába ládinun tídoun ugúnein jáma láni disípulugu, ába jóudin Dalmanutoún.

Jamúriaian fariséogu miláguru lúma Jesúsu

(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriaian lun larúfudun ában miláguru joun, siélugiñe. ¹² Ába lawáragun Jesúsu weíri, ába laríñagun.

—¿Cásan uágu jamúriaia gürígia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiriñiña Jesúsu, ábaya ládinun tídoun ugúnein, ába lídin loubáfurugun dúna.

Jarúfudajan fariséogu quei ísi

(Mt 16.5-12)

¹⁴ Bulíei jamútiti disípulugu janúgün eíginí, ában rügúñoun fein jáma tídan ugúnein. ¹⁵ Ába lewéridiruniña Jesúsu, laríñaga joun.

—Tounigi jumátia lueí jísite fariséogu lúma lísite Heródes.

¹⁶ Ába jaríñagun disípulugu jádaangua.

—Ladúgatia meígan wamá fein laríñagubei ítara.

¹⁷ Ába lasúbudiruni Jesúsu jarítangun, ába laríñagun joun.

—¿Ca uágu jaríñaga luágu meígan jumá fein? ¿Úagili gunfaráanda jumá, meféen jugúya? ¿Ítara lidére jíchügü? ¹⁸ ¿Maríjintün láu jágu, magáambun jugúya láu jarígeirugu? ¿Marítangun jumáali? ¹⁹ Dan le nafánreinjanbarun seíngü fein jádan seíngü mílu wügúriña, ¿átiriñoun faníñe táu tífe jabúdu?

Ába jaríñagun.

—Dúusu.

²⁰ —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdu?

Ába jaríñagun.

—Sédü.

²¹ Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareídaguagüdün Jesúsu ában maríjinti Betsáida

²² Lárigiñe, ába jachúlürün Betsáidoun, ába lanügúniwa ában maríjinti lun Jesúsu, ába jayúmurgun lun lun lagúurun luágu. ²³ Ítara líña lárügüdüni Jesúsu maríjinti ligía, ába lanúgüni bougudín lueí fulásu ligía. Ába lájurudagun arúrei luágu lágu, ába líchuguni lújabu luágu, ába lálügüdüni ánjein gayáaraü lubeí laríjin. ²⁴ Ába laríjin, ába laríñagun.

—Aríja numútiña wügúriña, naríjiniña quei tídibu wéwe, eíbugeina.

²⁵ Ábaya líchuguni Jesúsu lújabu luágu lágu, ába laríjin gürígia ligía láu goúnigi, ába lareídagun, ába laríjini sun cátei furáangu. ²⁶ Ába loúnajani Jesúsu águyu, aríñageina lun.

—Mebélurabátia ubúrugin, maríñagunbeíme lun ni ában ñi.

Laríñaguni Pédro luágu Jesúsu lan Crístubei

(Mt 16.13-20; Lc 9.18-21)

²⁷ Lárigiñe, ába lídin Jesúsu jáu lání disípulugu lídoun buri lirájüñü fulásu le geyéguabei láu ubúrugu Cesaréa le Filípo. Úmada, ába lálügüdüniña lání disípulugu, laríñaga joun.

—¿Cátanasan jaríñagun gürígia?

²⁸ Ába jóunabun.

—Añájein aríñagutiña luágu Juan lan le abásteragudabei lan amúrü, jíbiri aríñaga proféta Elías ban, añájeingua aríñagutiña luágu ámu lan proféta amúrü.

²⁹ Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amúrü Crístubei, le loúnajabei Búngiu lun lasábaruniña gürígia lídaangiñe jafígoun.

³⁰ Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

³¹ Ába lagúmeserun Jesúsu, le Wügúri Garaúwarügüti, arúfudaja joun luágu lúnti lan lasúfurirun sarágu, luágu weíribei lan jíchugun wügúriña weírigitíña lídan jafíñen juríu mebéreseni láu, ítara lúba gíñe jóuseruni jábutigu fádirigu jáma arúfudajatiña lilúrudun Moisés. Aríñagati joun luágu láfarúaba lan jilágubei, áni lásaarüba lan lídaangiñe ouweni lúnya labágaridun luágu lúrúwan wéyu. ³² Furáanguti laríñaguni le joun. Ábati lanúgüni Pédro Jesúsu ñigiñe, ába lagúmeserun adeínja lun. ³³ Ába lagáragun Jesúsu, ába laríjin jawágun lání disípulugu, ába lébechuni Pédro, ába laríñagun lun.

—¿Díseba nueí, Máfia! Bugúya, masáminaruntibu quei Búngiu, basáminarun quei wügúriña.

³⁴ Ábati lagúarun Jesúsu joun lání disípulugu jáma jíbiri gürígia lun jayárafadun lun, ába laríñagun joun.

—Le buséti lafálarunina, bulfeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanúgüni ában wügúri lugúruwan, falálana. ³⁵ Ladúga le abúseeruti leséfuragun lúngua ya ubóuagu leféridirubei ibágari le magúmchaditi, ánjeinti le ánjabei leféridiruni libágari ya ubóuagu nueígiñe, libíjubei ibágari le magúmchaditi siélu. ³⁶ ¿Cági ju lan lun gürígia lagáñeiruni sun le lánina uboú, leféridireime lubára siélu? ³⁷ Úati ni cáta lánina uboú le áuti gayára lan lagáñijan gürígia lubára siélu. ³⁸ Le anúgüti busíganu nuágu lúma luágu nerérin jagíbugiñe gürígia múaraantiña áni gafígouñtiña ja, nanúgüba gíñe busíganu láu, áu le Wügúri Garaúwarügüti, dánme le niábin siélugiñe láu luweírigin Núguchi, geyégu jáu ánjeligu ja sándubaña.

9 Aríñagati gíñe Jesúsu joun.

—Nínárün jáu, luágu añájein lan jádaangiñe ja yábaña guetó, moúnwenbaña darí jaríjini lachúlürün larúeijan Búngiu láu ubáfu.

Lámuñedagun laríjin Jesúsu

(Mt 17.1-13; Lc 9.28-36)

² Sísí wéyu lárigiñe, ába lanúgüni Jesúsu Pédro, Jacóbo, lúma Juan, ába lídin jáu luágu ában wúbü íñuti le ñí lumuti gayára lan jábugua jamá, ába lámuñedagun laríjin ñi jagíbugiñe. ³ Ába támiridun lanáangun jarú quei jeméreedu, weíríti tíjarun chúlú lúmoun úa jamá ni gürígia ubóuagu gayáraati jachíbum gamísa lun tájarudun ítara. ⁴ Ába jaríjini Elías lúma Moisés ayánuja lúma Jesúsu, ⁵ ába laríñagun Pédro lun Jesúsu.

—Maésturu, ílidan dan awánja lan ya! Adúga wamá úruwa dibásein, ában bun, ában lun Moisés, ában lun Elías.

⁶ Laríñagubaalin líra ladúga janúfude disípulugu, áni ibídiñeti lun Pédro ca lan laríñagubei. ⁷ Ába larárirun ában juánriñu le ñíjin jabeí, ába ladáuragun jáu, ába lagaambúniwa ában umálali lídaangiñe juánriñu ligía le aríñagubei.

—Niján Niraú le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügüya Jesúsú.

⁹ Dan le aráriereina jamá lueígiñe wúbü, ába léredun Jesúsú jawágu lun mabájüdagun jamáni le jaríjibeí lun ni ában daríme saráali lídaangiñe ouweni lúnya labágaridun, ligía le Wügúri Garaúwarügüti. ¹⁰ Ligía jareí-dunbalin jádaangua, álügüdajárügütiña jámagua cátei lán funa ásaarunibeí lídaangiñe ouweni. ¹¹ Ábati jálügüdüni Jesúsú.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñúbin furúmiñe áni laráanserubei lan sun cátei. ¿Cági taríñagubei Lerérun Búngiu nuágu, áu le Wügúri Garaúwarügüti? Aríñagatu luágu nasúfuriruba lan sarágu áni mabájüdünbadina lan. ¹³ Naríñajare jun luágu ñúbinjali lan Elías, ába jadúgüni gürígia sun le jabúseerunbei láu, quei taríñaguni Lerérun Búngiu luágu ítara lúba lan lasúseredun lun.

Lareídaguagüdün Jesúsú ában irájü gawáguti espíritu wuríbati

(Mt 17.14-21; Lc 9.37-43)

¹⁴ Lárigiñe, ába jagíribudun le ñíjin jabeí jíbiri disípulugu, ába jaríjin sarágu gürígia geyégu jáu. Níñanu giñe arúfudajatiña lilúrudun Moisés asígeneja jáma.

¹⁵ Dan le jaríjinbalin Jesúsú, ába laweíridun janígi láu jaríjini ñi, ába jeíbaagun abúsura lun. ¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába loúnabun ában jádaangiñe ja ñíbaña, ába laríñagun.

—Maésturu, niján niraú nanúgün bun, níjein ában espíritu wuríbati luágu, merérunjali ladúga. ¹⁸ Ní lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacún-rinjan lári. Ledébilidunñati ítara. Amúriajaadina jáma báni disípulugu lun jaságaruni espíritu wuríbati le lueí, siñá jamuti.

¹⁹ Ába loúnabun Jesúsú, ába laríñagun.

—¿Gürígia maffíneraditiña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha maffíñeni le jídaanbei? Barújumei irájü ligía ñájoun.

²⁰ Ába janúgüni lun. Dan le laríjinbalin espíritu wuríbati ligía Jesúsú, ába loúwejugüdüni irájü ligía, ába leíguadun múarugun, ába lagárabajan, ába láfurijan jacútaü liyúmulugugiñe. ²¹ Ába lálügüdüni Jesúsú lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe ñúraügili. ²² Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Anjein lubeíti níjein lubeí gayára bumúti adúga, gudéme wamá bun, íderagua báwa.

²³ Ába laríñagun Jesúsú lun.

—¿Ca uágu baríñaga ítara? Inárüni luágu gayára lan nadúgüni. Sun cátei gayáraati lun le affíñebei.

²⁴ Ába lagúaragun lúguchi irájü ligía.

—¿Affíñetina, íderagua bána lúntima naffínerun!

²⁵ Dan le laríjinbei Jesúsú luágu furésetimájali lan jagíbedun gürígia, ába ladeñjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabeí irájü le áni mebelúradügüyabá lídoun.

²⁶ Ába lagúaragun espíritu, ábaya loúwejugüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan. ²⁷ Ába lárügüdüni Jesúsú lueígiñe lújabu, ába liñúraguni, ába laráramun.

²⁸ Ábati lebelurun Jesúsú múnadoun, ába jálügüdüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

²⁹ Ába laríñagun joun.

—Ladúga líbe espíritu le, láu rügúñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsú luágu loúnwen

(Mt 17.22-23; Lc 9.43-45)

³⁰ Dan le jóudin ñígiñe, ába jásügürün Galiléagiñe, ³¹ mabúseeruntiti Jesúsú lun lasúbudirúniwa jalíñañein lan ladúga larúfudajaña lan joun láni disípulugu, aríñageina ligía luágu ledéregerúaba lan, ligía le Wügúri Garaúwarügüti, jájaburugun wügúriña wuríbatiña áni jáfarubei lan jilágubei, ábame lásaarun lídaangiñe ouweni luágu lúruwan wéyu lúnya labágaridun. ³² Úati gunfaráanda jamáni le laríñagubei joun, áni janúfudetiña lun jálügüdüni.

¿Cátima weírigubei?

(Mt 18.1-5; Lc 9.46-48)

³³ Ába jachúlürün ubúruyu Capernaúm, múnada, ába lálügüdüniña Jesúsú.

—¿Cásan buga uágu jadímureja le eíbugeina jumá?

³⁴ Ába jeréderun maníñu ladúga úmada adímurejeina jañá buga luágu ca lan jádaangiñe weíriguti-maabei. ³⁵ Ábati lañúurun Jesúsú, ába lagúarun joun dúsusugubei disípulugu lubádun, ába laríñagun joun. —Le abúsueruti ligía lan furúmiñeti, lúnti agúmujóuni lan jádan sùngubei, lun gíñe lesériwidun joun sùngubei.

³⁶ Ába lanúgün ában irájü, ába líchuguni jamídaangua, ába lanúgüni lújaburugu, ába laríñagun joun.

³⁷ —Gürígia le erésibiruti ában irájü quei le lídan níri, resíbi lumútina, áni máma rügúñein áu lerésibira, resíbi lumúti gíñe Núguchi le oúnajabalina.

Le mámabei wágani, wámagiñeñein

(Lc 9.49-50; Mt 10.42)

³⁸ Ába laríñagun Juan lun.

—Maésturu, aríjatiwa ában wügúri aságajati es-píritugu wuríbatíña lídan bíri, quei máma lan wá-mañein, ába wawéridiruni lun madúgündügüya láani.

³⁹ Ába laríñagun Jesúsu.

—Mawéridira jumeí, ladúga úati ni ában le adúgüti miláguru lídan níri lun ladímurejan wuríba nuágu. ⁴⁰ Le mámabei wágani, wámagiñeñein. ⁴¹ Ninárün jáu luágu furúmiegurügü lan le íchuguti ában wéru dúna jun lídan níri ladúga láni jumá Crístu, libíjuba afáyeirujau buíti.

Goúnigi lueí leíguadúniwa lídoun figou

(Mt 18.6-9; Lc 17.1-2)

⁴² Furúmiegurügü le afígoungüdüti ában já-daangiñe ja isérigiñabaña lídan jafíñen nuágu, buítimaati jamúga lun lun lágurúniwa baránajoun láu ában oúnwenbun dúbü le amúligülei güráñu luágu ligíina sügú láu ladúgüni cátei líra. ⁴³ Ánjabu lafígoungüda bújabu guánarü, buítimaati jamúga lun báchuguni, ladúga buítimaati jamúga bídin siélun láurügü ában újabu sügú láu jamúga badarún láu biángubei bújabu máfiougatin, ⁴⁴ ní lubei moúnwen jamá jéweraü ja eígbalin jágubu jiláaña, méñeguchadi wátu. ⁴⁵ Ánjabu gíñe lafígoungüda bugúdi guánarü, buítimaati jamúga gíñe lun báchuguni, ladúga buítimaati jamúga bebélurun siélun láu ában ugúdi sügú láu badarún máfiougatin láu biángubei bugúdi, ⁴⁶ le ní lubei moúnwen jamá jéweraü, méñeguchadi ligía wátu. ⁴⁷ Ánjabu gíñe lafígoungüda bágu, buítimaati lun baságaruni, ladúga buítimaati jamúga bebélurun lídoun larúeijan Búngiu láu ában águu sügú láu jamúga badarún máfiougatin láu biángubei bágu, ⁴⁸ le ní lubei moúnwen jamá jéweraü, méñeguchadi ligía wátu.

⁴⁹ Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdüniwa, queisigubeirügü líchugúniwa sálu luágu cátei adágaragüdüwati lun Búngiu, arúfuda lámuga luágu jarúma lan, buídu ligía lun lareidúniwa. ⁵⁰ Buíti sálu, ánjein leféridira lubásuan, ¿cábagi un ju lan? Ítara líña lubeíti, awánda jumeí sun ouchúni lubá jarúmadun ligíbugiñe Búngiu, lídan jumá úraguni júmagua.

Larúfudajan Jesúsu luágu ígiraguni

(Mt 19.1-12; Lc 16.18)

10 Ába láfuridun Jesúsu Capernaúmgiñe, ába lídin loúbawagun Judéa lúma luágun oúbaü le nígiñe lubeí láfuacha wéyu libíti dúna le Jordán. Ábaya joundaragun gürígia le ní lubei, ábaya larúfudajan joun queíñaja ligáburi. ² Ábati jayábin jádaangiñe fariséogu luágun Jesúsu áluga járgüdüni tídan jasádarán láu

jálügüdüni ánjein maríban lubeí lun lafánreinragun wügúri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladúga tidére janígi. ⁶ Ánjein méja, dan le ladúgünbalin Búngiu sun cátei, “adúga lumútiña wügúri túma wúri”.

⁷ “Ligía lígirubei lubeí wügúri lúguchi túma lúguchu lun laganoúniwa túma lúmari, ⁸ ábame jeréderun quei ábanrügü.” Mámáña lubeíti biáma, ábanrúgaaña.

⁹ Ligía moún lubei lafánreinraguni wügúri le ladúnraguagüdübei Búngiu.

¹⁰ Dan le múnada jamá, ábaya jálügüdüni disípulugu luágu cátei le, ¹¹ ába laríñagun Jesúsu joun.

—Le ígirutu lúmari, ába lagámaridun ámu, ladúgüña adultériu. ¹² Ánjein gíñe tígira wúri túmari, ába tagámaridun ámu, tadúgüña gíñe adultériu.

Labíniruniña Jesúsu irájüñü

(Mt 19.13-15; Lc 18.15-17)

¹³ Ába janáajan gürígia irájüñü lun Jesúsu lun lagúrun jawágu, ába jagúmeserun disípulugu adeíña joun ja anáajabaliña. ¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladúga ja jarúmabaña afíñe quei irájüñü, jagía lílanabaña larúeijan Búngiu. ¹⁵ Ninárün jáu luágu le lan marúfudunti ában igáburi únabugubuti queisi ában irájü, siñábei lebélorun lídoun larúeijan Búngiu.

¹⁶ Ába lanúgüniña lújaburugu, ába labíniruniña láu lújabu jawágu.

Ladímurejan ában rísiti lúma Jesúsu

(Mt 19.16-30; Lc 18.18-30)

¹⁷ Dan le lasígirunbalin Jesúsu luweíyasun, ába liábin ában wügúri eíbaagueina lubároun, ába lájuduragun ligíbugiñe, ába lálügüdüni ítara.

—Maésturu buíti, ¿cásan cátei buíti lúnbei nadúgüni lun nibíjini ibágaru le magúmuchaditi?

¹⁸ Ába laríñagun Jesúsu lun.

—¿Ca uágu baríñaga nun “buíti”? Ában rügúñein buíti, Búngiu. ¹⁹ Subúditi gumádi bun. “Maganoúabá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürígia, inébe jamá bagúbürigu bun.”

²⁰ Ába laríñagun wügúri ligía.

—Maésturu, gúnfulitina láu sun le lúmagiñe ñúraügidina.

²¹ Ába laríaguni Jesúsu láu ínsiñeni, ába laríñagun lun.

—Ában cátei mégeibei lun badúgüni. beíba, alúgurabeí sun le búmabei, ábame bíchuguni lebégi joun gudémetiña, ábame bibíjin írisini siélu. Ábame bagíribudun, ábame bafálarunina.

²² Dan le lagáambunbalin gürígia le cátei le, ába lírudagun, ába lídin láu íruni ladúga rísiti buídu. ²³ Ába laríjin Jesúsu geyégu jawágun súnigubei, ába laríñagun joun láni disípulugu.

—Jénreenguti lun jebélurun rísitiña lídoun larúeijan Búngiu!

²⁴ Ába laweíridun janígi disípulugu láu le laríñagubei, ábaya laríñagun joun.

—Nirájüñü, jénreenguti lun jebélurun ja íchubalin jafíñen luágu jarísin lídoun larúeijan Búngiu!

²⁵ Méreenguntimaati lun ában caméyu lun lásügürün lídaangiñe lujúyun ában agúsa sügú láu lebéllurun ában rísiti lídoun larúeijan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába laríaguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayáraati, ladúga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsu.

—Ninárün jáu luágu furúmieguarügü lan le ígirutu lúban, o lamúlenu, o líbugañanu, o lítunu, o lúguchi, o lúguchu, o lirájüñü, o lufúlasun nueígiñe o lueígiñe lan ugánu le lánina asálbaruni, ³⁰ lerésibiruba san weíyaa-su sügú láu guetó lídan uboú le. múna, amúlenu, íbugañanu, ítunu, úguchurunu, isáanigu, lúma fulásu, láu sun leíbaajóuniwa, resíbi ligíame íbágarí magú-muchaditi siélu. ³¹ Sarágu jáña ja furúmiñetiñábaña guetó, jagíaba agúmujóuni yágüta siélu, áni sarágu ja agúmujóunibaña, jagíaba furúmiñetiña.

Ladímurejaanya Jesúsu luágu loúnwen

(Mt 20.17-19; Lc 18.31-34)

³² Luáguñanu úma lun Jerusaléoun, Jesúsu jabá jabá láni disípulugu, láuñanu luweírin anígi, áni jíbiri gürígia ja afálarubaliña, láuñanu anúfudei. Ábayati ladíñurun Jesúsu jáu láni dúusu disípulugu jaweí jíbiri gürígia, ába lagúmeserun aríñagei le lúnbei lasúseredun lun joun. ³³ Ába laríñagun joun.

—Quei lubeí jaríjini, luáguñadiwa úma lun Jerusaléoun, le ñíba lubeí nedégeréua, áu le Wügúri Garaúwarügüti, joun jábutigu jafádirigun juríu lúma joun arúfudajatiña lílúrudun Moisés, ja lúnbaña jasíadirunina lun noúnwen. ³⁴ Ábame jedégererunina joun ja mámabaña juríu lun jéjerajan náu, jabeíchubadina, jásueragubadina, ábame jáfarunina jilágubei, luágume lírúwan wéyu, ábame násaarun lídaangiñe oúweni lúnya nabágaridun.

Jamúriajan Jacóbo lúma Juan ában fuleísei

(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, busétiwa lun badúgün ában fuleísei woun.

³⁶ Ábati laríñagun joun.

—¿Cági jabúseerubei lun nadúgün jun?

³⁷ Ába jaríñagun lun.

—Lun dánme lan barúeijan láu sun buweírigun, lun bañúuragüdüniwa, ában lueígiñe boúnwenren, ában lueígiñe bubaúna.

³⁸ Ába laríñagun Jesúsu joun.

—Íbídiñeti jun ca lan jamúriajabei. ¿Gayáraabei jawánduni luweírin igárigu le lúnbei nawánduni, gayára ligíame júradun núma lídan nasúfurirun?

³⁹ Ába jóunabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun jañúurun ában lueígiñe noúnwenren, ában lueígiñe nubaúna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri dísi disípulugu, ába jagáñidun lúma Jacóbo láu Juan. ⁴² Ába lagúarun Jesúsu joun súnigubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ⁴⁴ Furúmieguarügü jídaangiñe le abúseeruti lun ligíaba lan furúmiñeti, lúnti ídámuni lan joun jíbiri, ⁴⁵ ítara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágarí lebégime jasálbarun sarágu gürígia.

Lareídaguagüdüni Jesúsu Bartiméo, le maríjınbei

(Mt 20.29-34; Lc 18.35-43)

⁴⁶ Ábati jachúlürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti gírítí Bartiméo, líraú Timéo, ñun láru úma amúriaja seínsu. ⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladúgawagun David, gudémená bun!

⁴⁸ Sarágu jáña adeínjatiña lun lun lámanichun, ligíati-ma lagúaragun.

—¡Ladúgawagun David, gudémená bun!

⁴⁹ Ába leréderagun Jesúsu, ába laríñagun.

—Wájuma lun lun líabin nun.

Ába jagúarun lun maríjinti ligía, ába jaríñagun lun.

—Ragúba gurásu, sarába, lagúajaña bun.

⁵⁰ Ába lachüürunun labíte, ába ladúgün ában chubaú, ába layárafadun lun Jesúsu. ⁵¹ Ába lálügüdüni Jesúsu.

—¿Ca babúseerubei nadúgün bun?

Ába loúnabun maríjinti ligía.

—Maésturu, busétiwa naríjin.

⁵² Ába laríñagun Jesúsu lun.

—Gayáraati bídin, areídaguaadibu ladúga afíñeedibu nuágu.

Lídan óra ligía, ába gayára lan laríjin maríjinti ligía, ába lídin lárigi Jesúsu.

Lebélurun Jesúsu Jerusaléoun

(Mt 21.1-11; Lc 19.28-40; Jn 12.12-19)

11 Dan le yaráfaaña lubei lun Jerusalén, ába jachúlürün ligíbugiñe fulásu buri le Betfajé lúma Betánia, le únabubei libíti wúbü le Olívos, ába laríñagun Jesúsu joun biáma jádaangiñe láni disípulugu.

²—Jeíba lídan liraúraü fulásu le wagíbugiñebei, dán-me le jachúlürün ñi, jadáriruba ában burígü güráñu le maweinjóungili ni ában weíyaasu. Jafáragadeíme, ábame janúgüni ñájoun. ³ Ánjaün álügüdúwa ca lan uágu jadúgei le, jaríñagame lun luágu busén láni Jesúsu, luágu láguyugüdübei lan furése.

⁴ Ába jóudin, ába jadáriruni burígü ligía güráñu lubádu ában béna, bougudi lídan úma, ába jafáragaduni.

⁵ Ába jaríñagun jádaangiñe ja ñíbaña úmadarugu joun.

—¿Ca jadúgübei? ¿Cáme jafáragadei burígü le?

⁶ Ába jóunabuniña quei laríñaguni Jesúsu joun, ába jígiruniña lun jóudin láu. ⁷ Ába janúgüni burígü lun Jesúsu, ába jíchugunun jabíte luágu burígü ligía, ába laweínruni Jesúsu. ⁸ Sarágu jáña átulerutu jabíte luágu úma, jíbiri, ába jánchuañan tilímun wéwe, ába jachágajani luágu úma lubá lásügürün Jesúsu ligíbuagugíñe.

⁹ Ja ubáraübaña jáma ja árigibaña, ába jagúmeserun agúaraja.

¡Glória! ¡Biníwati wügúri le ñúbinbei lídan líri Wabúreme Búngiu!

¹⁰ Biníwati arúejani le ñúbinbei, le lúnbei ítara lan queisi meja larúejan wáguchi Davíd.

¡Uweiriguni lun Búngiu lídan líñun-ágei siélu!

¹¹ Lárigiñe, ába lebélurun Jesúsu Jerusaléoun, belú ligía témpulurugun, lárigiñe laríjini sun cátei, ába lídin Betánia jáu dúusu disípulugu ladúga dárüjali lan.

Líñaraguni Jesúsu tídibu ígo to mínboun

(Mt 21.18-19)

¹² Larúgan, dan le jáfuridunbei Betániagiñe, ába lalámachun Jesúsu. ¹³ Dísegiñe, ába laríjin ában tídibu ígo gabánatu. Ába lídin aríja ánjein gin tubei, ubánaü rügüñein ladárra tuágu ladúga mámagili lan tidáani ígo. ¹⁴ Ábati laríñagun Jesúsu lun tídibu ígo ligía.

—Magíindadügüyabá.

Ába jagáambuni láni disípulugu.

Larúmadagüdünun Jesúsu témpulu

(Mt 21.12-17; Lc 19.45-48; Jn 2.13-22)

¹⁵ Lárigiñe, ába jachúlürün Jerusaléoun, ába lebélurun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagáragajani jádabulan ja asáansijabaña seínsu joun gürígia lúma jála ja alúgurajabaña únjun. ¹⁶ Mígirun lumútu témpulu lun úmame. ¹⁷ Ába laríñagun lídan larúfudajan joun.

—Laríñajare Búngiu tídan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barú jumaaru quei jában jíwerutiña.”

¹⁸ Ába jagáambun jábutigu fádirigu jáma arúfudajatiña lilúruden Moisés luágu le laríñagubei, ába jagúmeserun áluaja ída lúba lan jáfaruni jílagubei, ladúga janúfudetiña luei, quei sun lan gürígia weíruti janígi luágu le larúfudajabei. ¹⁹ Dan le lagúñedunbei, ába láfuridun Jesúsu fulásurugugíñe.

Tídibu ígo to ásaürüboun

(Mt 21.20-22)

²⁰ Larúgan bináafin, sügúti Jesúsu jáma láni dúusu disípulugu luegiñe méme úma ligía, ába jaríjinun tídibu ígo saúja lúmagiñe tílagüle. ²¹ Ába larítaguni Pédro, ába laríñagun lun Jesúsu.

—Maésturu, jaríjabá tun tídibu ígo to bíñaraguboun gúñaarü, saúja!

²² Ába laríñagun Jesúsu joun súngebei.

—Afíñe jumá luágu Búngiu. ²³ Ninárün jáu luágu furúmieguarügü lan le aríñaguti lun wúbü le. “Gidába yágiñe, dabúba baránajoun”, ánjein úa lubei liloúguan afíñeni tídan lanígi áni afíñe ligía luágu lagúnfuliruba lan le laríñagubei, ítara lúba. ²⁴ Ligía naríñagunbei jun luágu sun lan le jamúriajan lúma Búngiu, ánjein afíñe jubei luágu resíbi jumáli lan, ítara lúba. ²⁵ Dan le jayúmuraguña lan lun Búngiu, ánjein níjein lubei ladúga ában gürígia jun le mísiñeti jun, ferúduna jumei lun gíñe ferúduna lánün Júguchi Búngiu le siélubei. ²⁶ Ánjein úa ferúduna jumá, úabei gíñe ferúduna láani Júguchi Búngiu le siélubei jífígoun.

Lugúmadin Jesúsu

(Mt 21.23-27; Lc 20.1-8)

²⁷ Ába jagíribudun Jerusaléoun. Dan le eíbugeina lubei Jesúsu témpulurugu, ába jayábin jábutigu fádirigu, arúfudajatiña lilúruden Moisés, jáma ámu wügúriña ja weirigutiña lídan jafíñen juríu, ²⁸ ába jálügüdüni.

—¿Cáteisán biríchabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

²⁹ Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóunaba, naríñagubei jun ca lan áu gumádi nadúgei buri cátei le. ³⁰ ¿Ca óunajabalin Juan abásteragúdaja? ¿Búngiu, ódi wügúriña?

³¹ Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óunajabalin, laríñaguba woun ca lan uágu mafíñerun wabei lun Juan. ³² ¿Ódi waríñaguba funági luágu jóunajan lan wügúriña?

Lun jamúga jóunabun ítara, janúfudetiña jawei gürígia, ladúga subúdi jamáni sun gürígia luágu proféta lán Juan. ³³ Ábati jaríñagun lun Jesúsu.

—Ibídiñeti woun.

Ábati gíñe laríñagun Jesúsu.

—Maríñagun nubeí gíñe jun ca lan áu gumádi nadúgei cátei le.

Jémpulu jawáguti ñadágimeintiña wuríbatíña
(Mt 21.33-46; Lc 20.9-19)

12 Ábati lagúmeserun Jesúsu adímureja joun gürígia ja ñíbaña láu jémpulu, ába laríñagun joun. —Ñíñein meja ában wügúri, ábunaguti tídi bu beíbei lufúlasunrugu. Ába ladúgün baríeru láu, adúga ligía ában ágei lun laríñagun tía beíbei lídoun lúma ában wáyelesi lun gayára lan loúnigiruni sun cátei. Ába lájayajani lichári joun ñadágimeintiña, ába lídin adúga weíyaasu. ² Dan le lachúlürünbei dan lun alúba-jani, ába loúnajan ában lumúsun amúriajei lufánran jámagiñe ñadágimeintiña. ³ Ábarüga járügüdüni músu ligía, ába jabúleiseiruni, ába jóunajani lárigoún, míchutiña ni cáta lun. ⁴ Ábaya loúnajan labúreme ichári ábanya músu, ába jíchaagun dúbü luágu, bougua jameí lálbulugu, anába. ⁵ Ábaya loúnajan labúreme ichári ábanya, ába jáfaruni jilágubei. Lá-rigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei. ⁶ Níjeinguati ában lun loúnajani, ában liraú jínsiñeti lun buídu, lagúmujoún óra ába loúnajani, ába larítagan luágu inébebei lan joun ladúga liraú lan. ⁷ Ába jaríñagun ñadágimeintiña jámagua. “Niján le lúnbei libíjini alágan, wáfaraali jilágubei, wagía lámuga labúriña sun cátei.” ⁸ Ábati járügüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábatí ladúga labúreme ichári? Liábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjan jumágilisan le taríñagubei Lerérun Búngiu nuágu? Taríñajare.

Lé meja dúbü le mabúseerun jabeí ábunagutiña, ligíaaali furúmiñeti.

¹¹ Wabúreme Búngiu adúgübalin lun furúmiñetibeí lan, áni aríja wamúti quei ában cátei weíriguti.

¹² Ába jabúseerún yebe jadáürüni Jesúsu ladúga jasúbudiruni luágu jawágu lan layúsurei jémpulu le. Quei janúfudebei jaweí gürígia, ába jígiruni lúngua, ába jóúdin.

Luáguti lafáyeijoún seínsu lun gumádi
(Mt 22.15-22; Lc 20.20-26)

¹³ Lárigiñe, ába jóunajóuniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lídunrunme. ¹⁴ Ába jayábin, ába jaríñagun lun.

—Maésturu, subúdi woun luágu aríñaga báani in-árüni, manúfudeiga lueí ni ában ladúga ni cáta lan luweírigun gürígia bun, áni barúfudajani lémeri Búngiu láu inárüni. Áríñagabá ában cátei woun. ¿Buítisan lun lafáyeijoún seínsu lun warúeite le Rómána ódi mabuíduntí?

¹⁵ Subúdi lumúti Jesúsu luágu biánguañein lan jagíbu, ába laríñagun joun.

—¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janúgüni lun. Dan le laríjini, ába lálügüdüniña. —¿Cági iyáwa lúma íri le luágubei?

Ába jaríñagun lun.

—Láni urúei Rómána.

¹⁷ Ába laríñagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburi loúnabuniña.

Álügüdajani libúgürü ásaaruni lídaangiñe óuweni
(Mt 22.23-33; Lc 20.27-40)

¹⁸ Ába jóúdin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe óuweni. Ába lubeíti jaríñagun lun.

¹⁹ —Maésturu, aríñagatí meja Moisés luágu ánjein lan óuwe ában wügúri le maríeiti masániguga táu lúmari, lúnti lan lamárieidun lamúlen túma wúri to ueíboun louwe, lun gasánigu lan táu lun líbugaña le óuwebei. ²⁰ Níñanu mejati sédü gamúlenuguatíña, le furúmiñeti, ába lamárieidun, ába loúnwen marájüñüga. ²¹ Le jabíaman, ába lamárieidun túma wúri tó buga lúmari líbugaña, ába gíñe loúnwen marájüñütiña, ligía méme asúsereda lúma le júruwan. ²² Maríeitiña sédügubei jagía túma, úati ni ában garaúti táu. Lagúmujoún óra, ába gíñe toúnwen wúri tugúya. ²³ Niján le uágubei wálügüdaja. Dánme le jásaarun jílaaña lídaangiñe óuweni lúnya gabágari jamá, ¿cábagi úmari wúri tugúya jádaangiñe sédü gamúlenuguatíña ja, lá-rigiñe maríeí jamá sun jagía túma?

²⁴ Ába laríñagun Jesúsu joun.

—Buléiguatún ladúga libídiñe tuáguti Lerérun Búngiu jun, ni luáguti lubáfu Búngiu. ²⁵ Dánme le jásaarun jílaaña lúnya jabágaridun, ámujalime jabá-gari, magámaridun jába, míchugun jamáñame jasánigu lun maríeí, queísi magámaridun jamá án-jeligu siélu. ²⁶ Ánjeinti luágu sará jamá jílaaña lúnya jabágaridun, ¿malíjan jumágiru lílburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.” ²⁷ Ítara líña lubeíti, ánjein jamúgati jílaaña jáña wügúriña jagía lun sun dan, maríñagunti jamúga Búngiu luágu Jabúngiute lan, ladúga máma Jabúngiute jílaguaaña Búngiu, Jabúngiute wín-wangiña. Ítara líña lubeíti, júgúya weíríti jabúleídá-gun.

Gumádi le weírigutimaabei
(Mt 22.34-40)

²⁸ Níñein ában jádaangiñe arúfudajatiña lílürudun Moisés le agáambubalin jadímurejan, queíti subúdi láani luágu óunaba lániña Jesúsu buídu, ába líábin lubároun, ába lálügüdüni.

—¿Cáteisán lídaangiñe lilúrudun Búngiu weíriguti-maabei?

²⁹ Ába laríñagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügúñein Abúremein. ³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei, ³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába laríñagun arúfudajati ligía lun.

—Buíti baríñaguni, maésturu. Binárün luágu ában rügúñein lan Búngiu, luágu úa lan ámu, ³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun gíñe jínsiñe jamá wíbirigu woun queisi wínsiñegua woúngua. Gebégiti sun líra ligíbugiñe sùgú láu sun wadágaragüdüñ lun lúma sun cátei le agudúbei luágu latárü.

³⁴ Dánti le lagáambun Jesúsu loúnabun láu lichú áu, ába laríñagun lun.

—Madíseedibu lueí lílana ban larúeijan Búngiu. Manígijaña lun jálügüdajan.

¿Ca adúgawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágu ladúgawagun lan David Crístu? ³⁶ David guánarügü láu lubáfu Sífiri Sándu aríñagati itara.

Laríñajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladúgawagun lan David Crístu ánjein wa lubálin David guánarü Crístu, “Nabúreme”?

Ába jagáambuni bürúbünu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Toúnigi jumátia jaweí arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsurúniwa joun úmada láu sarágu inébesei. ³⁹ Áluaja jamúti jalaú le jála weírigutiña tídan jalígilisin juríu, lúma lubuídun-ágei ubáraü lídan eíginí. ⁴⁰ Gidá jamutu jában wúrífña ja jiláañe úmari jaweí, lúnti jadáuragun láu sun líra, ába jadúgün afúrieiduni le migínaguti. Weíribei jasúfurirun luágu sun le jadúgübei.

Tedéweejan fugiábu wúri to jiláali túmari, lun Búngiu

(Lc 21.1-4)

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gíbetiña rísitiña íchugutiña sarágu

seínsu. ⁴² Ligía tíabin ában fugiábu wúri to jiláali túmari, ába tíchugun bián gáwanün tídoun gáfu tugúya. ⁴³ Ába lagúarun Jesúsu joun láni disípulugu lubádun, ába laríñagun joun.

—Ninárün jáu luágu gíbetima lan tíchugun wúri to sùgú jáu sun ja íchugubaña seínsu tídoun gáfu to, ⁴⁴ ladúga sun jagía, lídaangiñe le ígiragubei jáma jíchi-ga, ánjoun tugúya, láu tugúdemegun rútmuti sun lé túmabei lun tawínwandun.

Laríñagun Jesúsu luágu tagúnrinchawagúba lan témpulu

(Mt 24.1-2; Lc 21.5-6)

13 Dan le láfuriduña lan Jesúsu témpulurugugiñe, ába laríñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dúbü le áubei tadügúwa! ¡Máma tanárime buri!

² Ába loúnabuni Jesúsu.

—¿Aríagu jíña tun tanárime témpulu to? Merédebeítia ni ában dúbü ligíbuagu ában, lagúnrinchaguba sun le.

Seíni buri lubáragiñe lagúmuchun uboú

(Mt 24.3-28; Lc 21.7-24, 17.22-24)

³ Ábati jóudin luágu wúbü le gíribei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pedro, Jacóbo, Juan lúma Andrés, ába jaríñagun lun, jagíaguarügü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülújali lan dan lun lagúnfulirun sún buri cátei le?

⁵ Ába laríñagun Jesúsu joun.

—Toúnigi jumá, mayéedagualaún ni ában, ⁶ ladúga sarágujaba ñúbintiña, jaríñagame. “Áu Crístubei”, áni sarágujaba jayéedun.

⁷ ¡Jugúya, dánme le jagáambuni lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá, ladúga ñíbei wuríbu súnwandan, mámagili lagúmuchun uboú líra. ⁸ Lageíndaguba ában fulásu lúma ában, awúrribuja ligíame ában ageíraü lúma ámu. Níbei jarabaganáli lídan sarágu fulásu, ilámaü, chagáguau, áni súnme buri cátei le, lagúmesejarügügilime le lúnbei lasúfurirúniwa.

⁹ Toúnigigua jumá júngua ladúga jedéregerúba lun lúrudu, ábame jabúleiseirunün tídan buri jalígilisin juríu, janügúba lun jagúseragüdüniwa jagíbugiñe gumádimatiña lúma jagíbugiñe urúeigu, nueígiñe, ítara lúba gayára lan jadímurejan nuágu, jagíbugiñe.

¹⁰ Lubáragiñe lagúmuchun uboú, lapúrlichijóba ugánu luáguti asálbaruni lídan sun fulásu. ¹¹ Dánmeti le janügúniwa lun jedéregerúniwa joun lúrudugu, magíbedalá jarítangun luágu cába lan jaríñaga, masáminaragubei jumeí. Aríñaga jumeí le laríñagun Búngiu jun lídan óra ligía, ladúga mámba jugúya adímureja, Sífiri Sándu, ligíaba adímureja.

¹² Jedéregerubaña wügúriña jamúlenu jáma jábugaña

lun jáfarúniwa jilágubei, deréga jamáñame agúbürigu jasáanigu, jagáraabaguba isáanigu jawágun jagúbürigu lun jedéregerúniwa lun jáfaruniwa jilágubei. ¹³ Jiyéereguduba lun sun uboú nueígiñe, le asígiruti úragu darí lúmoun lagúmujoún, lasálbaru-ba.

¹⁴ Abúrūjati proféta Daniél luágu cátei iyéereguti le gagúnrinchaguagüdadabei, dánme le jaríjini cátei ligía le ní lubei moun lan lun ñi lan—le alíjabei, gunfaráandálá—jámetia Judéabaña, lúntimétia janúrajan luágun wúbü. ¹⁵ Le gürígia le boúgudabei, mebélura látia múnadoun aságara ni cáta, ¹⁶ le áraabubei, magíribudalá águyu ni anúgoun lanáangun. ¹⁷ Fugiábugume würiña ja dageíñatiña lídoun wéyu ligía jáma ja garájüñütiña ja gurágiña. ¹⁸ Amúriaja jumá lúma Búngiu lun máma lan lídan lidáani lidíliga jeíbaagua, ¹⁹ ladúga lidáanibei asúfuriruni quei le masúseredungili lúmagiñe ladúgüni Búngiu uboú, masúseredundügüyaalime giñe lárigiñe. ²⁰ Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

²¹ Ánjeinti aríñawagua jun. “Aríja jumá, niján Crístubei”, o “Nirán”, mafíñera jumá, ²² ladúga jayábiba eyéejatiña aríñaga jawoúgua luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadúgüba seíni lúma miláguru lun jayéedaguniña ásta ja anúadaja láañabaña Búngiu ánjein gayára. ²³ Aráanseñu jumá, rúnaadün luágun jugúdi.

Ída lúba lan ligáburi lagíribudun Crístu uboúagun (Mt 24.29-35, 42-44; Lc 21.25-36)

²⁴ Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjálime játi. ²⁵ Jeíguaduba warúguma siélugiñe, ábame ladádagurun sun siélu. ²⁶ Ábame narijiniwa, áu le Wügúri Garaúwarügüti, niábin lídan juánriñu láu oúnwenbun ubáfu lúma uweíriguni, ²⁷ ábame noúnajaniña ánjeligu oúndaraña sun ja nanúadajabaña lídaangiñe gádürü larígei uboú, lúmagiñe lidíse-ágei uboú darí lúmoun lidíse-ágei siélu.

²⁸ Gunfaráanda jumeí jémpulu le tuáguti tídi bu ígo. Dan le ñlúgüli tilímun, ába laboúchun tubána, subúdi jumúti luágu níteeli lan lidáani lubáchouga. ²⁹ Ítara meme, dánme giñe jaríjini sún buri cátei le, subúdi jumeí luágu yaráfaali lan niábin. ³⁰ Ninárün jáu, luágu lagúnrinchawagúba lan sun ubúrugu le Jerusalén lubáragiñe jóuwegun gürígia ja lánina dan le. ³¹ Lagúmuchaguba siélu lúma uboú, ánjein nerérun, merédebei magúnfulirunga.

³² Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraú, Búngiu rügúñein le Úguchili asúbudirei.

³³ Lúnti lubeíti agágudúañu jumá, aríaaja, ayúmuragua lun Búngiu, ladúga ibídiñeti jun ídame lan lachúlüra óra ligía. ³⁴ Ítara lúba quei ában wügúri le ñúdüñbei luágu ában weíyaasu díse, lubáragiñe láfu-

ridun lúbiñegiñe, ába líchuguni sun cátei jájaburugun lumúsuníña áni ru ligía jawádigimari, aríñaga ligía lun le luágubei béna lun loúnigirun. ³⁵ Áu queísi tabúreme múna tugúya, furésebei nagíribudun. Agágudúañu jumá lubeíti, ladúga ibídiñeti jun cába lan óra nachúlüra, ánjein gúñounba lubeí lúmoun áriebuba lan, o lubá lan larúgan o bináafin lan, ³⁶ ñúbindügü níñein sódini, ábame nadárirunün arúmuga. ³⁷ Le naríñagubei jun aríñaga numúti joun súnigubei. Agágudúañu jumá.

Lalédawagúniwa lubá Jesúsu (Mt 26.1-5; Lc 22.1-2; Jn 11.45-53)

14 Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejíptona, máfarawaguntiña jarájüñü Israelítagu, lidáani gíñe fédu le ní lubei teigúa fein to magánatu ísi. Ábanti jáluajan jábutigu fádirigu jáma arúfudajatiña lilúrudun Moisés ída lúba lan jarügüdüni Jesúsu láu eyéerawaguni lun jáfaruni jilágubei. ² Ába jaríñagun.

—Márügüda wameí fédurugu lueí jafúudun gürígia.

Tájurudaguni ában wúri Jesúsu (Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábulu, ába tiábin ában wúri láu ában budeín buin láu ibíñei le jémeti, le séruti. Ába tájalachuni ligíina budeín, ába téseruni ibíñei lálbulugun Jesúsu. ⁴ Ába jagáñidun jádaangiñe ja ñibaña, ába jaríñagun jámagua.

—¿Cámesan leféridirúa ibíñei jémeti le? ⁵ Gayáraati jamúgagu lalúgurun luágu sügü láu lebégi ában irúmu wadágimanu, lun jíderawagún gudémetiña.

Ába jebechunun, ⁶ ába laríñagun Jesúsu.

—Ígira jumóun. ¿Ca uágu jañáwurija tun? Ában cátei buíti le tadúgübei nun. ⁷ Súnwandan ñíbaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan. ⁸ Adúga táali wúri to le tíaraabei, jurúguaarú ibíñei luágu núgubu lubá nábuñajoún, ⁹ áni ninárün jáu luágu lídan lan furúmieguarügü fulásu lídan sun uboú le ní lumuti lapúrichijoúa ugánu le lánina asálbaruni labájü-dawagúba gíñe le tadúgübei wúri to lun jarítangun tuágu.

Lalúguruni Júdas Jesúsu (Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladúgün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaara-gun, ába jaríñagun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoún leígin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jálügüdüni disípulugu Jesúsu.

—¿Jalíagi babúseera lun woúdin aráansera wabárua lun weígini eígini le lánina fédu?

¹³ Ába loúnajan biáma jádaangiñe lání disípulugu, ába laríñagun joun lubáragiñe jóúdin.

—Jeíba ubúru, jadúnraguba lúma ában wügúri ñi táu ában dináa láu dúna, ¹⁴ jídinme lárigi le ñíjin lumúti lebélera, ábame jaríñagun lun tabúreme múna. “Ítara líña maésturu, ¿jagóun nege rúmu to lúnoun ñi lan leígei eígini le lánina fédu jáu lání disípulugu?”

¹⁵ Ábame larúfudun ában rúmu weírutu jun, tougiñegua múna, to aráanseñu tíña, ábame jaráanseruni eígini woun ñi.

¹⁶ Ába jáfuridun disípulugu, ába jachúlürün ubúrugun, ába jadáriruni súnigubei quei laríñaguni Jesúsu joun, ába jaráanseruni eígini lánina fédu ñi.

¹⁷ Dan le lagúñedunbei, ába lachúlürün Jesúsu jáu dúusu disípulugu. ¹⁸ Dánti le luágu jamá dábula eíga, ába laríñagun joun.

—Nínárün jáu luágu lalúgurubadina lan ában jídaangiñe le eígibeí núma.

¹⁹ Ábati jajírudagun, ába jagúmeserun álügüdaguei ában ában.

—¿Áu funásan?

²⁰ Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asédu. ²¹ Anángüraadina lubeíti, áu le Wügúri Garaúwarügüti, luágu úma le uágubei taríñaga Lerérün Búngiu, áni ;fugiábutia wügúri le alúguruti-na! Buítimaati jamúga lun wügúri ligía lun magúriajóuniwa lan.

²² Dan le añája lubeí eíga, ába lanúgünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñagun joun.

—Jóujuma, núgubu le.

²³ Lárigiñe, ába lanúgün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya. ²⁴ Ába laríñagun joun.

—Níta le, le añúragüdübalin iséri darádu, le gíñe áwiyrúabei joun sarágu gürígia lun ferúdnawa lan jafígoun. ²⁵ Nínárün jáu luágu máundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Laríñaguni Jesúsu luágu leyéedaguba lan Pédro láu
(Mt 26.30-35; Lc 22.31-34; Jn 13.36-38)

²⁶ Lásun jerémujani urému luágu Búngiu, ába jóúdin luágun wúbü le gíribei Olívos. ²⁷ Ábati laríñagun Jesúsu joun.

—Sun jugúya janúrajaba, ígira jumáname áriebe le, ladúga taríñajare Lerérün Búngiu. “Náfarubei jóúniri

mudún jilágubei, ábame jeréderun mudún chagágu.” ²⁸ Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

²⁹ Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

³⁰ Ába laríñagun Jesúsu lun.

—Nínárün báu, áriebe meme le, lubáragiñe layúgurun gáyu bián weíyaasu, úruwaalime weíyaasu baríñagun luágu ibídiñe nan bun.

³¹ Ába laríñagun.

—Ni ánjein lun lubeí noúnwen búma, maríñagubadina luágu ibídiñe ban nun.

Ligía méme gíñe jaríñaga súnigubei.

Layúmuragun Jesúsu lun Búngiu, Getsemaní
(Mt 26.36-46; Lc 22.39-46)

³² Ábati jachúlürün lídoun ában fulásu gíriti Getsemaní, ába laríñagun Jesúsu joun lání disípulugu, —Núrújuma ya, neíbuga ayúmuragua lun Búngiu.

³³ Ába lanúgüniña Pédro, Jacóbo, lúma Juan lúmagua. Ába ladíjeridun larítagnun buídu, sandí ligía ában igárigu weíruti tídan lanígi. ³⁴ Ába laríñagun.

—Sandítina ában íruti weíruti le lánina ouweni tídan nuwáni. Reídei jumá ya, áni agágudúañu jumá.

³⁵ Ábati lídin Jesúsu lubáruaguóun mémeraü, ába labúluchagun múarugun, ába lamúriajan lúma Búngiu ánjein gayára lubeí masúfurirun láani le lúnbei lasúseredun lun lídan óra ligía. ³⁶ Ába laríñagun lídan layúmuragun.

—Núguchi, gayára bumúti sun cátei, séfu bána lueí nasúfuriruni cátei le, máma quei nabúseerun, quei babúseerun.

³⁷ Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisan buga beréderun ni ában óra agágudúañu? ³⁸ Agágudúañu jumá, ayúmuragua jugúyame lueí jeíguadun lídoun ínchajóuni lun jeféridiruni jafíñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaleí méme dimúrei le laríñagubei furúmiñe. ⁴⁰ Dánya lagíribudun, ábaya ladáriruniña arúmuga ladúga luweírín lidábu jágu. Ibídiñetiti joun cába lan jóunabagüle lun. ⁴¹ Ábaya lídin lúruwan weíyaasu, ába laríñagun joun.

—¿Jarúmuguña mémesan, eméraagua jugúya? Buídürügaali, chúlúja óra lun nedéregerúniwa, áu le Wügúri Garaúwarügüti, jájaburugun gafígountiña.

⁴² Sarájuma, queímoun, níteeli le lúnbei ledéregeruni-na.

Janúgüni Jesúsu adáúra
(Mt 26.47-56; Lc 22.47-53; Jn 18.2-11)

⁴³ Ñígili Jesúsu adímureja, ligía lachúlürün Júdas, le ában jádaangiñe dúusu disípulugu, liábin jáu sarágu mútu táu efein lúma wéwe. Jóúnajan jábutigu fádirigu,

arúfudajatiña lilúrudun Moisés, jáma ámu wügúriña weírigutiña lídan jaffínen juríu. ⁴⁴ Aríñagalíti buga Júdas joun itara.

—Le wügúri le nachúurun, ligía, ábame járügüdüni, ábame janúgüni, joúnigireime buídu.

⁴⁵ Ítara líña lubeíti, dan le lachúlürünbei, ába layárafadun Júdas lun Jesúsu, ába laríñagun lun.

—Maésturu.

Ába lachúuruni. ⁴⁶ Ábati járügüdüni Jesúsu, ába janúgüni adaürúwa.

⁴⁷ Níñein ában jádaangiñe ja níbaña, ába láluguchunun lefeínte, ába líbuguni ában larígei lumúsun fádiri le íñutimaabei. ⁴⁸ Ábati laríñagun Jesúsu joun mútu jagía.

—¿Jíabin táu efeín lúma wéwe lun janúgünina adáúra, camá jamuga jíwerutina? ⁴⁹ Ságüñaja wéyu júma nan témpulurugu arúfudaja jun, madaú jumútina. Wel, lasúseredunbei le lun lagúnfulirun Lerérun Búngiu.

⁵⁰ Ábati jígiruni sun disípulugu Jesúsu lábugua, ába janúrajan.

Wügúri ñúraügili le anúrajabei

⁵¹ Níñein ában wügúri ñúraügili afálaruti Jesúsu, darúgu lougua táurügü ában sídi, ában járügüdüni.

⁵² Ába lasáfarun jaweí, ába leíbaágun surúsu, ígira sídi.

Jesúsu ligíbugiñe líñun-ágei lúrudu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janúgüni Jesúsu ligíbugiñoun fádiri le íñutimaabei, ába joúndaragun sun jábutigu fádorigu jáma arúfudajatiña lilúrudun Moisés, jáma ámu wügúriña ja weírigutiña lídan jaffínen juríu. ⁵⁴ Ábati lafálaruni Pédro Jesúsu dísegiñe chúlú túbúrürugun lúban fádiri le íñutimaabei, ába leréderun ñun jáma oúnigirutiña témpulu abácharagua larúgürügü wátu.

⁵⁵ Jáluajati jábutigu fádorigu lúma sun líñun-ágei lúrudu lidúnrun Jesúsu lun gayáraabei lan jasádiruni lun láfarúniwa jilágubei, madáritiña lidúnrun.

⁵⁶ Sarágu jáña yebe adímurejatiña iyéeni luágu, múaradúntiña láu le jaríñagubei. ⁵⁷ Níñanu yéetiña ásaarutiña aríñaga.

⁵⁸ —Agáambatiwa laríñagun. “Nagúnrinchaguboun témpulu to, to jadúgüboun wügúriña, ábame naráramagüdün ában témpulu lídan úrúwa wéyu to máma jadúga wügúriña.”

⁵⁹ Ni itara, múaradúntiña láu le jaríñagubei.

⁶⁰ Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntíbusan ni cáta? ¿Cáteisán le, le jaríñagubei buágu?

⁶¹ Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amúrúsan Crístubei le Liraú Búngiu, le lúnbei lasálbaruniña gürígia lídaangiñe jaffígoun?

⁶² Ába laríñagun Jesúsu lun.

—Ánja, áu. Áni jugúya, jaríjubadina, áu le Wügúri Garaúwarügüti, ñun lueígiñe loúnwenren Súnti Gabáfu, aríja jumeíme niábin lídan juánriñu siélugiñe.

⁶³ Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó? ⁶⁴ Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngebui lun láfarúniwa jilágubei.

⁶⁵ Ábatí buri jagúmeserun jíbiri ásueraguei, adáuragua láu ligíbu, abúleiseirei, jaríñagati.

—¿Aríñaga beígia cátei lan áfarubalibu!

Ába buri jagáyuañan súaara luágu.

Laríñagun Pédro luágu ibídiñe lan Jesúsu lun

(Mt 26.69-75; Lc 22.56-62; Jn 18.15-18, 25-27)

⁶⁶ Níñein Pédro bürürüru, ligía tiábin ában lumúsun fádiri le íñutimaabei. ⁶⁷ Dan le taríjini abácharagua larúgürügü wátu, ába taríaguni, ába taríñagun lun.

—¿Ma gíñe buga lúmañadibu Jesúsu le Nazarétna?

⁶⁸ Ába leyéedagun Pédro, laríñaga.

—Íbídiñeti gürígia ligía nun, íbídiñegubeíti nun ca lan uágu badímureja.

Ába lígiruni fulásu le ní lubei labácharagua lun yaráfa lan lun lebéneri barieru, ábati layúgurujan ában gáyu. ⁶⁹ Ábaya taríjini músu tugúya, ába taríñagun joun ja níbaña.

—Ába gíñetia jádaangiñe lánigu Jesúsu le.

⁷⁰ Ábaya leyéedagun. Murúsun óra lueígiñe, ábaya jaríñagun ja níbaña lun Pédro.

—Inárüni, amúrü ában jádaangiñe, ladúga Galiléana amúrü, itara líña badímurejan quei jagía.

⁷¹ Ába líñaragun Pédro lúngua ánjein máma lubei inárüni le laríñagubei. Ábaya laríñagun.

—Íbídiñeti gürígia le uágubei jadímureja nun.

⁷² Lídan óra ligía, ába layúgurujan gáyu libíaman weíyaasu. Ábati larítagnun Pédro luágu le laríñagubei buga Jesúsu lun. “Lubáragiñe layúgurujan gáyu bían weíyaasu, beyéedaguba náu úrúwa weíyaasu.” Dánti le larítagnun luágu, ába layájun.

Jesúsu ligíbugiñe Piláto

(Mt 27.1-2, 11-14; Lc 23.1-5; Jn 18.28-38)

15 Larúgan bináafin, ába joúndaragun jábutigu fádorigu jáma arúfudajatiña lilúrudun Moisés, jáma ámu wügúriña ja weírigutiña lídan jaffínen juríu lúma sun líbiri líñun-ágei lúrudu, aríja cába lan jadúga lun lasádirúniwa Jesúsu. Ába janúgüni gürágu, ába jedéregeruni lun Piláto. ² Ába lálügüdüni Piláto Jesúsu.

—¿Amúrü Jarúeitebei Juríu?

Ába loúnabun Jesúsu.

—Ánja, itara líña quei baríñaguni.

³ Ába buríti jíchugun jábutigu fádorigu sarágu lidúnrun. ⁴ Ábayati lálügüdüni Piláto, ába laríñagun lun.

—¿Moúnabuntíbusan ni cáta? ¿Aríjabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígi Piláto láu líra.

Lasíadirúniwa Jesúsu lun oúweni

(Mt 27.15-31; Lc 23.13-25; Jn 18.38-19.16)

⁶Jécutiti Piláto ígiragüda ában adaürüti ságü fédu le lánina páscua, le jamúriajan gürígia jádaangiñe adaürütiña. ⁷Ñíñeinti ában adaürüti gíriti Barabási úara jáma ámu ja áfarajabaña gürígia jilágubei lídan iñúraguni luágu gumádi. ⁸Ábati jayábin gürígia, ába jaríñagun lun Piláto lun ladúgüni queíñaja ladúga. ⁹Ába lálügüdüniña.

—¿Buséntün lun nígiragüdüni Jarúeite Juríu?

¹⁰Laríñagubaalin Piláto líra ladúga busén lán yebe lígiragüdüni Jesúsu, subúdi lumúti luágu ladúga lan gimúgaü jedéregerei jábutigu fádirigu. ¹¹Fúgüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu.

¹²Ábati laríñagun Piláto.

—¿Cáti jabúseerubei nadúgün láu le uágubei jaríñaga Jarúeite Juríu?

¹³Ába jagúaragun.

—¿Dáguabeí luágu gurúwa!

¹⁴Ába laríñagun Piláto joun.

—¿Cáti wuríbati ladúgübei?

Ábaya jagúaragun.

—¿Dáguabeí luágu gurúwa!

¹⁵Queíti busúen lan Piláto leréderun buídu jáma gürígia, ába lígiragüdüni Barabási, lárigiñeti loúnajan abeichei Jesúsu, ába ledéregeruni lun ládarawagún luágu gurúwa.

¹⁶Ábati janúgüni súaara lídoun түbúrürü lúban urúei, ába joúndarúniwa sun súaara. ¹⁷Ába jadáüraguagüdüni táu ában anáanguni funátu, ába jadúgün ában rídi láuti jíyu, ába jíchuguni leréberugu.

¹⁸Ába jagúmeserun agúaraja lun.

—¿Gabágarilá Jarúeite Juríu!

¹⁹Ába jagáyuajan lábulugun láu ában wéwe, ába já-sueraguni, ába jájuduragun abúsura lun. ²⁰Lárigiñe jé-gerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa

(Mt 27.32-44; Lc 23.26-43; Jn 19.17-27)

²¹Ñíñein ában wügúri Cirénena, gíriti Simón, lúguchi Alejandro lúma Rúfo, liábiña áraabugiñe, dan le lásügürün ñígiñe, ába jafósuruni lun lanúgüni lugúruwan Jesúsu.

²²Ába janúgüni Jesúsu lídoun ában fulásu gíriti Gólgota, míni lan líra, Lufúlasun Lábu Ichúgü. ²³Ába jíchugun diweín láu ában luwúyeri árani gíriti mirra tí-doun lun, mátun lumútu. ²⁴Ábati jádaraguni luágu gurúwa, ába jájurerun súaara ubúnuruni lun jaríjin cába lan jádaangiñe erédera táu lanáangun.

²⁵Ladaúnrun néfu bináafin, ligía jádaraguni luágu gurúwa. ²⁶Ába labúrüdúniwa lidúnrun ñi. “Jarúeite Juríu.” ²⁷Dáguatiña gíñe bián jíwerutiña luágu gurúwa úara lúma, ában lueígiñe loúnwenren, ában lueígiñe

lubaúna. ²⁸Láu líra lagúnfulira le taríñagubei Lerérun Búngiu. “Abájüdüwati jáma wuríbatiña.”

²⁹Dan le buríti jásügürün gürígia, ába jájinjani jachúgü láu, ába janábuni, jaríñaga.

—¿Bugúya le aríñagubei luágu fíbounme lan témpulu, ábaya lánme baráramagüdünnun lídan úrúwa wéyu, ³⁰séfuguabá búngua, raríba lueígiñe gurúwa!

³¹Ába gíñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—¿Séfuti ámu, ánjein ligía, siñáti leséfuragun lúngua! ³²¿Jaríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámu luágu!

Ja dáwaguñubaña luágu gurúwa úara lúma, anába jamúti gíñe.

Loúnwen Jesúsu

(Mt 27.45-56; Lc 23.44-49; Jn 19.28-30)

³³Amídirugu, ába labúrigadun sun ubou darí ladaúnrun úrúwa rábounwéyu. ³⁴Ligía lagúaragun Jesúsu.

—Eloí, Eloí, ¿láma sabáctani? —míni lan líra.

Nubúngiute, Nubúngiute, ¿cásan uágu bígirana?

³⁵Ñíñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶Ába leíbaagun ában jádaangiñe, ába ladúdüragüdünnun ában mudúsi táu diweín garújütu, ába líchuguni luágu ában wéwe, ába línchuni lun Jesúsu lun lachúurunun, ába laríñagun.

—Ígira wameí guetó, waríja ánjein ñúbin Elías aráriragüdei.

³⁷Ábati ladúgün Jesúsu ában agúaraguni jéreti, ába loúnwen. ³⁸Ába tajeíridagun tubélun témpulu lídan bián murúsun íñugiñe lun únabun. ³⁹Dan lagáambuni jábuti súaara Rómata le rárabei ligíbugiñe Jesúsu lagúaragun, aríjaleí ída líña lan loúnwen, ába laríñagun.

—Inárüni luágu Liraú lan Búngiu wügúri le.

⁴⁰Ñíñanu gíñe wúríña, aríagutiña dísegiñe, ñíñoun María Magdaléna, María to lúguchu Jacóbo le ñúraütimagilíbei, lúguchu gíñe José, ñíñoun gíñe Salomé. ⁴¹Wúríña ja, falá jamuti Jesúsu áni íderagua jamúti dán meja le Galiléaíen lan. Ñíñanu gíñe sarágu ámu wúríña ja ñúbinbaña Jerusaléoun úara lúma Jesúsu.

Lábunajoun Jesúsu

(Mt 27.57-61; Lc 23.50-56; Jn 19.38-42)

⁴²Lubáragiñe lálüdün wéyu, ába liábin José, ában wügúri inébewati jádaangiñe líñun-ágei lúrudu, le agúrabajabaalin lagúmeserun larúeijan Búngiu táu sun lanígi, lílana fulásu le gíríbei Arimatéa. Queíti luwýuri lubeí lan aráansejani, le ában wéyu lubá wéyu le eméraguagülei, ába lebéllun le ñíjin lubeí Piláto amúriajei lúgubu Jesúsu, úouga ni murúsun anúfudei lídan. ⁴⁴Ába laweíridun lanígi Piláto dan le lagáambun luágu jilá lan Jesúsu, ába loúnajan luágu ában jábuti súaara lun lálügüdüni ánjein inárüni lubeí luágu jilá lan. ⁴⁵Dan le laríñagunbei lun luágu inárüni lan, ába líchuguni Piláto lúgubu Jesúsu lun José. ⁴⁶Ábati lagáñi-

jan José ában gamísa fínutu, ába larárigüdüni lúgubu Jesúsu lueígiñe gurúwa, ába louburaguni táu. Ába líchuguni lídoun ában umúajaü achigíti luágu dúbü, ába ladáuruni láu ában dúbü. ⁴⁷ Ába tídin María Magdaléna túma María to lúguchu José aríjei fulásu le ní lubei labunúa Jesúsu.

Lásaarun Jesúsu lídaangiñe ouweni

(Mt 28.1-10; Lc 24.1-12; Jn 20.1-10)

16 Dan le lásügürünbei wéyu le eméraaguagülei, ába jagáñijan María Magdaléna, María to lúguchu Jacóbo, túma Salomé ibíñei lun jóudin ájurudei luágu lúgubu Jesúsu. ² Dimáasu, láfunaduña larúgan, ába jóudin luágu lumúaja, ³ ábati jaríñagun jámagua.

—¿Cábasan agídareí dúbü lueígiñe lubéneri umúajaü?

⁴ Dan le jaríjinbei, úaali oúnwenbun dúbü ligía lídan lilúgaarun. ⁵ Ába jebélurun lídoun umúajaü, ába jaríjin ában wügúri ñúraügili ñun ñi lueígiñe loúnwenren táu ában goúnu jarútu. Ába janúfudedagun, ⁶ ába laríñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe ouweni. Aríja jumeísan fulásu le ní lubei líchugúa. ⁷ Jeíba, jaríñagame joun láni disípulugu, lúntima Pédro, luágu níngiran lan luágu úma lun Galiléoun jubáragiñe. Jaríjibeí ñi quei laríñaguni jun.

⁸ Ába jóudin wúriña jagía anúrajeina ñígiñe ladúga lebélorun ában luweírín anúfudei joun. Maríñaguntiñati ni cáta ni ca un ladúga janúfude.

Larúfudagun Jesúsu lúngua tun María Magdaléna

(Jn 20.11-18)

⁹ Lárigiñe lásaarun Jesúsu lídaangiñe ouweni, dimáasu bináafin, ába larúfudagun lúngua furúmiñe tun María Magdaléna, to méja ueíboun laságara sédü espíritugu wuríbatiña. ¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuajaña ladúga lanárime íruni jádan luágu loún-

wen. ¹¹ Dan le jagáambun luágu wínwanya lan, luágu aríja táani, maffíñetiña.

Larúfudagun Jesúsu lúngua joun biáma jádaangiñe disípulugu

(Lc 24.13-35)

¹² Lárigiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóudiña áraabun. Ibídiñeti yebe joun luágu Jesúsu lan. ¹³ Ába jóudin, ába jawísaruniña ja jíbiri, ni jagía, maffíñetiña.

Líchugun Jesúsu jadásin disípulugu

(Mt 28.16-20; Lc 24.36-49; Jn 20.19-23)

¹⁴ Lárigiñe, ligía larúfudagun Jesúsu lúngua joun ún-su disípulugu jagía dan le ñun jamá luágu dábula, ába celadéinjan joun luágu liloúguan jaffíñen lúma lidére jachúgü, ladúga maffíñen jamá joun ja aríjubalin lárigiñe lásaarun. ¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia. ¹⁶ Ja affíñerutiña luágu, badísei jagíame, jasálbaruba, ja maffíñetiña, jeféridiruba lídaanme luwéyuri agúseragüdüni. ¹⁷ Niján cátei le lúnbei jarúfuduni ja affíñebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatiña jaweí gürígia lídan níri, jadímurejaba ámu dimúrei lueí jerérun, ¹⁸ ánjaña árügüda jéwe jájaburugu o ánjaña lan áta cátei le gáfarajati, madúgünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélun

(Lc 24.50-53)

¹⁹ Lárigiñe ladímurejan joun, ába líñurúniwa Jesúsu siélun, ába lañúrun lueígiñe loúnwenren Búngiu.

²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni chóurugüdaleí ugánu le japúrichijabei láu miláguru lé buri jadúgübei.

SAN LUCAS

Labúrjani Lúcas lé meja asúseredubei

1 Lun Teófilo le weírigubei. Gíbeeña gürígia oúchutiña jabúrjani cátei lé buri luáguti wasál-barun lé meja asúseredubei wagánagua lídan lúaragun, ² áfaaguatiña jabúrjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun. ³ Áu gíñe, álügüdaajaadina gíñe buídu buídu libúgürü sun cátei le asúsere-dubei lúmagiñe lagúmeserun, áni afíñetina luágu maríban lan lun nabúrjanun gárada to bun quei lubúdubu, ⁴ subúdi bámugei linárün cátei le arúfudáalibe bun buídu buídu. Niján le asúseredubei.

Lasúbudiragüdüni ában ánjeli luáguti lagúriajóun Juan le abásteragüdaajabei

⁵ Dán meja le Heródes lan urúeibe Judéa, ñíñein meja ában fádiri lánina jafíñen juríu, gíriti Zacarías, jádaangiñeti fádirigu ja lánigu Abías. Elisabét tíribe lú-mari, jádaangiñetu giñe ladúgawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adúga jameí sun le lubeibe darí lun siñá lan laríñawagún ni cáta wuríbati jawágu. ⁷ Masáanigutiña ladúga siñá lan tagáragüdüni Elisabét, áni derébugugaaña gíñe jagía biángubei.

⁸ Luágu ában wéyu, lídan lidáni jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabe témpulurugu águdaja cupáli ligíbugiñe Búngiu, ába láburi-lan luágun Zacarías. ¹⁰ Sun niján lan cupáli águdajoúa, añája gürígia bougudi ayúmuragua lun Búngiu.

¹¹ Ábati lasáliragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebéllurun anúfudei lídoun.

¹³ Ába laríñagun ánjeli ligía lun.

—Manúfudebá, Zacarías, ladúga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba gíñe agúndaarutiña láu lagúriajóun, ¹⁵ ladúga weírigubei biraú ligíbugiñe Búngiu. Mátunbei diweín ni bínu, áni ñíbe Sífiri Sándu lúma lúmagiñe lubáragiñe lagúriajóun lun ladúndejani lídan sun cátei. ¹⁶ Ladúgüba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwiduba lun Búngiu láu sarágu ubáfu quei meja ladúgüni Elías. Laráansejaba lubá

Jesúsu láu laráandaragüdüniña agúbürigu jáma isáanigu, láu gíñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachóuruni cátei le? Áu táu sun númari, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun. ²⁰ Guetó, quei mafíñerun bubei luágu le naríñagubei bun, berédera merérunga, siñábe badímurejan daríme lagúriajóun biraú. Lagúnfuliruba cátei le lídan lidáni.

²¹ Sun dan le, añájati buga gürígia bougudi agúraba-jei Zacarías, weíriti janígi luágu lílú témpulurugu.

²² Dan le láfuridunbei, siñá ladímurejan joun, ábati jasúbudiruni luágu salígu lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmar, ába máfuridun tan jábiñegiñe luágu seíngü játi, teréngati túnguarügü. ²⁵ “Ladúgüñein Búngiu lubúidun cátei le nun guelé lun lagídaruni nibúsigari jagíbugiñe gürígia.”

Lasúbudiragüdüni ában ánjeli luáguti lagúriajóun Jesúsu

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúrugü láni Galiléa, gíriti Nazarét, ²⁷ lun lídin bisídoun ában wúri irájügiro, gíritu María. Wúri tugúya, gadáraduñoun lúma ában wügúri gíriti José lun tamárieidun lúma, wügúri ligía, linébaanfan urúei David. ²⁸ Ába lebéllurun ánjeli ligía le ñíjin tubei, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun wúriña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagúriajan ában irájü, ábame bíchuguni líri Jesúsu. ³² Weírigubei, Liraú Búngiu le íñubei lúba lagúarúniwa, áni larúeigüdübe Wabúreme Búngiu quei larúeigüdüni David, le binádu lidúje.

³³ Lagúmadirubei linásiñun Israel lun sun dan, áni magúmuchadibe lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame loúburagu-nibu lubáfu Búngiu. Ligía sándubei lubeí irájü le lúnbei bagúriajani, Liraü Búngiu lúba lagúarún. ³⁶ Tiábin bidúje to Elisabét, dageínaaru gíñe lau sun weíyaaru lan, tagáraüdüba ában wügúri irájü, ítara líña lubeíti, tó meja uáguboun jaríñaga luágu siñá lan tagáraüdü, níjein sísi játi dageínaü tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adúgaleí le baríñagubei náu.

Lárigiñe, ába lídin ánjeli.

Tídin María bisídoun Elisabét

³⁹ Lídoun dan ligía, ába tídin María furése lídoun ában ubúrugú le labádinaguabei buri wúbü Judéa, ⁴⁰ ába tebélorun lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügú jáu sun jiñáriñu, binílaali gíñe biraü. ⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraü nurágeirugu láu ugúndani. ⁴⁵ Gúndaatibu bugúya le afíñerubei, luágu lagúnfuliruba lan cátei le laríñagubei Wabúreme bun.

⁴⁶ Ábati taríñagun María.

Rútu nuwáni uweíriguni lun Nabúreme,

⁴⁷ gúndaagua tugúya nanígi luágu Búngiu le Nasálbaragüle,

⁴⁸ lugúndun gudémejabu jaali nun, nugúya le lidámun.

Lúmagiñe guelé, jaríñaguba sun gürígia luágu fuleíseiwadina lan,

⁴⁹ ladúga adúgaali Búngiu, le Súnti Gabáfu, cátei weínamuti nun, sánduti líri.

⁵⁰ Súnwandan gudémebaña lan ja inébejabúbaña lun, lun.

⁵¹ Adúgaali oúnwenbun buri cátei, adúgaali lun ni cáta jamá ja barúguabaña jóungua.

⁵² Gídalaaña ja gabáfubaña lídaangiñe jaweírigun, ja únabubaña, ába ladúgüniña lun weírigu jamá.

⁵³ Já buga lamábaña, quimúlegüda lumútiña, ánjeinti ja rísibaña, míchugunti ni cáta joun.

⁵⁴ Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

⁵⁵ queí meja lidáradun jáma binádu wagúbürigu—Abrahám jáma ladúgawagun—lun gudémejabu lan joun lun sun dan.

⁵⁶ Ába teréderun María úrüwa játi ñi, lárigiñe, ába tagíribudun jábiñoun.

Lagúriajoun Juan le abásteragüdjabei

⁵⁷ Ába lagúnfulirun dan lun tagúriajan Elisabét, ába tagúriajan ában wügúri irájü. ⁵⁸ Dan le jagáambun tubésinanigu jáma tidújeñu luágu lubuidun cátei le ladúgübei Búngiu tun, ába jagúndaarun úara túma. ⁵⁹ Luágu liwidün wéyu, ába lerésibiruni circuncisión, le liseíni luágu láni lan Búngiu irájü ligía. Busétiña yebéti jíchuguni líri lúguchi luágu, le Zacarías, ⁶⁰ ába taríñagun lúguchu.

—Uá, Juánba líri.

⁶¹ Ába jaríñagun tun.

—¿Cági uágu? Úati ni ában jádaangiñe binébaanfaangu gíríti Juan.

⁶² Ába jálügüdüni lúguchi irájü láu seíni ca lan íri labúseerubei líchugun luágu. ⁶³ Ába lamúriajan ában murúsun fuláansu, ába labúrüdün luágun. “Juan líribei.” Ába laweíridun janígi súngebubei láu cátei le.

⁶⁴ Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu.

⁶⁵ Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu.

⁶⁶ Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷ Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸ Buídulá ladímurejoun luágu Wabúreme le Jabúngiutebei gürígia ja Israéltagu, ladúga ñúbinjali woun, wagía le lánigu, áni sálba láadiwa.

⁶⁹ Rújali ában Asálbaragüle le gabáfuti woun jádaangiñe linébaanfaangu David, lé meja esériwidubei lun.

⁷⁰ Ítara líña meja laríñaguni Búngiu jádaangiñe láni profétagu ja edéregeragubaña jóungua lun, lúmagiñe meja binádu dan,

⁷¹ luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷² Ítara líña gudémejabu lan Búngiu joun binádu wagúbürigu, arúfudaleí luágu mabúlieidagun lan lueí lidáradun le sándubei jáma.

⁷³ Níján lé meja laríñagubei lun wáguchi Abrahám.

⁷⁴ Luágu leséfurubádiwa lan jaweí wáganiñu, lun gayáraabei lan wesériwidun lun manúfudeiga,

⁷⁵ láu úarani, derégeguñu wagía woúngua lun, sun dan le wabágaridubei.

⁷⁶ Áni bugúya nisáaniraü, láni Búngiu le íñubei proféta lúba bagúarúniwa,

ladúga baráansejaba lubá Wabúreme,

⁷⁷ subúdi lámuga úma lánina asálbaruni joun lánigu, le áubei ferúdnawa lan jafígoun.

⁷⁸ Wabúngiute, láu lísiñejabu lúma lugúdemejabu, loúnajabei Crístu wámoun siélugiñe
⁷⁹ lun larúgoungadágüdüñ jáu ja lídaanbaña lubúriga lúma jáu ja luágubaña úma le ouwenibei lébeja, lúma lun ladúndejaní wapásun lídoun úma le anúgübalíwa lídoun darángilaü.
⁸⁰ Aweírdeina ligíati irájü ligía, afáragadagueina gíñe lídan láni espíritu. Ába laganoún lídan fulásu mageírawati darí lúmoun wéyu le lagúmeserun luwádígimari lun Búngiu jagánagua lumútuniña Búngiu ja Israelítagu.

Lagúriajouniwa Jesúsu (Mt 1.18-25)

2 Lídoun buga dan ligía, ába laríñagun urúei Augústo lun jabájüdüñ sun güriña ja Rómabaña. ² Furúmiñe meja jadügüni cátei le, dán meja le Cirénio lan agúmadijabei Síria. ³ Súnti güriña mósu jóudin jageíra lun ñi lan jabájüdüwa. ⁴ Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le gíribei Belén, le ñi lubei lagúriajoua Davíd, quei linébaanfan lubei Davíd José. ⁵ Ába lídin Belén lun labájüdüñ úara túma María to gadáradunboun lúma lun jamárieidun, áni dageí-nañoun. ⁶ Dánti le añája lan ñi Belén, ába lachúlürün dan lun tagúriajan María. ⁷ Ába tagúriajani furúmiñeti tiraü ñi, ába touburaguni tídan lágei, ába taróun-ragüdüni ñi tídan jában anímaalu ladúga úati ubáraü joun tídan jában chülüdügütiña.

Ánjeligu jáma oúnigirutiña mudún

⁸ Lídan áraabu bougudi lueí Belén, ñíñanu jóuniri mudún, bou larúgan jáu oúnigiraña jalügüniña mudún. ⁹ Sódini, ába lasáliragun ában láni Wabúreme Búngiu ánjeli siélugiñe joun, ába jaríjin ában oúnwen-bun larúgounga le lánina Búngiu geyégua jáu, ába janúfudedagun. ¹⁰ Ába laríñagun ánjeli ligía joun.

—Manúfudeda jumá, ladúga níjein ugánu buíti nanúgün jun, lébunabei sarágu ugúndani joun sun güriña. ¹¹ Luágu agúriajouaali lan ában asálbaragülei jun ugúñe, lageíra Davíd, Crístu le Jabúreme.

¹² Jadárirubei irájü ligía jóuburagu tídan lágei, roun tídan jában anímaalu.

¹³ Lídan óra ligía, ába jasáliragun sarágu ánjeligu lubádu furúmiñeti ánjeli, ába jíchugun uweírighuni lun Búngiu, jaríñaga.

¹⁴ ¡Uweírighuni lun Búngiu lídan líñutima siélu, darángilaü múarugu jádan güriña ja ibíjübalin lufúleisein!

¹⁵ Dánti le jagíribudun ánjeligu járigouñ siélun, ába jaríñagun jóuniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóudin furéseguina, ába jadárirunun María lúma José, lúma irájü roun tídan jában anímaalu.

¹⁷ Dan le jaríjübalin, ába jabájüdaguni le laríñagubei ánjeli joun libúgürü le. ¹⁸ Súnti ja agáambuliña, weírighuni jáni lú le jaríñagubei. ¹⁹ Áni María, areídañu tíñein

sun cátei le tídan tanígi, arítagua luágu. ²⁰ Ábati jagíribudun jóuniri mudún, adímurejeina weíri luágu Búngiu, luágu sun le jagáambubei lúma le jaríjübei, ladúga suséreti ítara quei laríñawagüniwa joun.

Larúfudúniwa Jesúsu témpulurugu

²¹ Luágu liwídun wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáni jarúmadun lagúbüriugu Jesúsu según igáburi lídan lilúrudun Moisés, ába janügüni irájü ligía ubúrugun Jerusalén lun jedéreggeruni lun Búngiu. ²³ Jadügünbalin líra ladúga laríñajare tídan lilúrudun Búngiu. “Sun furúmiñeti wügüri irájü agúriajouí lúnbei Búngiu.” ²⁴ Ába lubeiti jóudin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñíñein meja ában wügüri Jerusalén gírighi Simeón. Wügüri ligía ában wügüri buíti, weírighi ledéreggeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón, ²⁶ áni arúfuda láali lun luágu mouñwenbei lan maríjigaleí Crístu le lúnbei loúnajani Wabúreme Búngiu. ²⁷ Ába lídin wügüri ligía témpulurugun, ladúndejan Sífiri Sándu. Dánti le janügünbalin lagúbüriugu Jesúsu Jesúsu témpulurugun lun jadügüni le laríñagubei lúrudu láu, ²⁸ ába loúyua-jani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun nouñwen láu darángilaü, nugúya le esériwidubei bun, ladúga gúnfuli báali le baríñagubei nun.

³⁰ Aríja náali Wasálbaragüle láu nágu,

³¹ Asálbaragülei le bouñajabei joun sun güriña.

³² Ítara lúba queísi ában lámpu lun larúfuduni inárüni joun ja mámabaña juríu,

ru ligíame uweírighuni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le. ³⁴ Ábati labíniruniña Simeón, ába laríñagun tun María, to lúguchu Jesúsu.

—Írájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seini le lúnbei gíbe jamá májatiña jerésibiruni. ³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efein to ácharurutu tuágu buwáni.

³⁶ Ñíñoun gíñe ában wúri proféta, gírighi Ána, wúri tugúya liraü Fanuél, jádaangiñe ladúgawagun Áser. Weírighi wúri tugúya, ñúraügiñe meja tamárieidun-bei, sédüñein irúmu táu lúma túmari, ába loúnwen, ³⁷ guetó, gádürü-weín-gádürü irúmu táu. Máfuriduntu-ti témpulurugugiñe, terédera ñi esériwida lun Búngiu áriebe wéyuagu, ayúnara lúma ayúmuragua lun Búngiu. ³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíríbuduni Nazarétün

³⁹ Lárígiñeti jagúnfulirun láu sun le laríñagubei lilúrudun Búngiu, ába jagíríbudun María, José, lúma Jesúsú Galiléoun lídoun jabúrugute le Nazarét.

⁴⁰ Aweírdeina ligiati irájü le, éredeina ligía, afáragadagueina lídan lichú áu, biní lumúti jati Búngiu sarágu.

Jesúsú témpulurugu

⁴¹ Ságüja irúmu jóudin lagúbürigu Jesúsú ubúrugú Jerusalén lubá fédu le páscua, ⁴² áni dan le lagúnfulirunbei Jesúsú dúusu irúmu, ába jóudin súngubei Jerusalén quei le jagáburi lídan fédu ligía. ⁴³ Dánti le jagíríbudun lárígiñe lagúmchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jarítagún yebe luágu niten lan jádan gürígia ja jámarigubaña luágu úma. Ítara líña jadúgün ában wéyu eibuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíríbudun ubúrugun Jerusalén áluajei ñi.

⁴⁶ Úrúwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weíríti janígi luágu lichú láu lúma luágu buri loúnabagüle.

⁴⁸ Dan le jaríjinbalin lagúbürigu, ába laweírídun janígi, ába taríñagun lúguchu lun.

—¿Cáme badúgei cátei le woun, niraú? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsú joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíríbudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítangunrugun. ⁵² Niján mémeti Jesúsú aweírdeina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe gürígia.

Lapúrichijan Juan le abásteragüdjabe, lídan fulásu mageírawati

(Mt 3.1-12; Mr 1.1-8; Jn 1.19-28)

3 Lídan liqueínsin lirímuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ² Anás lúma Gáifasi, jagía fádirigu íñutimáabaña lídan jafíñen juríu. Ábati líchugun Búngiu ában ugánu lun Juan, le liraú Zacarías, lídan fulásu mageírawati, ³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságüríjan luágu jafígoun, sáansi jameíme jagáburi lun ferúdnawa lan jafígoun, badísei jagíame. ⁴ Suséreti cátei le ítara queí meja labúrüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme, queísi ladárarúniwa úma surúti.

⁵ Labuínchagüdüwaba sun gudúungu, sun wúbü, lagurúaba, úma buri le segéti, lásururuba, úma buri le múaragunti, lúwaradaguba.

⁶ Laríjúbei sun ubou Wasálbaragüle, le loúnajabei Búngiu woun.”

⁷ Núbintiña sarágu gürígia lun Juan lun labáster-agüdüniña, ába laríñaga joun.

—¿Jarásan jéwe jugúya le! ¿Ca awísarubalün lun jeibaagun lueí lanárime lafáyeiragüle figou le yaráfaal-ibeí? ⁸ Ígira jumeí binádu jigáburi, abágarida jumá lun gayára lan laríjin buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga quei naríñaguni jun, gayaraati ladúgün Búngiu linébaanfaangu Abrahám lídaangiñe buri dúbü le. ⁹ Yaráfaal dan lun jafáyeijan luágu jifígoun queísi taráanserún jaráwa lun táchuguni tídibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadúgüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinragu-ni lúma le meíginbei.

¹² Núbintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadúgüni?

¹³ Laríñaga Juan joun.

—Magúburaja jumá lougiñe le uágubei laríñaga lúrudu.

¹⁴ Aríñagatiña gíñe fiú sudaara lun.

—Ángi wagía, ¿cági lúnbei wadúgüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madúgün lumúti, gufúruma jumá láu jafáyeiruaaja.

¹⁵ Añájati gürígia madéraguagüdünja arítagua luágu fágua lan Juan Crístubei, ¹⁶ ába laríñagun Juan joun súngubei.

—Áu, láu dúna nabásteragüdaün, nítenbei ában le lúnbei labásteragüdünnün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagúruga ligeídin. ¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába loúndarún türígu buíti tídoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle. ¹⁹ Erérati gíñe lun gumándan Heródes luágu laganoún túma Heródias, to lúmari Felípe, le lamúlen, lúma luágu ámu buri cátei wuríbati le ladúgübei.

²⁰ Lubáragiñe ladúgün Heródes gásu láu, adúgarügü

ligía ában cátei wuríbatimaati. ládaruni Juan furísun-rugun.

Labásterun Jesúsu
(Mt 3.13-17; Mr 1.9-11)

²¹ Lubáragiñe ladaürúniwa Juan, dan le labáster-agüdüniña güri-gia, badíseiti giñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijiniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amürü Niraú le jínsiñebei nun, gúndaatina báu.

Linébaanfaangu Jesúsu
(Mt 1.1-17)

²³ Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraú lan José, José, liraú Elí, ²⁴ Elí, liraú Matát, Matát, liraú Leví, Leví, liraú Melquí, Melquí, liraú Jána, Jána, liraú José, ²⁵ José, liraú Matatías, Matatías, liraú Amós, Amós, liraú Nahúm, Nahúm, liraú Esli, Esli, liraú Nagaí, ²⁶ Nagaí, liraú Maat, Maat, liraú Matatías, Matatías, liraú Semeí, Semeí, liraú José, José, liraú Judá, ²⁷ Judá, liraú Joána, Joána, liraú Résa, Résa, liraú Zorobabél, Zorobabél, liraú Salatiél, Salatiél, liraú Néri, ²⁸ Néri, liraú Melquí, Melquí, liraú Adí, Adí, liraú Cosám, Cosám, liraú Elmodám, Elmodám, liraú Er, ²⁹ Er, liraú Josué, Josué, liraú Eliézer, Eliézer, liraú Jorím, Jorím, liraú Matát, ³⁰ Matát, liraú Leví, Leví, liraú Simeón, Simeón, liraú Judá, Judá, liraú José, José, liraú Jonán, Jonán, liraú Eliaquím, ³¹ Eliaquím, liraú Meléa, Meléa, liraú Mainán, Mainán, liraú Matáta, Matáta, liraú Natán, ³² Natán, liraú Davíd, Davíd, liraú Isaí, Isaí, liraú Obéd, Obéd, liraú Booz, Booz, liraú Salmón, Salmón, liraú Naasón, ³³ Naasón, liraú Aminadáb, Aminadáb, liraú Arám, Arám, liraú Esróm, Esróm, liraú Fáres, Fáres, liraú Judá, ³⁴ Judá, liraú Jacób, Jacób, liraú Isáac, Isáac, liraú Abrahám, Abrahám, liraú Taré, Taré, liraú Nacór, ³⁵ Nacór, liraú Serúg, Serúg, liraú Ragáu, Ragáu, liraú Pelég, Pelég, liraú Héber, Héber, liraú Sála, ³⁶ Sála, liraú Cainán, Cainán, liraú Arfaxád, Arfaxád, liraú Sem, Sem, liraú Noé, Noé, liraú Laméc, ³⁷ Laméc, liraú Matusalén, Matusalén, liraú Enóc, Enóc, liraú Jaréd, Jaréd, liraú Mahalaléel, Mahalaléel, liraú Cainán, ³⁸ Cainán, liraú Enós, Enós, liraú Set, Set, liraú Adán, Adán, liraú Búngiu.

Loucháwagúniwa Jesúsu
(Mt 4.1-11; Mr 1.12-13)

4 Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanúgüni Sífiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia oucháguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü. ³ Ábati laríñagun Máfia lun.
—Ánjein Liraú bubei Búngiu, salíguagüdbeí dúbü le feínme.

⁴ Laríñaga Jesúsu lun.

—Taríñajare Lerérun Búngiu. “Mámarügüba táu fein jabágarida güri-gia, jabágariduba giñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanúgüni Máfia Jesúsu luágun ában wúbü íñuti, ába larífuduni sun fulásu le ubouágubei lun lídan ában. ⁶ Ába laríñagun Máfia lun.

—Níchugubei sun ubáfu lúma sun uweíriguni le bun ⁷ ánjabu ájuduragua nun lun banúgünina quei bubúngiute, báníbei súnigubei, ladúga ibíja náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Disebá nueí, Máfia, ladúga taríñajare Lerérun Búngiu. “Judúguabá lun Búngiu le Babúreme, lún-rügüla besériwida.”

⁹ Lárigiñe, ába lanúgüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraú bubei Búngiu, chúguabá búngua yágiñe lun únabun, ¹⁰ ladúga taríñajare Lerérun Búngiu.

Loúnajabaña Búngiu láni ánjeligu lun jóunigiruníbu, ¹¹ janúgübadibu jájaburugu lueí labúleiseirun bugúdi luágu dúbü.

¹² Ába laríñagun Jesúsu lun.

—Taríñajare giñe Lerérun Búngiu. “Moúchaguabeí Búngiu le Babúreme.”

¹³ Dánti le madárijali Máfia cába lan luwúyeri oucháwagúni ladúga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa
(Mt 4.12-17; Mr 1.14-15)

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejóun luágu lídan sun fulásu geyégua. ¹⁵ Arúfudajatija tídan jalígilisin juríu lídan sun fulásu, buíti jadímurejan sun güri-gia luágu.

Jesúsu lídan ubúrugú Nazarét
(Mt 13.53-58; Mr 6.1-6)

¹⁶ Ábati lídin Jesúsu Nazarétün, le fulásu le ñi lubei lagúriajoua, ába lebélorun tídoun jalígilisin juríu lídan wéyu le eméaaguagülei quei ligáburi yebu, ába laráramun lun lalíjan tídan Lerérun Búngiu. ¹⁷ Ába jíchugunun lilíburun proféta Isaías lun, dan le ladáranun, ába ladáriruni le ñi lubei laríñaga ítara.

¹⁸ Níjein láni Búngiu Sífiri Sándu nuágu, ladúga anúadaja láadina lun níchuguni ugánu buíti joun gudémetiña, oúnaja láadina lun námaliñaniña ja nidíjeribaña tídan janígi,

lun náfuridagüdüniña adaürútiña,
lun níchugun aríjini joun maríjintiña,
lun neséfuruniña ja ouserúabaña wuríba,
¹⁹ lun nadímurejan luágu dan le fuleiseijabu lan Búngiu joun güri-gia.

²⁰ Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun

ja ñíbaña aríaguei, ²¹ ába lagúmeserun adímureja, laríñaga.

—Ugúñe guáñarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weirititi janígi luágu lubuidun buri dimúrei le laríñagubei. Jálügüdagua buríti jámagua.

—¿Mámasan le liraú José le?

²³ Ába laríñagun Jesúsu joun.

—Subúsi nun luágu jaríñagubei lan cátei le nun.

“Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adúga baalibe Capernaúm, adúgabeí giñe ya bageira.”

²⁴ Ába lasígirun adímureja, laríñaga.

—Ninárün jáu luágu úa lan ni ában proféta erésibirúati buídu lageira. ²⁵ Chóuru numúti luágu añájein lán meja sarágu wúriña ja jiláguañábaña jámarigu jádan Israelítagu lídan meja lidáni proféta Elías, dan le májuyun lubeí júya luágu úrúwa írúmu dimí, ába ñi lan sarágu ilámaü fulásurugu, ²⁶ áni moúnajan lumúti Búngiu Elías túmoun ni ában jádaangiñe wúriña jiláguaaña jámarigu jagía ja aganoúbaña Israel, loúnajei túmoun ában to aganoúboun Sarépta, yaráfa lun ubúrgu Sidón. ²⁷ Ñíñanu meja giñe sarágu gawágutiña gumeín luágu jára ñi Israel lídan lidáni proféta Eliséo, úati ni ában jádaangiñe areí-dawaguagüdüti lueídügüya Naamán le Síriana.

²⁸ Dan le jagáambunbalin sun ja ñíbaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janúgüni lúblugun wúbü le gagíbuagubalin fulásu lun jájuchuruni ñígiñe. ³⁰ Ába lásügürün Jesúsu jamídaanguágiñe jámagua, ába lídin.

Ában wügúri gawáguti espíritu wuríbati

(Mr 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larífudajan joun gürígia ñi lídan wéyu le eméraaguagülei. ³² Weirititi janígi láu ligáburi larífudajan, ladúga láu ubáfu ladímureja.

³³ Ñíñeinti ában wügúri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agúnrinchaguawa? Subúdi numútibu, áni subúdi numúti luágu amúrü lan Liraú Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

Ábati lájuchuruni espíritu wuríbati wügúri ligía múarugun jagíbugiñe súnagubei, ába láfuridun lídaangiñe, mabúleiseirunga. ³⁶ Ába laweíridun janígi súnagubei, ába jaríñagun jámagua.

—¿Cáteisán buri dimúrei le? ¡Adímurejati wügúri le láu gumádi lúma ubáfu joun espíritu wuríbatiña, ába jáfuridun!

³⁷ Adímurejoátiti buri luágu Jesúsu lídan sun fulásu geyégua.

Lareídagugüdünnun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígílisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmragun lun Jesúsu lun lareídagugüdünnun. ³⁹ Ába lélemuchun Jesúsu tuágun, ába ladeínjan lun abírúau, ába lagídarun abírúau tueí. Lídan méme óra ligía ába tásaarun, ába tagúmeserun eténira joun.

Lareídagugüdünnun Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janúgüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. ⁴¹ Sarágu jaña giñe ja gawágutiña espíritu wuríbatiña, ába jagídarúniwa jaweí, ába buri jagúaragun ítara.

—Amúrü le Liraúbei Búngiu.

Ába ladeínjan Jesúsu joun espíritu wuríbatiña, mígirun lumútiña lun jadímurejan, ladúga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúrgu lídoun ában fulásu mageírawati. Ába jáluajani gürígia, ába jachúlürün le ñíjin lubeí, buséntiña yebe jeréderuni lueí lídin, ⁴³ ába laríñagun joun.

—Gásu giñe níchuguni ugánu le luáguti larúeijan Búngiu joun lílana líbiri fulásu, ladúga lun líra nouña-joúa.

⁴⁴ Ítara líña lídin apúrichijeina tídan buri jalígílisin juríu, Galiléa.

Esénijani le láubei miláguru

(Mt 4.18-22; Mr 1.16-20)

5 Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladúga busén jamá jagáambuni lerérun Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³ Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arífudaja joun gürígia ñígiñe. ⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebe, mañúguntiwa ni cáta, quei amúrü lubeí aríñagubalin, wágura.

⁶ Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábati jadúgün seíni joun jíbiri ja tídaanbaña to ában

ugúnein lun jayábin íderaguaña. Ába jayábin, ába jabuínchagüdünnun biángubei ugúnein darí yebe lun tadíbiragun. ⁸ Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügúri gafí-gounti nugúya.

⁹ Laríñagubaalin Simón líra ladúga laweíridun lanígi, jáu sun ja úarabaña lúma, luágu añúguni le jadúgübei.

¹⁰ Weíríti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja gürgia nun.

¹¹ Lárígiñeti jätürün, ába jígiruni sun cátei, ába jóúdin lúma Jesúsu lun láni jamá disípulugu.

Lareídaguagüdünnun Jesúsu ában gawáguti gumeínluágu sun lúra

(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñí lubei ában wügúri gawáguti gumeín luágu sun lúra. Dan le laríjinbalin wügúri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, ánjabu busén, gayáraati bareídaguagüdünnina.

¹³ Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín luei wügúri ligía, ¹⁴ ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñüdünrügüba, arúfudagua búngua lun fádiri, rúbeime edeweejani le uágubei laríñaga lilúrudun Moisés luágu barúmadun, aríja jamámugei gürgia luágu areídaguadibu lan.

¹⁵ Eibu dan, eibu labúruchaguntima luágu Jesúsu, sarágu jañátija gürgia oúndaragutiña lun jagáambuni lúma lun lareídaguagüdünni jasándi. ¹⁶ Ábaja lídin Jesúsu le ñíjin lumúti úa jamá gürgia lun layúmuragun lun Búngiu.

Lareídaguagüdünnun Jesúsu ában fadáguaali

(Mt 9.1-8; Mr 2.1-12)

¹⁷ Luágu ában wéyu, ñíñein Jesúsu arúfudaja, ñíñanutí fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdünniña sánditiña. ¹⁸ Ábati jayábin fiú wügúriña barúna ában wügúri fadáguaali tídan ában ubárari, jálugati jebélaagüdüni le ñíjin lubei Jesúsu lun laríjini. ¹⁹ Madáritiña jalíagiñeba lan jebélura ladúga jíbe gürgia, ábati jaweínrun tábulugun múna, ába jagídarun murúsun lueigiñe loúgiñe le ñí lubei Jesúsu, ába jarárigüdüni sánditi tídan lubárari ligíbugiñoun. ²⁰ Dan le laríjinbalin Jesúsu afíñeni le jawágubei, ába laríñagun lun sánditi ligía.

—Wügúri, ferúdnawaali bifígoun.

²¹ Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisan gürgia le, le minébenejabubei lun Búngiu láu ligáburi ladímurejan? Úati ámu gayáraati ferúdnuna lan figoú lueídügüya Búngiu.

²² Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³ ¿Cátima méreengün-bei laríñawagun. “Ferúdnawaali bifígoun”, ódi “Sarába, beíbuga”? ²⁴ Narúfudaaliti jun luágu gayára lan ferúdnuna nan figoú, áu le Wügúri Garaúwarügüti.

Ábati laríñagun lun le sándibeí.

—Sarába, barúboun bubárari, beíba búbiñoun.

²⁵ Lídan óra ligía, ába lásaarun sánditi ligía jagíbugiñe, ába labúdnun lubárari tó buga ídaan-boun laroúnra, ába lídin lúbiñoun adímurejeina luágu luweírigun Búngiu. ²⁶ Ába laweíridun janígi sún-gubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu

(Mt 9.9-13; Mr 2.13-17)

²⁷ Lárígiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíríti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi náni disípulu.

²⁸ Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi lání disípulu lúmagiñe óra ligía.

²⁹ Lárígiñe, ába ladúgün Leví ában oúnwenbun fédu lun Jesúsu, lúbiñe, ñíñanutí sarágu agúburajatiña liseínsuna gumádi jámaya ámu gürgia ñun luágu dábula jáma. ³⁰ Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma lání disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gafígountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. ³² Mára niábiña áluaja magádietiña ligíbugiñe Búngiu, niábiña áluaja gafígountiña lun lasáansirún jóuserun.

Jálügüdüni Jesúsu luágu ayúnaruni

(Mt 9.14-17; Mr 2.18-22)

³³ Ábati jaríñagun lun Jesúsu.

—¿Ída líñasan ayúnara jabeí lánigu Juan jáma fariséogu, ayúmuragua jagía sarágu lun Búngiu, án-jaña báni disípulugu, jóútiña, gurá jagía súnwandan?

³⁴ Ába laríñagun Jesúsu joun.

—¿Gayáraati funági jayúnaragüdünniña gürgia ja jamísurajan lídoun ában maríei sun niján lan adári jáma ñí? ³⁵ Lachúlürüba dan lun lídin adári, ligíameti jayúnarun.

³⁶ Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga ítara, lagádeiruboun to isérigiruboun, áni merédebei gíñe murúsun gamísa iséri ligía buídu tuágu anáanguni ñulújaru tugúya.
³⁷ Michugúntu gíñe diweín iséri lídoun guéru ñulújali, ánjein adügúwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubei tíchugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati gíñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

Jabúdajan disípulugu türígu lídan wéyu le eméraguagülei

(Mt 12.1-8; Mr 2.23-28)

6 Luágu ában wéyu le eméraguagülei, eíbugeina líña Jesúsu labádinagua nádü jáma láni disípulugu, átüjeina jagiati disípulugu lin türígu, ába jéferejani láu jájabu, ába jeígini líla. ² Ábati jaríñagun jádaangiñe fariséogu joun.

—¿Cásan uágu jadúga wadágimanu le moún lumuti ladügún lídan wéyu le eméraguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma? ⁴ Ába lebéllurun tídoun lúban Búngiu, ába lanúgün tídaangiñe fein to sagráuboun, jou ligía tídaangiñe, ru ligía joun ja úarabaña lúma, láu sun fádirigu rügúñanu lán yebe lúnbaña jeígin tídaangiñe fein tugúya, según lilúrudun Moisés, áni máma figoú le ladügübei Davíd ligíbugiñe Búngiu.

⁵ Aríñagati gíñe joun.

—Gabáfutina, áu le Wügúri Garaúwarügüti, lun naríñagun cába lan gayára ladügúniwa wéyu le eméraguagülei.

Wügúri le jiláalibeí újabu

(Mt 12.9-14; Mr 3.1-6)

⁶ Lídaanya ában wéyu le eméraguagülei, ába lebéllurun Jesúsu tídoun jalígilisin juríu, ába lagúmeserun arúfudaja. Níñein ában wügúri jiláali újabu le loúnwenren, ⁷ añájati arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubei lun lídan wéyu le eméraguagülei, lun jadárirun lidúnrun. ⁸ Subúdi lumúti ca lan jarítagebei, ába laríñagun lun wügúri le jiláalibeí újabu.

—Sarába, ráramabá wagíbugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügúdaadün ában cátei. ¿Ca cátei gayáraabei ladügún lídan wéyu le eméraguagülei, buídu ódi wuríbani, lasálbarun ibágari ódi lagídarún?

¹⁰ Ábati laríaguniña Jesúsu sun ja geyégubaña láu, ába laríñagun lun wügúri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügúdagua já-

magua ída lúba lan gayára lan jagúmunchun láu Jesúsu.

Lanúadajaniña Jesúsu dúusu apóstolugu

(Mt 10.1-4; Mr 3.13-19)

¹² Lídoun dan ligía, ába lídin Jesúsu luágun ában wúbü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu.

¹⁴ Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraú Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu gürgia

(Mt 4.23-25)

¹⁷ Ába larárirun Jesúsu jáu lueígiñe wúbü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu gürgia ñúbintiña loubawagugiñe Judéa, Jerusalén, lúma láurugugiñe Tíro lúma Sidón. Sun gürgia ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wuríbatíña, areídaguátiña gíñe. ¹⁹ Álugatiña sun gürgia jagúrurun luágu Jesúsu, ladúga areídaguagüda lumútiña súnugubei láu lubáfu.

Fuleíseiwatiña jáma fugiábugu

(Mt 5.1-12)

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibe, ladúga ménreengúnbei jun lun jebélurun lídoun larúeijan Búngiu.

²¹ ‘Fuleíseiwatün, jugúya le áfaagubei ilámaü guetó, ladúga jaquímuléduba.

‘Fuleíseiwatün, jugúya le ayájubei guetó, jéjerajaba lárigiñe.

²² ‘Fuleíseiwatün dan le iyéreegu jumá joun gürgia nueígiñe, dan le jabúgagunün jawáriu, dan le janábagunün, dan le janúgüni jíri queí ni cáta, queí cátei wuríbati, nueígiñe, áu le Wügúri Garaúwarügüti.

²³ Gúnda jumá sarágu, buin jumá láu ugúndani lídan wéyu ligía, ladúga jibíjuba ában oúnwenbun afáyeirua-jaü siélu, ítara méme líña meja jadúga binádu jagúbürigu gürgia ja joun profétagu.

²⁴ ‘Fugiábugu jugúya, jugúya le rísibe, ladúga ibíja jumáali sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladúga jalámachuba.

‘Fugiábugu jugúya le éjerajabei guetó, ladúga jayájuajaba láu íruni.

²⁶ ‘Fugiábugu jugúya dan le sun jamá gürgia adímureja buíti juágu, ítara liñá meja jadímurejan binádu jagúbürigu buíti jawágu profétagu yéetiña.

Jínsiñe jamá jáganiñu jun

(Mt 5.38-48, 7.12)

²⁷ Niján nerérun jun, Jugúya le agáambubalina. Jínsiñe jamá jáganiñu jun, adúga jumá buíti joun ja iyéreejabúbaña jun, ²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjabu láfara ában gürígia luágu ában louba bigíbu, rúbei gíñe le ában louba lun, le anúgütu babíte bueí, rúboun gíñe bisímisin lun. ³⁰ Furúmieguarügü le amúriajati búma, rúba lun, le anúgüti bumégen, máluajabeí lúma. ³¹ Le cátei le babúseerubei ladügün bun, ligialá badúga joun ámu.

³² Ánjein já rügüñanu lubeí jínsiñejabúbaña jun jínsiñe jun, ¿ca buíti jadügübei láu líra? Ásta gafígountiña, ítara líña jadúga. ³³ O ánjaün lan adúga buíti joun rügü ja adügübaña buíti jun, ¿ca buíti jadügübei láu líra? Ítara líña gíñe jadügün gafígountiña. ³⁴ Ánjaün afúredeija jounrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiñu jun, adúga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeiruaja lúmagiñe Búngiu le íñugubei, áni lirájüñübadün gíñe le tímati-maati, ladúga ligía, fuleíseijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan júguchi Búngiu.

Madímureja jumá wuríba jawágu ámu

(Mt 7.1-5)

³⁷ Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladügüba jun queígubeirügü jadúga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? ⁴⁰ Úati ni ában disípulu weíriguti lueí lumáesturun, íbini ánjein lagúmucha latúriajan, chúlúrügübei quei lumáesturun.

⁴¹ ¿Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubeí baríñagun lun bíbugaña. “Sagáneí liraúraü ífei le bágurugubei”, áni masándi bumúti durúsu le bágurugubei? ¡Biánguañein bigíbu! Sagábei durúsu le bágurugubei furúmiñe, gayára lámuga baríjini liraúraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³ Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. ⁴⁴ Sun tídibu

wéwe subúdiwati luágu lin, mátüjountu ígo lueígiñe júyu, ni beíbei lueígiñe guríbiyuwa. ⁴⁵ Gürígia le buídubei, cátei buíti laríñagubei ladúga cátei lan buíti tídaanbei lanígi, gürígia le wuríbati, cátei wuríbati laríñagubei ladúga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu

(Mt 7.24-27)

⁴⁶ ¿Ca uágu jaríñaga luágu áu lan Jabúremebei áni madügün jumúti le nubeíbei? ⁴⁷ Naríñagaali jun ída líña lan le ñúbinbei nun áni adúgaleí le nubeíbei. ⁴⁸ Ítara líña quei ában wügúri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrubei dúna, ába liábin fulúdu láu érei tuágun múna tugúya, siñá lumutu ánjingicha ladúga luáguñoun lan ébuu derébuguti. ⁴⁹ Ánjeinti le agáambubalina áni madügün lumúti le nubeíbei, ítara líña quei ában wügúri le ábunagubei lúban ligíbuagu ságoun, mawágaburiga, dánti le liñúrubei dúna, ába liábin fulúdu láu érei tuágun, ába teíguadun, ába tagúnrinchagun le gumúti.

Lareídaguagüdüni Jesúsu lumúsun ában gumándan

Rómata

(Mt 8.5-13)

7 Dan le lásurunbei ladímurejan Jesúsu joun gürígia, ába lídin Capernaúm. ² Níñein ában gumándan Rómata ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen. ³ Dan le lagáambunbei gumándan ligía luágu Jesúsu, ába louñajan fiú jádaangiñe wügúriña weírigutiña lídan jafíñen juríu lun jayúmuragun lun Jesúsu lun lídin areídaguagüdei lumúsun. ⁴ Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ ladúga jínsiñetiwa wagía juríu lun, ligía guáñarügü ábunaguagüdübarun walígilisin.

⁶ Ábati lídin Jesúsu jáma, dan le yaráfaaña tun lúban gumándan ligía, ába louñajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manúgün ban bubéresegun ñúdüñ lúbiñe, luágu nege madúna lan lun bebélurun lúbiñoun, ⁷ ligía nege mídin lubeí lún-gua álugabu. Rúrügübei dimúrei, ábame lareídagun lumúsun. ⁸ Ladúga ligía nege gíñe lábugiñeñein gumá-di íñutimaati, áni añájein gíñe súaara lábugiñe lagúmadijan. Dan lé nege laríñagun lun ában jádaangiñe lun lídin, ñúdüñti, dan le laríñagun lun le ában lun liábin, ñúbinti, áni dan le louñajani lumúsun adúga som cátei, adúga lumúti. Ítara lúba nege, luágu berérun mósu lídin sándi lueí lumúsun.

⁹ Dan le lagáambunbalin Jesúsu cátei le, weíriri lanígi láu wügúri ligía, ába laríjin jawágun gürígia ja afálarubalin, ába laríñagun joun.

—Ninárün jáu, ni íbini jádan Israelítagu madárigidina afíñeni weíruti quei lafíñen wügúri le.

¹⁰ Dánti le jachúlürünbei wügúriña ja ñúdünbaña álupei Jesúsu járiogún lúbiñoun gumándan, areídaguuali lumúsun.

Láguyuaguádüni Jesúsu tiraú ában jiláali túmari

¹¹ Lárigiñe cátei le, lídiña Jesúsu lídoun ában ubúругu gíruti Naín, úareina jáña láni disípulugu lúma, jáma sarágu gürígia. ¹² Dan le lachúlürünbei yaráfa lun lubéneri ubúругu ligía, ába laríjin jóudin ábunaja ában jiláali le ligiarügüti tiraú lúguchu to jiláali túmari. Sarágu jáña lílana fulásu ñúdün ábunaja túma. ¹³ Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴ Ába layarafadun, ába lagúrurunun gánjoun, ába jaráramagun ja anúgübaña. Ába laríñagun lun jiláali.

—Irájü, ¡naríñaguña bun lun básaarun!

¹⁵ Ábati lásaarun lé buga jiláalibe, ába lagúmeserun adímureja. Ába ledéregeruni Jesúsu tun lúguchu.

¹⁶ Dan le jaríjinbalin gürígia cátei le, ába laweírídun janígi, ába jagúmeserun adímureja buíti luágu Búngiu, jaríñaga.

—Chúlúgua ában proféta weíríguti wádoun.

Aríñagatiña gíñe.

—Ñúbinja Búngiu íderaguawa, wagía le lumútuniña.

¹⁷ Ába lagaambúniwa cátei le ladúgübei Jesúsu lídan sun Judéa lúma geyéguá láu.

Loúnagülegu Juan le abásteragüdajabei

(Mt 11.2-19)

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe, ¹⁹ ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu. ²⁰ Dan le jachúlürünbei le ñí lubei Jesúsu, ába jayarafadun, ába jaríñagun lun.

—Loúnajañadiwa Juan le abásteragüdajabei álügüdaabu ánjein amúrü lubeí Crístubei le lúnbei liábin, o ánjein lun lubeí wagúrabun ámu.

²¹ Lídan méme óra ligía, areídaguagüdati Jesúsu sarágu gürígia lídaangiñe jasándi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdagúame lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jágyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe gürígia le meféridirun lumúti lafíñen nuágu.

²⁴ Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jidinbei aríja lídan fulásu mageírawati? ¿Ában mabúru le lánjinjan garábali? ²⁵ Ánjein máma lubeí ítara líña, ¿cáti jidinbei aríja? ¿Ában wügúri táu

anáanguni wéndegutu? Máma ligía, subúdi jumúti luágu ja lan wéndegubaña adáuragun, agánawa jagía buídu, tídaañanu jában urúeigu. ²⁶ Lídan linárün cátei, ¿ca jidinbei aríja? ¿Ába proféta? Ánja, inárüni, áni ában weíríguti sügú láu proféta. ²⁷ Juan, ligía óunagülei le uágubei taríñaga Lerérun Búngiu.

Nóunajañein nóunagüle bubáragiñe lun laráansejani úma bubá.

²⁸ Quei naríñagun jun, jádan sun gürígia, úagili proféta weíríguti lueí Juan, áni láu sun líra, weíríguti le únabutimaabei lídan larúeijan Búngiu sügú láu le anúgarügübalin ugánu luágu arúeijani ligía.

²⁹ Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiragun jagáburi. Gürígia jagía, resíbi jamáali meja labásteragüdajan Juan, ³⁰ ánjañati jibe-ágei fariséogu jáma arúfudajatiña lilúrudun Moisés, májatiña meja lun jadúgüni le lubeí Juan, merésibirun jamúti lé yebe labúseerubei Búngiu ladúgün luágu jafúleisein. ³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja añúurubaña mágidirugu ájurera, ába jagúaragun joun jibegu.

“Íñaajatiwa fidu jun, mabínajantün, erémujatiwa erému jíruti jun, mayájuntün.” ³³ Ladúga ñúbinti Juan le abásteragüdajabei, lé meja meíginbei fein, máton ligía diweín, aríñagatün luágu gawágu lan espíritu wuríbati.

³⁴ Lárigiñe, ába niábin, áu le Wügúri Garaúwarügüti, jóutina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladúgübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷ Ñíñounti ában wúri wuríbati témeri lídan ubúругu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanáangiñe Jesúsu, lubádu lugúdi, ába tadúdüragüdüni lugúdi láu táguira. Nuján ayájuaja, nuján arágajei láu tídíburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügúri le, lasúbudirúnein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñagun bun.

Laríñaga fariséo.

—Aríñagabei nun, maésturu.

⁴¹ Laríñaga Jesúsu lun.

—Niñanu bián wügúriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei

jafáyeiruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi já-daangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun wúri tugúya, ába laríñagun lun Simón.

—¿Aríagu bíña tun wúri to? Belútina búbiñoun, míchutibu dúna nun lun nachíbuni nugúdi, ánjounti wúri to, ágawagüda tumúti nugúdi láu táguira, ába tamábeidagüdüni láu tídíburu. ⁴⁵ Machú bumútina, án-joun tugúya, lúmagiñe nebélorun, merédegili tachú-jani nugúdi. ⁴⁶ Míchutibu aílí nábulugu, ánjoun tugúya, túguatu ibíñei jémeti luágu nugúdi. ⁴⁷ Ligía naríñagun-bei bun luágu arúfuda láani luweírín tínsiñejabu luágu ferúdnawa lan líbe tífigoun, ánjeinti gürgía le míbeti ferúdnawa lan, míbeti ínsiñeni larúfudun.

⁴⁸ Ábati laríñagun Jesúsu tun wúri tugúya.

—Ferúdnawaali bifígoun.

⁴⁹ Ábati jagúmeserun amísurajoútiña ja ñúnbaña lúma ñi aríñaga jámagua.

—¿Cáteisan wügúri le, ferúdnawa lubei gíñe figou?

⁵⁰ Ába laríñagun Jesúsu tun wúri tugúya.

—Sálbawádibu lídaangiñe bifígoun ladúga bafíñerun nuágu, beiba darángilañu.

Wuríña já buri meja íderaguti Jesúsu

8 Lárigiñe cátei le, ñúdünti Jesúsu lídoun sarágu ubúru luágu lúma buri lirájüñü fulásu íchigei ugánu buíti luágu larúeijan Búngiu. ² Ñúdütiña dúusu apóstolugu lúma jáma wuríña ja lareídaguagüdübaña já-daangiñe espíritugu wuríbatiña lúma sándi. Ñíñoun María to gíriboun Magdaléna jádan, to ídaangiñeboun jáfurida sédü espíritugu wuríbatiña, ³ ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luágu abunaguti

(Mt 13.1-9; Mr 4.1-9)

⁴ Sarágu jáña gürgía ñúbinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába lábúrujan lídaangiñe luágun úma, ába jadúgüraguni ásügürütiña, ába jeígini dunúru. ⁶ Líbiri, ába lábúrujan labádinaguouñ dúbü, dánti le labouçhun, ába lásaürün ladúga lumábei fulásu. ⁷ Ába lábúrujan líbiri labádinaguouñ jíyu, ába láfaruni jíyu le ájüchübei úara lúma. ⁸ Ñíñein gíñe lídaangiñe, áburujati lídoun múa buíti, dan le laweínamudun, gin ligía, buíti lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt 13.10-17; Mr 4.10-12)

⁹ Ábati jálügüdüni láni disípulugu ca lan lílabei jémpulu le. ¹⁰ Laríñaga joun.

—Jugúya, subúdigüda láali Búngiu cátei arámudaguati le luágutibeil larúeijan jun, ánjaña ja mebéresenbaña láu lerérun, láu jémpulu laríñawagúa cátei luágu larúeijan joun lun ibídiñebei lan líla cátei le jaríjibeil joun, lun gíñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luágu abunaguti

(Mt 13.18-23; Mr 4.13-20)

¹¹ Ába laríñagun Jesúsu joun.

—Niján líla jémpulu ligía. Líla nádü, ligía lerérun Búngiu, ¹² úma le ñíjin lubei lábúruja lídaangiñe líla nádü, jagía gürgía ja agáambubalin lerérun Búngiu, ába liábin Máfia, ába lagídaruni tídaangiñe janígi lun mafíñerun jamá, masálbarun jagíame. ¹³ Dúbü le ñíjin lubei lábúruja líbiri líla nádü, jagía gürgía ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afíñetiña luágu murúsun dan, áni dan le jóuchawagún, mawándun jamúti, ába jeféridiruni jafíñen luágu Búngiu. ¹⁴ Jíyu le ñíjin lubei lábúruja líbiri líla nádü, jagía gürgía ja agáambubalin lerérun Búngiu, ába jasígiruni binádu jagáburi, ába jasígirun arítagua luágu írisini lúma ugúndani le lánina ubou le, úati fulásu jarítaturugun lun lerérun Búngiu, siñátiti laságarún cátei buíti já-daangiñe. ¹⁵ Ánjeinti múa buíti le ñíjin lubei lábúruja líbiri líla nádü, jagía gürgía ja agáambubalin lerérun Búngiu táu anígi buítu, adúga jagía gásu láu lerérun, eíbuga jagía quei lubúdubu, sagáwati cátei buíti já-daangiñe.

Jémpulu luágu lámpu

(Mr 4.21-25)

¹⁶ Ába laríñagun Jesúsu.

—Úati gürgía ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgungadágüdüñ múnada, lun gayára lan jaríjin ja ebélurubaña jabárua. ¹⁷ Úati lubeiti ni cáta arámudaguati lun mafúnraangudun lan, úa ni cáta le ibídiñewati lun machúlürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeiti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu

(Mt 12.46-50; Mr 3.31-35)

¹⁹ Ábati tachúlürün lúguchu Jesúsu jáma lamúlenu le ñijin lubei Jesúsu, siñáti jayárafadun lun ladúga jíbe gürígia. ²⁰ Ába laríñawagún lun.

—Nujántia bóguchu jáma bamúlenu bougudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu lérrouga

(Mt 8.23-27; Mr 4.35-41)

²² Luágu ában wéyu, ába ladinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóudin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóudin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei. ²⁵ Ábati laríñagun joun disípulugu.

—¿Ca susérebei lun jafíñen?

Ába jálügüdagun jámagua láu anúfudei lúma luweírin anígi, jaríñaga.

—¿Cátei funásan wügúri le, gumádi lubáli garábali lúma lugúdi barána áni agáamba jamei?

Wügúri Gadárana le gawágubei espíritugu wuríbatíña

(Mt 8.28-34; Mr 5.1-20)

²⁶ Ába jachúlürün loubawagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába liábin ában wügúri lílana fulásu ligía lubádun. Lújali wügúri ligía gawágu espíritugu wuríbatíña. Madáüti anáanguni, maganoún ligía tídan múna, lídan buri jabára jiláaña le achigíti luágu dúbü lagánawa. ²⁸ Dan le laríjinbalin wügúri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraú Búngiu le Íñugutimaabei? Ayúmuraguatina bun lun masúfuriragüdüñ bánina.

²⁹ Laríñagunbei ítara ladúga lagúmadiruñein lan Jesúsu espíritugu ligía lun láfuridun lídaangiñe. Saráguja weíyaasu lárügüdüni espíritugu wuríbati ligía, ábaja jagúraguni gürígia lújabu lúma lugúdi láu güríngüri lun ledéraguagüdüñ, ábaja látumuraguni, ába lanúragüdüni espíritugu lídoun fulásu le mageírawati.

³⁰ Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladúga gíbeeña espíritugu wuríbatíña ja ebéluubaña lídoun. ³¹ Ába jamúriajan espíritugu jagía lúma Jesúsu lun moúnajan

lániña máfiougatin. ³² Queíti ñíñanu jamá sarágu büíruju eíga luágu ában wúbü yaráfa, ába jayúmurgun espíritugu jagía lun lun loúnajaniña jádoun büíruju jagía, ába lánjarun Jesúsu. ³³ Ábati jáfuridun espíritugu wuríbatíña jagía luei wügúri ligía, ába jebélurun jádoun büíruju, ábati jáguragun büíruju jagía jóungua lueigiñe ában gudúngu, ába jáburujan lídoun lagúnu, ába jañáradagun.

³⁴ Dan le jaríjinbalin ja oúnigirubaliña büíruju cátei le asúseredubei, ába janúfudedagun, ába jeíbaagun abájüdaguei ubúruju lúma áraabu. ³⁵ Ábati jóúdingua gürígia aríjei cátei le asúseredubei. Dan le jachúlürünbei le ñi lubei Jesúsu, ába jadáriruni wügúri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areídaguáli, ába janúfudedagun. ³⁶ Játi buga aríjbalin, ába jabájüdaguni luáguti lareídagun wügúri lé buga gawágubei espíritugu wuríbatíña joun, ³⁷ ába jayúmuragun lílana fulásu ligía lun Jesúsu lun lídin ñígíñe, ladúga janúfude. Ábati ladinun Jesúsu tídoun ugúnein lun lídin, ³⁸ ába layúmuragun wügúri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

³⁹ —Girírbubá búbiñoun, ábame babájüdaguni sun le ladúgübei Búngiu bun.

Ába lídin, ába labájüdaguni le ladúgübei Jesúsu lun lídan sun fulásu ligía.

Liraú Jáiro túma wúri to agúrurubarun lanáangun Jesúsu

(Mt 9.18-26; Mr 5.21-43)

⁴⁰ Dan le lagíribudunbei Jesúsu loubáfurugun lagúnu, ába jeresibiruni gürígia láu ugúndani ladúga sun jagía agúrabañu jáñein. ⁴¹ Ábati liábin ában wügúri gíriti Jáiro, le ábanbei jádaangiñe tábutigu jalígilisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴² ladúga ában rügüñoun liraú, quei buri dúusu irúmu táu, touwe. Dan le lídinbei Jesúsu, ába jafálaruni sarágu gürígia darí lun jámurudaguni.

⁴³ Níñounti ában wúri jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴ Ába tayárafadun lun Jesúsu lanáangiñe, ába tagúruruni táru lanáangun, lídan méme óra ligía ába tareídagun.

⁴⁵ Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pedro jáma líbirigu.

—Maésturu, murúgu wañátia ya lurúma jíbe gürígia, ¿álügüdagidibu ca lan agúrurubei buágu?

⁴⁶ Ába laríñagun Jesúsu.

—Gurúwaali nuágu, ladúga sandí numuti luágu areídaguagüdaadina lan gürígia láu nubáfu.

⁴⁷ Dan le tasúbudiruni wúri tugúya luágu subúdiwaali lan, ába tiábin adádagareína, ába tájuduragun lubádu lugúdi Jesúsu, ába tagúfesarun lun jagíbugiñe sun gürígia ca lan lébubei tagúrurun luágu áni ába lan

tareídagun lídan méme óra ligía. ⁴⁸ Ábati laríñagun Jesúsu tun.

—Niraú, areídaguadibu ladúga bafíñerun nuágu. Beíba darángilañu.

⁴⁹ Ñígili Jesúsu adímureja, ligía lachúlürün ában lúbiñegiñe Jáiro, ába laríñagun lun Jáiro.

—Jilá biraú, mebéresejadügüyabá lun Maésturu.

⁵⁰ Dan le lagáambunbalin Jesúsu le, ába laríñagun lun.

—Manúfudedabá, afíñerügübá, ábame tareídagun biraú.

⁵¹ Dan le lachúlürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagúbürigu irájü tugúya.

⁵² Jayájuña sun ja ñíbaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

⁵³ Ába jéjerajan láu ladúga subúdi jamáni luágu jilá tan. ⁵⁴ Ábati lárügüdüni Jesúsu tújabu, ába laríñagun láu umálali jéreti.

—Írájü, sarába.

⁵⁵ Ába táguyugun, ába tásaarun lídan méme óra ligía, ába laríñagun Jesúsu lun jíchugun eíginí tun.

⁵⁶ Weiriti janígi tagúbürigu, ába laríñagun Jesúsu joun lun mabájüdagun jamáni le asúseredubei ni ca un.

Loúnajaniña Jesúsu dúusu apóstolugu apúrichija

(Mt 10.5-15; Mr 6.7-13)

9 Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritu wuriñatiña lúma lun jareídaguagüdün sánditiña. ² Ába loúnajaniña apúrichijeí ugánu luáguti larúeijan Búngiu lúma areídaguagüdaña sánditiña. ³ Laríñaga joun.

—Manúga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janúgün. ⁴ Furúmieguarügü múna to ñíjin lumúti jachúlüra, reidei jumá ñi darí jídin lídaangiñe fulásu ligía. ⁵ Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuriduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeineí ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóúdin.

Loúnwen Juan le abásteragüdejabei

(Mt 14.1-12; Mr 6.14-29)

⁷ Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladúga ñíñanu aríñagutiña luágu saráali lan Juan lídaangiñe ouweni, ⁸ jíbiri aríñaga luágu proféta Elías lan achúlaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹ Ába laríñagun Heródes.

—Áu guánarügü ouñajabei adúrürei lichügü Juan. ¿Cátei funáti le, le uágubei nagáamba labájüdagun sarágu cátei?

Ábati loúchun Heródes laríjini Jesúsu.

Leídagüdün Jesúsu seíngü mílu wügúriña

(Mt 14.13-21; Mr 6.30-44; Jn 6.1-14)

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüniña lídoun fulásu mageírawati yaráfa lun Betsáida. ¹¹ Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña gürígia ja, ñúdün jamámuga áluga jabára lun jeméraagun, áluaja jagíame eíginí lídan buri lirájüñü aúdü lúma lídan buri fulásu yaráfati, ladúga úati ni cáta ya.

¹³ Laríñaga Jesúsu joun.

—Rújuma eíginí joun.

Jaríñaga lun.

—Seíngü rügüñoun fein wáma jáma bián úduraü, ánjava gubeirügü ñúdün agáñija eíginí joun sun gürígia ja.

¹⁴ Yaráfañanu jóun seíngü mílu wügúriña ñi, mabájüdünga würiña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadügüni ítara, ába jañúurun sùngubei.

¹⁶ Ábati lanügünun Jesúsu seíngü fein lújaburugu jáma bián úduraü, ába laríjin síelun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánrein-jani jádan gürígia. ¹⁷ Joútiña sùngubei quimúle, dan le jabúdajanun ígiragutu, buíngüdatiña dúusu faníñe láu.

Laríñaguni Pédro luágu Jesúsu lan Crístubei

(Mt 16.13-19; Mr 8.27-29)

¹⁸ Luágu ában wéyu dan le layúmuraguña lan Jesúsu lábugua, ñíñanu láni disípulugu díseraü lueí, ába laríñagun joun.

—¿Ída liñásan jaríttagun gürígia nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdejabei amúrü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe ouweni amúrü.

²⁰ Ábati laríñagun joun.

—Ángi jugúya, ¿cátanagi lídan jaríttagun?

Laríñaga Pédro lun.

—Crístu, le loúnajabei Búngiu lun lasálbaruniña gürígia, amúrü.

Ladímurejan Jesúsu luágu loúnwen

(Mt 16.20-28; Mr 8.30-9.1)

²¹ Ába laríñagun Jesúsu joun láu éregu lun maríña-gun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügúri Garaúwarügüti. Janúgübadina wügúriña weírigutiña lídan jafíñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lí-daangiñe oúweni luágu lúruwan wéyu lúnya nabá-garidun.

²³ Lárigiñe, ába laríñagun joun súngebui.

—Le buséti nánigu lan, bulíeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queisi lanúgüni ában wügúri lugúruwan, falálana. ²⁴ Ladúga le abúseeruti leséfuragun lúngua ya ubouágu leféri-dirubei ibágari le magúmuchaditi, ánjein le ánjabei leféri-diruni libágari ya ubouágu nueígiñe, libíjubei ibágari le magúmuchaditi siélu. ²⁵ ¿Cági ju lan lun gürígia lagáñeiruni sun le lánina ubouú, leféri-direime lubára siélu o lagún-rinchaguba lan lúngua? ²⁶ Le anúgüti busíganu nuágu lúma luágu nerérun, áu le Wügúri Garaúwarügüti, nibúsigaribadi-na gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷ Ninárün naríñaguni jun luágu añájein lan jádaangiñe ja yábaña guetó, moúnwenbaña maríjinga jameí larúeijan Búngiu.

Lámuñedagun larijín Jesúsu

(Mt 17.1-8; Mr 9.2-8)

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wúbü ayú-muragua lun Búngiu, barú lumútiña Pédro, Jacóbo, lú-ma Juan lúmagua. ²⁹ Dan le niján lan Jesúsu ayú-muragua, ába lámuñedagun ligíbu, ába tájarudun lanáangun, ába támiridun. ³⁰ Ábati jasálriragun Moisés lúma Elías ayánuja lúma, ³¹ geyégu líña ában larú-gounga weíruti jáu, jayánujaña libúgürü oúweni le lún-bei lasúfuriruni Jesúsu, Jerusalén. ³² Láu sun luweírín lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wügúriña ja lúmabaña. ³³ Dan le adísedeinaña bián wügúriña jagía lueí Jesúsu, ába laríñagun Pédro lun.

—Maésturu, ¡lídan dan awánja lan ya! Adúga wamá úruwa dibásein ya—ában bun, ában lun Moisés, túma ában lun Elías.

Ibidiñeti lun Pédro ca lan laríñagubei. ³⁴ Súnti niján lan adímureja, ába liábin ában juánriñu oúburaguaña, ába janúfudedagun ladúga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraú le jínsiñebeí nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Réideitiña maníñu, maríñagun jamúti cátei le jaríjubei lun ni ában lídan dan ligía.

Lareídaguagüdün Jesúsu ában irájü gawáguti espíritu wuríbati

(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wúbü, sarágu jáña gürígia ñúdüntiña lubároun Jesúsu. ³⁸ Ábati lagúaragun ában wügúri jádaangiñe láu umálali jéreti, laríñaga.

—Maésturu, fuleíseijabubá nun, aríjabeí niraú le ligía rügúñeíbei, ³⁹ níjein ában espíritu wuríbati luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwuriya lumúti, májati lígiruni. ⁴⁰ Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

⁴¹ Ába loúnabun Jesúsu, laríñaga.

—¡Jugúya gürígia mafíñeraditiña, wuríbatiña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jí-daanbei? Barúbei biraú ñájoun.

⁴² Dán yebe le lídin irájü ligía lun, ába lájuchuruni espíritu wuríbati múarugún, ába louwejagüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi. ⁴³ Ába laweíridun janígi súngebui láu luweírigun Búngiu.

Ladímurejaanya Jesúsu luágu loúnwen

(Mt 17.22-23; Mr 9.30-32)

Sun añája lan láu luweírín janígi láu le ladúgübei Jesúsu, ába laríñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügúri Garaúwarügüti, jájaburugun náganiñu.

⁴⁵ Úati gunfaráanda jamáni disípulugu le laríñagubei, ladúga darúñu líña jasáminan lun cátei le, áni janú-fudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?

(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ quei lasúbudiruni Jesúsu jasáminan, ába lanúgün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jídan, ligía weírigutimaabei.

Le mámabei wágani, wámagiñeñein

(Mr 9.38-40)

⁴⁹ Ábati laríñagun Juan lun Jesúsu.

—Maésturu, aríjatiwa ában wügúri aságajati espíritu wuríbatiña lídan bíri, ába wewéridiruni ladúga máma lan ában wádaangiñe.

⁵⁰ Laríñaga Jesúsu lun.

—Mewéridira jumeí, ladúga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügúniwa Jesúsu siélun, ába ladúgüni luweiyasun Jerusaléoun láu anígi. ⁵² Ába loúnajan loúnagülegu lubá, ába jóúdin lídoun ában liraúraü fulásu láni Samária lun jáluajan múna lubá, ⁵³ májatiña Samariána jerésibiruni ladúga jaríjin luágu leíbuga lan Jerusaléoun. ⁵⁴ Dan le jaríjinalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siéluigiñe lun lagúmochun jáu queí meja ladúgüni proféta Elías?

⁵⁵ Ábati ladígiragun Jesúsu jawágun, ába ladeínjan joun, laríñaga.

—Ibídiñeti jun luágu wuríba lan cátei le jayúmajabei.

⁵⁶ Máma niábiña, áu le Wügúri Garaúwarügüti, agún-rinchaguei jabágari güriquia, niábiña asálbarei.

Ábati jóúdin lídoun ámu liraúraü fulásu.

Já yebe busénbaña jafálaruni Jesúsu

(Mt 8.19-22)

⁵⁷ Dan le luágu jamá úma, ába laríñagun ában wügúri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügúri Garaúwarügüti, úati ni jalíaba lan nabálachagüdei nichúgü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen nóguchi, buná neíme, ábame neíbugun búma.

⁶⁰ Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichijeí ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayóuragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuínduntí lun lílaname larúeijan Búngiu.

Loúnajaniña Jesúsu úrúwa-wein-dísi disípulugu apúrichija

10 Lárigiñe cátei le, ába lanúadajan Jesúsu úrúwa-wein-dísi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi. ² Laríñaga joun.

—Inárüni, gíbetiña güriquia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajouniwa, áni louguatiña

ñadágimeintiña. Ligía lúnti lubeí jamúriajan lúma Búngiu lun loúnajan ñadágimeintiña jagánaguoun.

³ Jeíba, noúnajañadün quei mudún jádoun ánimaalu gáñitiña. ⁴ Manúga jumá ságü júmagua, ni seínsu, ni geídi, meréderagun jugúyame ayánuja ni ca úma luágu úma. ⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añájein lubeí güriquia jínsiñe-jabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí güriquia jínsiñejabutiña lun darángilaü tídan múna tugúya, giríbugüda jumeí abúsuruni. ⁷ Reídei jumá tídan múna tugúya to ñí lubeí jerésibirúa, jou jumeíme, gurá le íchugúti jun úouga busíganu, ladúga garíchatí ñadágimeinti lun lafáyeiru-aja. Masáansija jumá múna. ⁸ Dánme le jachúlürün lídoun ában ageíraü le ñí lumuti jerésibirúa, jóújumei le íchugúti jun, ⁹ areídaguagüda jumáña sánditiña ja ñítiña, jaríñagame joun lílana fulásu ligía. “Sub-údigüdáwaali luáguti larúeijan Búngiu jun.” ¹⁰ Ánjaün achúlüra lídoun ában ageíraü le ñí lumuti merésibirúniwa jumá, furíjuma lídoun buri úma, jaríñagame. ¹¹ “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigábury, áni subúdi jumeí luágu subúdigüdáwaali lan luáguti larúeijan Búngiu jun.” ¹² Naríñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügú láu jabeichún lílana ubúrugu le Sodóma.

Lílana ageíraü buri magáambaditiña

(Mt 11.20-24)

¹³ ¡Fugiábu jugúya lílana Corazín! ¡Fugiábu jugúya lílana Betsáida! Ladúga lun jamúga ubúrugu lan Tíro o Sidón ladügúwa buri miláguru le adügúbei lídan jubúrugute, binárü jamúga lasáansiragua jagábury lílana, ába jamúga jarúfuduni láu jadáuragun lúdu lúma balígi. ¹⁴ Ánjein jugúya, lídaanme luwéyuri agúseruni, weíritimaabei jabeichúniwa sügú jáu güriquia Tírona jáma Sidónna. ¹⁵ Amúrüti, ubúrugu le Capernaúm, zjarítaguatibu luágu liñurúaba lan bíri queísi líñun siélu? Larárirawagüdüwaba bíri únabun queísi lúnabun máfiougati.

¹⁶ Ába laríñagun Jesúsu joun úrúwa-wein-dísi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútiña, le májati lagáambunün, májati gíñe lagáambunina, áni le májati lagáambunina, májati gíñe lagáambuni Nóguchi le óunajabalina.

Jagíribudun úrúwa-wein-dísi disípulugu

¹⁷ Ába jagíribudun úrúwa-wein-dísi disípulugu jagía lídaangiñe jaweiyasun láu ugúndani, aríñageina jagía. —Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburu leíguadun Máfia siéluigiñe quei ában labírijanouga. ¹⁹ Rújadina ubáfu jun lun jadúgüragun jéwe jáma águru, masúfurirunga ni cáta, lúma lun jére lan jubáfu lueí lubáfu Máfia. ²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürúwañu tídan lilíburun Búngiu siélu.

Lagúndaarun Jesúsu

(Mt 11.25-27, 13.16-17)

²¹ Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, iñúragüda numúti bíri, ladúga arámuda báali cátei luáguti barúeijan jawei chútiña áu jáma furéndeitiña, ába bafúraanguagüdüni joun ja louguabaña ufúrendei queísi irájüñü. Ánja, Núguchi, ladúga ítara líña babúseeruni.

²² Derége láali Núguchi sun cátei nun. Úati ni ában subúdíjbuti cáтана lan lueídügüya Núguchi, úati gíñe ni ában subúdíjbuti cáteinein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ ladúga nariñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵ Lídan ában guríriguaü, níñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadúga lun gayára lan nibíjini ibágari magúmchaditi?

²⁶ Laríñaga Jesúsu lun.

—¿Cáteigi bürúwañubei lídan lilúrudun Moisés? ¿Ída líñagia balíjan ñi?

²⁷ Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jín-siñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badúga ítara, bibíjubei ibágari magúmchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰ Ábati loúnabuni Jesúsu, laríñaga lun.

—Níñein ában wügúri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáan-gun, buleísei jameí, ába jígiruni jilá mémeeli. ³¹ Ába lásügürün ában jafádirin juríu lídaangiñe méme úma ligía, dan le laríjinbalin wügúri ligía, mebéresenti láu,

ába lasígiruni leíbugun loubáfurugugiñe úma. ³² Sügú ligía ában jádaangiñe ladúgawagun Leví ñígiñe, dan gíñe le laríjini wügúri buleíseiwaali ligía, ába gíñe lasígiruni leíbugun loubáfurugugiñe úma, mebéresenga gíñe láu. ³³ Ábati lásügürün ában wügúri Samariána aweíyasujati lídaangiñe úma ligía, dan le laríjinbalin, ába lagúdemedagun lun. ³⁴ Ába líabin, ába lagáranijan lun bíti buri le luágubei láu aili túma diweín, ába lagúraguni. Ába laweínragüdüni luágu lilügün burígü, ába lanügüni tídon jában chülüdügütiña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Toúnigibeí wügúri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe úruwa wügúriña ja líbiribeí le ueíbe líwerujoúa, lídan barítagn?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badúga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachúlürün lídoun ában liraúraü fulásu le ñi lubei terésibirei ában wúri gíritu Márta, túbiñe. ³⁹ Níñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weíriti teténirun lun tubéresegun. Ába taríñagun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nábugua? Aríñagabá tun lun tíderagunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ni ában lun lagídaruni tueí.

Larúfudajani Jesúsu ayúmuraguni lun Búngiu

(Mt 6.9-15, 7.7-11)

11 Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébevalá bíri.

Núbinlá bidáani lun barúeijan ya ubouágu, adügúwalá bugúndan ubouágu quei ladügün bugúndan siélu.

³ Rúboun fein buídurügütu woun lun wéyu le ugúñebeí.

⁴ Ferúdunabeí wuríbati le adúga wamáalibeí quei ferúduna wamániña ja adúgübaña wuríbati woun.

Mígira báwa lun wáburujan lídoun wuríbati, dísegüdarügü báwa lueí.

⁵ Aríñagati gíñe Jesúsu joun.

—Niján ában jémpulu jun. Lídin jamúga ában jí-daangiñe lúbiñe ában lumáda amídi áriebu, ába laríñagun lun. “Numáda, furédeibá úruwa fein nun, ⁶ ladúga sun líña lachúlürün ában numáda núbiñoun áni úati ni cáta núma lun níchugun lun.” ⁷ Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.” ⁸ Nariñaguña jun luágu íbini lan jamúga másaarun lan íchigoun lun ladúga lumáda lan, lásaaruña jamúga íchigoun lun lueí lasígirun ebéreseja lun. ⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰ Ladúga sun le amúriajati, íb-jati, le áluajati, daríti, le adaúnjati luágu béna, junrén-wati lun.

¹¹ ¿Gayáraabei funági líchugun ában úguchili jí-daangiñe dúbü lun liraú dan le lamúriajan fein lúma? ¿o líchugun lan ában jéwe lun dan le lamúriajan údu-raú? ¹² ¿o líchugun lan ában águru lun dan le lamúriajan gañeín? ¹³ Gíchigadijadün ligía cátei buíti joun jirájüñü láu sun juríban, igúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu níjein lan lubáfu Máfia lúma Jesúsu
(Mt 12.22-30; Mr 3.19-27)

¹⁴ Níñein Jesúsu aságara ában espíritu wuríbati lueí ában wügúri le madímuregüdün láalibeí yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵ Níñeanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügúri le espíritugu wuríbatiña.

¹⁶ Jíbiri, lun jóuchaguni, ába jamúriajan miláguru lúma lun larúfuduni luágu lumagiñe lan Búngiu liábin lubáfu. ¹⁷ Queíti subúdi láani le jarítagebei, ába laríñagun joun.

—Furúmieguarügü arúejiani le afánreinraguti lun jageíndagun jámagua, lagúnrinchaguba, ában gíñe família fánreinguatiña ladúga wuríbu, jagúnrinchaguba gíñe. ¹⁸ Ánjein gíñe níjein lubeí fánreinguaü jádan Máfia jáma lánigu, ¿ída lubági ladúrarun lubáfu? Nariñagunbalin le, ladúga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia, ¹⁹ áni ánjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagía guánarügü arúfuda jamúti luágu bulfeigua jumá. ²⁰ Le inárünibeí, láu lubáfu Búngiu naságaja espíritugu wuríbatiña, áni arúfuda lumúti líra luágu chülúljalí lan larúejian Búngiu lídoun fulásu le.

²¹ Ába wügúri jéreti, dan le aráanseñu lan, toúnigi lúban buídu, sun le lúbiñebei chouíuti. ²² Ánjein núbin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanúgüni le labúseerun, ába lafánreinraguni jáma lumádagu.

²³ Le mámabei númagiñe, náganiñein, le míderagun lumútina, güríngua lumúti le nadúgübei.

Espíritu wuríbati le agíribudúbei
(Mt 12.43-45)

²⁴ Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to nígiñe lubeí náfurida.” ²⁵ Dánti le lagíribudun, ába ladáriruni gürígia buga ligía quei ában muna to buí-dawaru, aráanserúa. ²⁶ Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügúri ligía lueí buga furúmiñe.

Ugúndani le tímatimaati

²⁷ Dan le niján lubeí Jesúsu aríñagei cátei le, ába tagúaragun ában wúri jádaangiñe gürígia, taríñaga.

—¡Fuleíseiwatu jíñáru to agúriajabalibu, fuleíseiwatu to átagüdübalibu!

²⁸ Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

Amúriajatiña gürígia wuríbatiña miláguru lúma Jesúsu
(Mt 12.38-42; Mr 8.12)

²⁹ Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatiña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás. ³⁰ Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügúri Garaúwarügüti, ligíaba ában seíni joun gürígia ja lánina dan le luágu Búngiu lan oúnajabalina. ³¹ Dánme le lidáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasiadiruniña, ladúga tugúya, núbintu lídaangiñe lidíse-ágei ubouí lun tagáambuni lichú láu Salomón, áu, weírigutimaatina sügú láu Salomón áni májatün jagáambunina. ³² Lídan mémeme agúseruni ligía, ábame gíñe jásaarun já meja aganoúbaña ubúru Nínive, ábame jasíadiruniña ja lánina dan le, ladúga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weíriguti sügú láu Jonás, áni májatün lun jagáambunina.

Lilámpun úgubu

(Mt 5.15, 6.22-23)

Ába lasígirun Jesúsu aríñaga.

³³ —Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoungadun joun ja ebélurutiña. ³⁴ Ítara líña águu quei ában lámpu lun úgubu, ánjein buídu lubei bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubei bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi.

³⁵ Touñigibá lun mabúrigadun lan bilámpun. ³⁶ Ánjein jarúgounga lubei láu sun búgubu, úaga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés

(Mt 23.1-36; Mr 12.38-40; Lc 20.45-47)

³⁷ Dan le lagúmuchunbei ladímurejan Jesúsu, ába lamísurajani ában fariséo eíga lúbiñe. Ába lebéllurun Jesúsu, ába lañúurun luágu dábulu. ³⁸ Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eíginí. ³⁹ Ába laríñagun Wabúreme Jesúsu lun.

—Jugúya fariséogu ragá jumuti wéru lúma asíedu bougudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿Íbidiñeti jun luágu le lan adúgübalin le bougudigiñebei, ligía lan gíñe adúgübalin le múnadagiñebei? ⁴¹ Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe bougudigiñe jibíti.

⁴² ¡Fugiábugu jugúya fariséogu! Adúgatün dísi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madúgüntün gásu láu ísuruni lúma línsiñejabu Búngiu. Ligía lúnbei jadúgüni, mígirunga jumeíme jadúgüni le ában.

⁴³ ¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígílisin, busén jugúya lun labúsurún jun láu sarágu inébesei úmada.

⁴⁴ ¡Fugiábugu jugúya fariséogu, biángua tigíbu!, ladúga ítara jíña quei umúajaü le maríjinti, sügú jagía gürígia ligíbuagugiñe ibídiñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

⁴⁶ Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anúgüni júrüti joun ámu, áni jugúya, májatün janúgün ni murúsun lídaangiñe.

⁴⁷ ¡Fugiábugu jugúya!, ladúga rújumuti dúbü arítaguágleime luágu jamúaja profétagu já meja jáfaragubaña binádu jagúbürigu. ⁴⁸ Láu líra, arúfuda jumúti luágu gúnda jumá láu le jadúgübei binádu jagúbürigu, jagía áfaragubaliña, jugúya wéndegüda jumúti jamúaja.

⁴⁹ ‘Ligía laríñagunbei meja Búngiu láu lichú láu. “Nouñajaba profétagu jáma apóstolugu joun, ábame jáfara-guniña jíbiri jilágubei, eíbaaja jamáñame jíbiri.” ⁵⁰ Ligía lagúseragüdübaña lubei Búngiu gürígia ja lánina dan le luágu játa profétagu ja áfarawagúbaña lúmagiñe ladúgün uboú, ⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu jówegun profétagu.

⁵² ¡Fugiábugu jugúya arúfudajatiña lilúrudun Moisés!, ladúga ragú jumaali ligélen lubéneri subúdi, mebéllurun jíña, mígirun jugúya lun jebéllurun ja busénbaña jebéllurun.

⁵³ Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴ lun jaríjin ánjaña adárira lidúnrun.

Larúfudajan Jesúsu luágu mabuídun lan biángua lan igíbu

12 Ába jóundaragun sarágu mílu gürígia, gíbetiña darí lun jachúinragun jóungua. Ába lagúmeserun Jesúsu aríñaga jóúntima láni dísiplugu.

—Touñigi jumátia jaweí fariséogu, ítara líña jagáburi quei ísi—biánguañein jagíbu. ² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajóuba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Naríñajare jun, numádagu, moún lumuti janúfudedun jaweí gürígia ja gabáfubaña lun jáfarunün jilágubei, lárigiñe líra siñá jadúgün ámu cátei jun.

⁵ Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibeí lun loúnajanun juwáni máfiougatin lárigiñe lagídaruni jibágari. Lueílá janúfudeda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷ Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégítun sügú jáu sarágu dunúru ligíbugiñe Búngiu, áni loúnigirúñádün.

Ja meyéedagunbaña luágu Jesúsu jagíbugiñe gürígia
(Mt 10.32-33, 12.32, 10.19-20)

⁸ Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba gíñe luágu nánigu jamá jagíbugiñe lání Búngiu án-jeligu. ⁹ Anjaña ja aríñagubaña jagíbugiñe gürígia luágu máma jamá nánigu, naríñaguba gíñe jagíbugiñe lání Búngiu án-jeligu luágu máma jamá nánigu.

¹⁰ Furúmjeguarügü le aríñaguti cátei wuríbati nuágu, áu le Wügúri Garaúwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹ Dánme le janügún ligíbugiñoun lúru luágu jagúserun, o jagíbugiñoun lan tábutigu jalígilisin juríu, madíjerida jumá luágu cába lan jounaba o cába lan jaríñaga, ¹² dánme le lachúlürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani lueí leténirún sarágu lun irísini

¹³ Ába laríñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Laríñaga Jesúsu lun.

—¿Cági íchubalina quei agúseragüdüti o quei afán-reinjati jídan?

¹⁵ Aríñagati gíñe ítara.

—Tounigigua jumá júngua lueí luweínamu águu, ladúga máma lueígiñe líbe lúmati gürígia labágarida sarágu dan.

¹⁶ Ábati líchuguni jémpulu le joun, laríñaga.

—Níñein méja ában wügúri rísiti, ába líchugun lichári alúbajouñi buíti. ¹⁷ Ábati laríñagun rísiti le lúnguarügü. “¿Cábasán funa nadúga? Ibídiñeti nun jalíaba lan nareídei sun le nalúbajabei.” ¹⁸ Ába lasáminarun, ába laríñagun. “Subúdi náali cába lan nadúga, nagúnrinch-aguaru sun náni lágei líla nádü, ábame nadúgün ámu weínamutimaatu, ábame nareíduni nalúbajan lúma sun le númabei tídan. ¹⁹ Ábame naríñagun nún-wagua. Buíti dan bun, níjein sarágu cátei areídañu bú-ma lun sarágu dan, eméraguabá, jóuba, gurába, gúndaabá.” ²⁰ Laríñaga Búngiu lun. “Wügúri deré tagáambun, bouwe áriebe le, sun le búmabei areídañu, ¿cábasan un lerédera?” ²¹ Ítara líña lasúseredun lun gürígia le adámuridaguagüdüti irísini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

Tounigi lumútiña Búngiu lirájüñü
(Mt 6.25-34)

²² Ába laríñagun Jesúsu joun lání disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun. ²³ Gebégitimaati ibágarí sügú láu eígini, gebégi úgubu sügú táu anáanguni. ²⁴ Aríja jumá joun dunúru. mábunaguntiña,

malúbajan, mágei ligía jeígin, láu sun líra, jóugüda lumútiña Búngiu. ¡Gebégitimaatün sügú jáu dunúru! ²⁵ Úati ni ában jádaangiñe gayáraati líchugun lánwoun libágarí láu sun luweírín lidíjeri luágu. ²⁶ Ánjein lubeíti siñá lubei jadúgüni le míbebei, ¿ca uágu jadíjerida luágu buri líbiri cátei?

²⁷ Aríja jumá ída líña lan labouuchun buri fulúri. mawádigimariti, májüchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubei ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüda-timabadün, lougua tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladúga lirájüñü ubou le, lárígíñanu buri cátei le, ánjein jugúya, níjein ában Júguchi le subúdiabubei lun sun jemégeirun. ³¹ Áluaja jumá lun jesériwidun lun furúmiñe, ábame líchuguni sun le jemégeirubei jun.

Irísini siélu
(Mt 6.19-21)

³² Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan. ³³ Alúgura jumei le júmati, jíchigeime lebégi joun gudémetiña, láu líra, jadúgüñoun lágei seínsu to maweíyadaditu, irísini siélu le magúmchaditi, le ní lubei siñá lan jebélurun jíwerutiña anúgei jirísini, úa jagía jamútiri ní lun jeígini. ³⁴ Naríñagubalin le jun ladúga le ní lumuti jirísini, níñoun gíñe janígi.

Aráanseñu jumá, agúrabaja

³⁵ Aráanseñu jumá lubá nagíribudun siéluigiñe, durúngu jílampun. ³⁶ Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. ³⁷ Buídubei dan joun músu ja ladárirubaña jayúbudiri agágudúañu dan le lachúlürün, ninárün jáu, iyúbudiri meme ligía laráanseruba, ábame lañúuragüdüniña luágu dámbula, ábame lesériwiduni jeígin joun. ³⁸ Íbini amídi áriebe lan lachúlüra o lubá lan larúgan, ánjaña ladárrira agágudúañu, buídubei dan joun músu jagía. ³⁹ Subúdi jumei luágu lun lan jamúga subúdi lání tabúreme múna cába lan óra lachúlüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegung. ⁴⁰ Jugúya, aráanseñu jumá gíñe, ladúga lídaanme magáradajan jumá ligíame nagíribudun, áu le Wügúri Garaúwarügüti, ubouágun.

Músu le úarabei, lúma le múaraanbei
(Mt 24.45-51)

⁴¹ Ábati lálügüdüni Pédro Jesúsu, laríñaga lun. —Nabúreme, ¿wounrügü bíchigei jémpulu le ódi joun súngebei?

⁴² Laríñaga Wabúreme Jesúsu lun.

—Lun furúmieguaugü oúnigiruti úarati, gunfaráan-da ligía, le lígirubei liyúbudiri lun laríjin jáu tílana lúban, lun leígagüdüniña lídan dan. ⁴³ Buídubei dan lun músu le ladárirubei liyúbudiri agúnfulira láu luwádígimari dan le lachúlürün. ⁴⁴ Ninárün jáu, luágu líchugubei lan liyúbudiri lun ligía lan aríja láu sun le libíjubei. ⁴⁵ Ánjein arítagua músu ligía luágu lúgili lan liábin liyúbudiri, ábame lagúmeserun oúserañña jíbiri músu ja lábugiñebaña laríajaan wuríba, leréderame eíga, áta, abácharuada, ⁴⁶ ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírín-ágei abeichuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷ Músu le subúdijabúbei lun ca lan labúseerubei liyúbudiri áni maráanserunti, mabájüdüñleí, labeichúba sarágu. ⁴⁸ Ánjeinti músu le ibídiñeti lun, ába ladúgün cátei lé buri lúnti labeichún lueígiñe, maweírubei labeichún. Le únti líchugúa gíbeti, gíbebei amúriajoúti lúmagiñe, le gíbeti ígirúti lábugiñe laríajaan, gíbetimaabei amúriajoúti lúmagiñe.

Jesúsu lébunabei fánreinguaü

(Mt 10.34-36)

⁴⁹ Láu niábin uboúagun, ñíbei fánreinguaü uboúagu queísi wátu geméti. ¡Busénjadina jamúga durúnguaali lan wátu ligía! ⁵⁰ Lúnti nasúfurirun le gumúti, ¡meméni-ja nanígi lagúmuchun! ⁵¹ ¿Jarítaguatúnsan luágu barú nán meja darángilaü númagua dan le niábinbei uboúagun? Manúgütina darángilaü, fánreinguaü nanúgübei. Jafánreinraguba ja mafíñebaña nuágu jáma ja affíñebaña nuágu, ⁵² lúmagiñe guetó, seíngügua tídan ában múna, jafánreinraguba úruwa jaweí biáma, biáma jaweí úruwa, nueígiñe. ⁵³ Lagáragabuba úguchili luágun liraú, isáani luágun úguchili, úguchuru tuágun tiraú, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

⁵⁴ Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵ Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. ⁵⁶ ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubeí luáguti ligáburi dan le gádaanbalün jun?

Joucha jumá lun lídan jumá dan jáma jáganiñu

(Mt 5.25-26)

⁵⁷ ¿Ca uágu siñá lubei jasúbudiruni cátei le úaraguabei júngua? ⁵⁸ Ánjein agúaragüda ában gürígia buágu, ába bídin lúma ligíbugiñe lúruudu, jouchabá baráanseragun búngua lúma luágu úma lubáragiñe jachúlürün, manúgün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furisunrugun. ⁵⁹ Naríñajare

bun luágu máfuridunbadibu lan ñígiñe darí bafáyeiruni lagúmujoún bigáwanün.

Ca lan uágu lúnti lubeí lasáansirún igáburi

13 Lídoun méja dan ligía, ába jayábin gürígia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu. ² Ába laríñagun Jesúsu joun.

—¿Jarítaguatúnsan luágu ladúga lan luweírín jafígoun Galiléana jagía sügú jáu ja jíbiri lílana jageíra lasúseredunbei le joun? ³ Máma lueígiñe líra, láu sun líra, naríñajare jun luágu ánjein lan masáansirun jumá jigáburi, joúweguba gíñe sun jugúya. ⁴ Ángi dísi-wídü jagúra ja oúwegubaña dan le lábुरुjanbei wáyelesi le Siloébei jawágun— ¿jarítaguatün luágu weírítima lan jadúnrun sügú jáu ja jíbiri ja aganoúbaña Jerusalén? ⁵ Máma líña gíñe, láu sun líra, naríñajare jun luágu ánjein lan masáansirun jumá jigáburi, joúweguba gíñe sun jugúya.

Jémpulu tuáguti tídibu ígo to mínboun

⁶ Ábati labájüdaguni Jesúsu jémpulu le joun, laríñaga.

—Ñíñein ában wügúri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati laríñagun lun le oúnigirubalin ichári. “Aríjabásan, úruwaali irúmu gabúgürügua niábin álua-ja ígo tuágu ídibu to, madáritina. Chaúnboun, ¿cába uágu terédera ñi luágu ni cáta?” ⁸ Ába loúnabuni le oúnigirubalin ichári, ába laríñagun. “Niyúbudiri, ígirayaboún irúmu le, nañúludagüdüli múa táu, awoúja áume táu. ⁹ Fáguaga tagiindun ítara, ánjoun magiindun, ábame tánychugún.”

Lareídaguagüdünnun Jesúsu ában wúri sebúti tanágan lídan wéyu le eméraaguagülei

¹⁰ Luágu ában wéyu le eméraaguagülei, ñíñein Jesúsu arúfudaja tídan jalígilisin juríu, ¹¹ ñíñounti ában wúri, dísi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun. ¹² Dan le laríjinbarun Jesúsu, ába lagúarun tun, ába laríñaga tun.

—Wúri, areídaguadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴ Ábati lagáñidun tábuti ligílisi ladúga lareídaguagüdünnun Jesúsu lídan wéyu le eméraaguagülei, ába laríñagun joun gürígia ja ñíbaña. —Níjein sísi wéyu lídan dimáasu lun gayára lan luwádígimaríniwa, lídan sísi wéyu ligía lun jíabin lun lagáranijoún jun, máma lídan wéyu le eméraaguagülei.

¹⁵ Ába laríñagun Wabúreme Jesúsu lun.

—¡Biángua tigíbu jugúya le!, ¿ma farára jumúti sun jugúya jilúgün bágasu o jilúgün lan burígü lun janúgün áta dúna lídan wéyu le eméraaguagülei?

¹⁶ Wúri to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdún lídan wéyu le eméraaguagülei?

¹⁷ Dan le laríñagunbalin Jesúsu cátei le, ába nibúsi-garigua jamá sun láganiñu, ánjaña sun jíbiri gürígia, gúndaatiña láu cátei lé buri weíriguti le ladúgübei Jesúsu.

Jémpulu luáguti tíla mostása

(Mt 13.31-32; Mr 4.30-32)

¹⁸ Ábati laríñagun Jesúsu.

—¿Ída líña ligáburu larúeijan Búngiu? ¿ca cátei úmounbei gayára lan níchuguni? ¹⁹ Ítara líña quei ában liraúraü tíla mostása le lábunubei ában wügúri lichárirugu, ába labouchun, ába laweíridun darí lun liábin lun ábanme lan tídibu wéwe weíriti, darí lun jadúgün dunúru jádibu luágu tuburébu.

Jémpulu luáguti ísi

(Mt 13.33)

²⁰ Ábaya laríñagun Jesúsu.

—¿Ca cátei úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában wúri tí-doun úrúwa líburu fulúaarú, ába terésirun súngubei.

Béna le bürúraübei

(Mt 7.13-14, 21-23)

²² Ába lasígiruni Jesúsu luweíyasun Jerusaléoun, arú-fudajeina ligía lídan buri sun aúdü lúma lirájüñü fulásu le ídaangiñebei lásügúra. ²³ Ába laríñagun ában wügúri lun Jesúsu.

—Nabúreme, míbetiñásan ja lúnbaña jasálbarun?

Ába louñabun Jesúsu, ába laríñagun.

²⁴ —Bürúraüti lubéneri siélu, joucha jumá lun gayáraabei lan jebélurun lídaangiñe, ladúga quei naríñaguni jun, sarágujaba busúentiña jebélurun, siñábei. ²⁵ Lárigiñe ladáurun tabúreme múna lubéneri, jugúya le bougudibe jadaúnjaba luágu béna, jaríñagame. “Wabúreme, darába béna wabá.” Ábame louñabunün, laríñagame jun. “Íbídiñetün nun, íbídiñe gíñe nun jalána jumá.” ²⁶ Ábameti jagúmeserun aríñaga. “Jóujúadiwa, gurá wagía búma, arúfudaja amúrú woun úmadarugu.” ²⁷ Ábameti louñabunün, laríñagame. “Aríñaga náali jun luágu íbídiñe jumá nun, íbídiñe nun jalána jumá. Díse jumá nueí, sun jugúya le adúgübei wuríbani.” ²⁸ Ligíaba jayájuajan, acúnrijame jari dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin. ²⁹ Jayábiba gürígia lueígiñe oúbaü le ñígiñe lubei láfuara wéyu lúma lueígiñe le ñígiñe lubei lálüda, lueígiñe núru lúma lueígiñe suédi lun jañúurun eíga lídan larúeijan Búngiu. ³⁰ Níbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

Layájun Jesúsu jawágu lílana Jerusalén

(Mt 23.37-39)

³¹ Lídan méme wéyu ligía, ába jayábin fariséogu, ába jaríñagun lun Jesúsu.

—Beíba yágiñe, ladúga busénti Heródes láfarunibu jilágubei.

³² Ába laríñagun joun.

—Jeíba, jaríñagame lun wügúri bíbuti ligía. “Ugúñe lúma jarúga naságajan espíritugu wuríbatiña já-daangiñe gürígia, areídaguagüda áu sánditiña, lárigiñe jarúga, lásurun nuwádigimari. ³³ Lúnti nasígiruni nuweíyasun ugúñe, jarúga, lúma lárigiñe jarúga, ladúga máma lúnti lafarúniwa ában proféta jilágubei bougudi lueí Jerusalén.

³⁴ Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chúgua jugúya dúbü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁵ Ígira láadün Búngiu, áni naríñajare jun luágu maríjindügüya jumáadina lan daríme lachúlürün dan lun jaríñagun. “Biníwati le ñúbinbei lídan líri Wabúreme.”

Lareídaguagüdün Jesúsu ában wügúri lújali larúna lúma liyáda

14 Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja ñibaña, jaríaguñein Jesúsu. ² Níñein gíñe ában wügúri láu sándi le ílu, ³ ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareídawaguagüdün ában wügúri lídan wéyu le eméraaguagülei ódi siñáti?

⁴ Ába jeréderun maníñu. Ábati lanúgüni Jesúsu sánditi ligía, ába lareídaguagüdüni, ába laríñagun lun lun lídin. ⁵ Ába laríñagun joun fariséogu.

—Furúmieguarügü jídaangiñe, ánjein eíguada lilúgün bágasu o lilúgün lan burígü lídoun ában wélu lídan wéyu le eméraaguagülei, laságarubei ñígiñe furése.

⁶ Maríñagun jáña ni cáta.

Ja amísurajoúbaña lídoun maríei

⁷ Dan le laríjini Jesúsu janúadajani amísurajoútiña ubáraü buri le joúnbei ja weírigubaña, ába laríñagun joun.

⁸ —Dánme le bamísurajoún lídoun ában fédu lánina maríei, máluajabeí lubuídun-ágei ubáraü, ñúbin liñein ábanya amísurajoúti weírigutimaati bueí, ⁹ ábame liábin le amísurajabalün, laríñagame bun. “Rúbei bubára lun wügúri le.” Ábameti bídin láu busíganu añúura lídan lúnabun-ágei ubáraü. ¹⁰ Dánme le bamísurajoún lídoun ában fédu, ñurúba lídan lúnabun-ágei ubáraü, lun dánme lan le liábin le amísurajabalibu, laríñagame bun. “Numáda, sügúba lídoun ában ubáraü weírigutimaati.” Ítara lúba berésibirun inébesei

jagíbugiñe sun ja ñúnbaña luágu dábula. ¹¹ Le anáanguti lúngua weíri, lúnabudúba, le únabuti lanáangun lúngua, weíríbei lanügún.

¹² Aríñagati gíñe lun wügúri le amísurajabalin.

—Dánme le bíchugun ában adíneruni o fédu, mamí-suraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitiña, ladúga jamísurajabadibu gíñe, bibíjubati bafáyeiruaja. ¹³ Dánme le badúgün fédu, amísuraja báña gudémetiña, siñáguatiña úngua, danímaatiña, maríjintiña. ¹⁴ Ábame gúnda ban, ladúga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe oúweni.

Jémpulu luáguti oúnwenbun adíneruni

¹⁵ Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶ Ábati laríñagun Jesúsu lun.

—Ñíñein ában wügúri, íchuguti ában oúnwenbun adíneruni, ába loúnajan amísuraja sarágu gürígia.

¹⁷ Óra lun adíneruni, aba loúnajani lumúsun aríñaga

joun amísurajoútiña. “Queímoun, aráanseeli sun cátei.” ¹⁸ Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.”

¹⁹ Laríñaga ában. “Agáñijaadina seíngü féru bágasu lánina wadágimanu, neíbuga ouchaña, adúgabá fuleísei nun, ferúduna bána, siñáti nídin.” ²⁰ Laríñagaya ában. “Sun líña namárieidun, ligía siñá lubei nídin.”

²¹ Dan le lagíríbudun músu, ába labájúdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.” ²² Lárígiñe ladúgüni, ába laríñagun músu lun liyúbudiri. “Nabúreme, adúga náali le bubeíbei nun, níjein mémegua ubáraü.”

²³ Ábati laríñagun iyúbudiri lun músu ligía. “Beíba lídan sun úma bougudin lueí ubúrugü, lúma sun fulásu geyégua láu, ábame bafósuruníña sun ja badárirun lun jayábin lídoun nufédun, buin támuga núban.

²⁴ Ladúga naríñajare jun luágu úabei lan ni ában jádaangiñe ja namísurajabaña eígiti lídan nadíner-agüdün.”

Lúnti lígirúniwa sun cátei lun lánibei lan Crístu

²⁵ Sarágu jáña gürígia afálaruti Jesúsu, ába lagáragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúlenu, o lítunu, o libágarí guánarügü, sügü náu. ²⁷ Le gíñe májabei lasúfurirun nueígiñe queísigubeirügü jamúga ában wügúri le anúgüti lugúruwan, siñáti nání lan disípulu. ²⁸ Ánjein arítagua ában jádaangiñe ladúgün ában wáyelesi, zma funági lañúuruba furúmiñe asáminara átiríbei lan lagástarun

lun laríjini ánjein gabáfu lubeí lun lagúmuchuni?

²⁹ Ladúga ánjein líchiga ébuu, lárígiñeme lásiñerei wadágimanu agúmucha, jéjerajaba ja aríjubalin láu, ³⁰ jaríñagame. “Guméseti wügúri le ában wadágimanu, siñá lumuti agúmucha.” ³¹ Ánjein lawúribuja lubeí ában urúei lúma ámu urúei, zma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súdeara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli. ³³ Ítara líña lubeíti, furúmieguarügü jídaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt 5.13; Mr 9.50)

³⁴ Buíti sálu, ánjein leféridira lubásuan, zcábagi un ju lan? ³⁵ Mabuídunjali ni lun lábunawagún nádü lídan, ni lun lidérebugu múa, fiwarügaalime. Agáamba jumána, jugúya le garígeirugubei lun jagáambun.

Jémpulu tuáguti mudún to eféridiruboun

(Mt 18.10-14)

15 Luágu ában wéyu, ába jayárafadun sarágu agúburajatiña liseínsuna gumádi jáma gafí-gountiña lun Jesúsu lun jagáambuni. ² Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügúri le, resíbi lumútiña gafí-gountiña, jou ligía jáma.

³ Ábati líchuguni Jesúsu jémpulu le joun, laríñaga.

⁴ —zCa jídaangiñe, lun jamúga galúgüniña lan san mudún, leféridira ában jádaangiñe, mígirun lubáña gádürü-wein-díisi-néfu ñi, lubárua, lun lídin áluajoun mudún to eféridiruboun? ⁵ Dan le ladárirunun, ába lanúgünun légewagu láu ugúndani. ⁶ Dan le lachúlürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladúga darína nilúgün mudún tó yebe eféridiruboun nueí.” ⁷ Naríñajare jun luágu ítara méme líña weírítima lan ugúndani siélu luágu ában gafí-gounti le asáansiruti luríban ligáburi lun lafálaruni Búngiu, sügü láu jawágu gádürü-wein-díisi-néfu gürígia richágutiña ligíbugiñe Búngiu ja memégeirunbaña jasáansiruni jagáburi.

Jémpulu luáguti seínsu le eféridirubei

⁸ zCa wúri to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni? ⁹ Dan le tadáriruni, ába toúndaruniña tumádagu jáma tubésinanigu, taríñaga joun. “Gúnda jumá núma, ladúga darína seínsu lé yebe neféridirubei.” ¹⁰ Naríñajare jun luágu ítara líña lan gíñe ugúndani jádan lání Búngiu ánjeligu luágu ában gafí-gounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹ Rúlumuti gíñe Jesúsu jémpulu le joun, laríñaga. —Ñíñein méja ában wügúri jáu bián lirájüñü. ¹² Ába laríñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³ Málüti lueígiñe, ába loúndaruni amúleñein sun lumégegungun, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴ Dan le gumújali sun liseínsun, ába ladágarun ában lemégeirun eiginí lídan fulásu ligía, ába ladáragun lúngua lídan ában oúnwenbun mégei. ¹⁵ Ábati lídin áluaja wadágimanu lúma ában lílana fulásu ligía, ába loúnajani wügúri ligía oúnigiraña lilúgüniña búruju. ¹⁶ Weíriti liláma darí lun lawámadun lun lun leíginí jeígin búruju, míchugúnwati lun. ¹⁷ Ábati lasáminarun, laríñaga lúnguarügü. “¡Sarágu ñadágimeintiña lúbiñe núguchi ígiraguati eiginí joun, áu ya, ouwe niláma! ¹⁸ Nagíribuda le ñíjin lubeí núguchi, naríñagame lun. Núguchi, afgounjaadina ligíbugiñe Búngiu lúma bigíbugiñe. ¹⁹ Madúnaali lun nanáangun núngua quei biraú, barúbana quei ában jádaangiñe ñadágimeintiña búma.” ²⁰ Ába lárügüdün úma lun lagíribudun lúbiñoun lúguchi. “Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruni. ²¹ Ábati laríñagun isáani lun. “Núguchi, afgounjaadina ligíbugiñe Búngiu lúma bigíbugiñe, madúnaali lun nanáangun núngua quei biraú.” ²² Ába laríñagun úguchili joun lumúsuniña. “Sagájumoun tubuídun-ágei anáanguni furése, daúguagüda jumeí. Daújuma gíñe ában bágü luágu lújabu túma geídi luágu lugúdi. ²³ Áfara jumeí liraúraü bágasu le dibúnetimaabei. ¡Weíga, eféduja wagíame!, ²⁴ ladúga niraú le, rúnaali yebe quei jiláali áni chúlúguaya, féridijalí yebe áni daríwama.” Ába jagúmeserun eféduja. ²⁵ Súnti buga dan le, níjeinti buga íbugañaü áraabu. Dánti le lagíribudun, dan le lachúlürün tubádun múna, ába lagáambuni áfaruni lúma abínajani. ²⁶ Ábati lagúarun lun ában jádaangiñe músu, ába lálügüduni ca lan susérebei. ²⁷ Ába laríñagun lun. “Chúlújali bamúlen, áfaragüdalá búguchi liraúraü bágasu le dibúnetimaabei, ladúga lachúlürün láu magádiei.” ²⁸ Ába lagáñidun íbugañaü, májaali lebélorun. Ába láfuridun lúguchi, ába layúmuragun lun lun lebélorun. ²⁹ Ába laríñagun lun lúguchi. “Subúdi bumúti luágu seríwíjadina lan bun sarágu dan, madúraagunganéi le bubeíbei ni ában weíyaasu, míchugidibu ni ában liraúraü gábara nun lun nefédujan jáma numádagu. ³⁰ Guetóti, láu liábin biraú le, le achágarubalin biseínsun jáma wúríña wuríbatíña, jáfaragüdabá bágasu le dibúnetimaabei!” ³¹ Ábati laríñagun úguchili lun. “Niraú, amúrü númañadibu súnwandan, sun le náni, báni. ³² Ánjein guetó, lúnti wadúgün fédu lúma lun wagúndaarun ladúga bamúlen lé yebe rúwamaalíbei quei jiláali, chúlúguaya, féridijalí yebe, áni daríwama.”

Jémpulu luáguti oúnigiruti le múaraanbei

16 Aríñagati gíñe Jesúsu joun láni disípulugu. —Ñíñein méja ában iyúbudiri rísiti, ñíñein gíñe ában loúniri lumégegungun, ába jayábin aríñaga lun luágu lachágaruñein lan oúnigiruti ligía lirísín. ² Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladúga masígíjadibu oúnigirei nílagu.” ³ Ábati leréderun oúnigiruti ligía asáminara, laríñaga lúnguarügü. “¿Cábati nadúga guetó lárigiñe gidála lan niyúbudiri wadágimanu nueí? Méretina lun nadúgün wadágimanu júrüti, áni nibúsigaritina lun namúriajan. ⁴ Subúdi náali cába lan nadúga lun ñí jama erésibirutina jábiñe dánme mawádigimarijadina.” ⁵ Ába loúnajan jawágu ja adúweirubalin iyúbudiri lun jayábin lun ában ában. Ába lálügüdün le furúmiñeti, laríñaga lun. “¿Átiri badúweiruni niyúbudiri?” ⁶ Ába laríñagun lun. “Dúwei numúti san barín agúlei.” Ábati laríñagun oúnigiruti ligía lun. “Nuján bigáradan, ñurúba furése, badúgame ában luágurügü dimí-san.” ⁷ Lárigiñe, ábaya lálügüdün ában, laríñaga lun. “Ángi amúrü, ¿átiri badúweijan?” Laríñaga lun. “San ságü túrígu.” Laríñagati lun. “Nuján bigáradan, adúgabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu oúnigiruti ligía lídan ligáburi ladúgüni cátei. Ligía laríñagun Jesúsu. —Gürígia wuríbatíña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu. ⁹ Siñáti leménigidún luágu irísini lánina ubou le, aríñagatina lubeíti jun lun jayúsuruní jirísín lun jadúgün buíti, lun dánme lan le lagúmuchun jibá-gari, jerésibirúba tídan múna to magúmuchaditu, yágüta siélu. ¹⁰ Le adúgüti buíti láu le murúsunrügüti, ladúgüba gíñe buíti láu le gíbeti, le madúgünti buíti láu le murúsunrügüti, madúgünbei gíñe buíti láu le gíbeti. ¹¹ Ánjaün lubeíti madúgün buíti láu buri irísini le láni ubou le, le uágubei siñá lan leménigidún, ¿cábati affíñera juágu lun ledégerun irísini inárüniti lábugiñe jaríaa-jan? ¹² Ánjaünti madúgün buíti láu jemégen ámu, ¿cábati íchigei le jáni guánarügü jun? ¹³ Siñáti lesériwidun ában gürígia joun bián iyúbudirigu, ladúga liyéreeguduba ában lun, lín-siñedame le ában lun, o úarabei lan lun ában, lanúgeime le ában quei ni cáta. Siñáti lesériwidúniwa lun Búngiu lúma lun seínsu. ¹⁴ Agáambagu jáña fariséogu lun sun cátei le, ába jéjerajan láu Jesúsu, ladúga jínsiñe lan seínsu joun. ¹⁵ Ábati laríñagun Jesúsu joun. —Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janúgübei gürígia quei weíriti cátei, iyéreeguti lun Búngiu.

Lúrudu lúma larúeijan Búngiu

¹⁶ Níjein meja lilúruden Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóuchatiña lun jebélurun lídoun.

¹⁷ Méreenguntimaati lun lagúmuhagun siélu lúma uboú, máma lun magúnfulirun lan liñúraü-ágei dimúrei lídaangiñe lilúruden Búngiu.

Larúfudajan Jesúsu luágu ígiraguni

(Mt 19.1-12; Mr 10.1-12)

¹⁸ Ánjoun lígira ában wügúri lúmari, lagámarida ámu, ladúgüñein figoú le giríbei adultériu, le gíñe agámariduti ában wúri to ígiraguaaru, ladúgüña gíñe adultériu.

Wügúri le rísibei, lúma Lázaro

¹⁹ Aríñagati gíñe Jesúsu.

—Níñein méja ában wügúri rísiti, anáanguni fínutu to wédegutu ladáuraguboun, ságüja wéyu ladáagun fédu láu sarágu wédegü. ²⁰ Níñein gíñe ában gudémeti gíriti Lázaro, sun lúra láu gumeín, ²¹ lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weíruti lasúfurirun darí lun lawánduni jayábin oúnli éjelujei lugúmeín. ²² Luágu ában wéyu, ába loúnwen fugiábu ligía, ába janúgüni ánjeligu lúmoun Abrahám, le ñíjin jabeí jiláaña buítiña, ába gíñe loúnwen rísiti, ába lábunajoún. ²³ Dan le lasúfuriruña lan rísiti ligía lídan fulásu le ñíjin jabeí jiláaña wuríbatiña, ába liñúruni laríjin, ában laríjini Abrahám dísegiñe, láu Lázaro lúma. ²⁴ Ábati lagúaragun, laríñaga. “;Núguchi Abrahám, gudémená bun! Oúnajabeí Lázaro lun ladúdüragüdüni ligíbu lújabu láu dúna, ñúbin lámuga éderei tuágu niñéñe, ladúga nasúfuriruña sarágu lídan wátu geméti le.” ²⁵ Ába laríñagun Abrahám lun. “Niraú, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira. ²⁶ Boúgudigiñe lueí sun le, níjein ában baráangu afánreinraguáwa júma, ja jamúga buséntiña jóudin yágiñe lun ñíjin, siñáti, ni ja ñíbaña, siñáti jayábin ñájoun.” ²⁷ Ábati laríñagun rísiti. “Amúriajatina búma, Núguchi Abrahám, lun boúnajani Lázaro lúbiñe núguchi, ²⁸ añájein seíngü namúlenu ñi, lun ladímurejan joun, mayábin jamámuga gíñe lídoun fulásu lánina asúfuriruni le.” ²⁹ Ába laríñagun Abrahám lun. “Níjein le labúrújabeí Moisés jáma profétagu jáma ñi, jadúga jamá gásu láu!” ³⁰ Ába loúnabun rísiti, ába laríñagun. “Binárün, núguchi Abrahám, láu sun líra, ánjein ñúdün ában jádaangiñe jiláaña adímureja joun, lasáansiraguba jagáburi.” ³¹ Laríñaga Abrahám lun. “Ánjein mája jabeí jadúgün gásu láu le laríñagubei Moisés jáma profétagu, mafíñebañá gíñe láu sun lásaarun ában jádaangiñe jiláaña lun lídin adímureja joun.”

Luríban laffíngüdüniwa ában gürígia

(Mt 18.6-7, 21-22; Mr 9.42)

17 Ába laríñagun Jesúsu joun láni disípulugu. —Súnwandan níjeinbei lán buri cátei affí-gougüdüti gürígia, jáni fugiábu gürígia le affíngüdüti ámu! ² Buítimaati jamúga lun lun lagurún baránajoun láu ában dúbü le lamúlija awási güráñu luágu ligíina sügú láu laffíngüdüni ában jádaangiñe ja ñúbü-rigiñabaña lídan jafíñen nuágu. ³ Ítara líña lubeíti toúnigi jumá.

Ánjein adúga bamúlen o bíbugaña wuríbani bun, wéridibei, ánjein asáansiragua ligáburi, ferúdnabei, ⁴ ánjein adúga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madúgüdüngüya láali lan, lúnti ferúduna báni.

Lubáfu affíñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü affíñeni jídan—gayáraati jamúga ñúraüraü lan queísi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateín-giruníwa luágu

⁷ Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawóujan o loúnigirun lan anímaalu, ¿laríñaguba funági lun músu ligía. “Belúba, ñurúba eíga?” ⁸ Uá, aríñagarügübei lun. “Aráansebei neígin, aráanseñu amúrúme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.” ⁹ ¿Teínqui lumúti funági iyúbudiri músu luágu ladúgüni le lubeíbei lun? Uá. ¹⁰ Jugúya giñéti, dánme lásurun jadúgüni le uágubei laríñaga Búngiu jun lun jadúgüni, lúnti jaríñagun. “Músú moún-tiña wagía, ladúga lé rügüñein lúnbei wadúgüni wadúga.”

Lareídaguagüdüni Jesúsu dísi gawágutiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samaría lúma Galiléa.

¹² Dan le lachúlürünbei lídan ában liraúraü fulásu, ába jayábin dísi wügúriña gawágutiña gumeín, lubároun. Ába jeréderun díse lueí, ¹³ ába jagúaragun lun ítara.

—Jesúsu, Maésturu, gudéme wamá bun!

¹⁴ Dan le laríjinbaliña Jesúsu, ába laríñagun joun.

—Jeíba arúfudagua júngua joun fadirigu.

Dánti le ídirina jamá, ába jareídagun. ¹⁵ Níñeinti ában jádaangiñe, dan le laríjinbei luágu areídaguuali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni

lun. Áni Samariána wügúri ligía. ¹⁷ Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri né-fu? ¹⁸ ¿Niján gubeírügü teréncha le agíríbuda eteingirei Búngiu?

¹⁹ Ábati laríñagun lun wügúri ligía.

—Sarába, beíba, areídaguaadibu ladúga bafíñen.

Ída lúba lan ligáburu liábin larúeijan Búngiu

(Mt 24.23-28, 36-41)

²⁰ Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, maríjín-bei, ²¹ maríñawagúnbei. “Niján”, o “Níngitan”, ladúga lídan linárün cátei, níjeinjali larúeijan Búngiu jagánaga.

²² Ábati laríñagun joun láni disípulugu.

—Lachúlürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía. ²³ Laríñawagúba jun. “Niján Cristu ya”, o “Níngitan yágüta.” Iyéenibei, mídin jumá jarígi, mafálarun jumáñame. ²⁴ Ladúga ítara quei laríjín ában labíríjaníga lueígiñe ában louba siélu lun luágun le ában, ítara lúba dánme le nagíríbudun ubouágun, áu le Wügúri Garaúwarügüti. ²⁵ Lúnti nasúfurirun sarágu furúmiñe, mebéresen jagíame gürígia ja lánina dan le náu. ²⁶ Quei meja lasúseredun lídan lidáani Noé, ítara lúba gíñe lasúseredun lídan búrime wéyu le niábingüle, áu le Wügúri Garaúwarügüti.

²⁷ Dán meja ligía, jerédera meja gürígia eíga, áta, agámarida, íchaajaña jarájüñü lun jamárieidun darí wéyu le lebélorun Noé tídon ugúnein to árca. Ába liábin gúnran, ába jañáradagun súngebei. ²⁸ Ítara lúba gíñe quei lasúseredun lídan lidáani Lot. jerédera gürígia eíga, áta, agáñija, alúguraja, ábunagua, adáagua muna. ²⁹ Dan le láfuridunbei Lot ubúrügugiñe Sodóma, ába láburujan wátu gemetí lúma sáfuru siélugiñe, ába láfaraguniña súngebei. ³⁰ Ítara lúba dánme le niábin, áu le Wügúri Garaúwarügüti.

³¹ Lídaanme wéyu ligía, le gürígia le bougudibei tueí lúban, ánjein níjein lubeí lumégegungun múnada, mebéluralá aságarei. Le gürígia le áraabubei lídan óra ligía, magíríbudalá lúbiñoun. ³² Jarítagua jumá luágu le asúseredubei tun lúmari Lot. ³³ Le áluguti leséfuruni libágari ya ubouágu, lefériðirubei ibágari magúmchaditi, le ánjabei lefériðiruni libágari ya ubouágu, nueígiñe, libíjuba ibágari magúmchaditi.

³⁴ Naríñajare jun luágu áriebe lánme ligía, ñíbaña biáma gürígia arúmuga tídan ában meme gabána, lanügúba ában jádaangiñe, ígirúame le ában según jafíñen nuágu. ³⁵ Ñíbaña biáma würiña amúlíja lídan ában, tanügúba ában jádaangiñe, ígirúame to ában. ³⁶ Ñíbaña biáma wügúriña áraabu, lanügúba ában jádaangiñe, ígirúame le ában.

³⁷ Dan le jagáambunbalin cátei le, ába jálügüdüni, jaríñaga lun.

—¿Jalíbasan lasúsereda buri cátei le, Wabúreme? Laríñaga joun.

—Le ñí lumuti lúgubu jiláali, ñíba jouñdaragua wadúbi.

Jémpulu tuáguti wúri to jiláali túmari, lúma agúser-agüdüti

18 Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu. ² Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában gürígia. ³ Ñíñoun gíñe ában wúri lídan fulásu ligía, jilá meja túmari, ságü wéyu tídin lúmoun agúser-agüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵ quei nuján méme lan wúri to ásüdagüda nichügü, neséfuraaru, jebé lámuga tíabin, gumú líñein nugúraasun.”

⁶ Ába laríñagun Jesúsu.

—Niján laríñagubei agúseragüdüti le wuríbabei, ⁷ gúbumeti leséfuraña Búngiu lánigu ja ayúmuragutiña lun wéyuagu, áriebe. ¿Lúbei lubá líderaguniña? ⁸ Uá, madárasanbei. Láu sun le, dánme le nagíríbudun, áu le Wügúri Garaúwarügüti, ubouágun, ¿nadáriruba funásan afíñeni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richáguja jamá ligíbugiñe Búngiu, janúgaña ámu gürígia quei ni cáta. Laríñaga.

¹⁰ —Ñüdütiña bián wügúriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmurgun, laríñaga. “Búngiu, teínqui numútibu luágu mí-taran nan quei jíbiri gürígia—jíwerutiña, wuríbatiña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnnumuti gíñe díisi gáwanün lídaangiñe ságü fiádürü le ebélorubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun liñúrui laríjín siélun, le luweírín lúnabun lanáangun lúngua. Aboujarügüleí laníguagu láu igárigu, laríñaga. “¡Búngiu, gudémená bun, nugúya le gafícounti!” ¹⁴ Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladúga le anáanguti lúngua weíri, ñúraübei lanügún, ánjein le ñúraübei lanáangun lúngua, weíríbei lanügún.

Labíniruniña Jesúsu irájüñü

(Mt 19.13-15; Mr 10.13-16)

¹⁵ Anaajouatiña gíñe irájüñü lun Jesúsu lun lagúrurun jawágu, dan le jaríjínbalin disípulugu cátei le, ába jadeínjan joun ja anájabaliña irájüñü. ¹⁶ Ába laríñagun

Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladúga ja ítarabaña quei jagía, jagía lílan-abaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu afíñeni jarú-mati líbe jafíñen irájüñü, mebélubei lídoun.

Layánujan ában wügúri rísiti lúma Jesúsu

(Mt 19.16-30; Mr 10.17-31)

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadúgüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágu baríñaga nun “buíti”? Ában rügúñein buíti, Búngiu. ²⁰ Subúdi bumúti gumádi. Maganouábá túma wúri gámaritu, máfarajabá, míwerujabá, mayéejabá luágu ni ában, inébe jamá bagúbürigu bun.

²¹ Laríñaga wügúri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badúgüni. alúgurabeí sun le búmabei, ábame bíchuguni lebégi joun gudémetiña, ábame garísín ban siélu. Ábame bagáribudun, ábame bafálarunina.

²³ Dan le lagáambunbalin wügúri ligía cátei le, ába lírudagun, ladúga rísiti buídu. ²⁴ Dan le laríjini Jesúsu lírudagun, ába laríñagun.

—jénreenguti lun jebélurun rísitiña lídoun larúeijan Búngiu! ²⁵ Méreenguntimaati lun lásügürün ában caméyu lídaangiñe lujúyun ában agúsa sügú láu lebélorun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

²⁷ Laríñaga Jesúsu joun.

—Le jásiñerubei gürgía adúga, gayára lumúti Búngiu, ladúga úati ni cáta siñáti lun Búngiu.

²⁸ Laríñaga Pedro lun.

—Wabúreme, wagía, ígira wamáali sun le wámati lun wafálarunibu.

²⁹ Ába laríñagun Jesúsu joun.

—Ninárün jáu luágu furúmieguarügü lan le ígiruti lúban, o lagúbürigu, o líbugañanu, o lamúlenu, o lúmari, o lirájüñü luágu larúeijan Búngiu, ³⁰ libíjubatíma sarágu weíyaasu lougiñe lídan ubou le, ibíjaleíme ibágari magúmuchaditi yágüta siélu.

Ladímurejaanya Jesúsu luágu loúnwen

(Mt 20.17-19; Mr 10.32-34)

³¹ Ába lagúarun Jesúsu joun lání dúusu apóstolugu jábugua, ába laríñagun joun.

—Weíbuga Jerusalén guetó, le ñiba lubeí lagúnfulira sun le jabúrújabei profétagu nuágu, áu le Wügúri Garaúwarügüti. ³² Jedéregerubadina joun ja mámbaña juríu, jéjerajaba náu, anába jamáname, suégua. ³³ Jabeíchubadina, lárigiñeme, ábame jáfaruni-

na jilágubei, áni násaaruba lídaangiñe ouweni luágu lúruwan wéyu lúnya nabágaridun.

³⁴ Úati gunfaráanda jamá ni cáta lídaangiñe cátei le, ibídiñegubeiti joun ca lan uágu ladímureja joun, darúguati laníchigu cátei le laríñagubei, joun.

Lareídaguagüdüni Jesúsu ában Jericóna maríjinti

(Mt 20.29-34; Mr 10.46-52)

³⁵ Dan le achúlüreinaali Jesúsu ubúrugun Jericó, ñíñein ában maríjinti ñun láru úma amúriaja. ³⁶ Dan le lagáambunbei maríjinti ligía já süüjan sarágu gürgía, ába lálügüdjagan ca lan susérebei. ³⁷ Ába jaríñagun lun luágu niján lan Jesúsu Nazarétna ásügüra ñígiñe.

³⁸ Ábati lagúaragun, laríñaga.

—jJesúsu, le ladúgawagun Davíd, gudémená bun!

³⁹ Ja lubá lubáabaña, ába jadeñjan lun lun lámánichun, ligíatima lagúaragun.

—jLadúgawagun Davíd, gudémená bun!

⁴⁰ Ábati laráramagun Jesúsu, ába loúnajan anúgei. Dan le yaráfaali lun, ába laríñagun lun.

⁴¹ —¿Ca babúseerubei nadúgün bun?

Ába laríñagun lun.

—Nabúreme, buséntina naríjin.

⁴² Laríñaga Jesúsu lun.

—jIbíjabeí baríjin! Areídaguadibu ladúga bafíñen.

⁴³ Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürgía ja aríjubalin cátei le, ába giñe jadímurejan buíti luágu Búngiu.

Jesúsu lúma Zaquéo

19 Ábati lebélorun Jesúsu fulásurugun Jericó, ába lásügürün ubúrugugiñe. ² Ñíñein ában wügúri rísiti, gíríti Zaquéo, jábuti agúburajatiña liseínsuna gumádi. ³ Buséntiti Zaquéo laríjini Jesúsu lun lasúbudiruni, siñáti laríjini ladúga ñúraüraüti lúgubu, áni gíbetiña gürgía. ⁴ Lúnti gayára lan laríjini, ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladúga lúnti neréderun búbiñe ugúñe.

⁶ Ábati larárirun Zaquéo furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri gürgía cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában gürgía láu eyéeraguni, náguugüdüba gádürü weíyaasu sügú láu lun.

⁹ Laríñaga Jesúsu lun.

—Sálbañu jáña tílana múna to ugúñe, ladúgawagun giñe Abrahám amúrü. ¹⁰ Ligía niábinbei ubouagu, áu le Wügúri Garaúwarügüti, lun náluajaniña lúma asálbaraña já yebe féridijañaabaña.

Jémpulu luáguti díisi murúsun seínsu

¹¹ Dan le añája lubeí gürígia agáambajei laríñaguni buri Jesúsu cátei le, ába labájúdagun ában jémpulu joun, ladúga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹² Ábati laríñagun joun.

—Ñíñein ában wügúri íñugutiña lidújeñu, leíbugati wügúri ligía lídoun ámu fulásu díseti lun líchugúniwa lurúeiteme lageíra, ábayame lagíribudun. ¹³ Lubáragiñe láfuridun, ába loúnajan jawágu díisi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le darí nagíribudun.” ¹⁴ Queíti liyéreegunbei wügúri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageírroun. Dan le lachúlürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun.

“Nabúreme, gáñeitina seíngü weíyaasu ligíbuagun biseínsun.” ¹⁹ Ába gíñe laríñagun lun. “Bagúmadija lídan seíngü fulásu.” ²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladúga nanúfude bueí, ²¹ ladúga ában ban wügúri derégüdati, reideitibu láu cátei le mawádigi-maritibu luágu, alúbaja amúrú le ní lumuti mábunagun ban.” ²² Ábati laríñagun urúei lun. “Músú wuríbati, luágu guánarügü berérun nagúseragüdábu. Quei subúdi bubálin luágu ában nan wügúri derégüdati, luágu reidei nan láu cátei le mawádigimaritina luágu, alúbaja áu le ní lumuti mábunagun nan, ²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴ Ába laríñagun joun ja ñíbaña. “Gidájumei seínsu lueí, rújumei lun le díisibeí lúma.” ²⁵ Ába jaríñagun lun. “Wabúreme, níjeinga díisi seínsu lúma.” ²⁶ Ába laríñagun urúei. “Naríñajare jun luágu sun lan le adúgati buíti láu le lúmabei, libíjuba lánwoun, ánjein le madúgünti ni cáta buíti láu murúsun le lúmabei, lagídarúaba murúsun ligía lueí. ²⁷ Játi náganiñu, já yebe mabúseerúnbaña lun urúei nan, barújumaña ñájoun, áfaragua jumáña jilágubei nigíbugiñe.”

Lebélurun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá.

²⁹ Dan le chúlú mémeeli lídoun buri fulásu le Betfajé lúma Betánia, yaráfa lun wúbü le gíribei Olívos, ³⁰ ába laríñagun joun biáma jádaangiñe láni disípulugu.

—Jeíba lídan liraúraü fulásu le wagíbugiñebei, dánme le jachúlürün ñi, jadáriruba ában burígü güráñu le maweinrúngili. Jafáragadeíme, ábame janúgüni ñájoun. ³¹ Ánjaün álügüdúwa ca lan uágu jafáragadei, jaríñagame luágu busén láani Jabúreme.

³² Ába jóúdin, ába jadáriruni ítara quei laríñaguni Jesúsu joun. ³³ Dánti le añája lubeí afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴ Ába jóúnabuniña.

—Ladúga busén láani Wabúreme.

³⁵ Ábati janúgüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun. ³⁶ Quei awáansereina lan Jesúsu, átulejeina jamóun janáangun luágu úma lubá. ³⁷ Dan le jayárafadun lun larárirún wúbü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigin Búngiu, luágu buri miláguru le jaríjibeí. ³⁸ Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguaü siélu, lúma uweírigin lun Búngiu!

³⁹ Ábati jaríñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰ Laríñaga Jesúsu joun.

—Nínárün jáu luágu ánjaña lan ámanichaja ja, lagúarajaba lán buri dúbü nuágu.

⁴¹ Dan le layárafadun lun Jerusalén, dan le laríjini ubúrugu ligía, ába layájuañan jawágu lílana fulásu ligía, laríñaga.

⁴² —¡Lun jamúga gunfaráanda jumáni ugúñe luágu áu lan úmabei lun ñurúguaü jun, buíti jamúga! Má-jatün. ⁴³ Ligía lachúlürüba lubeí wéyu buri wuríbati jun, jadúgame jáganiñu ában baríeru geyégua láu jubúrugute lun siñá lan jáfuridun ñigíñe, ábame jageíndagun júma lídaangiñe sun oúbaü. ⁴⁴ Jagúnrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladúga mebéresen jumá láu óra le liábinbei Búngiu asálbaraün.

Larúmadagüdünnun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélurun Jesúsu témpulurugun, ába laságaruniña ja alúgurajabaña jáma ja agáñijabaña ñi.

⁴⁶ Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barújumaaru quei jában jíwerutiña.

⁴⁷ Ságü buri wéyu larúfudajan Jesúsu témpulurugu, añájeti jábutigu jafádirigun juríu jáma arúfudajatiña lílúrúdnun Moisés, jáma gíñe lábutigu fulásu áluaja ída lúba lan jáfaruni jilágubei, ⁴⁸ madáritiña ída lúba lan jadúgüni ladúga weíri lan jóurabajóuniwa sun gürígia lun jagáambuni lerérun.

Lirícha Jesúsu témpulurugu

(Mt 21.23-27; Mr 11.27-33)

20 Luágu ában wéyu, dan le témpuluruguñein lubei Jesúsu arúfudaja joun gürígia, apúrichijei ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügúriña weírigutiña lídan jafíñen juríu, ² ába jaríñagun lun.

—Aríñagabei woun ca lan biríchabei lun badúgüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdáadün gíñe ában cátei, oúnaba jumána.

⁴ ¿Ca oúnabajalin Juan abásteragüdjaja? ¿Lóunajan Búngiu ódi jóunajan wügúriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafíñerun wabeí lun. ⁶ Ánjawa aríñaga luágu jóunajan lan wügúriña, jachámuraguba gürígia dúbü wawágun, ladúga chóuru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnabajalin Juan abásteragüdjaja. ⁸ Ábati laríñagun Jesúsu joun.

—Maríñagun nubei gíñe jun ca lan áu ubáfu nadúgei buri cátei le.

Jémpulu jawáguti ñadágimeintiña wuríbatíña

(Mt 21.33-44; Mr 12.1-11)

⁹ Ába lagúmeserun Jesúsu adímureja joun gürígia, ába labájüdagun ában úraga le gíbebei laníchigu, joun. Niján úraga ligía.

—Níñein meja ában wügúri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰ Dan le lachúlürün lidáani alúbajani, ába loúnajan ában lumúsun anúgei lufánran, ába jabúlei-seiruni ñadágimeintiña músu ligía, ába jóunajani lárigoún, míchugunga ni cáta lun. ¹¹ Ábayati loúnajan ábanya músu, ába gíñe janábuni, buleísei jameí, ónaja jameí, míchugunga ni cáta lun. ¹² Ábaya loúnajan ábanya, ábaya gíñe jabúleiseiruni, ába jabúguni nígiñe.

¹³ Ába laríñagun labúreme ichári lúnguarügü.

“¿Cábasán funa nadúga? Noúnajaali niraú le jínsiñebei nun, dánme le jaríjini, fágua inébebei joun.” Ába loúnajani. ¹⁴ Dan le jaríjinbalin, ába jaríñagun jámagua.

“Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdjagan Jesúsu, laríñaga.

—¿Cábatí ladúga labúreme ichári? ¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷ Ába laríaguniña Jesúsu, ába laríñagun joun.

—¿Cáti lílabei le bürúñubei tídan Lerérun Búngiu le ní lubei laríñaga.

Lé meja dúbü le mabúseerun jabeí ábunagutiña, ligíaali furúmiñeti?

¹⁸ Furúmieguarügü le achúgeraguti luágu dúbü ligía lagúnrinchaguba, léti uágunti láburuja, labúrechagúbei. Áu dúbü ligía.

Luáguti liseínsuna gumádi

(Mt 21.45-46, 22.15-22; Mr 12.12-17)

¹⁹ Lídan meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járügüdüni Jesúsu, ladúga jasúbudiruni luágu jawáguti lan jémpulu le laríñagubei, madúgün jamúti ladúga janúfude jaweí gürígia. Ábati jagúrabajan ámu dan.

²⁰ Ábati jóunajan gürígia ja ásügürütiña jóungua camá jamuga jarúmatiña lun jaríaajani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati. ²¹ Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei luma gíñe le barúfudajabei, manúfudetibu gíñe lueí ni ában, ladúga ni cáta lan luweírigin gürígia bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijóun seínsu lun warúeite César ódi mabuídunti? ²³ Ába lasúbudiruni Jesúsu luríban jarítangun, ába laríñagun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa luma íri le bürúñubei luágu?

Jaríñaga lun.

—Láni César.

²⁵ Ábati laríñagun joun.

—Le lani César rújumei lun César, le lani Búngiu rújumei lun Búngiu.

²⁶ Siñá jamúti áburugüda tídoun jasádarán láu lé buri laríñagubei jagíbugiñe gürígia, weírirügüti janígi láu loúnabagüle joun. Ába jámanichun.

Álügüdjani lübúgürü ásaaruni lídaangiñe óuweni

(Mt 22.23-33; Mr 12.18-27)

²⁷ Lárigiñe, ába jóudin saduséogu aríjei Jesúsu. Jaríñajare saduséogu luágu másaarunbaña lan jiláaña lídaangiñe óuweni lúnya jabágaridun. Ábati jaríñagun lun Jesúsu.

²⁸ —Maésturu, laríñajare Moisés woun tídan lílburun, luágu ánjein lan óuwe ában wügúri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadúgawagun lámuga líbugaña le óuwebei. ²⁹ Wel, níñanu mejáti sédü wügúriña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabíaman túma buga lúmari íbugañaü, ába gíñe loúnwen marájüñüga. ³¹ Ábati lamárieidun le júrwán túma, chúlú lúmoun le jasédün, jilágua meme jagía, marájüñüga táu. ³² Ába gíñe toúnwen wúri tugúya. ³³ Aríñagabá ában cátei woun. dánmeti le jásaarun lí-

daangiñe oúweni lúnya jabágaridun, ¿cábatu úmari wúri to jádaangiñe, quei maríei tubei jáma sédügubei?

³⁴ Ába laríñagun Jesúsu joun.

—Lídan ubou le, maríeitiña wügúriña jáma wúriña, ³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe oúweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ ladúga mouñwendügüyaaña gürígia siélu, itaraañame quei ánjeligu, lirájüñü jañame Búngiu ja saráaña lídaangiñe oúweni. ³⁷ Moisés guánarügü arúfuda lumúti luágu níjein lan ásaaruni lídaangiñe oúweni lídan le labúrújanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubun, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanúgüniña Búngiu sun gürígia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügdagun jamáali lan.

¿Ladúgawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñásan jaríñagunbei luágu ladúgawagun lan David Crístu? ⁴² Laríñajare David guánarügü tídan líburu to gíríoun Sálmos.

Aríñagati Búngiu lun Nabúreme. “Ñurúba lueígiñe nouwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladúgawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu gürígia agáambajei Jesúsu, ába jagáambun laríñagun joun láni disípulugu.

⁴⁶ —Toúnigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesi úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eíginí.

⁴⁷ Gidá jamutu gíñe jában wúriña ja jiláaña úmari jaweí, lúnti jadáuragun láu, ába jadúgün furíeigi migínguti. Weíríbei jasúfurirun luágu sun le jadúgübei.

Seínsu le tíchugubei ában fugiábu wúri témpulurugu

(Mr 12.41-44)

21 Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² aríja lumúti gíñe tíchugun ában wúri jiláali túmari, gudéme-tu, bián gáwanün tídoun gáfu. ³ Ába laríñagun Jesúsu.

—Nínárün jáu luágu gíbetima lan tíchugun fugiábu wúri to sùgú jáu sùngubei, ladúga sun jagía, lí-

daangiñe le ígiragubei jáma jíchiga, ⁴ ánjoun tugúya, láu tugúdemegun tíchigei sun le túmabei lún yebe tawínwandun.

Laríñagun Jesúsu luágu tagúnrinchawagúba lan témpulu

(Mt 24.1-2; Mr 13.1-2)

⁵ Jadímurejaña fiú gürígia tuágu témpulu, luágu tubuídunmeraü láu lubuídun buri tidúbüri lúma buri cátei le jíchugubei gürígia lun tawéndedun. Ábati laríñagun Jesúsu.

⁶ —Lachúlürüba wéyu lun lagúnrinchawagún sun le jaríagubei tuágu témpulu to guetó, merédebei ni ában dúbü ligíbuagu dúbü.

Seíni buri lubá lagúmuchun ubou

(Mt 24.3-28; Mr 13.3-23)

⁷ Ábati jálügüdüni, jaríñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Níjan dan ligía.” Mafíñera jumá joun, mafálara jumáña. ⁹ Dánme le jagáambun ladímurejóun luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubou líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹ Níbei óunwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfnati siélu lúma óunwenbun buri seíni.

¹² Lubáragiñe lasúseredun sun le, jarújóuba, eíbaajoúa jugúyame. Janügúba agúsera tídan jalígilisin juríu, jádarawagúba furísunrugun, barúwa jugúyame jagíbugiñoún urúeigu jáma gumádimatiña, nueígiñe, lun jagúseragüdünn, ¹³ ligíame jidáani lun jadímurejan luágu nufúleisein. ¹⁴ Aráanse jumeí jarítangun lun madíjeri jumá cába lan jaríñaga jueígiñegua, ¹⁵ níchuguba dimúrei lúma lichú áu jun le lásiñerun ni ában jádaangiñe jáganiñu asígenera ni óunaba. ¹⁶ Jalúgurubadün jagúbürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéereeguduba joun sun gürígia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meme derégüdagua lídan jafíñen nuágu, jibíjibeí ibágarí magúmuchaditi.

²⁰ Dánme jaríjin geyégu jamá lan súdeara ubúruagu Jerusalén, subúdi jumeí luágu yaráfaali lan lagúnrinchagun ubúruagu ligía. ²¹ Jámeti gürígia ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun ñígiñe, ja áraabubaña, magíríbuda jamá ubúrugun. ²² Luwéyuri buríbei jafáyeirun gürígia luágu wuríbati le jadúgübei, dánme le lagúnfulirún sun le bürúwañubei tídan Lerérun

Búngiu. ²³ Fugiábugume würiña ja dageínatiña lídan dan ligía, o ja lan garájüñütiña ja gurágiña! Ladúga ñíbei sarágu igárigu ubouágu, larúfudubei Búngiu luweírín ligáñi luágu jafígoun gürígia ja juríu. ²⁴ Ñibaña ouwegutiña wuríburugu, jíbiri janáawaguba adáurawagua lídoun ámu ageíraü, ábame jagúnrinchaguni ja mámabaña juríu ubúrugú Jerusalén daríme lagúmochun dan le íchugúbei joun lun jadúgüni.

Ligáburí ída lúba lan liábin Crístu

(Mt 24.29-35, 42-44; Mr 13.24-37)

²⁵ Lasáiragubáti buri seíni luágu wéyu, luágu játi lúma jawágu warúguma, ábame laweírídun janígi néchaanigu ubouágu, ábame janúfudedagun luágu lanárima lajúujan lúma labouñjan lugúdi barána.

²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladúga jarügüdüba lan warúguma ámu úma. ²⁷ Ábame laríjín níábin, áu le Wügúri Garaúwarügüti, lídan juánriñu láu sun nubáfu lúma ouñwenbun nuweírígoun. ²⁸ Dánme le lagúmeserún buri cátei le asúsereda, ragújuma dügüdaguaü, iñúra jumeíme jichügü, ladúga madíseeleme jasálbarun.

²⁹ Rúlumuti gíñe jémpulu le joun.

—Aríja jumoún tídi bu ígo, o furúmieguaügü tídi bu wéwe. ³⁰ Dan le jaríjin labouchun tubána, subúdi jumúti luágu yaráfaali lan lidáani lubáchouga. ³¹ Dánme gíñe le jaríjini lasúseredun buri cátei le, subúdi jumeí luágu madíseele lan lidáani Búngiu lun larúeijan.

³² Ninárün jáu luágu lagúnrinchawagúba lan sun ubúrugú le Jerusalén lubáragiñe jóuwegun gürígia ja lánina dan le. ³³ Lagúmochaguba síelu lúma ubou, ánjein nerérun, ladúraruba lun sun dan.

³⁴ Toúnigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina íbágarí le, márügüdüba lámugaün wéyu nagíribudagüle ubouágun lídan magáradajan jumá, ³⁵ quei ában sádara to adárrurutu. Ladúga ítara lúba liábin wéyu ligía jawágun sun ja aganoúbaña lídan sun fulásu ya ubouágu.

³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun gíñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árie bu, ábaja lídin erédera luágu wúbü le Olívos.

³⁸ Ábaja chúlúgiñe jamá gürígia témpulurugun ságü bináafin lun jagáambuni.

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

22 Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejiptona, máfaragun lumútiña jígirama Israelítagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu

jilágubei, íbídiñounga joun gürígia, ladúga janúfude jaweí.

³ Ábati lagáñeiruni Máfia larítagun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adúga darádu jáma jábutigu jafádiríñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jaríñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá gürígia.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachúlürün fédu le ídaanbei teigúa fein magánatu ísi, ñí lubei gíñe ladágarawagüdüwa mudún le lánina fédu. ⁸ Ába laríñagun Jesúsu lun Pédro lúma Juan.

—Jeíba aráanserei eíginí le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Laríñaga joun.

—Dánme le jebélurun ubúrugun, jadúnraguba lúma ában wügúri táu ában dináa láu dúna, jafálareime chúlú tídoun múna to ñíjin lumúti lebélera.

¹¹ Jaríñagame lun tabúreme múna. “Laríñajare Maéstru. ¿Jigóun rúmu to ñí lubei gayára lan neígini eíginí le lánina fédu jáu náni disípulugu?” ¹² Ábame larúfudun ában rúmu weírítu jun toúgiñegua múna, aráanseñu tíña, jaráansereime eíginí ñi.

¹³ Ába jóúdin, ába jadáriruni sun cátei quei laríñaguni Jesúsu joun, ába jaráanseruni eíginí lánina fédu ñi.

¹⁴ Dan le lachúlürünbei óra, ába lañúurun Jesúsu jáu láni disípulugu luágu dábu, ¹⁵ ábati laríñagun joun.

—¡Oúnwenbun nabúseerun neígini eíginí lánina fédu le júma lubáragiñe noúnwen! ¹⁶ Ladúga naríñajare jun luágu meígindügüya náali lan eíginí lánina fédu le daríme lagúnfulirún laníchigu lídan larúeijan Búngiu.

¹⁷ Ábati lanúgün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumeí jídaangua,

¹⁸ naríñajare jun luágu mákundügüyaadina lan diweín daríme liábin larúeijan Búngiu.

¹⁹ Lárigiñe, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumeí le, jarítaguagüleme nuágu.

²⁰ Ítara meme gíñe, lárigiñe jeígin, ába lanúgüni wéru táu diweín, ába laríñagun.

—Niján níta le lúnbei láwiurun lídaangiñe núgubu juágu, lun lañúurun iséri darádu.

²¹ Niján wügúri le lúnbei ledéregerunina wáma ya luágu dábu, ²² luáguñadina úma le lúnbei nanúgüni, áu le Wügúri Garaúwarügüti, áni ¡fugiábutia wügúri le lúnbei lalúgurunina!

²³ Ábati jagúmeserun álügüdagua jádaangua cába lánfuna alúgurei.

Ladímurejóun luágu cába lan weírigutima

²⁴ Ába jasígenejan lánigu luágu cába lan jádaangiñe weírigutimá. ²⁵ Ába laríñagun Jesúsu joun.

—Lídan arúejani lánina uboú le, agúmadijatiña já buri lurúeítana fulásu, camá jamuga labúreme jagía, já buri lábutigu fulásu, aríñawagúati jawágu luágu wügúriña jamá ja gadúgatiña fuleisei joun güriña.

²⁶ Ánjein lídan narúejan, mítaraanti, lubáragiñe líra, le weírigutimaabei le tímatimaati jídan lúnti lanáangun lúngua quei le únabutimaabei, le agúmadijabei, lúnti ítara lan quei le esériwijabei. ²⁷ ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸ ¡Jugúya úarabañája núma lídan nouchwagun, ²⁹ ligía níchugunbadün lun jarúejan quei líchugunina Núguchi lun narúejan. ³⁰ Jeígiba, gurá jugúyame luágu nidábulan yágüta síelu lídan narúejan, ñurú jugúyame luágu buri lála urúei lun jagúseragüdüniña jadúgawagun dúusu lirájüñü Israél.

Laríñaguni Jesúsu luágu leyéedaguba lan Pédro láu

(Mt 26.31-35; Mr 14.27-31; Jn 13.36-38)

³¹ Aríñagati gíñe Wabúreme Jesúsu.

—Simón, Simón, amúriajaali Máfia úma lúma Búngiu lun gayáraabei lan loúchagunün quei lawánijóun túriku, ³² íbija lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dúgüdaguau joun bíbirigu.

³³ Laríñaga Simón lun.

—Nabúreme, aráansetina lun nídin búma furísunrugun, o lun lan nouñwen búma.

³⁴ Laríñaga Jesúsu lun.

—Pédro, ugúñe méme, beyéedaguba náu úrüwa weíyaasu lubáragiñe layúgurujan gáyu, baríñaguba luágu íbídiñe nan bun.

Layárafadun lórate ouchwaguni

³⁵ Ábati laríñagun Jesúsu joun.

—Dan le nouñajanbalün maságüteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶ Ábati laríñagun joun.

—Ánjeinti guetó, le gaságüteti, barúloun, barú ligíame lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le.

³⁷ Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatiña.” Sun le bürúwañubei nuágu lagúnfuliruña guetó.

³⁸ Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemani

(Mt 26.36-46; Mr 14.32-42)

³⁹ Ábati láfuridun Jesúsu, ába lídin luágun wúbü le Olívos quei ligáburiñaja, ába jóudin láni disípulugu lúma. ⁴⁰ Dan le jachúlürün lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹ Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴² laríñaga.

—Núguchi, ánjabu busén, séfu bána lueí ouñwenbun asúfuriruni le lúnbei nasúfurirun, madügúwalá le nabúseerubei, le la babúseerubei adügúwa.

⁴³ Ábati liábin ában ánjeli siélugiñe lun líchugun érei lun. ⁴⁴ Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga ouñwenbun lédedejan jítaü, múarugun.

⁴⁵ Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni. ⁴⁶ Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janúgüni Jesúsu adáüra

(Mt 26.47-56; Mr 14.43-50; Jn 18.2-11)

⁴⁷ Nígili Jesúsu adímureja, ligía jayábin sarágu güriña, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúruni.

⁴⁸ Ábati laríñagun Jesúsu lun.

—Júdas, ¿láu ában chúuti balúgurana, áu le Wügúri Garaúwarügüti?

⁴⁹ Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le louñwenren. ⁵¹ Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. ⁵² Ába laríñagun joun jábutigu fádirigu, joun wügúriña weírigutiña lídan jafíñen juríu, lúma joun jábutigu tisúdaarana témpulu, ja ñúbinbaña anúgei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadúgüni jugúndan náu, óraali lun lagúmadijan le labúremebei lubúriga.

Laríñagun Pédro luágu íbídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati jarügüdüni Jesúsu, ába janúgüni lúbiñoun fádiri le íñutimaabei, ábati lafálaruni Pédro dísegiñe.

⁵⁵ Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan.

⁵⁶ Queíti taríjini ában músu ñun larúgürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

⁵⁷ Ába leyéedagun Pédro, laríñaga.

—Ibídiñeti wügúri ligía nun.

⁵⁸ Murúsun lueígiñe, ábaya laríjini ában, ába laríñagun.

—Jánigu gíñe amúrü.

Ába laríñagun Pédro.

—Máma jánigu áu.

⁵⁹ Queí buri ában óra lárigiñe, ábaya laríñagun ában.

—Inárüni luágu lúmañajañein lan wügúri le ladúga Galiléana gíñe.

⁶⁰ Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu. ⁶¹ Ába ladígiragun Wabúreme Jesúsu aríja luágun Pédro, ába laritagun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu úruwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügúriña ja ónigirubalin Jesúsu, ába jéjerajan láu, bei jameí. ⁶⁴ Ába jagúraguni lágu, ába jagáyuajan ligíbuagun, aríñageina jagía.

—¡Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóundaragun wügúriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janúgüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabeí woun, ¿amúrúsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, mafíñebadün nun, ⁶⁸ ánjaün nálügüdagua, moúnabun jubádina, mígiragüdün jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügúri Garaúwarügüti, lueígiñe loúnwenren Búngiu le Súnti Gabáfuti.

⁷⁰ Ábati jálügüdüni súngebui.

—¿Amúrü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

23 Ábati jásaarun sun líñun-ágei lúrudu, ába janúgüni Jesúsu ligíbugiñoún Piláto, ² ába jagúmeserun íchiga lidúnrun, jaríñaga.

—Darí wamaali wügúri le achágaraguágüdaña gürígia, laríñajare luágu moun lan lun wafáyeijan seínsu lun urúei Rómata, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábati laríñagun Piláto lun.

—¿Amúrúsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügúri le.

⁵ Ábatima jaríñagun jére.

—Lachágaraguágüdüñanu sun gürígia Judéana láu ligáburi larúfudajan, lagúmesera Galiléagiñe, niján mémegua adúgei chúlú ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubei wügúri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladúga ñíñein Heródes Jerusalén lídan dan ligía. ⁸ Ába lagúndaaragun Heródes dan le laríjini Jesúsu, ladúga agáambañajaali lan luágu áni lúja labúseerun laríjini, agúrabatiti laríjin ladúgün ában miláguru. ⁹ Ába lálügüdaguni luágu sarágu cátei, moúnabunti Jesúsu ni cáta. ¹⁰ Níñanu jábutigu fádirigu jáma arúfudajatiña lilúrudun Moisés, magúmüti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáuraguagüdüni táu anáanguni wéndegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu gürígia, ¹⁴ ába laríñagun joun.

—Jugúya anúgübalin wügúri le nun, jaríñaga luágu chagáguagüda lániña gürígia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu.

¹⁵ Madáriti gíñe Heródes lidúnrun, giríbugüdalá woun. Aríja jumáali luágu madúgün lan ni cáta le lúnti lafarún jilágubei lueígiñe, ¹⁶ nabeíchagüdalí lubeíti, lárígíñeme, ábame nígiragüdüni.

¹⁷ Gagáburititi Piláto lúnja lígiragüdüni ában adaürúti fédurugu, ¹⁸ ába jagúarajan súngebui lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürúña lueígiñe ligía lan ában já-daangiñe ja iñúragubaña jóungua luágu gumádi, lúma lueígiñe láfarajan. ²⁰ Busénti yebe Piláto lígiragüdüni Jesúsu, ábaya ladímurejan joun, ²¹ ligiatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába laríñagun Piláto joun luágu lúruwan weíyaasu.

—¿Cáti wuríbati ladúgübeí? Madáritina ni cáta le lúnti lafarún jilágubeí lueígiñe. Nabeíchagüdali, ábame ní-giragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádírigo, ába jabíjini le jabúseerubeí. ²⁴ Ábagubeítí ladúgüni Piláto le jabúseerubeí, ²⁵ ábati lígiragüdüni wügúri le jabúseerubeí, le adaürúbeí lueígiñe iñúragu-ni lúma áfarajani, ábati ledéregeruni Jesúsu joun lun jadúgüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóúdiña lan láu Jesúsu lun ládarawagún luágu gurúwa, ába járügüdün ában wügúri Cirénena gíríti Simón, liábiña áraabugíñe, ába janúgagüdüni gurúwa lun, ába lídin láu lárígi lárígi Jesúsu.

²⁷ Sarágu jáña gürígia afálaruti jáma sarágu würíña jádan ayájuajeina, agúarajeina láu íruni luágu. ²⁸ Ába ladígiragun Jesúsu jawágun, ába laríñagun joun.

—Würíña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladúga liábinba buri wéyu dánme le laríñawagún. “Fuleíseiwatiña ja siñábeí jagáraüdn jáma gíñe ja marájüñüjañábaña, jáma ja mátagúdajanbaña.” ³⁰ Ábameti jaríñagun gürígia lun wúbü íñuti. “Áburujabá wawágun”, aríñaga jagíame lun wúbü únabuti. “Darúguabá wáu.” ³¹ Ladúga ánjein adúgajabalin sun le láu tídibu wéwe le dúdügili, ¿cábagi madúgün jamá láu le mábeijali? (Ítara líña ladímurejan luoúgua, le madúnrunbei, lúma jawágu ja gadúnrunbaña.)

³² Barútiña gíñe biáma gadúnruntiña lun jafarún úara lúma Jesúsu. ³³ Dan le jachúlürünbei lídoun fulásu le gíríbeí Lufúlasun Lábu Ichúgü, ába jádaraguni Jesúsu luágu gurúwa jáma gíñe biáma wuríbatiña jagía, ában lueígiñe loúnwenren, ában lueígiñe lubáúna.

³⁴ Dánti le añája lan ádaragueí Jesúsu luágu gurúwa, ába laríñagun.

—Núguchi, ferúduna báña ladúga ibídiñeti joun ca lan jadúgübeí.

Ába jájurerun súaara ubúnuruni lun jaríjin cába lan un jádaangiñe terédera lanáangun Jesúsu. ³⁵ Níñanu gürígia aríagua, níñanu gíñe lúrudugu jéjerajaña láu, jaríñaga.

—Sálbati ámu, sálbagualá gíñeti lúngua, ánjein in-árüni lubeí luágu ligía lan Crístubeí le lanúadirubeí Búngiu lun lasálbaruniña gürígia.

³⁶ Éjerajatiña gíñe súaara láu, láu jayárafadun íchiga tagúbüri diweín lun lun látunun, ³⁷ jaríñaga buri lun.

—Ánjein Jarúeite bubeí juríu, sálbaguabá búngua.

³⁸ Níñeinti ában abúrújóuni loúgiñe lichúgü, laríñaga-jare ñi. “Niján Jarúeite Juríu.”

³⁹ Ába lanábuni ában jádaangiñe wuríbatiña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubeí, sálbaguabá búngua, sálba bawame.

⁴⁰ Ába ladeínjan le ában lun loúba, laríñaga lun.

—¿Manúfudetibusan lueí Búngiu, bugúya le lábugiñebei ában meme súfuri lúma? ⁴¹ Wagía, garíchatíwa lun wasúfurirun ladúga wafáyeijaña luágu wadúga, ánjeinti wügúri le, madúgünti ni cáta wuríbati.

⁴² Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³ Laríñaga Jesúsu lun.

—Nínárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaúnrün úruwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le laríjinbalin jábuti súaara Rómána le asúseredubeí, ába ladímurejan weírigo luágu Búngiu, laríñaga.

—Inárüni, madúnrunti buga wügúri le.

⁴⁸ Sun gürígia ja ñíbaña, ja aríjubalin le asúseredubeí, ába jóúdin ñígiñe, áfarajeina jameí janíguagu, le jagárigu. ⁴⁹ Ánjaña sun lumádagu Jesúsu jáma gíñe würíña ja ñúbinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Níñein ában wügúri gíríti José, lídaangiñeti fulásu le gíríbeí Arimatéa, le jafúlasun juríu. Buítí ligáburi wügúri ligía, richáguati ligíbugiñe Búngiu, lídaañein líñun-ágei lúrudu le jáni juríu. ⁵¹ Agúrabañu líñein larúeijan Búngiu, magúndaanti lubeítí láu cátei le ladúgübeí líñun-ágei lúrudu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma.

⁵³ Lárígiñe laráriragüdüni lueígiñe gurúwa, ába loúburaguni táu ában gamísa, ába lácharuni lídoun ában umúajaü achigítí luágu ában dúbú le ñí lubeí úagili lan ni ában abunúti. ⁵⁴ Wáandaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵ Ába jafálaruni würíña já meja ñúbinbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü. ⁵⁶ Dan le jagíríbudunbei jábiñoun, ába jaráanseruni ibíñei buri le íchugúbeí jawágu jiláaña,

ábati jeméraagun lídan wéyu le eméraaguagülei quei laríñaguni lilúrudun Moisés.

Lásaarun Jesúsu lídaangiñe óuweni

(Mt 28.1-10; Mr 16.1-8; Jn 20.1-10)

24 Wéyu dimáasu, ába jagíribudun würiña luágun umúajaü, bináafingua, barúina jamei ibíñei le jaráanserubei jámagua. ² Dan le jachúlürünbei, má-maali lídan lubára dúbü le lidaü umúajaü. ³ Ába jebélurun lídoun umúajaü ligía, madári jamúti lúgubu Wabúreme Jesúsu ñi. ⁴ Súnti añája lan ñi arítagua jagef lánfunu, ligía jaríjin bián wügúriña rára jarúgabu táu anáanguni mirítu. ⁵ Queíti jélemuchun láu jagíbu únabun, buin láu anúfudei, ába jaríñagun wügúriña jagía joun.

—¿Ca uágu jáluajei le wínwanbei jádan jiláaña? ⁶ Úati ya, saráali lídaangiñe óuweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügúri Garaúwarügüti, ⁷ luágu ledéregerejaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe óuweni luágu lürüwan wéyu.

⁸ Ábati jarítagun luágu dimúrei le laríñagubei Jesúsu. ⁹ Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anügübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würiña. ¹¹ Dan le jaríñagunbalin buri cátei le joun apóstolugu, ába janügüni quei lílülün áu, mafíñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügüñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

Luágu úma lun Emaúsun

(Mr 16.12-13)

¹³ Luágu méme wéyu ligía, jóüdiña biáma jádaangiñe lánigu Jesúsu lídoun ában liraúraü fulásu gíriti Emaús, úrüwa óra eíbuguni Jerusaléngiñe, ¹⁴ adímurejeina jáña luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugeina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun güriña subúdi jamúti le asúseredubei Jerusalén lídoun buri wéyu le. ¿Amúrü rügüñein jádaangiñe ja ñíbaña ibídiñejabu lun?

¹⁹ Ábati laríñagun joun.

—¿Cági asúseredubei? Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladúgübei lúma luágu lerérun ligíbugiñe Búngiu lúma jagíbugiñe sun güriña. ²⁰ Ábati jedéregerejuni jábutigu wafádiríñegu jáma walúrudungu lun siádiwa lan lun óuweni lúma lun ládarawagún luágu gurúwa. ²¹ Rúwamutí yebe wafíñen luágu ligíaba lan eséfurei linásiñun Israél. Úrüwa wéyu guetó lueígiñe lasúseredun cátei le. ²² Láu sun líra, weírigüda jamáali jádaangiñe würiña ja wámabaña wanígi láu jóúdin luágun umúajaü lubá buga larúgan, ²³ queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu. ²⁴ Ába jóúdin jádaangiñe wíbirigu aríjei umúajaü, ába jadáriruni ítara quei jaríñaguni würiña jagía, maríjin jamúti Jesúsu.

²⁵ Ábati laríñagun Jesúsu joun.

—¿Loúguati gíñe gunfaráanda jumá, lúti gíñe lubá jafíñerun luágu lé meja jaríñagubei profétagu? ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

²⁷ Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmagiñe buri lílburun Moisés túmoun sun jalíburun profétagu.

²⁸ Dan le jachúlürün lídoun fulásu le ñíjinbaña lubei, ába ladúgün Jesúsu camá jamuga lasígiraali leíbugun. ²⁹ Ába jeredun luágu lun leréderun jáma, jaríñaga lun.

—Reideibá wáma, ladúga ladáruduña áni güñemémeeli.

Ábati lebélerun Jesúsu lun leréderun jáma. ³⁰ Dánti le ñurújali jáma luágu dábula, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubei woun luágu úma, aríñagalei tíla Lerérun Búngiu woun?

³³ Ábati magúrabajaanjaña lan, ába járügüdün úma lun jagíribudun ubúrugun Jerusalén le ñí lubei jadáriraña únsu apóstolugu oúndaragu jáma gíñe jíbiri lánigu. ³⁴ Ába jaríñagun ja oúndaraguñubaña ñi joun.

—Inárüni luágu saráali lan Wabúreme Jesúsu lídaangiñe óuweni lúnya labágaridun, aríja láali Simón.

³⁵ Ábati jabájüdaguni bián wügúriña jagía le asúseredubei joun luágu úma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt 28.16-20; Mr 16.14-18; Jn 20.19-23)

³⁶ Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítangun luágu pántu lan jaríjubei. ³⁸ Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan afíñeni le tídan janígi? ³⁹ Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan laríñaguni líra, ába larúfuduni lújabu lúma lugúdi joun. ⁴¹ Queíti mafíñen mémegiña lan ladúga ugúndani lúma luweírín anígi le jawágubei, ába laríñagun Jesúsu joun.

—¿Níjeinsan eíginí júma ya?

⁴² Ába jíchugun murúsun úduraü súti lun lúma síru-udu, ⁴³ ába lanúgüni, ába leígini jagíbugiñe sun jagía. ⁴⁴ Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürúwañubei nuágu tídan lilíburun Moisés, tídan jalíburun profétagu, lúma tídan líburu to gírí-boun Sálmos.

⁴⁵ Ábati gunfaráandagüda lánun Lerérún Búngiu joun, ⁴⁶ ába laríñagun joun.

—Bürúwañu líña luágu lúnti lan loúnwen Crístu, ába lánme lásaarun lídaangiñe oúweni lúnya labágaridun

luágu lúrúwan wéyu, ⁴⁷ lúnti lan gíñe lapúrichijóun lí-dan líri joun sun gürígia uboúagu lun jasáansiruni jóuserun lun ferúdnawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Noúnajabei Sífiri Sándu, le uágubei laríñaga Núguchi Búngiu jun, ítara líña lubeíti, reídei jumá ya ubúrugú Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun

(Mr 16.19-20)

⁵⁰ Ábati lanúgüniña Jesúsu bougudin lueí ubúrugú chülú Betánia, ába liñúrúni lújabu, ába In ferúdnawa laabíniruniña. ⁵¹ Dánti labíniruniña, ába lamúdeirun jaweí, ába lanúgúniwa siélun. ⁵² Lárigiñe jájuduragun lun, ába jagíríbudun járigóun ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchi-ga uweíríguni lun Búngiu.

SAN JUAN

Liábígüle Búngiu Irájü ubouágun queísi Wügúri Garaúwarügüti

1 Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía. ² Lídan lubeíti lagúmeserunbei sun cátei, lúmañein Búngiu Úguchili Búngiu Irájü. ³ Lídaangiñe ladúgei Búngiu sun cátei, úati ni cáta adügúti le máma ladúga. ⁴ Ligía íchugubei íbágarí lun sun cátei, áni ligía arúgoun-gadagüdübei jáu güri-gía. ⁵ Rúti larúgounga queísi lám-pu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügúri loúnajan Búngiu, gíriti Juan, le ñúbinbei lun líchugun fe luágu Búngiu Irájü le lúnbei liábin ubouágun lun larúgoungadágüdü jáu güri-gía. ⁷ Juan, lúnti líchugun fe luágu, lun gayáraabei lan jafíñerun sun güri-gía luágu cátei le lúnbei laríñaguni dánme le liábin. ⁸ Máma Juan le lúnbei larúgoungadágüdü jáu güri-gía, ában wügúri ligía le oúnajoubei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímátimaati lun larúgoungadágüdü jáu sun güri-gía, lachúlürüña meja ubouágun lídan dan ligía.

¹⁰ Níúbinti ubouágun, áni láu sun lídaangiñe lan ladúgei Búngiu ubou, manúgün jamúti lirájüñü ubou quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafíñerun luágu, ába líchugun ubáfu joun lun lirájüñübaña lan Búngiu. ¹³ Mítaraantiñatia quei jasánigu agúbürigu ja güri-gíabaña, ja agúriajóutiña quei furúmíerügü güri-gía o láu lan lugúndan ában wügúri, lirájüñü Búngiu jagía.

¹⁴ Ligíratí meja le Dimúreibe, le méme Búngiu Irájübei, ñúbinti lun ítara lúba lan quei furúmíerügü güri-gía, ába laganouniwa wádan. Aríja wamúti luweírígun, uweíríguni le ladúnabei Liraú Búngiu le ában-rügüti, le buínbei láu areíni lúma inárüni. ¹⁵ Adímurejati Juan luágu, ába laríñagan.

—Niján léñaja uágubei nadímureja jun dan le naríñaganbei luágu le lan ubábei naráanseja úma, weírígutíma lan sügú náu, ladúga níjeinjali lán meja lubáragiñebei nagúriajóun.

¹⁶ Sun wagía íbijaadiwa sarágu abíniruni lídaangiñe luweírín lirísín. ¹⁷ Lúmagiñe Moisés lerésibirúa lílúrudun Búngiu, ánjeinti ínsiñeni lúma inárüni, lídaangiñe Jesucrístu liábin. ¹⁸ Úagili ni ában aríjiti

Búngiu, Liraú le ábanrügübei le yaráfabei tun lanígi, ligía arúfudubalin woun ída líña lan Búngiu.

Ladímurejan Juan le abásteragüdjabei luágu lufúleisein Jesucrístu

(Mt 3.11-12; Mr 1.7-8; Lc 3.15-17)

¹⁹ Ába jóúnajan juríu ja Jerusalénna fádirigu jáma wügúriña jádaangiñe ladúgawagun Leví álügüdei Juan cáteinein lan. ²⁰ Ába laríñagan joun furáangu.

—Máma áu Crístu.

²¹ Ábayati jálügüdüni.

—¿Cátabuti? ¿Proféta Elías amúrü?

Laríñaga joun.

—Uá, máma áu.

Ábaya jaríñagan lun.

—¿Amúrü proféta ligíra le lúnbei liábin?

Ába laríñagan joun.

—Máma gíñe áu.

²² Ábati jaríñagan lun.

—¿Cátabuti? Mósutia wanúgüni bouñabagüle joun ja oúnajabaliwa. ¿Cági gayáraabei baríñagan woun buougua?

²³ Ába loúnabuniña láu méme dimúrei lé meja laríñagubei proféta Isaías.

—Áu ában le agúarajabei lídan fulásu le mageírawati. “Aráanse jumóun janígi lubá liábin Wabúreme queísi ladárarúniwa úma surúti.”

²⁴ Ja ñúdünbaña adímureja lúma Juan, lánigu jadámurin fariséogu, ²⁵ ábati jaríñagan lun.

—Ánjeinti máma bubeí Crístu, ni Elías, ni proféta ligía, ¿cáti uágu babásteragüdjaja?

²⁶ Ába laríñagan joun.

—Áu, láu dúna nabásteragüdjaja, níjein ában íbídiñeti jun jagánagua, ²⁷ liábinba nárigiñe, wügúri ligía, madúnatina ni lun jamúga nafáragaduni tagúruga ligeídin.

²⁸ Sun cátei le, lídan fulásu le gíribei Betábara lasúsereda, luágu oúbaü le nígiñe lubeí láfuara wéyu libíti dúna Jordán, le ní lubei labásteragüdjaja Juan.

Wügúri le loúnajabei Búngiu lun loúnwen luágu jafígoun güri-gía

²⁹ Larúgan, ába laríjin Juan liábin Jesúsu ayárafadeina lun, ába laríñagan joun lánigu.

—Niján le loúnajabei Búngiu lun loúnwen luágu jafígoun güri-gía queísi meja lafarúniwa mudún lídan dan ligíra luágu jafígoun güri-gía. ³⁰ Luáguñaja nadímureja dan le naríñaganbei. “Liábinba ában wügúri nárigiñe

le weíriguti sügú náu, ladúga níjeinjali lán meja lubáragiñe nagúriajoun.”³¹ Ni áu, ibídiñetí meja wügúri ligía nun, abásteragüdajádina láu dúna lun jasúbudiruni Israelítagu.

³² Aríñagati gíñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lúblugú.
³³ Ibídiñetí yebe nun cátei lan wügúri ligía, aríñagarü-gaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lúblugú itaga wügúri, ligía wügúri ligía le abásteragüdajabei láu Sífiri Sándu.”³⁴ Aríja náaliti, geféen áu luágu ligía lan Liraúbei Búngiu.

Furúmiñetiña láni Jesúsu disípulugu

³⁵ Larúgan, níñeinya Juan jáma biáma jádaangiñe lánigu. ³⁶ Dan le laríjinbei Juan lásügürün Jesúsu, ába laríñagun.

—Niján wügúri le lanúadirubei Búngiu lun lagídaruni jafígoun gürígia.

³⁷ Ába jagáambuni biáma lánigu Juan laríñagun ítara, ába jafálaruni Jesúsu. ³⁸ Ábati ladígiragun Jesúsu lárigoún, quei laríjin jafálaruni, ába laríñagun joun.

—¿Ca jabúseerubei núma?

Ába jaríñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigóugu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladúga queíburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában já-daangiñe biáma ja agáambubalin le laríñagubei Juan ába jafálaruni Jesúsu. ⁴¹ Lubáragiñe ámu cátei, ába lídin Andrés álugeti Simón Pédro le líbugaña, ába laríñagun lun.

—Darí wamaali Mesías, le Crístu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanúgüni Andrés Simón le níjin lubei Jesúsu, ába laríaguni Jesúsu Simón ligíbuagun, ába laríñagun lun.

—Simón, amúrü le liraú Jonás, guetó Céfasha bíri, míni lan íri le. Pédro, o dúbü.

Lanúadiruniña Jesúsu Felípe lúma Natanaél lun lánime disípulugu

⁴³ Larúgan, ába larítagnun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴ Felípe ligía, Betsáidana le ní lubei gíñe lagánawa Andrés láu sun Pédro. ⁴⁵ Ábati lídin Felípe áluajei Natanaél, ába laríñagun lun.

—Aríja wamáali wügúri le uágubei labúrüja Moisés tídan líburu to lánina lilúrudun Búngiu, le gíñe uágubei jabúrüja profétagu—Jesúsu le liraú José le Nazarétna.

⁴⁶ Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷ Dan le laríjin Jesúsu layárafadun Natanaél, ába laríñagun.

—Nítén ában ladúgawagun Israel le tímatimaati, úati yéguau lídan.

⁴⁸ Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati laríñagun Natanaél lun.

—Maésturu, amúrü Liraúbei Búngiu, amúrü jarúeite-bei Israelítagu.

⁵⁰ Ába laríñagun Jesúsu lun.

—¿Bafíñerunbei nun ladúgarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati lueí le.

⁵¹ Aríñagati gíñe Jesúsu.

—Nínárün jáu, luágu jaríjubei lan siélu junréñu, añá-jame láni Búngiu ánjeligu aweíña lúma arárija noúgiñe, áu le Wügúri Garaúwarügüti.

Ában maríei lídan fulásu le gíribei Caná, le lídaanbei Galiléa

2 Úrúwa wéyu lárigiñe, níñein ában maríei lídan ában fulásu gíríti Caná, le lídaanbei Galiléa. Níñounti lúguchu Jesúsu, ² amísurajóuati gíñeti Jesúsu jáu sun láni disípulugu lídoun maríei ligía. ³ Ába tagú-muchun diweín, ába taríñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu baríñagei le nun, nóguchu? Machúlügili dan lun nídejan lídan cátei le.

⁵ Ába taríñagun joun ja éjeeragubaña.

—Adúga jumeí sun le laríñagunbei jun.

⁶ Níñoun sísi dináa láutu dúbü tíbe to jayúsuruboun juríu lun jachíbagun jóungua según jagáburi. Ságü ában dináa tugúya, barútu wein o darándi gálun dúna.

⁷ Ába laríñagun Jesúsu joun éjeeragutiña.

—Buíngüda jumoun sun dináa to láu dúna.

Ába jabuínchagüdünun buídu buídu. ⁸ Ábati laríñagun Jesúsu joun.

—Dabú jumati murúsun tídaangiñe, ábame janúgüni lun le aríjubei láu fédu.

Ába jadúgüni ítara. ⁹ Ábati loúchuni le aríjubei láu fédu dúna ligía salígua lun diweínme, ibídiñoun lun jalíagiñeti lan, ja rügúñanu éjeeragubaña asúbudirei, ladúga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ ába laríñagun lun.

—Sun gürígia seríwi jamútu tubuídun-ágei diweín furúmiñe, dánti le guráaña amísurajóutiña gíbe, ligía jéjeeragun diweín to furúmieguarügü, ánjeinti amúrü, ába bareídunun tubuídun-ágei diweín darí guetó baságaroun.

¹¹ Cátei le, le ladúgübei Jesúsu lídan fulásu le gíríbei Caná le lídaanbei Galiléa, ligía furúmiñetíbei miláguru le áubei larúfudei luweírigin, ába jafíñerun láni disípulu luágu.

¹² Lárígiñe cátei le, ába lídin lídoun fulásu le gíríbei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

Labúgaguniña Jesúsu alúgurajatiña témpulurugugiñe

(Mt 21.12-13; Mr 11.15-18; Lc 19.45-46)

¹³ Ábati lídin Jesúsu ubúругu Jerusalén ladúga yarafaali lan jafédun juríu le lánina páscua. ¹⁴ Ñi ladárraña ja alúgurajabaña bágasu, mudún, únjun, jáma buri ja ñúnbaña lídan jabára le ñí lubei jasáansija seínsu joun gürígia. Lídan túbúrürü témpulu ladárraña sun gürígia ja. ¹⁵ Dan le laríjbalin Jesúsu cátei le, ába ladúgün ában labeíjagüle láu gúrudu, ába labúgaguniña sun jagía lídaangiñe túbúrürü témpulu jáu sun jalúgüniña mudún jáma bágasu. Chagélei jaseínsun ja asáansijabaña seínsu, garábagualeí jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manúga jumoún lúban Núguchi lun jalúguraagüleme!

¹⁷ Ábati jarítangun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jaríñagun juríu lun.

—¿Ca miláguru barúfudubei woun lun wasúbudiruni ánjein garícha bubeí lun badúgüni cátei le?

¹⁹ Ába laríñagun Jesúsu joun.

—Güríngua jumoún témpulu to, naráram-agüdáyaboun lídan úrúwa wéyu.

²⁰ Ába jaríñagun juríu lun.

—Bíán-wein-sísi irúmu janúgün adúgoun témpulu to, ¿lun biyáraaboun lan aráramagüda lídan úrúwa wéyu?

²¹ Lúgubu guánarü Jesúsu témpulu to uáguboun ladímureja joun. ²² Ligía dan lubeí le lásaarun lídaangiñe oúweni, ába jarítangun luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsiiti le tídaanbei janígi gürígia lun Jesúsu

²³ Dan le Jerusalén lubeí Jesúsu lídan fédu le lánina páscua, sarágu jáña afíñerutiña luágu dan jaríjbaalin miláguru buri le ladáagubei lun larúfuduni luágu ligía lan Crístubei. ²⁴ Ánjeinti Jesúsu, míchaagunti lúngua jájaburugun ladúga subúdi lániña cátañañanu lan.

²⁵ Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

Jesúsu lúma Nicodémo

3 Ñíñein ában wügúri lánina jadámurin fariséogu, ába jádaangiñe jábutigu juríu, gíríti Nicodémo.

² Ába lídin Nicodémo ayánuja lúma Jesúsu gúñoun, ába laríñagun lun.

—Maésturu, subúdi wamúti luágu Búngiu lan oúnajabalibu arúfudaja woun, ladúga úati ni ában lun gayára lan larúfuduni lubáfu láu miláguru quei badúgüni ánjein úa lubeí Búngiu lúma.

³ Ába laríñagun Jesúsu lun.

—Nínárün báu luágu le lan magúriajóunwayati, siñáti lebelurun lídoun larúeijan Búngiu.

⁴ Ába laríñagun Nicodémo lun.

—¿Ída lubági lagúriajóunwaya ában wügúri weíríyaali? ¿Gayáraati funági lebelurunya turágeirugun lúguchu lúnya tagúriajani?

⁵ Ába laríñagun Jesúsu lun.

—Nínárün báu luágu le lan magúriajóunti lídaangiñe dúna lánina abásteruni, lúma lídaangiñe Sífiri Sándu, siñáti lebelurun lídoun larúeijan Búngiu. ⁶ Le agúria-jóubei jádaangiñe agúbürigu ja gürígiabaña, ítara líña ligáburu queísi jagáburu gürígia, le agúria-jóubei lídaangiñe Sífiri Sándu, ítara líña ligáburu queísi ligáburu Sífiri Sándu. ⁷ Maweíridalá banígi luágu naríñagun bun luágu lúnti lánya jagúriajóuniwa sun gürígia. ⁸ Ítara quei láfurun garábali le ñígiñe lumúti labúseera, agáambabei lamúri, ibídiñeti bun jalíagiñe lan líabin ni jalíñoun lan lídin, ítara jáña gíñe sun ja agúriajóubaña lídaangiñe Sífiri Sándu.

⁹ Ábayati laríñagun Nicodémo lun.

—¿Ída lubásan cátei le?

¹⁰ Ába laríñagun Jesúsu lun.

—Ába oúnwibun maésturu Israélna amúru, ¿ibídiñeti cátei le bun? ¹¹ Nínárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibe, jugúya fariséogu, mafíñetün luágu le waríñagubei jun. ¹² Ánjein mafíñen jubeí nun dan le nadímurejan jun luágu buri cátei le lánina ubou, ¿ída lubági jafíñera luágu le lánina siélu?

¹³ ‘Uágili ni ában amúdeiruti siélun, lárígiñe ába larárirun ñígiñe lun gayára lan geféen lan luágu nueídügüya, áu le Wügúri Garaúwarügüti, le gábanbei siélu. ¹⁴ Ítara queí meja liñúrunun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara líña giñe niñurúaba lan luágu gurúwa ¹⁵ lun sun lan le afíñeruti nuágu, mídin lámuga máfiougati, siélun lámuga lídin abágari-da ában ibágari le magúmchaditi.

Lísiñejabu Búngiu joun gürígia

¹⁶ ‘Weíríti jínsiñe gürígia ja ubouagubaña lun Búngiu darí lun loúnajanina, áu le Liraú le ábanrügüti, lun noúnwen luágu jafígoun, lun sun lan ja afíñerutiña nuágu, mídin jamámuga máfiougati, siélun lámuga jóudin, abágarida ában ibágari le magúmchaditi. ¹⁷ Moúnajan lumútina Búngiu áu le Liraú ubouagun lun níchugun jadúnrun gürígia, loúnajanina lun jasálbarun ja ubouagubaña nuágu.

¹⁸ ‘Le afíñeti nuágu, áu le Liraú Búngiu, barú lumuti Búngiu queísi madúnrun, ánjein le mafíñeti, gadúnrunjali ligíbugiñe Búngiu ladúga mafíñen lan nuágu,

áu le Liraú Búngiu le ábanrügüti. ¹⁹Ja mafíñebaña, gadúnrunjaña ligíbugiñe Búngiu ladúga dán buga le niábinbei ubouágun lun narúgoungagüdün láu, gúndaatimaatiña lílana ubou láu lubúriga sügú láu larúgounga, ladúga cátei lan wuríbati jadáagubei. ²⁰Sun ja adúgübaña cátei wuríbati, iyéreeguti larúgounga joun, ába jadisedun lueí larúgounga ligía, lueí lasúbudirúniwa cátei wuríbati le jadúgübei. ²¹Ja adúgübalin lugúndan Búngiu, jínsiñeti joun lun lídan jamá larúgounga lun larijñiwa luágu jarúma lan le jadúgübei, láu lubáfu Búngiu.

Ladímurejanya Juan luágu Jesúsu

²²Lárigiñe sun cátei le, ába lídin Jesúsu jáu lání dispulugu Judéoun, ába leréderun átiri dan ñi, abásteragüdaja. ²³Ñíñein gíñe Juan abásteragüdaja lídan fulásu le giríbei Enón, yaráfa lun Sálím, ladúga ñíñein lan sarágu dúna, ába buríti jayábingua güriñe, ába jabásterun. ²⁴Lubáragiñe ladaürún Juan lasúsereda sun cátei le.

²⁵Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶Ábati jóúdin aríñaga lun Juan.

—Aríjabásan maésturu, wügúri lé buga búmabei luágu óubaú le ñígiñe lubeí láfurida wéyu libíti dúna Jordán, le ligíra lé meja uágubei badímureja woun, guetó labásteragüdajaña güriñe áni jafálaruñeíti sun güriñe.

²⁷Ába laríñagun Juan joun.

—Siñáti níjein lan ni cáta lúma ni ában güriñe ánjein máma lubeí líchugun Búngiu lun. ²⁸Agáamba jumúti lubeígia naríñagun jun furáangu luágu máma lan áu Crístubei, luágu áu lan ában le óúnajóubei lubá. ²⁹Lídan ában maríei, adári ligía táubei ladári. Léti lumáda adári, le ñíbei agáambe, óúnwenbun lugúndan láu lagáambuni ladímurejan. Ítara níña gíñeti, óúnwenbun nugúndan luágu Jesúsu, ³⁰ligía lúnti laweírigudúntima, áu lun núnabuduntima.

Le ñíbinbei siélugiñe

³¹Jesúsu, le ñíbinbei siélugiñe, jóugiñeñein sun güriñe. Áu, múaruguna áu, áni lérügüñein lánina ubou gunfaráanda nan. Ánjein le ñíbinbei siélugiñe, jóugiñeñein sun güriñe, ³²luágu gíñe le aríja láalíbei lúma le agáamba láalíbei ladímureja, míbetiña afíñerutiña luágu le laríñagubei. ³³Ánjeinti le afíñeruti, lachoururubei luágu inárüni lan le laríñagubei Búngiu, láu lafíñerun. ³⁴Le lóúnajabei Búngiu, lerérun Búngiu ladímurejabei, ladúga mébejati líchuguni Búngiu lání Espiritu lun. ³⁵Jínsiñeti Liraú Búngiu lun, rúlaali gíñe sun cátei lújaburugun. ³⁶Le afíñebei luágu Liraú Búngiu, gabágariti le magúmchaditi, ánjeinti le májabei lafíñerun luágu Liraú Búngiu, mabágaríbei líbe ibágarí ligía áni mebélurunbei siélun, láburujarügüba ligáñi Búngiu luágu.

Jesúsu túma wúri to Samariána

⁴Aba jagáambun fariséogu luágu gíbetima jamá lánigu Jesúsu sügú jáu lánigu Juan, áni gíbetima güriñe ñíbintiña lun, lun jabásterun, ²láu sun máma lan Jesúsu abásteragüdajabaliña, lánigu abásteragüdajabaña. ³Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴Lídan weíyaasu ligía lásügürübatí loúbawagugiñe Samária. ⁵Ítara liñáti lachúlürün lídoun ában fulásu lídan Samária giríti Sícar, yaráfa lun múa lé meja lígirubei Jacób lun José le liraú, le ában jádaangiñe binádu wagúbürigu. ⁶Ñíñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía. ⁷Tiábijati ában wúri Samariána adábura dúna lídaangiñe wélu le, ába laríñagun Jesúsu tun.

—Rúba dúna nun.

⁸Añánguratí buga lání dispulugu agáñija eíginí ubúrugu. ⁹Ábati taríñagun wúri Samariána to lun Jesúsu.

—¿Ída liñáti bamúriajanbei dúna núma, lárigiñe juríu ban, nugúya Samariána?

(Mínsiñeguatiñati juríu jóungua jáma Samariána.)

¹⁰Aba laríñagun Jesúsu tun.

—Lun jamúga subúdi báni edéweejani le líchugubei Búngiu, subúdiabei jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágarí bun, bun.

¹¹Ába taríñagun lun.

—Úgubeíti cába lan áu badábura dúna áni julíiti wélu le, ¿ida lubáti bíchuguni luwúyeri dúna ligía nun? ¹²Jacób, lé meja binádu wadúgawagun, ígirubalin wélu le woun, guráti meja dúna lídaangiñe jáu sun lirájüñü jáma lílúgüniña. ¿Weírigutibu funáti sügú láu Jacób?

¹³Ába laríñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ánjein le átuti lídaangiñe dúna le níchugubei, mamágürabudundügüyaali, ladúga dúna le lúnbei níchuguni lun, géseséenbei lídan lun líchugun ibágarí magúmchaditi lun.

¹⁵Ábati taríñagun lun.

—Rúbei dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶Ába laríñagun Jesúsu tun.

—Beíba óugei búmari le úmabei bamárieida, ábame biábin.

¹⁷Ába taríñagun lun.

—Mámaritina le maríeitina lúma.

Ábati laríñagun Jesúsu tun.

—Binárün láu baríñagun luágu mámari ban le maríeiti búma, ¹⁸ladúga séingüjáña wügüriña úmatiña bagánawa, áni mamárieidutibu lúma wügüri le úmabei bagánawa guetó. Aríñagaadibu inárüni.

¹⁹Dan tagáambubalin wúri to cátei le, ába taríñagun lun.

—Afíñetina luágu proféta ban. ²⁰ Binádu wagúbürigu ja Samariána, judúguatiña meja lun Búngiu ya luágu wúbü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába laríñagun Jesúsu tun.

—Afíñebá nun luágu nítebei lan dan lun jájuduragun lun Búngiu mídinga jugúya luágun wúbü lígita, ni jídin Jerusalén. ²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladúga lídaangiñe warásan wagía juríu liábin asálbaruni. ²³ Lachúlürüba óra, áni niján óra ligía, lun mebésesenwa lan jalía lan jájuduragua gürígia lun Búngiu. Le lúnbei lebéserunwa láu, ída líña lan ligáburí jájuduragun lun. Lúnti jadúgüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le lálua-jabei Búngiu jámagiñe gürígia. ²⁴ Espíritu Búngiu, ja ájuduragubaña lun, lúnti jadúgüni láu sun janárün, mebésesenga láu cátei le arijúati.

²⁵ Ába taríñagun lun.

—Subúditi nun luágu liábinba lan Mesías le gíribei Crístu, dánmeti liábin, lafúnraanguagüdübei sun cátei woun.

²⁶ Ába laríñagun Jesúsu tun.

—Áu Mesías ligía.

²⁷ Ligíati jachúlürün láni disípulugu, ába laweíridun janígi láu jadáriruni Jesúsu adímureja túma ában wúri, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸ Ábati tígirunun wúri tugúya tidína, ába tídin ubúrugú oúgaña gürígia, ába taríñagun joun.

²⁹ —Jigoúgu jaríja ában eyéri aríñaguti sun cátei le adúga náalibe nun. ¿Mámadügü funásan ligía Crístubei?

³⁰ Ábati jóúdingua ubúrugugiñe lun le ñijin lubei Jesúsu. ³¹ Añájati buga disípulugu ayúmuragua lun Jesúsu lun leígin. ³² Laríñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barújaña eígini lun?

³⁴ Ába laríñagun Jesúsu joun.

—Nadúgüni lugúndan le óunajabalina, agúmuchei luwádigimari, ligía neíginbei. ³⁵ Jugúya aríñagatün. “Níjeingua gádürü játi lubá alúbajani.” Ánjein áu, naríñajare jun. Aríja jumeí nádü, dánjali lun lalúbajoún. ³⁶ Le ñadágimeinbei alúbaja, ibíja lumúti lafáyeiruaaja, áni cáteiti le lalúbajabei, gürígia, lun jabíjini ibágari le magúmchaditi siélu, lun lagúndaarun le ábunagubei úara lúma le alúbajabei. ³⁷ Quei le lubei laríñawagún. “Ámu le ábunagubei, ámu le alúbajabei.” ³⁸ Oúnaja náadün alúbaja le ñi lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samaría afíñerutiña luágu Jesúsu láu taríñagun wúri tugúya joun luágu aríñaga láni sun le adúga táalibe tun.

⁴⁰ Dánti le jachúlürünbei Samariána le ñi lubei Jesúsu,

ába jayúmuragun lun lun leréderun jáma. Ába leréderun bián wéyu ñi, ⁴¹ ábaya jafíñerun sarágu gürígia dan le jagáambunbalin le laríñagubei. ⁴² Ábati jaríñagun tun wúri tugúya.

—Mámarügaali luágu le baríñagubei woun wafíñera, ladúga agáamba wamáali gíñe lúmagiñe, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraú ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samariagiñe, ába lasígiruni luweíyasun loúbawagun Galiléa, ⁴⁴ mídinti lageíra quei laríñaguni Jesúsu guánarü luágu madúgüniwa lan gásu láu ában proféta lídan guánarü lageíra. ⁴⁵ Dan lachúlürünbei Galiléa, resíbi jamúti lílana fulásu buídu, ladúga ñúdüni jamá gíñe lídan fédu le lánina páscua Jerusalén áni aríja jamúti sun le ladúgübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñi lubei lasálriraguagüda dúna lun diweínme. Níñeinti ában wügúri weíriguti, ñadágimeinti lúma urúei, níjein ában liraú sánditi lídan fulásu le gíribei Capernaúm. ⁴⁷ Dan lagáambunbei wügúri ligía luágu ñúbinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbiñe lun lareídaguagüdüni liraú, ladúga madíseeli lan lun loúnwen. ⁴⁸ Ába laríñagun Jesúsu lun.

—Jugúya, ánjaün maríjin miláguru, mafíñetün.

⁴⁹ Laríñaga wügúri ligía lun.

—Queímoun furése lubáragiñe loúnwen niraú.

⁵⁰ Ábati laríñagun Jesúsu lun.

—Giríbbubá búbiñoun, areídagua biraú.

Ába lafíñerun wügúri ligía luágu le laríñagubei Jesúsu lun, ába lídin. ⁵¹ Dan layárafadun tun lúban, ába jayábin lumúsuníña lubároun, ába jaríñagun lun.

—Magádieeli biraú.

⁵² Ába lálügüdüniña ca lan óra lagúmesera liraú areídagua, ába jaríñagun lun.

—Gúñaarü ladaúnrün ában rábounwéyu lagídara abíruaü lueí.

⁵³ Ába larítaguni luágu ligía lan óra laríñagun Jesúsu lun luágu areídaguagüdüni lan liraú, ába lafíñerun luágu Jesúsu jáu sun lufámilian.

⁵⁴ Ligía libíaman miláguru le ladúgübei Jesúsu dan le lagíribudunbei Judéagiñe lun Galiléoun.

Lareídaguagüdüni Jesúsu wügúri adádagaraali le Betésdana

5 Lárigiñe cátei le, jadúgüña juríu ában fédu, ába lagíribudun Jesúsu Jerusaléoun luágu fédu ligía. ² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna. ⁴ Ladúga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi

le adáburuti lídoun dúna ligía lárigi lánjingichagun, ába lareídagun furúmieguaügü sándi le luágubei. ⁵ Níñeinti ában wügúri, darándi-widü irúmu láu láu sándi, ⁶ dan laríjinbalin Jesúsu wügúri ligía roun, subúdíleí átiri lan dan láu ítara, ába laríñagun lun.

—¿Buséntibu bareídagun?

⁷ Ába loúnabun le sándibeí.

—Úati cába lan anúgana lídoun dúna dan le lán-jingichagun. Ságü nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárami, beíba.

⁹ Lídan óra ligía, ába lareídagun, ába labúduunun lubárami, ába lagúmeserun eíbuga. Queíti lidáani lubeí eméraguni wéyu ligía, ¹⁰ ába jaríñagun juríu lun le areídagubei.

—Wéyu le eméraguagülei ugúñe, moún lumuti banúgünun bubárami buóguá.

¹¹ Ába laríñagun joun.

—Le areídaguagüdübalina aríñagubei nun.

“Budáboun bubárami, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárami, beíba”?

¹³ Ibídíñetiti lun ca lan areídaguagüdübalin, ladúga gíbetiña gürígia ñi áni ñúdünja bugáti Jesúsu. ¹⁴ Lá-rigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguagüdübalin lubeí, mafígoun-jadügüyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin. ¹⁶ Ligía lébubei jeíbaajani juríu Jesúsu lun jáfaruni jilágubei ladúga buri ladáaguni cátei líbe le lídan wéyu le eméraguagülei. ¹⁷ Ába laríñagun Jesúsu joun.

—Ñadágimeinti Nóguchi chülú lúmoun dan le, áu ñadágimeintina gíñe.

¹⁸ Ligíatimaati jabúseerunbei juríu jáfaruni jilágubei, mámarügü ladúga lálalachaguni lúrudu le lánina wéyu le eméraguagülei, ladúga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraú Búngiu

¹⁹ Ábati laríñagun Jesúsu joun.

—Ninárün jáu, luágu siñá lan nadúgün, áu le Liraú Búngiu, ni cáta láu náni núngua, le rügúñein naríjubei ladúgün Nóguchi, nadúga. Sun le ladúgubei Búngiu Úguchili, adúga numúti gíñe, áu le Búngiu Irájü, ²⁰ ladúga jínsiñetina lun Búngiu, arúfuda lumúti sun le ladúgubei nun, áni larúfuduba cátei weínamutimaati nun, le lúnti laweíridun janígi láu. ²¹ Ítara quei lásaaragüdüniña Búngiu Úguchili jiláaña lídaangiñe oúweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun. ²² Magúseragüdünti Búngiu ni ában, rúrügü lumúti sun ubáfu nun, áu le Liraú, lun nadúgüni, ²³ lun sun lan gürígia íchigei ában méme in-

ébasei le jíchugubei lun Búngiu Úguchili nun. Le míchuti inébasei nun, áu le Búngiu Irájü, míchuti gíñe inébasei lun Búngiu Úguchili le oúnajabalina.

²⁴ ‘Ninárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masíadirúnwabei gíñe, sügújali lídaangiñe féridi lídoun ibágari le magúmuchaditi. ²⁵ Ninárün jáu luágu nítebei lan dan, áni niján dan ligía, dánme le jagáambuni jiláaña numálali, ja ñúdünbaña láu le nubeíbei, gabágaribaña. ²⁶ Ladúga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu Irájü, lun níchugun ibágari, ²⁷ rújali gíñe ubáfu nun lun nagúseragüdüniña gürígia ladúga Wügúri Garaúwarügüti áu. ²⁸ Maweírídálá janígi luágu le, ladúga lachúlürüba dan lun jagáambuni sun jiláguaña numálali, ²⁹ ábame jáfúridunga lídaangiñe jamúaja. Já meja arúfudubalin luágu nánigu jamá láu jadúgüni buíti uboúagu, jásaaruba lun jaganoún lúma Búngiu lun sun dan, án-jañati ja arúfudubalin luágu lánigu jamá Máfia láu jadúgüni wuríbani, jásaaruba lun jasíadirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadúgün ni cáta láu náni núngua. Quei laríñawagúniwa nun, ítara líña nagúseragüdüni, áni buíti ligáburu nagúseragüdüni ladúga moúchun nan lun nadúgüni le nabúseerubei, lueídügüya le labúseerubei Nóguchi le oúnajabalina. ³¹ Ánjein ába lubeí geféen nuóguá, moúnti le naríñagubei. ³² Níjein ámu le geféenbei luágu náni fuleísei, áni subúdititi nun luágu le lan laríñagubei nuágu, gebégiti. ³³ Jugúya oúnajatün álügüdei Juan nuágu, áni le loúnabagülebei jun, inárüni. ³⁴ Áu magúrabuntina ladímurejan ni ában wügúri luágu nufúleisein, narítaguagüda rügúñaadün luágu le laríñagubei Juan nuágu lun gayáraabei lan jafíñerun nuágu lun jasálbaruba lan. ³⁵ Ítara liñá meja Juan quei ában lámpu le durúnguati, ru ligía larúgoun-ga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶ Níjein ában cátei luágu nufúleisein buítimaati sügú láu le laríñagubei Juan. Lé buri cátei le nadúgubei, le méme buri uágubei laríñaga Nóguchi nun lun nadúgüni, arúfuda lumúti luágu Nóguchi lan oúnajabalina le tímatimaati. ³⁷ Nóguchi le oúnajabalina, arúfuda láali luágu áu lan Liraú le oúnajóubei lun nasálbaruniña gürígia uboúagu, láu sun magáambun jumágili lan lumálali Búngiu, maríjin jumeí. ³⁸ Mebélugili lerérun jídoun, ladúga mafíñetün nuágu, áu le loúnajabei. ³⁹ Atúriaaja jumútu Lerérun Búngiu láu sarágu goúnigi, ladúga agúraba jumá jadáriruni ibágari le magúmuchaditi tídan, láu sun líra, líburu tugúya adímurejaboun nuágu, ⁴⁰ áni májatün jiábin númoun lun jibíjini ibágari ligía.

⁴¹ ‘Máluaajantina lun janúgünina gürígia weírugu.

⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueígíñe loúbadi-na Nóguchi niábin, áni jugúya, merésibirun jumúti, ánjein ñúbin ámu láu láni lúngua, ligíaba jerésibira.

⁴⁴ ¿Ída lubásan jafíñerun nuágu, resíbitünga uweírugu-ni júmagiñegua, máluajan jumúti uweíruguni le lúmag-iñeti Búngiu le ábanrügüti? ⁴⁵ Marítagua jumátia luágu níchuguba lan jidúnrun ligíbugiñe Núguchi, Moisés guánarügüba íchiga jidúnrun, le guánarügü uágubei jíchigei jeménigin. ⁴⁶ Ladúga, lun jamúga afíñe jumá luágu le laríñagubei Moisés, jafíñeruña jamúga gíñe nun, ladúga abúrújati Moisés nibúgürü. ⁴⁷ Ánjein mafíñen jubei luágu le labúrújabei, ¿ída lubáti jafíñerun luágu le naríñagubei jun?

Leígagüdün Jesúsu seíngü mílu wügúriña

(Mt 14.13-21; Mr 6.30-44; Lc 9.10-17)

6 Lárigiñe, ába lídin Jesúsu loubáfurugun dúna le Galiléa, le méme gíñe dúna le gíribei Tibérias. ² Sarágu jáña gürígia afálarei ladúga jaríjini buri miláguru le ladágubei, láu lareídaguagüdüniña sán-ditiña. ³ Ábati laweínrun Jesúsu luágun ában wúbü, ába lañúurun ñi jáma láni disípulugu. ⁴ Yaráfaaliti pás-cua, le jafédun juríu. ⁵ Dan laríjinbei Jesúsu luágu sarágu jáña lan gürígia afálaruti, ába laríñagun lun Felípe. —¿Jalíabasan wagáñija eígini joun sun gürígia ja? ⁶ Laríñagunbalin líra lúnrügü lagáambun cába lan laríñaga Felípe, Jesúsu, subúdi láali cába lan ladúga. ⁷ Ábati laríñagun Felípe lun. —Ni bián-san fiádürü fein loúguaboun lun tafánrein-jóuniwa murúsun murúsun jádan sun gürígia ja. ⁸ Ábati laríñagun Andrés, ában gíñe jádaangiñe dis-ípulugu, le lamúlen Simón Pédro, lun. ⁹ —Niján ában irájü ya, nújein seíngü fein lúma, jáma bián úduraü, loúguabei líra joun sarágu gürígia. ¹⁰ Ábati laríñagun Jesúsu. —Aríñaga jumá joun súngubei lun jañúurun. Níñanuti jawára seíngü mílu wügúriña boúgudin jaweí würiña jáma irájüñü. Queíti ñíñein lan sarágu sagádi lídan fulásu ligía, ába jañúurun. ¹¹ Ábati lanúgü-nun Jesúsu fein lújaborugu, lárigiñe líchugun eteín-giruni lun Búngiu, ába líchugun joun láni disípu-lugu, ába jafánreinjanun disípulugu jádan sun ja ñún-baña. Ligía méme ladúga jáu úduraü, ruínalei sun le jabúseerubei joun. ¹² Dan le quimúleña, ába laríñagun Jesúsu joun láni disípulugu.

—Abúdaja jumei sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faníñe láu tífe fein le ígiragubei tídaangiñe seíngü fein.

¹⁴ Dánti le jaríjinbalin gürígia miláguru le, le ladúgübei Jesúsu, ába jaríñagun.

—Inárüni luágu niján lan proféta lé meja lúnbei liábin ubouágun.

¹⁵ Queíti lasúbudiruni Jesúsu luágu busén jamá janúgüni láu érei lun jadúgüni urúeime, ába lídin lábugua luágun wúbü.

Leíbugun Jesúsu ligíbuagu dúna

(Mt 14.22-27; Mr 6.45-52)

¹⁶ Dan le lagúñedunbei, ába jarágachun láni Jesúsu disípulugu lárün dúna, ¹⁷ ába jádinagun tídoun ában ugúnein, ába jagúmeserun ánjiñuragua lun jachúlürün Capernaúm. Búrigaaliti, machúlüti Jesúsu jámoun. ¹⁸ Ába lagúmeserun garábali áfuragua jére, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eíbugeina ligíbuagu dúna, ába janúfudeda-gun. ²⁰ Ába laríñagun joun.

—Manúfudeda jumá, áu le.

²¹ Ábati jerésibiruni láu ugúndani tídan ugúnein, ába jachúlürün lídoun fulásu le ñíjin lubei jóudin lídan murúsun óra.

Jáluajani gürígia Jesúsu

²² Larúgan, ába jaríjin gürígia ja eréderubaña loubáfurugu luágu ñúdünya jamá buga disípulugu tídan ugúnein to ñíboun áni tugúya rügúñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúruguñe Tibérias lun lídoun ában fulásu yaráfa lun le ñí lubei jeígoun fein lárigi leteíngirun Jesúsu tuágu. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóudin Capernaúm áluajei.

Jesúsu, fein to lánina ibágari

²⁵ Dan le jachúlürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

²⁶ Ába laríñagun Jesúsu joun.

—Ninárün jáu luágu ladúga lan jeígin darí lun jaquí-muledun jáluajana, máma ladúga gunfaráanda jumáni laníchigu buri miláguru. ²⁷ Madíjerida jumá luágu eígini le gagúmchaditi le lúntibeí júgubu, áluaja jumei eígini tun juwáni, le íchugubei ibágari magúmchaditi. Ligía eígini le lúnbei níchuguni jun, áu Wügúri Garaúwarügüti, ladúga rúlaali Búngiu Úguchili ubáfu nun lun níchuguni ibágari ligía.

²⁸ Ábati jaríñagun lun.

—¿Ída lubásan wadúga lun woúdin láu le lubeíbei Búngiu?

²⁹ Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

³⁰ Jaríñagati lun.

—¿Cábaga seíni gayára barúfudun woun lun wafíñerun buágu? ¿Cági cátei badúgübei? ³¹ Binádu wagúbürigu jóutiña meja fein to gíriboun maná lídan fulásu mageírawati, quei taríñaguni Lerérun Búngiu. “Jóügüda lumútiña Búngiu fein to siélugiñetu.”

³² Ába laríñagun Jesúsu joun.

—Ninárün jáu luágu máma lan Moisés íchugubarun fein siélugiñetu tugúya joun, Núguchi íchugubei fein joun áni ligía gíñe íchugubarun fein siélugiñetu jun to

tímatimaatu. ³³ Ladúga fein to líchuguboun Búngiu, tugúya to aráriruboun siéluigiñe áni rúti gíñe ibágari joun lílana ubou.

³⁴ Ábati jaríñagun lun.

—Rúboun fein tugúya woun súnwandan.

³⁵ Ába laríñagun Jesúsu joun.

—Áu fein to íchuguboun ibágari. Le ñúbinti númoun, malámadügüyaarume luwáni, le afíñeruti nuágu, mamágürabudügüyaaru giñe luwáni. ³⁶ Quei le nubei jun, jugúya maffíñetün láu sun aríja jumáadina lan. ³⁷ Sun gürígia ja líchugubaña Nóguchi nun, ñúbintiña nun, játi ñúbintiña númoun mabúgun nubáña. ³⁸ Mára niábiña siéluigiñe lun nadúgüni nugúndan, le náni nungua, niábiña lun nadúgüni lugúndan le óunajabalina. ³⁹ Léti labúseerubei Nóguchi le óunajabalina, lun meféridirun nan ni ában jádaangiñe ja líchugubaña nun, lun sarágüdarügü náníña lídaangiñe óuweni lídaanme lagúmujoún wéyu. ⁴⁰ Le labúseerubei le óunajabalina, lun sun lan ja anúgütina queísi Liraú Búngiu, afíñe jagía nuágu, lun gabágarari jamá le magúmuchaditi, áni násaaragüdübaña lídaangiñe óuweni lídan lagúmujoún wéyu.

⁴¹ Ába jagúmeserun juríu adímureja wuríba luágu Jesúsu ladúga laríñagun luágu ligía lan fein to aráriruboun siéluigiñe. ⁴² Ába jaríñagun.

—¿Ma funági Jesúsu le liraú José le? Subúdi wamúti lúguchi túma lúguchu. ¿Ída líñati laríñagunbei luágu siéluigiñe lan larírira?

⁴³ Ábati laríñagun Jesúsu joun.

—Madímureja jumá nuágu. ⁴⁴ Siñati liábin ni ában númoun ánjein máma lubei lanúgün Búngiu Úguchili le óunajabalina, áni násaaragüdübei lídaangiñe óuweni lídan lagúmujoún wéyu. ⁴⁵ Laríñajare tídan líburu to jerérun profétagu. “Larúfudajaba Búngiu joun súnubei.” Sun lubeíti ja agáambubalin Búngiu Úguchili, furéndeí jagía lúmagiñe, ñúbintiña númoun.

⁴⁶ ‘Mára jamúgatia luágu níjein lan aríjiti Búngiu Úguchili. Áu le ñúbinbei lúmagiñe Búngiu, áu rügüñein aríjei. ⁴⁷ Ninárün jáu luágu le lan afíñeti nuágu, gabágariti le magúmuchaditi. ⁴⁸ Áu fein to íchuguboun ibágari. ⁴⁹ Jouítiña binádu jagúbürigu fein to maná lídan fulásu mageírawati áni láu sun luwúyeri jiláguatiña. ⁵⁰ Áu, tuágu fein to aráriruboun siéluigiñe nadímureja, lun ja lan eígiti, lúmounbaña Búngiu.

⁵¹ Áu méme fein wínwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, nógubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábati jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Ninárün jáu luágu ánjaün lan meígin lídaangiñe nógubu, áu Wügúri Garaúwarügüti, mátun jumeíme

níta, mabágaribadün. ⁵⁴ Le eígiti nógubu, gurálei níta, gabágariti tímatimaati le magúmuchaditi, áni násaaragüdübei lídaangiñe óuweni lídan lagúmujoún wéyu. ⁵⁵ Ladúga eígini le tímatimaati nógubu, uníñein le tímatimaati níta. ⁵⁶ Le eígiti nógubu, gurálei níta, lídaañein ában núma, áu lúma. ⁵⁷ Úguchili le óunajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribeí nídaangiñe. ⁵⁸ Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagúbürigu, láu lan sun luwúyeri jiláguatiña, le eígiti tídaangiñe fein to, labágariduba tímatimaati lun sun dan lúma Búngiu.

⁵⁹ Lídan adámuridaguni tídan jalígilisin juríu to Capernaúboun, ñi larúfudajeí Jesúsu cátei le.

Dimúrei lánina ibágari magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adúga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbati láburujan líra jun? ⁶² ¿Cába jamúga funáti asúsereda ánjana jamúga jaríja, áu Wügúri Garaúwarügüti, awárirara nárigoún siélun lé meja ní nubei furúmiñe? ⁶³ Náni Espíritu, ligía íchugubei ibágariti tímatimaati, nóguburügü, siñati líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei ibágari magúmuchaditi. ⁶⁴ Áni añájeingua jídaangiñe, maffíñetiña.

Ladúga lúmagiñe furúmiñeti dan, subúdi láña Jesúsu cátaña lan maffíñebaña, lúma cátei lan le lúnbei lalúguruni. ⁶⁵ Ába laríñagun.

—Ligía naríñagunbei jun luágu siñá lan liábin ni ában númoun ánjein máma lubei Nóguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün gíñe jídin nueí?

⁶⁸ Ába lounabun Simón.

—¿Cábagi úmoun woúdin? Dimúrei buri le baríñagubei, lánina ibágari tímatimaati le magúmuchaditi. ⁶⁹ Wagía afíñeediwa, áni subúdi wamúti luágu amúrü lan Crístubei le Liraú Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraú Simón Iscarióte, ladúga ligíaba lan alúgurei, láu sun ában lan jádaangiñe dúusu disípulugu ligía.

Mafíneruntiña lamúlenu Jesúsu luágu

7 Lárigiñe sun cátei le, ába eíbugañaja lan Jesúsu loúbawagu Galiléa, mabúseerunti leréderun Judéa ladúga ñi buséntiña juríu jáfaruni jilágubei.

² Queíti yaráfaali lan ában lídaangiñe jafédun juríu le gíribei tufédun dibásein, ³ ába jaríñagun lamúlenu lun.

—Meréderabá ya, beíba Judéoun aríja jamámugei gíñe bánígu ja ñíbaña cátei lé buri badúgübei. ⁴ Dan le busén lan ában gürígia lasúbudirúniwa, madúgün lumúti buri cátei arámudaguarügü. Queíti adúga ban cátei líbeina le, adúgabeí ligíbugiñe sun uboú.

⁵ Ni íbini lamúlenu mafíñetiña luágu. ⁶ Ábati laríñagun Jesúsu joun.

—Machúlügili dan lun nídin Jerusalén luágu fédu ligía, ánjein jun, buíti furúmierügü óra. ⁷ Siñáti jiyéeregudún joun ja lánina uboú le, anáti áu, iyéeregutina joun, ladúga geféentina luágu wuríba lán buri cátei le jadúgübei. ⁸ Jeíba lídan fédu, áu mídinbadina guetó, machúlügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jóudin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijóuniwa. ¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wügúri le?

¹² Sarágu jañáti adímurejatiña luágu jádan gürígia. Ñíñanu aríñagutiña luágu ában lan wügúri buíti ligía, jíbiri aríñaga. “Mabuídunti, yéegua lumútiña gürígia.”

¹³ Úati ni ában adímurejati furáangu luágu, ladúga janúfude jawéi juríu.

¹⁴ Lamídounjali fédu lúmagua, ligía lebéllun Jesúsu témpulurugun, ába lagúmeserun arúfudaja. ¹⁵ Ába laweíridun janígi juríu, ába jaríñagun.

—¿Ída liñásan lasúbudirunbei le sarágu cátei, matúrijaanga ligía?

¹⁶ Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina. ¹⁷ Ánjein níjein lubeí ában le aráanseti lun ladúgüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan náni núngua nadímureja. ¹⁸ Le adímurejabei luágu lání lúngua, ladúgüni lun janúgüni gürígia weíri, le oúchubei lun lanúgüniwa le oúnajabalin weíri, ligía aríñagubalin inárüni, áni máma ligía bíangua tigíbu.

¹⁹ ¿Ma inárüni luágu rúlaani Moisés lúrudu jun? Láu sun líra, úati ni ában jídaangiñe úraduti lúma lúrudu ligía. ¿Ca uágu jabúseera jáfarunina jilágubei?

²⁰ Ába jaríñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába laríñagun Jesúsu joun.

—Luágurügü ában cátei le nadúgübei lídan wéyu le eméraguagülei laweírda janígi sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagúbürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraguagülei. ²³ Ánjein adúga jubálin líra íbini lídan lan wéyu le eméraguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügúri dayárugubei lídan wéyu le eméraguagülei? ²⁴ Masáminara jumá luágu cátei quéisi laríjiniwa, samína jumá luágu quéisi lubeí.

Ladímurejan Jesúsu luágu ladúgawagún

²⁵ Ábati jagúmeserun jádaangiñe ja aganoúbaña Jerusalén álügüdaja.

—¿Másan niján le jáluajabei lun jáfaruni jilágubei?

²⁶ Nijánga adímureja ligíbugiñe guríriguaü, áni úati ni ában aríñaguti ni cáta lun. ¿Léfunasan afíñe jamá gumádimatiña luágu wügúri lan le Crístubei? ²⁷ Subúdi woun jalágiñe lan liábin le, ánjeinti dánme le liábin Crístu, ibídiñebei ni ca un jalágiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába laríñagun rein.

—¿Subúdi jumútina lubeíti, subúdi jumeí jalágiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun. ²⁹ Áu, subúdi numúti ladúga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladúga machúlügili lan dan lun loúnwen. ³¹ Sarágu jáña afíñerutiña luágu, ába jaríñagun.

—Dánme le liábin Crístu, ¿ladúgüba funági ámu miláguru sügú láu wügúri le?

Jounajan fariséogu polisía adáürei Jesúsu

³² Ába jagáambuni fariséogu le jaríñagubei gürígia luágu Jesúsu, jagía jáma jábutigu fádirigu, ába jóunajan polisía témpulurugugiñe lun jadáürüni. ³³ Ábati laríñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴ Jáluajabadina, madári jubádina, ladúga siñábei lan jídin le ñíjinbadina lubeí.

³⁵ Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagánaguabaña gürígia ja güriégu, lun larúfudajan joun güriégu? ³⁶ ¿Ca míni lan láu laríñagun woun. “Jáluajabadina, madári jubádina ladúga siñábei lan jídin le ñíbadina lubeí?”

Líseesen dúna wínwanti

³⁷ Le lagúmujóun wéyu lídan fédu ligía, ligiatima weírigubei. Lídaanti wéyu ligía, ába laráramun Jesúsu, ába laríñagun láu umálali reínti.

—Le mágürabutu luwáni, ñúbinlá númoun, gurála.

³⁸ Le afíñeti nuágu, láwiyujaba dúna wínwanti tí-daangiñe lanígi, quei taríñaguni Lerérun Búngiu.

³⁹ Laríñaguña Jesúsu láu líra luágu ja lan afíñerutiña luágu, jerésibirubei lan Sífiri Sándu, dan ligía, miábingili Sífiri Sándu ladúga magíribudungili lan Jesúsu larigouñ siélun lídoun luweírigin.

Fánreinguaü jádan gürígia

⁴⁰ Ñíñanu jádaangiñe gürígia, dan le jagáambunbalin cátei le, ába jaríñagun.

—Inárüni luágu niján lan proféta lé meja lúnbei liábin.

⁴¹ Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴² Taríñajare Lerérun Búngiu luágu ladúgawagunbei lan urúei Davíd Crístu, áni Beléngiñetibeibe lan, fulásu meme le ñígiñeti lubeí Davíd.

⁴³ Ába lubeíti jafánreinragun gürígia lueígiñe Jesúsu.

⁴⁴ Ñíñanu yebe abúseerutiña jadáürüni, úati ni ában adúgüti.

Maffíñetiña gumádimatiña luágu Jesúsu

⁴⁵ Ába jagíribudun polisía ja tánina témpulu jarigouñ jámoun fariséogu jáma jábutigu fádirigu. Ába jaríñagun joun polisía.

—¿Ca uágu manúgün jubálin?

⁴⁶ Ába jaríñagun polisía.

—¿Uagili ni ában adímurejati quei ladímurejan wügúri le!

⁴⁷ Ábati jaríñagun fariséogu joun.

—¿Ígiraguagüdaadün gíñe júngua lun leyéedunün?

⁴⁸ ¿Níjein funági ában jádaangiñe wábutigu o jádaangiñe lan fariséogu afíñeruti luágu? ⁴⁹ Ánjaña gürígia ja, ja afálarubalin wügúri ligía, ja ibídiñejabubaña lun lúrudu, íñarawagúaaña.

⁵⁰ Nicodémo, le ñúdüñbei adímureja lúma Jesúsu gúñoun, ligía ában jádaangiñe fariséogu, ába laríñagun joun.

⁵¹ —Según walúrudun, siñáti wasíadiruni ában wügúri magáambunga wameí furúmiñe lun wasúbudiruni ca lan lidúnrunbei.

⁵² Ábati jaríñagun lun.

—¿Galiléana gíñe amúrü, badímurejaanbei luágu lufúleisein? Atúriajabouñ Lerérun Búngiu, basúbudirubei luágu úagili lan ni ában proféta Galiléana.

⁵³ Ába jóudin cáda ában jábiñoun.

Wúri maréitu to aganouñoun luma ámu wügúri

8 Ánjeinti Jesúsu, ába lídin luágun wúbü le gíribeibe Olívos. ² Larúgan bináafin, ába lagíribudun témpulurugun, ába jayábin sun gürígia lubáduñ, ába lañúurun, ába lagúmeserun arúfudaja joun. ³ Ábati janúgün arúfudajatiña lilúrudun Moisés jáma

fariséogu ában wúri jadáriragun lúma ámu wügúri lueí túmari. Ába jíchugunun jamídaangua ja ñíbaña jámagua, ⁴ ába jaríñagun lun Jesúsu.

—Maésturu, nuján wúri to, wadáriragun lúma ámu wügúri lueí túmari. ⁵ Laríñajare lilúrudun Moisés jawágu jíbe wúriña ja, lun jáfarawagún jilágubei láu dúbü. ¿Cági baríñagubei?

⁶ Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labúrújan múarugu láu lújabu. ⁷ Queíti jasígirun álügüdaguei, ába laráramun, ába laríñagun joun.

—Furúmiñeguarügü jídaangiñe le maffíngouti, chuléí furúmiñeti dúbü tuágu.

⁸ Ábaya lélemuchun, ába lasígirun abúrúja múarugu.

⁹ Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weínamutimáa-jañabaña. Dánti le furíjaña sùngubei, ába ladáriragun Jesúsu lúngua lábugua túma wúri tugúya quei teréderunbei ñi. ¹⁰ Ábati liñúraguni Jesúsu lichúgü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asiádirutibu lun bouñwen?

¹¹ Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madúgadügüyabá figou.

Jesúsu lilámpun ubou

¹² Ábaya ladímurejan Jesúsu joun gürígia, ába laríñagun.

—Áu lilámpunbei ubou, le afálarutina, libíjubei larúgounga le anúgübei gürígia lídoun ibágari magúmuchaditi, áni meíbugunbei lídan lubúriga.

¹³ Ábati jaríñagun fariséogu lun.

—Amúrü, badímurejaña buíti buougua, mebégiti líra.

¹⁴ Ába laríñagun Jesúsu joun.

—Le naríñagubei gebégiti, láu sun áu lan adímurejabei buíti nuougua. Áu, subúdi numúti jalíagiñe lan niábin lúma jalíñounba lan nídin, ánjein jugúya, ibídiñeti jun jalíagiñe lan niábin ni jalíñounbadina lan.

¹⁵ Jugúya, jasáminarun nuágu queísi luwúyeri lasáminarun ubou, áu, magúseragüdüntina ni ában. ¹⁶ Ánjana jamúga agúseragüda, nadúgüñein jamúga láu úarani, ladúga mámarügüba áu agúseragüda,

Núguchi le ouñajabalina lagúseragüdüba gíñe núma. ¹⁷ Bürúwati lídan jilúrudun luágu dan lan geféen jamá bián gürígia luágu ában méme cátei, lúnti lan lafíñerún joun. ¹⁸ Ítara liñáti áu ában le geféenbei luágu náni fuleísei, Núguchi le ouñajabalina, ligía gíñe ában le geféenbei nuágu.

¹⁹ Ábati jaríñagun lun.

—¿Jageígi Búguchi?

Ába laríñagun joun.

—Jugúya, ibídiñetina jun, ni Núguchi, ibídiñeti gíñe jun, lun jamúga subúdi jumánina, subúditi jamúga gíñe Núguchi jun.

²⁰ Lídán laríñagubalin Jesúsu cátei le, larúfudajaña témpulurugu lídan fulásu le ñí tubeí buri gáfu to lágei seínsu. Madáürün lumúti ni ában ladúga machúlügjili lan lidáani lun loúnwen.

Laríñajare Jesúsu joun luágu siñá lan jeídin ñíjinba lubeí lídin

²¹ Ábaya laríñagun Jesúsu joun.

—Áu, neíbuga, jugúya jáluajabadina, jóúweguba gaffigounga, siñáti jídin le ñíjinba lubeí nídin.

²² Ábati jaríñagun juríu.

—¿Láfaragua funa lúngua, laríñagunbei luágu siñá lan woúdin le ñíjinba lubeí lídin?

²³ Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni ubou le jugúya, ánjein áu, máma láni ubou le áu. ²⁴ Ligía naríñagunbei jun luágu jóúweguba lan gaffigounga, ladúga ánjein maffíñen jubeí luágu áu lan áu, jóúweguba ítara.

²⁵ Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü. ²⁶ Gayáraati jamúga naríñagun gíbetei jun luágu luríban jigáburu lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana ubou.

²⁷ Ánjein jagía, úati gunfaráanda jamáni láu luágu lan Búngiu ladímureja Jesúsu joun. ²⁸ Ligía laríñagunbei joun.

—Dánme le jiiñúrúna, áu Wügúri Garaúwarügüti, ligíame jasúbudiruni luágu áu lan le uágubei naríñaga luágu áu lan, áni madúgün nan ni cáta luágu náni nungua, lueídügüya le larúfudajabei Nóguchi nun.

²⁹ Ladúga númañein le oúnajabalina, mígirun lágidina Nóguchi nábugua, ladúga adúga náni le áubei lagúndaara súnwandan.

³⁰ Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figou

³¹ Ába laríñagun Jesúsu joun juríu ja ánjarubaña lun lerérün.

—Ánjaün asígira lun jídin surúñu láu le nubeíbei jun, jíábinba lun náni jumá díspulugu le tímatimaati.

³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Ninárün jáu, luágu sun lan ja adáagubaña figou, lidámun figou jagía. ³⁵ Ában idámuni, máma jádaangiñeti famíliá, ánjeinti ában isáani, jádaangiñeti famíliá súnwandan. ³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figou,

furáangubadün le tímatimaati. ³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladúga mája jumá lun le nubeíbei jun. ³⁸ Áu nadímurejan luágu le larúfudubei Nóguchi nun, jugúya jadügüni le jafúnrendeirubei lúmagiñe jóguchi, le Máfia.

³⁹ Ába jaríñagun lun.

—Abrahám wáguchibeí.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübei. ⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madúgünti meja Abrahám ni cáta líbe líra! ⁴¹ Le méme ladügübei jóguchi, ligía jadügübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubeí jóguchibeí, jínsiñetina jamúga jun ladúga lúmagiñe Búngiu niábin, áni anája ya. Máma láu náni nungua niábin, Búngiu oúnajabalina. ⁴³ ¿Ca uágu lásiñerunbei gunfaráanda jumáni le naríñagubei? Ladúga mabúseerun jumá jagáambuni náni ugánu. ⁴⁴ Máfia jóguchibeí, lánigu jugúya, áni buséntün jadügüni lugúndan. Gáfarajadigubeiñein Máfia lúmagiñe furúmiñeti dan. Márügüdünti lueígiñe inárüni, maríñagunti gíñe inárüni. Lídán le laríñagun iyéeni, ladímurejaña quei ligáburu, ladúga yéeti áni ligía lúguchibeí iyéeni. ⁴⁵ Ánjeinti áu, quei inárüni lubeí naríñagubei, maffíñetün nun. ⁴⁶ ¿Ca jídaangiñe gayáraabei larúfuduni luágu gaffigoun nan? Ánjeinti inárüni lubeí naríñagubei, ¿cáti uágu maffíñen jubeí nun? ⁴⁷ Le lánigu Búngiu, agáamba lumúti lerérün Búngiu, ánjeinti jugúya, quei máma jubeí lánigu Búngiu, ligía mája jubeí jagáambuni.

Níjeinjali meja Crístu lubáragiñe Abrahám

⁴⁸ Ábati jaríñagun juríu lun.

—Wanáürün láu waríñagun luágu máma ban ámu jaweí jagúbüri Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadügübei, níchuguña inébesei lun Nóguchi, jugúya, íchiga minébeni nun. ⁵⁰ Máluajaantina inébesei nungua, láu sun níjein lan ában áluga lumúti ninébesi, áni ligía le agúseragüdübei. ⁵¹ Ninárün jáu luágu le lan adügüti gásu láu le nubeíbei, moúnwenbei lan.

⁵² Ábati jaríñagun juríu lun.

—Anáti guetó, chóuru wamáali luágu níjein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adügüti gásu láu le bubeíbei, moúnwenbei lan. ⁵³ ¿Cátabuñadíbugi lúmoun wáguchi Abrahám? Jiláti Abrahám, jilágu profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíriguni nuóúgua, málabei, ánjeinti Nóguchi, le méme uágubei jaríñaga luágu ligía lan Jubúngiutebei, ligía íchugubei uweíriguni nuágu.
⁵⁵ Jugúya, ibídiñeti Búngiu jun, anáti áu, subúdi ni nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúdi ni Búngiu nun le tímatimaati, áni adúga numúti le lubeíbei.

⁵⁶ Abrahám lé meja binádu júguchi, gúndaati meja láu lasúbudiruni luágu lachúlürüba lan nuwéyuri lun niábin ubouágun queísi asálbaragülei, buin líña láu ugúndani dan laríjini wéyu ligía.

⁵⁷ Ábati jaríñagun juríu lun Jesúsu.

—Uágubeigili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dúbü lun jachúraguni luágu, ába larámudagun, ába láfuridun témpulurugugiñe, ába lásügürün jamídaangiñe, ába lídin.

Lareídaguagüdün Jesúsu ában wügúri maríjinti

9 Lídan le lásügürün Jesúsu lídaangiñe ában fulásu, ába laríjin ában wügúri maríjinti lúmagiñe lagúriajóun. ² Ába jaríñagun láni disípulugu lun.

—Maésturu, ¿cásan uágu lagúriajóunbei wügúri le maríjinga? ¿Ladúgasan jafígoun lagúbürigu, o ladúga lifígoun guánarü?

³ Ába laríñagun Jesúsu joun.

—Máma ladúga lifígoun, máma gíñe ladúga jafígoun lagúbürigu, lasúseredunbei itara lun laríjouniwa le luáraabei Búngiu adúga láu lareídagun wügúri ligía.

⁴ Lúnti nadúgüni luwádigimari Búngiu le oúnajabalina sun wínwangidina lan, jiláadina ligíame, siñáme nadúgüni. ⁵ Sun dan anája lan ligíbuagu ubou le, áu lilámpunbei ubou.

⁶ Lárigiñe laríñaguni Jesúsu cátei le, ába lásuerun múarugun, ába ladúgün murúsun gubégubeti láu larúre, ába lájuruduni luágu lágu le maríjinbei. ⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajóuti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali. ⁸ Játi lubésinanigu jáma gürígia já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

⁹ Níñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügúri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügúri le gíribei Jesúsu, ligía adúgübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame

bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügúri ligía?

Laríñaga joun.

—Ibídiñeti nun jageí lan.

Jálügüdaguni fariséogu maríjinti le areídaguagüdúwal- ibei

¹³ Ábati janúgüni wügúri lé meja maríjinbei jagíbugiñoún fariséogu. ¹⁴ Queíti lídan lan wéyu le eméraaguagülei ladúgei Jesúsu gubégubeti le áubei lareídaguagüdei maríjinti ligía, ¹⁵ ába gíñe jálügüdüni fariséogu wügúri ligía ída líña lan gayáraajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügúri le adúgübalin cátei le, siñáti loúnagüle lan Búngiu ladúga minébenti wéyu le eméraaguagülei lun.

Jaríñagati jíbiri.

—¿Ída liñáti ladáguni buri miláguru le, ánjein gaffígon lubeí?

Ába lubeíti ñi lan fánreinguaü jádan. ¹⁷ Ábaya jálügüdüni lé meja maríjinbei.

—Ángi bugúya, ¿cági baríñagubei luágu wügúri le, queísi bugúya lubeí le laríjagüdübei?

Ába laríñagun.

—Nugúya, naríñagun luágu ában lan proféta.

¹⁸ Májatiña yebe fariséogu jafíñerun luágu maríjin lán meja wügúri ligía áni aríjaali lan guetó, darí lun jagúarun joun lagúbürigu, ¹⁹ ába jaríñagun joun.

—¿Nijánsan jiraú le uágubei jaríñaga luágu maríjin gubeíñein lan lúmagiñe lagúriajóun? ¿Ída liñáti aríjaali lubeí guetó?

²⁰ Ába jaríñagun lagúbürigu.

—Subúdi wamúti luágu waraú lan le, áni maríjin lan dan le lagúriajóunbei, ²¹ ibídiñeti woun ída líña lan aríjaali lubeí, ni ca lan areídaguagüdúbalin lágu. Álügüda jumeí, weíriyaali, gayáraati loúnabun lueígíñegua.

²² Anúfudeiti aríñagagüdúbalin líra joun lagúbürigu wügúri ligía, ladúga aríñagaaña lan fariséogu luágu sun lan ja afíñerutiña luágu Jesúsu lan Crístubei, jabugúba lan tídaangiñe jalígílisin juríu. ²³ Ligía jaríñagunbei lagúbürigu. “Álügüda jumeí, weíriyaali.”

²⁴ Ábayati jagúarun juríu lun wügúri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúdi ni woun luágu gaffígon lan wügúri líra.

²⁵ Ábati laríñagun joun.

—Ibídiñeti nun ánjein gaffígon lubeí lúmoun maffígon lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladúgübei báu? ¿Ída liñásan ladúga lun laríjagüdüniibu?

²⁷ Ába laríñagun joun.

—Aríñaga náali jun, mebéseseguntün náu, ¿cáti uágu jabúseera naríñaguniya jun? ¿Ódi buséntün gíñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügúri ligía, ánjein wagía, larúfudajan Moisés wafálarubei. ²⁹ Subúdi woun luágu adímureja lán meja Búngiu lun Moisés, ánjein le, ibídiñegubeíti woun jalágiñeti lan.

³⁰ Ábati laríñagun wügúri ligía joun.

—¡Ámuti gíñe cátei le! ¡Ibídiñeti jun jalágiñeti lan, áni aríjagüda lána! ³¹ Subúdi woun luágu magáambun láníña Búngiu gafígountiña, ja rügúñanu ájuduragubaña lun jáma ja adügübalin lugúndan, lagáamba. ³² Magáambuñajagili luágu ni ában aríjagüdüti ában gürígia le agúriajoúti maríjinga. ³³ Lun jamúga máma lan lúmagniñe Búngiu liábin wügúri le, siñáti jamúga ladügün ni cáta.

³⁴ Ábati jaríñagun lun.

—¿Bugúyasan le agúriajoúbei buin láu figoú, buséntibu barúfudajan woun?

Ába jabúguni tídaangiñe jalígilisin.

Ja maríjinbaña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Afiñetibu luágu Liraú Búngiu?

³⁶ Ába laríñagun wügúri ligía lun.

—Aríñagabeí nun cátei lan, afíñe námuga luágu.

³⁷ Ába laríñagun Jesúsu lun.

—Aríja báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

—Afiñetina, Nabúreme.

³⁹ Ába laríñagun Jesúsu.

—Niábinbei ñájoun uboúagun lun néfegechagüdüni jágu ja ibídiñejabubaña lun cátei lánina Búngiu, lun gíñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan gíñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga ibídiñe lan cátei lánina Búngiu jun, madúnrontün jamúga luágu jifígoun, quei jaríñagun luágu subúdi jamáni, gadúnrontün.

Jémpulu luáguti loúnigiruniña Jesúsu lánigu queísi ában oúnigiruti mudún

10 ‘Nínárün jáu luágu le lan mebéluti lídaangiñe lubéneri jabárierun mudún, lun lebélurun lídaangiñe ámu oúbaü, jíweruti. ² Ánjeinti le ebélurubei lídaangiñe béna, ligía le oúnigirubaliña mudún. ³ Ába lánjunrenchuni le oúnigirubalin béna béna lun, lun lebélurun, subúdi jamúti gíñe mudún lumálali. Ába lagúajan joun láu jíri, ába laságaraguniña baríeru-

rugugiñe. ⁴ Lárigiñe laságaraguniña súngebui, ába lídin eíbugeina jabá jabá, ába jafálaruni ladúga subúdi jamáni lumálali. ⁵ Mídintiña lárigi ában le ibídiñeti joun, anúrajarügütiña lueí ladúga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu joúniri mudún buíti

⁷ Ábayati laríñagun Jesúsu joun.

—Nínárün jáu, áu béna le nígiñe lubeí gayára lan jayábin gürígia lun lánigu jamá Búngiu. ⁸ Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madügütiña lánigu Búngiu gásu jáu. ⁹ Áu bénabei, le ebéluruti nueígiñe, lasábarúaba. Ítara lúba quei ában mudún le ebéluruti furí ligía baríerurugugiñe, darí ligía sagádi lun leígin.

¹⁰ ‘Jíweruti, liábin rügüña lun líwerujan, lun láfarajan lúma lun lagúnrinchagun, ánjein áu, niábiña lun jibíjin ibágari, áni lun jibíjini gíbe. ¹¹ Áu, ítara níña queísi ában joúniri mudún le buíti, le gayáraati líchuguni libágari jawágu lilúgüniña mudún. ¹² Ánjein le ñadágimeinrügüti luágu fáyeiti, dan le laríjin liábin anímaalu le jabísa mudún, ába lígiruniña mudún, ába leíbaagun, ladúga máma lan oúnigiruti buíti ligía, máma gíñe lilúgüniña mudún. Ábati liábin jabísa mudún, ába lawáraüdagugüdüniña. ¹³ Wügúri ligía eíbaaguati ladúga luwádigimariña lan luágurügü fáyeiti, mebésesegúnti jáu mudún.

¹⁴ ‘Áu oúnigirutibei buíti. Ítara quei nisúbudin lun Nóguchi áni subúdi Nóguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún joúniri. Rúnumuti nibágari jawágu queísi líchuguni oúnigiruti mudún libágari jawágu lilúgüniña mudún. ¹⁶ Añájein gíñe ámu gürígia ja lúnbaña nánigu jamá ja mámbaño juríu, lúnti gíñe nanúgüniña lun nánigu jamá. Jagáambubadina, ábame jeréderun súngebui lídan ában lúma ában oúnigiruti.

¹⁷ ‘Jínsiñetina lun Nóguchi, ladúga níchugubei nibágari luágu uboú, ligía ábayame nibíjini. ¹⁸ Magída lubeí ni ában gürígia nibágari, láuba nugúndan níchigei. Garíchatina lun níchuguni lúma lúnnya nerésibiruni. Ligía cátei le laríñagubei Nóguchi nun.

¹⁹ Dan le jagáambubalin juríu dimúrei buri le, ábaya jafánreinragun. ²⁰ Sarágu jáña jádaangiñe aríñagutiña.

—¿Cásan uágu jadúga gásu láu, níjeingusan espíritu wuríbati lídan áni lúlújali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdüni espíritu wuríbati maríjintiña?

Merésibirun jamáni juríu Jesúsu

²² Dan ligía lidáni luríbouga, ladügüñati fédu le lánina tederegerún témpulu Jerusalén lun Búngiu.

²³ Níñeinti Jesúsu eíbugañaja témpulurugu luágu

corredór le gíribei Láni Salomón corredór. ²⁴ Ába jagúriridagun juríu láu, ába jaríñagun lun.

—¿Darísan ídaba bigirawa láu machoúruni? Ánjein amúrú lubeí Crístubei, aríñagabei furáangu.

²⁵ Ába laríñagun Jesúsu joun.

—Aríñaga náali, mafíñetün nun. Sún buri cátei le nadáagubei láu lugúmadin Nóguchi, arúfuda lumúti furáangu. ²⁶ Jugúya, mafíñetün ladúga máma jumá jádaangiñe nilúgüniña mudún quei bugája naríñaguni jun. ²⁷ Subúdi jamúti nilúgüniña mudún numálali, subúdi numútiña gíñe, áni falá jamutina. ²⁸ Rútina ibágari magúmuchaditi joun áni meféridirubaña, úabei gíñe agídaruñiña nújaburugugiñe. ²⁹ Nóguchi le weírubei jaweí sungubei, ligía íchugubaliña nun, áni úati ni ában lun lagídaruñiña lújaburugugiñe. ³⁰ Áu lúma Búngiu Úguchili ában méme wagía.

³¹ Ábayati jabúdajan juríu dúbü lun jachúrugini luágun. ³² Ába laríñagun Jesúsu joun.

—Gíbeeli cátei buíti nadúga jigíbugiñe láu lubáfu Búngiu, ¿cábagi lídaangiñe uágu jíchaagua dúbü nuágu?

³³ Ába jaríñagun juríu lun.

—Míchaagunbadiwa dúbü buágu luágu ni cáta buíti badúga, ladúga anába báali lan Búngiu láu berérun. Wügúri rügúñadibu, áni bíchaaguaña búngua quei Búngiu.

³⁴ Ábati laríñagun Jesúsu joun.

—Bürúwati lídan jilúruden luágu aríñaga lan Búngiu. “búngiu buri jugúya”. ³⁵ Subúditi woun luágu siñá lan leyéedawagún láu le taríñagubei Lerérun Búngiu, áni aríñagatu líburu tugúya luágu wa lániña Búngiu gürígia ja erésibirubalin lerérun lun jíchuguni joun gürígia, quei búngiugu. ³⁶ Ánjeinti anúadaja lubáalina Búngiu, ába loúnajanina uboúagun, ¿ída liñáti jaríñagunbei luágu anába náni láu naríñagun luágu Liraú nan Búngiu? ³⁷ Ánjein madúgün nan cátei lé buri ladúgübei Nóguchi, mafíñera jumá nun, ³⁸ ánjein nadúga, íbini mafíñerun jumá nun, afíñe jumá luágu buri cátei le nadúgübei, subúdi jumámugei luágu níjein lan Nóguchi nídan, áni anájein lan gíñe lídan Nóguchi.

³⁹ Ábaya jálugun jadáürüni, ába leséfurun jaweí.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñí lubeí meja labásteragüdaja Juan. ⁴¹ Sarágu jáña gürígia ñúdüntiña aríjei, ába buri jaríñagun.

—Láu sun madúgün lan Juan ni ában miláguru, inárüni sun le laríñagubei luágu wügúri le.

⁴² Ába jafíñerun sarágu gürígia luágu Jesúsu lídan fulásu ligía.

Loúnwen Lázaro

11 Ñíñein ában wügúri sánditi, gíriti Lázaro, lílana fulásu le gíribei Betánia, le tageíra María túma Márta to tíbugaña. ² María tugúya, to lítu Lázaro le sándibeí, tugúya to éseruboun ibíñei luágun lugúdi Jesúsu, ába tarágajani láu tidiburi. ³ Ábati jóunajan bián ítunu ja, aríñaga lun Jesúsu.

—Jesúsu, sándiñeintia bumáda.

⁴ Dan lagáambunbalin Jesúsu cátei le, ába laríñagun. —Mámabei óuweni lébeja cátei lídaangiñe sándi le, lúntibeí larijiniwa luweírigin Búngiu, lúma gíñe lun larijiniwa luweírigin Liraú Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu, ⁶ dan le jaríñawagúnbei lun luágu sándiñein lan Lázaro, reídeigili bián wéyu lídan fulásu le ñí lubei. ⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dúbü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladúga laríjubei lan larúgounga le yábei uboúagu, ¹⁰ ánjein eíbuga áriebe, lachúgeraguba ladúga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubeí, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmieguarügü arúmuguni ladímureja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladúga buítimaati ítara jun, afíñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun gíñe, jilá wamámuga úara lúma.

Jesúsu ásaaragüdübei lídaangiñe óuweni, ligía íchiga ibágari

¹⁷ Dan le lachúlürünbei Jesúsu, gádürüjali wéyu lueígiñe labunún Lázaro. ¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñúdüntiña Jerusaléngiñe bisídoun Márta túma María lun jíchugun ñurúguaü joun luágu loúnwen jamúlen. ²⁰ Dan tagáambunbei Márta luágu níteeli lan Jesúsu achúlüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²² áni subúditi nun luágu líchugubei lan Búngiu sun le bamúriajan lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaragüdübaliña jiláaña, rúneí jabágari joun lárigoún. Le afíñeti nuágu, gayáraati loúnwen, labágaridayaba, ²⁶ áni sun le wíngangilibei áni afíñeti

nuágu, labágariduba gíñe lúma Búngiu súnwandan.
¿Afíñetibu?

²⁷ Taríñaga lun.

—Ánja, Nabúreme, afíñetiña luágu bugúya lan Crís-tubei le Liraú Búngiu, lé meja lúnbei liábin ubouágun.

Layájun Jesúsu lubádu lumúaja Lázaro

²⁸ Lárigiñe taríñaguni Márta le, ába tídin ougoun María, ába taríñagun tun jóunguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrun, lídaañein fulásu le ñí lubei tadáreie Márta. ³¹ Dan le jaríjinbei juríu ja ñibaña múnada túma María ámalijoun tásaarun ába táfuridun furéseguena, ába jóudin tárigi, jarítangun luágu teíbuga lán yebe luágu umúajaü ayájua.

³² Dánti le tachúlürünbei María le ñíjin lubei Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, mouñwenti jamúga namúlen.

³³ Dan le laríjin Jesúsu tayájun María jáma juríu ja ñúbinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábati jaríñagun juríu.

—¿Aríja jumá luweírín meja línsiñe lun!

³⁷ Ñíñanu jádaangiñe aríñagutiña.

—Niján le aríjagüdübalin wügúri le maríjinbei, ¿siñátí jamúga funásan ladúgün lun mouñwen lan Lázaro?

Lásaarun Lázaro lídaangiñe ouweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dúbü, ñíñein ában dúbü lidaúme. ³⁹ Ába laríñagun Jesúsu.

—Gidájumei dúbü.

Ába taríñagun Márta lun.

—Mósutia jingiaali lan ladúga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigin Búngiu?

⁴¹ Ábati jagídaruni dúbü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina.

⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafíñerun luágu amúrú lan ouñajabalina.

⁴³ Lárigiñe laríñaguni cátei le, ába lagúaragun.

—¿Lázaro, furíba ñígiñe!

⁴⁴ Ába láfuridun jiláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumei, ígira jumei lun lídin.

Elédeguni lun lárügüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñúdümbaña túma María, aríja jamei le ladúgübei Jesúsu, ába jafíñerun luágu. ⁴⁶ Ñíñanu jádaangiñe, ába jóudin jámoun fariséogu, ába jabájüdaguni le ladúgübei Jesúsu joun. ⁴⁷ Ábati jayábin fariséogu jáma jábutigu fádirigu, ába jóundaragun jáma jíñun-ágei agúmadijatiña, ába jaríñagun.

—¿Cábasan wadúga? Ladáaguñatia wügúri le sarágu miláguru. ⁴⁸ Ánjeinti wígira ítara, jafíñeruba sun gürígia luágu, ábamei jayábin gumádimatiña Rómána, ábame jagúmochaguagüdünnun walígilisin láu sun warásan.

⁴⁹ Ñíñein ában jádaangiñe, gíriti Gáifasi, ligía jábutibeí fádirigu lídan irúmu ligía, ába laríñagun joun.

—Íbídiñeti ni cáta jun, ⁵⁰ maríjin jumei luágu buítima lan woun lun loúnwen ábanrügü wügúri jawágu jíbiri, máma lun lagúnrinchawagún sun warásan.

⁵¹ Máma láu láni Gáifasi lúngua laríñagei líra, ladúga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu loúweba lan Jesúsu jawágu juríu, ⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubei meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíriti Efraín, yaráfa lun fulásu mageírawati. Ába leréderun ñi jáma láni díspulugu.

⁵⁵ Yaráfaaliti jafédun juríu le giríbei páscua, sarágu jáña gürígia ñúdünnun Jerusalén lun jadúgüni igáburi le lánina jarúmadun lubáragiñe fédu ligía. ⁵⁶ Jáluajañeinti Jesúsu, dánti le témpulurugúñanu lan, ába jálügüda-jan jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dí múrei lun le lan asúbudiruti jalíañein lan Jesúsu, lun lan laríñaguni, barú jamámugei adáüra.

Tájurudaguni ában wúri lugúdi Jesúsu

(Mt 26.6-13; Mr 14.3-9)

12 Sísi wéyu lubáragiñe páscua, ába lídin Jesúsu Betánia, le ñí lubei lagánawa Lázaro le lásaaragüdübei jádaangiñe jílaaña lúnya labágaridun. ² Ába jadúgün ában adíneruni ñi luágu láni fuleísei, Márta, tugúya éjeeraguboun, Lázaro ában jádaangiñe ja ñúnbaña luágu dábula lúma Jesúsu. ³ Ábati tanúgün María ában paénti íbíñei le séruti, ába tájurudaguni lugúdi Jesúsu láu, ába tarágajani láu tídíburi, ába lejémougadun íbíñei ligía sun ñi múnada. ⁴ Ába laríñagun Júdas Iscarióte, le liraú Simón, ában jádaangiñe láni Jesúsu díspulugu, le méme lúnbei lalúguruni.

⁵ —¿Ánsan malúgurún lubei íbíñei le luágu úrüwasan fiádürü lun jíderawagún gudémetiña?

⁶ Laríñagunbei Júdas ítara, máma luágu berése lan jáu gudémetiña, laríñagunbei ítara ladúga jíweru lan, áni queíti ligía lan gámabarun lágei seínsu, ábaja líwerujan lídaangiñe le íchugúbei tídoun. ⁷ Ábati laríñagun Jesúsu lun.

—Ígiraboún, taráanseruñadina lubá lachúlürün luwéyuri nágunúniwa. ⁸ Súnwandan ñíbaña lan gudémetiña jídan, ánjeinti áu, mámaba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába jóudin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jílaaña. ¹⁰ Ába giñeti juáradun jábutigu fádírigo lídan ában lun gíñe jáfaruni Lázaro, ¹¹ ladúga sarágu jáña lan juríu adíseduntiña jaweí lun jafíñerun luágu Jesúsu, lídaangiñeti Lázaro.

Lebélurun Jesúsu ubúrugun Jerusalén

(Mt 21.1-11; Mr 11.1-11; Lc 19.28-40)

¹² Sarágu jáña güriña ñúdüntiña Jerusalén lubá fédu le páscua, larúgan, ába jasúbudiruni luágu lachúlürüba lan Jesúsu ñíjin ubúrugun. ¹³ Ábati játújan tubána fáluma, ába jáfuridun lubároun Jesúsu agúarajeina.

—¡Uweírighuni lun Búngiu! ¡Biníwati le ñúbinbei lídan líri Wabúreme! ¡Biníwati lurúeite Israél!

¹⁴ Ába ladárirun Jesúsu ában burígü, ába laweínruni quei laríñagun tídan Lerérun Búngiu.

¹⁵ Manúfudebá, ubúrugun le Sión, níten burúeite waríñu luágu ában burígü.

¹⁶ Úati yebe gunfaráanda jamáni láni disípulugu cátei le wéyu ligía, lárighiñe, dan le belújali Jesúsu lídoun luweírighun yágüta siélu, ába jarítangun luágu burúwa lan sun cátei le luágu, áni ítara líña lan lasúseredun lun.

¹⁷ Ja güriña ja ñíbaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei.

¹⁸ Ligía lébubei jáfuridun güriña eresíbirei Jesúsu, ladúga jagáambun luágu miláguru le ladügübei.

¹⁹ Ábati jaríñagun fariséogu jámagua.

—Aríja jumáli luágu, siñá lan ladügúniwa ni cáta, sun güriña añágüran lúma.

Jáluajani güriégu Jesúsu

²⁰ Níñanu güriégu jádan güriña ja ñúdünbaña Jerusalén lun jájuduragun lun Búngiu, ²¹ ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Busétiwa waríjini Jesúsu.

²² Ába lídin Felípe, ába laríñagun lun Andrés, ába jóudin biángubei jagía abájüdaguei lun Jesúsu. ²³ Ábati laríñagun Jesúsu joun.

—Chúlúja óra lun líchugúniwa uweírighuni nun, áu le Wügúri Garaúwarügüti. ²⁴ Ninárün jáu luágu ánjein lan máburujan ában lágu túriгу múarugun lun loúnwen,

ában mémebei águu, ánjein ouwe, lalúbajoúba sarágu lídaangiñe. ²⁵ Le jínsiñejabuti lun libágarí, leféridirubei, ánjein le mebéresenti láu libágarí lídan ubou le, larefídubei lubá íbágarí le magúmuchaditi, siélu. ²⁶ Le buséti lesériwidunina, lúnti lafálarunina, áni le ñí numuti, ñíbei gíñe le esériwidubalina. Le esériwidutina, líchuguba Núguchi uweírighuni lun.

Ladímurejan Jesúsu luágu loúnwen

²⁷ 'Níjein ában oúnwenbun líbe samínaü nuágu guetó. ¿Cábasan naríñaga? ¿Naríñaga funa. "Núguchi, sálba bána lídaangiñe le lúnbei lasúseredun nun guetó"? Uá, lun líra níabin. ²⁸ Núguchi, iñurúalá bíri nídaangiñe.

Ábati lagaambúniwa ában umálali siélugiñe le aríñagubei.

—Íñúra náali níri bídaangiñe, áni niñúruyabei.

²⁹ Ábati jaríñagun güriña ja ñíbaña agáambaja luágu wayújururu lan, jíbiri aríñaga.

—Ában ánjei adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein. ³¹ Niján dan ligía lun lagúserawagüdün ubou, áni guetóba leféridirei Máfia, le agúmadijabei lídan ubou le, lubáfu. ³² Dánmeti le niñurúniwa múarugugíñe, nanúgübaña súnugubei númoun.

³³ Láu líra laríñaguñein luágu loúweba lan luágu ában gurúwa. ³⁴ Ába jaríñagun güriña lun.

—Agáambaadiwa laliijóun tídan walíburun to lánina lilúrudun Moisés luágu labágariduba lan Crístu lun sun dan. ¿Ída liñáti baríñagunbei luágu liñurúaba lan Wügúri Garaúwarügüti? ¿Cáteigi Wügúri Garaúwarügüti ligía?

³⁵ Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáaraabei lan jachúlürün le ñíjin lubei jabúseera jachúlürün, márügüdün lámugaün lubúriga, ladúga le eíbuguti lídan lubúriga, ibídiñeti lun jalíñouñein lan. ³⁶ Afíñe jumá lubeíti nuágu sun anájagua lan júma lun lirájüñü jumá larúgounga.

Lárigiñe laríñaguní Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

³⁷ Láu sun adúga lan Jesúsu sarágu miláguru jagíbugiñe, mafíñetiña luágu. ³⁸ Láu líra jagúnfulirei le laríñagubei proféta Isaías.

¿Cásan afíñerubei luágu wáni ugánu?

¿Ca un larúfudei Wabúreme Búngiu lubáfu?

³⁹ Quei mafíñerun jabei, ába lasúseredun le ámu dimúrei le laríñagubei Isaías tídan labúrújan, joun.

⁴⁰ Darú lumuti Búngiu jaríjin, derégüda loun janígi, lun maríjin jamá láu jágu, úame gunfaráanda jamá,

mayábin jagíame nun lun nareídaguagüdüniña.
⁴¹ Laríñagunbalin Isaías le luágu Jesúsu ladúga aríja láali lan luweírigan.

⁴² Láu sun líra, sarágu jáña jádaangiñe juríu afíñerutiña luágu Jesúsu ásta jádaangiñe ábutigu, áni maríñagun jamúti bougudi, le janúfude jaweí fariséogu, lueí jabúguniña tídaangiñe jalígílisin.

⁴³ Ladúga gúndaatimaatiña láu inébesi le jíchugubei gürígia sügú láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

⁴⁴ Ába laríñagun Jesúsu láu umálali jéreti.

—Le afíñeti nuágu, máma rügúñein nuágu lafíñera, afíñeti gíñe luágu Nóguchi le oúnajabalina. ⁴⁵ Le gíñe aríjitiña, laríñein gíñe le oúnajabalina. ⁴⁶ Áu lámpubei, niábinbei ubouágun lun sun lan ja afíñetiña nuágu, merédera jamámuga lídan lubúriga. ⁴⁷ Ánjein le agáambuti nerérun áni madúgüti gásu láu, máma áu asíadirubalin, ladúga máma niábiña lun nasíadiruniña gürígia ubouágu, niábiña asálbaraña. ⁴⁸ Le mebéré-senti náu, madúgün ligía gásu láu nerérun, níjein lúnti lasíadiruni. dimúrei buri le aríñaga náalibeí, ligíaba asíadirei lídaanme lagúmujoún wéyu. ⁴⁹ Ladúga madí-murejaantina luágu náni núngua, Nóguchi le oúnajabalina, ligía aríñagubalin le lúnbei naríñaguni nun lúma le lúnbei narúfudajani. ⁵⁰ Áni subúdi numúti luágu barú lan lugúmadin Nóguchi ibágari magúmchaditi joun ja adúgübalin le lubeíbei. Le lubeíti naríñagubei, naríñaguni quei laríñaguni Nóguchi nun.

Lachíbuni Jesúsu jagúdi láni disípulugu

13 Ábanrugaali wéyu lubá fédu le páscua. Subúdi láali Jesúsu luágu chülúja lan óra lun lígiruni ubou le lun lídin lúmoun Lúguchi. Súnwandan meja jínsiñe jamá lánigu ja ubouagubaña lun, guetó larú-fuduñeinti línsiñejabu lídan luweírín-ágei.

² Dálaalíti Máfia larítagun tídoun lanígi Júdas Iscaríote lun ledéreguni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan gíñe Búngiu lagíribuda, luágu gíñe rúlaali lan Úguchili sun cátei lújaburugun, ába larúfuduni luweírín-ágei únabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáuragun, ába lagúrün ában tuáya liránaagua. ⁵ Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pedro, ába laríñagun lun.

—Nabúreme, ¿bachíbaalisan nugúdi?

⁷ Ába laríñagun Jesúsu lun.

—Guetó, úati gunfaráanda báni le nadúgübei, gunfaráanda bubeí lárígiñe.

⁸ Ába laríñagun Pedro lun.

—¡Machíbun bubeí nugúdi!

Laríñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába laríñagun Simón Pedro lun.

—Mámarügüla nugúdi bachíba, chibábei gíñe núbabu lúma nigíbu.

¹⁰ Laríñaga Jesúsu lun.

—Le sun liñábei lágoun, lugúdi rügúñein abúseera lachíbuniwa, ladúga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le laríñagunbei luágu máma lan sun jagía jarúmatiña, ladúga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáurunun gamísa to larágachuboun, ábaya lañúurun luágu dábula, ába laríñagun joun.

—¿Gunfaráanda jumútsan le nadúgübei jun?

¹³ Jugúya agúajatün nun Maésturu, lúma Nabúreme, áni richátün ladúga áu ligía, ¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti gíñe jachíbuni jugúdi júmagua. ¹⁵ Rújadina ában jém-pulu jun lun jadúgüni líbe méme le nadúgübei.

¹⁶ Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin.

¹⁷ Ánjein gunfaráanda jumá buri cátei le áni adúga jumeíme, gúndaabadün.

¹⁸ “Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúnfulírün le tídaanbei Lerérün Búngiu. “Garábagua le eígubei núma, nuágun.”

¹⁹ Naríñaguñein le jun lubáragiñe lasúseredun, lun dánme lan le lasúseredun, afíñe jumámuga luágu áu lan Crístubei. ²⁰ Ninárün jáu luágu le lan erésibiruti le nouñajan, resíbi lumútina gíñe, áni le erésibirutina, resíbi lumúti gíñe le oúnajabalina.

Ladímurejani Jesúsu luágu ledéregubei lan Júdas

(Mt 26.20-25; Mr 14.17-21; Lc 22.21-23)

²¹ Lásun laríñaguni Jesúsu sun cátei le, ába lasándirun sarágu íruni tídan lanígi, ába laríñagun furáangu.

—Ninárün jáu luágu ledéregubadina lan ában jí-daangiñe.

²² Ábati jagúmeserun disípulugu aríagua ja-wouguoún, ibídiñounga joun ca lan jádaangiñe uágubei ladímureja Jesúsu. ²³ Áu Juan, le abúrjubarun gárada to, ában jádaangiñe disípulugu, le weíríbei ínsiñe lun Jesúsu, loúbagiñeñádina lídan adíneruni,

²⁴ ába ladúgün Simón Pedro seíni nun lun nálügüdüni Jesúsu ca lan jádaangiñe uágubei ladímureja. ²⁵ Ábati nayárafaduntima lun Jesúsu, ába naríñagun lun.

—Nabúreme, ¿cáteisán lúnbei ledéregunibu?

²⁶ Ába laríñagun Jesúsu nun.

—Nadúdüragüda murúsun fein, le únti níchigoun, ligíaba edéregera.

Ábati ladúdüragüdüni murúsun fein, ába líchugunun lun Júdas Iscaríote, le liraú Simón. ²⁷ Quei lárügüdünnun Júdas fein tugúya, ítara lebéllurun Máfia tídoun lanígi. Ábati laríñagun Jesúsu lun.

—Le lúnbei badúgüni, adúgabei furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu laríñagei Jesúsu líra lun. ²⁹ Quei Júdas lubei táubei lágei seínsu, sun jaríñagun yebéti laríñaguña Jesúsu lun lun lagáñijani le jabúseerubei lubá fédu, o lun lan líchugun seínsu joun gudémetiña. ³⁰ Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába laríñagun Jesúsu.

—Laríjúa nuweírigun, áu le Wügúri Garaúwarügüti, guetó, arijúame luweírigun Úguchili nuágu. ³² Ánjeinti arúfuda nubálin luweírigun Búngiu, larúfudubei gíñe Búngiu nuweírigun, áni ladúgübei madíse. ³³ Nirájüñü, úaadináme júma sarágu dan. Jáluajabadina, le méme naríñagubei joun juríu naríñagayaali jun guetó. Siñábei jídin le ñíjinba lubei nídin. ³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti gíñe jínsiñegua jumá júngua. ³⁵ Ánjaün jínsiñegua júngua, jasúbudirubei sun gürígia luágu náni jumá disípulugu.

Ladímurejani Jesúsu luágu leyéedaguba lan Pédro luágu

(Mt 26.31-35; Mr 14.27-31; Lc 22.31-34)

³⁶ Ába laríñagun Simón Pédro lun Jesúsu.

—¿Jalíñounbadibusan, Nabúreme?

Ába laríñagun Jesúsu lun.

—Siñáti bafálarunina le ñíjinbadina lubei guetó, lachúlürüba wéyu lun bafálarubadina lan.

³⁷ Laríñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Laríñaga Jesúsu lun.

—¿Binárün luágu aráanse ban lun bíchuguni bibágaru nuágu? Ninárün báu luágu beyéedaguba lan náu úrüwa weíyaasu lubáragiñe layúgurujan gáyu.

Jesúsu, ligía úmabei lun lúmoun Úguchili

14 'Merédera jumá láu líbe samínaü, afíñe méme jumá luágu Búngiu, afíñe méme jugúyame nuágu. ² Níjein sarágu ubáraü tídan lúban Nóguchi lun jaganoún gürígia ñi, lun jamúga máma lan ítara líña, aríñaga náali jamúga jun. Neíbuga lubeíti aráanseja ában ubáraü jubá. ³ Lárigiñeme nídin, aráanse neíme ubáraü ligía, ábame nagíribudunya lun nanúgünün númagua, lun ñi jumá le méme ñí numuti. ⁴ Subúdi jumúti jalíñounbadina lan, subúdi jumúti gíñe úma.

⁵ Laríñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni úma?

⁶ Laríñaga Jesúsu lun.

—Lun lachúlürüniwa lúmoun Búngiu, áu úmabei, áu inárüni, áu ibágari. Nueígiñe rügúñein gayára lan lachúlürüniwa lúmoun Búngiu Úguchili. ⁷ Lun jamúga subúdi nan jun buídu, subúdi jumúti jamúga gíñe

Nóguchi, subúdi jumáaliti lúmagiñe guetó, ladúga aríjañaja jumáli láu jaríjinina.

⁸ Laríñagati Felípe lun.

—Arúfudabei Úguchili woun, buídurügaalime woun.

⁹ Laríñaga Jesúsu lun.

—Felípe, lújadina júma, ¿ibídiñegidina bun? Le aríjiti-na, laríjiñein gíñe Búngiu Úguchili, ¿cáti uágu baríñaga nun lun narúfuduni Búngiu Úguchili jun?

¹⁰ ¿Mafíñetibusan luágu anájein lan lídan Búngiu Úguchili, níjein lan gíñe Búngiu Úguchili nídan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoúbei nídan, ligía adúgübalin luwádigimari guánarü. ¹¹ Afíñe jumá nun luágu anájein lan lídan Búngiu Úguchili, áni lan níjein gíñe Búngiu Úguchili nídan, íbini luágurügü cátei lé buri nadúgübei, afíñe jumá nun. ¹² Ninárün jáu, luágu le lan afíñeti nuágu, ladúgübei lan cátei lé buri nadúgübei, ladúgüba buri cátei weínamutimaati, ladúga áu, neíbuga le ñíjin lubei Nóguchi. ¹³ Sun le jamúria-jan lídan níri, nadúgübei, arúfuda námugei luweírigun Nóguchi. ¹⁴ Nadúgübei furúmieguaügü cátei le jamúria-jan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ Ánjein jínsiñe nubei jun, gúnfuli jumá láu le nubeíbei, ¹⁶ ábame nayúmuragun lun Nóguchi lun loúnajajan ámu jun newéñegua lun líderagunün, lun gíñe líchugun gurásu jun. Ligíaba Sífiri Sándu le subúdi-jabúbei lun sun inárüni, júmabei súnwandan. ¹⁷ Ja lánigu ubou le, siñáti jerésibiruni Sífiri Sándu ligía, ladúga siñá lan jaríjini ni jasúbudiruni, ánjein jugúya, subúdi jumáli, ladúga níjein júma áni leréderuba jídan. ¹⁸ Mígirun nubádün jábugua, nagíribudayaba lun júma nan. ¹⁹ Málüjadina ánjana maríjin jamá gürígia, ánjein jugúya, jaríjubadina, áni gabágaribadün ladúga wínwañu níña lan. ²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nóguchi, jugúya nídan, áu gíñe jídan. ²¹ Le subúdi-jabuti lun nugúmadin áni úaragu ligía lúma, arúfuda lumúti luágu jínsiñe nan lun le tímatimaati. Áni jínsiñejabúbei Nóguchi lun le jínsiñejabuti nun, jínsiñebei gíñe nun, arúfudagua áume núngua lun.

²² Ába laríñagun Júdas (mámatia le Isarióte).

—¿Cásan uágu barúfudaguba lubei búngua woun, máma joun gürígia ja lánigu ubou le?

²³ Laríñaga Jesúsu lun.

—Le jínsiñejabuti nun, adúgati gásu láu le nubeíbei, áni línsiñeduba lun Nóguchi, ábame wayábin, áu lúma Nóguchi, agánawa lúma. ²⁴ Le mínsiñejabuti nun, madúgüti gásu láu le nubeíbei. Dimúrei le naríñagubei, máma náni, láni Nóguchi le oúnajabalina.

²⁵ 'Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Nóguchi lídan níri lun líderagunün, larúfudajaba jun, larítaguagüdübadün gíñe luágu sun le aríñaga náalibeí jun.

²⁷ 'Neíbuga júmagiñe, nígiraali ñurúguaü júma—ában luwúyeri ñurúguaü le áurügübei gayára lan

níchiguni. Mítaraanti queísi ñurúguaü le líchugubei uboú. Magíbedalá jisáminan, manúfude jugúyame. ²⁸ Agáamba jumáli naríñagun luágu neíbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Nóguchi, ladúga ligía íñugutimaati nueí. ²⁹ Ligía aríñaga gíñe nubálin le jun, lun dánme lan lasúseredun, afíñe jumámuga. ³⁰ Madímurejaanjadina sarágu júma, ladúga níteeli le agúmadijabei lídan uboú le. Láu sun mabáfu lan nuágu, ³¹ lúnti ítara lúba lan lun lasúbudiruni uboú luágu jínsiñe lan Nóguchi nun, áni adúga náni le lubeíbei nun. Sarájuma, queímoun yágíñe.

Tídibu beíbei lúma tilímun

15 Laríñaga Jesús. —Ítara níña quei ában tídibu beíbei le tímatimaati, Nóguchi, ítara líña quei le oúnigirubarun nádü. ² Chaún lumuti furúmieguaügü lídaangiñe nilímun le míinti, atírímuja lumúti le gíinbei, jarúmagüdaleí lúntima lagíindun. ³ Jugúya, jarúmaadün lárígi narúfudajan jun. ⁴ Lídan méme jumá ában núma quei lídaañadina lan ában júma. Ában límu siñáti lagíindun ánjein mámañein lubeí luágu ídibu, ítara jíña gíñe, siñáti jagíindun ánjein máma lubeí badúleñu jíña nuágu. ⁵ Áu ídibubei, jugúya límu. Le badúleñuti nuágu, badúleñu áu luágu, lagíinduba gíbe, siñáti jadúgün ni cáta úouga áu. ⁶ Le merédeti badúleñu nuágu, lágurúba bougudin, ábame lamábeidun quei buri límu le abúdajóubei lun lagudúniwa. ⁷ Ánjaün asígira badúleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jibíjubei. ⁸ Ibíjati Nóguchi inébesei dan le gíbe lan jagíindun, áni arúfuda jumúti luágu náni jumá disípulugu ja tímatimaatiña láu líra. ⁹ Jínsiñetün nun ítara quei nínsiñe lun Nóguchi, ítara méme jumá lubeíti lídan ínsiñeni le nánibei jun. ¹⁰ Ánjaün ñúdüñ láu le nubeíbei, lídan mémebadün ínsiñeni le nánibei jun, ítara quei nídin láu le lubeíbei Nóguchi, áni lídan mémeñadina ínsiñeni le lánibei nun. ¹¹ Nadímurejánbei jun ítara lun gayára lan jasúbudiruni úgundani le níchugubei, le gumúti. ¹² Níján nugúmadinbei. lun jínsiñegua jumá júngua quei jínsiñe nun. ¹³ Luweírín-ágei ínsiñeni le gayáraabei gáni láni gürígia, lun líchuguni libágari jawágu lumádagu. ¹⁴ Numádagu jugúya, ánjein jadúga le nubeíbei. ¹⁵ Manúgün náadün quei músu, ladúga ibídiñeti le ladúgübei liyúbudiri músu lun, nanúgünün quei numádagu ladúga subúdigüda náali sun le laríñagubei Nóguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagíindun gíbe, lun gíñe ladúrarun jin. Ítara lúba líchuguni Nóguchi sun le jamúriajan lúma lídan níri jun. ¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsú jáu sun lánigu lun uboú

¹⁸ Ánjaün iyéreeguda lun uboú, subúdi jumeí luágu áu lan iyéreegudubei lun furúmiñe. ¹⁹ Lun jamúga lánigu jumá uboú, jínsiñetün jamúga joun gürígia ja lánigu uboú quei jínsiñe jánigu joun. Anúadaja numútün jádaangiñe ja lánigu uboú, ligía jiyéreegunbei lun uboú ladúga mámaadün lan láni uboú. ²⁰ Jarítagua jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí, jeíbaajabadün gíñe, ánjein gíñeti madúgün jabeí gásu láu narúfudajan, madúgünbaña gíñe gásu jáu. ²¹ Jadúgübei sun le jun, nueígíñe, ladúga ibídiñe lan le oúnajabalina joun. ²² “Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figoú ligía. ²³ Ja iyéreejabúbaña nun, iyéreeguti gíñe Nóguchi joun. ²⁴ Madúnruntiña jamúga lun jamúga madúgün nan ni cáta le úagili adúgüti jagánagua, guetó aríja jamáli buri cátei ligía áni láu sun líra iyéreegugidina joun, iyéreegu gíñe Nóguchi joun. ²⁵ Wel, lasúseredunbei le ladúga lúnti lan lagúnfulirun dimúrei le bürúwañubei lídan jalúrudun. “Ába niyéreegudun joun, mébunouga.” ²⁶ Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loubadina Nóguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladúga númañadün lan lúmagiñe furúmiñeti dan. **16** ‘Naríñaguñein buri cátei le jun lun moúnwen lan jafíñen nuágu. ² Jabúgagubadün tídaangiñe jalígíisin, wuríbabei dan jun daríme lun ánjaün lan láfaragua furúmierügü gürígia jilágubei, larítaguba luágu lesériwiduñein lan Búngiu láu líra. ³ Jadúgübei líra ladúga masúbudirun jamágili lan Nóguchi, masúbudirun jamána. ⁴ Naríñaguñein le jun, lun dánme lan le lachúlürün dan ligía, lun jarítagun luágu aríñaga náali lán meja jun. **Le ladúgübei Sífiri Sándu** ‘Maríñagun numúti meja le jun lúmagiñe binárü ladúga meja júmañadina lan, ⁵ ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan, ⁶ jírurügütün luágu naríñaguni cátei lé buri jun. ⁷ Inárüni naríñagubei jun. buítimaati jun lun nídin, ladúga ánjana mídin, miábinbei Sífiri Sándu júmoun lun líderagunün, áni ánjana ñúdüñ, noúnajabei. ⁸ Dánme liábin, ladáraguagüdúbaña gürígia ja uboúagubaña jóungua luágu gafígoun jamá, luágu gíñe níjein lan ában úma le lánina úarani, luágu gíñe lagúseragüdúbaña lan Búngiu. ⁹ Larúfudubei joun luágu gafígoun jamá láu mafíñen jamá nuágu, ¹⁰ lasúbudiragüdúbei joun luágu úaragua nan, láu larúfuduni joun luágu nídiba lan le ñíjin lubeí Nóguchi dánme le nígirunün. ¹¹ Líchuguba

fe joun luágu lagúseragüdün Búngiu, ladúga agúser-agüda láali Máfia, le agúmadijabei lídan uboú le.

¹² Gíbegili lúnti naríñaguni jun, jásiñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabei sun inárüni jun, ladúga madímurejanbei luágu láni lúngua, le lagáambubei, ligíaba laríñaga. Lasúbudiragüdübei cátei lé buri lúnbei lasúseredun jun. ¹⁴ Líchuguba inébesi nun, ladúga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Nóguchi, náni gíñe, ligía naríñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ Málüjadina, ánjana maríjin jumá, múrusunmeya dan lárigiñe, ábayame jaríjinina, ladúga neíbuga le ñíjin lubei Nóguchi.

¹⁷ Ábati jálügdagun jádaangiñe láni disípulugu jámagua, ába jaríñagun.

—¿Cásan míni lan le? Laríñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladúga leíbuga lan le ñíjin lubei Lúguchi. ¹⁸ ¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálügdaguni, ába laríñagun joun.

—Aríñagatina jun luágu málüjadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügdagua júmagua? ²⁰ Ninárün jáu luágu jayájuba lan, jírugua jugúyame, ánjañati gürígia ja láni uboú le, jagúndaaruba. Láu sun líra, íbini jíru jumá, lasáansiraguba jírun lun ugúndanime. ²¹ Dan le tagúriajan lan ában wúri, súfuritu ladúga chülúja lan lórate igári, lásun agúriajoaali lan irájü, marítangunjaru luágu igári, ladúga ugúndani le tasándirubei luágu agúriajaaru lan ában irájü uboúagu. ²² Ítara líña gíñe, jugúya jírutün guetó, naríjayabadün, ábame tabuínchun janígi láu ugúndani, ában ugúndani le úati gayáraati lagídaruni jueí.

²³ Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nóguchi sun le jamúriajabei lídan níri lúma, jun. ²⁴ Chülú lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiragúbalin uboú

²⁵ Aríñaga náali buri cátei le jun láu jémpulu, inítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili. ²⁶ Lídaanme wéyu ligía, jamúriajaba lúma lídan níri, maríñaguntina luágu nayúmuraguba lan lun Nóguchi juágu, ²⁷ ladúga ligía guánarü jínsiñetün lun. Jínsiñetün lun ladúga jínsiñe nan jun, afíñeedün gíñe luágu lúmagiñe lan Búngiu niábin. ²⁸ Lúmagiñe Búngiu

Úguchili náfurida, ába niábin lídoun uboú le, guetó ní-giraali uboú le, neíbugaya lúmoun Nóguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurun-ga jémpulu. ³⁰ Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladúga subúdi báni jarítangun gürígia. Luágu líra wafíñera luágu lúmagiñe lan Búngiu biábin.

³¹ Ába laríñagun Jesúsu joun.

—¿Afíñeedüti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábuga, láu sun máma lan nábugañadina ladúga níjein Nóguchi núma.

³³ Naríñagunbalin sun le jun, lun jadárirun ñurúguaü lídan jafíñerun nuágu. Jasúfuriruba uboúagu, ganígi jumá, ¡sirígua náali uboú!

Layúmuragun Jesúsu jawágu láni disípulugu

17 Lárigiñe laríñaguni Jesúsu sun cátei le, ába laríjin siélun, ába laríñagun.

—Nóguchi, chülúja nidáani, rúba inébesi luágu Biraú, ru lámuga gíñe Biraú inébesi bun. ² Rújadibu ubáfu lun Biraú jawágu sun gürígia lun líchugun ibá-gari magúmchaditi joun ja bíchugubaña lun. ³ Niján lébunabei ibá-gari le magúmchaditi, lun jasúbudirunibu gürígia amúrü le Búngiu ábanrügüti, le inárüti, lúma lun jasúbudirunina, áu Jesucrístu le boúnajabei.

⁴ Rújadina uweíriguni bun ya uboúagu, gumú nan gíñe le uágubei boúnajana. ⁵ Guetóti Nóguchi, rúbei uweíriguni le méme méja nánibei nun biñúwarü lubáragiñe meja ñi lan uboú.

⁶ Subúdigüda náali joun ja baságarubaña lídaangiñe uboú lun bíchuguniña nun, cátabu lan. Bánigu meja, ába bíchuguniña nun, ñúdüntiña láu le bubeíbei.

⁷ Guetó, subúdi jamáali luágu sun lan le bíchugubei nun búmagiñe lan liábin, ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, afíñeeña gíñe luágu amúrü lan oúnajabalina.

⁹ Ayúmuraguntina bun jawágu, mayúmuraguntina jawágu lánigu uboú, nayúmuragun jawágu ja bíchugubaña nun, ladúga báni jamá. ¹⁰ Sun le náni, báni, le báni, náni, arijúati nuweírigun jawágu.

¹¹ Áu, meréedina uboúagu, ánjein jagía, jeréderuba. Áu, neíbuga búmoun. Nóguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma.

¹² Dán meja le jáma nan uboúagu, toúnigi numútiña meja ja bíchugubaña nun láu bubáfu, meféridiruntina ni ában jádaangiñe lueídügü Júdas, lun lagúnfulirun le búruwañubei tídan Berérun.

¹³ Guetó, neíbuga le ñíjin bubeí, luágu anájagua lan uboúagu aríñaga numúti buri cátei le lun jabuínchun láu ugúndani méme le nuágubei. ¹⁴ Rúnaali berérun joun, ába jeyéregudün lun uboú, ladúga máma jamá lánigu uboú ítara queísi máma lan lánigu uboú áu.

¹⁵ Mamúriajaantina búma lun baságaruniña

ubouágugiñe, namúriajan búma lun batoúnigiruniña lueí Máfia. ¹⁶ Ítara quei máma lan láni ubou áu, máma gíñe láni ubou jagía. ¹⁷ Derégeguagüda báña jóungua bun, láu lubáfu berérun le inárütibeí. ¹⁸ Quei bouñajarina jádoun lánigu ubou láu ugánu lánina asálbaruni, ítara gíñe nouñajaniña jádoun lánigu ubou láu ugánu ligía. ¹⁹ Áni derégeguatina núngua bun jawágu, lun gíñe jedégereragun jóungua bun le tímatisaati.

²⁰ Máfia rüguñein jawágu namúriaja búma, amúriajatina gíñe jawágu ja lúnbaña jafíñerun nuágu dánme le jagáambuni ugánu lánina asálbaruni jamagiñe.

²¹ Amúriajatina búma lun lídan jamá ában sun jagía, lun ában méme jamá cátei wáma quei áu búma, amúrü núma, lun lídan jamá ában buídu buídu, lun lafíñerun ubou luágu bouñajan nan. ²² Rúnaali uweírugini le méme bíchugubei nun joun, lun ában méme jamá cátei quei ában méme wamá cátei áu búma, ²³ áu jádan, amúrü nídan, lun jayábin lun ában mémebaña lan buídu buídu, subúdi lámugei ubou luágu bouñajan lan áu, áni jínsiñe jamá bun sarágu quei nísíñe bun.

²⁴ Nóguchi, amúrü íchugubaliña nun, buséntina lun númabaña lan le ní numuti, lun jaríjini uweírugini le bíchugubei nun, ladúga jínsiñegubeiñadina bun lubáragiñe ladügúniwa ubou. ²⁵ Nóguchi richáguati, ibídíñetibu lun ubou, subúditibu nun, subúdi jamáli gíñe wügúriña ja luágu bouñajan lan áu. ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun gíñe ñi nan já dan.

Janúgüni Jesúsu adáúra

(Mt 26.47-56; Mr 14.43-50; Lc 22.47-53)

18 Lárigiñe laríñaguni Jesúsu cátei le, ába láfuridun jáu láni disípulugu lun jóudin loubáfurugun dúna le cedrón. Níñein ában fulásu lé buri ní lumuti tídibu olívos, ñíjin lubeí lebelura Jesúsu jáu láni disípulugu. ² Subúdi lumúti gíñe Júdas le alúgurubalin Jesúsu, fulásu ligía, ladúga oúndaraguañaalaí Jesúsu ñi jáma láni disípulugu. ³ Ába lubeíti lachúlürün Júdas ñíjin jáu sarágu súdeara jáma polisía ja tánina témpulu, jóunajan jábutigu fádorigu jáma fariséogu. Gárumatetiña, barútiña gíñe lámpu lúma tóchi. ⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edégerubalin jáma. ⁶ Dan laríñagunbei Jesúsu joun luágu ligía lan le jáluajabei, ába jeíguadunga múarugún janagoún. ⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágu áu lan. Ánjein áu lubeí jáluajabei, ígira jumáña ja lun jóudin.

⁹ Lasúseredunbei líra lun lagúnfulirun le laríñagubei Jesúsu guánarügü. “Meféridirúnti ni ában jádaangiñe ja líchugubaña Nóguchi nun.” ¹⁰ Ábati laságarunun Simón Pédro lefeínte, ába líbuguni larígei ában lumúsun fádori le íñutimaabei gíríti Málco. ¹¹ Ába laríñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni ouchwagúni le líchugubei Nóguchi lun nasúfuriruni?

Jesúsu ligíbugiñe fádori le íñutimaabei

(Mt 26.57-58; Mr 14.53-54; Lc 22.54)

¹² Ábati janúgüni súdeara, lúma gumándan, jáma japolisían juríu, Jesúsu adáúra, ába jagúraguni. ¹³ Lárigiñe, ába janúgüni lúbiñoun Anás. Anás ligía limédamurubei Gáifasi, fádori le íñutimaabei lídan irúmu ligía. ¹⁴ Gáifasi ligía, le méme meja aríñagubei joun juríu luágu buítima lan joun lun loúnwen ában wügúri jawágu sun mútu.

Leyéedagun Pédro luágu subúdi láni Jesúsu

(Mt 26.69-70; Mr 14.66-68; Lc 22.55-57)

¹⁵ Ába wóudin, áu Juan lúma Simón Pédro, lárigi larígi Jesúsu. Áu, subúditina lun fádori le íñutimaabei, ábati nebelurun lúma Jesúsu lídoun tübúrürü lúban fádori, ¹⁶ ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to ouñigirubalin béna, ába nebelaagüdüni Pédro. ¹⁷ Ábati tálügüdüni ouñigirutu béna Pédro.

—¿Ma bugúya ában jádaangiñe láni gürígia le disípulugu?

Laríñaga Pédro.

—Uá, máma áu.

¹⁸ Queíti díliga lubeí, fúguatiñati músu jáma polisía wátu, rára jañáti ñi abácharagua. Níñein gíñe Pédro jáma, abácharagua larúgürügü wátu.

Lálügüdaguni fádori le íñutimaabei Jesúsu

(Mt 26.59-66; Mr 14.55-64; Lc 22.66-71)

¹⁹ Ába lagúmeserun fádori le íñutimaabei álügüdaguei Jesúsu cátaña lan lánibaña disípulugu, cátei lan gíñe larífudajabei. ²⁰ Laríñaga Jesúsu lun.

—Bougudi nadímureja ligíbugiñe sun ubou, súnwandan narífudajan tídan ligílisi lúma témpulurugu le ní lubei jóundaragua sun juríu, madúgüngidina lubeíti ni cáta arámudaguati. ²¹ ¿Ca uágu bálügüdana? Álügüda báña ja agáambubalina, jagialá aríñagei le uágubei nadímureja joun. Subúdi jamúti le naríñagubei joun.

²² Dan laríñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagun, ába laríñagun lun.

—¿Ítara lúba bouñabuni fádori le íñutimaabei?

²³ Laríñaga Jesúsu lun.

—Ánjein aríñaga nubeí wuríbati, aríñagabeí jalíañein lan luríban, ánjeinti buídu lubeí le naríñagubei, ¿ca uágu bagáyuaja nuágu?

²⁴ Ábati loúnajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu
(Mt 26.71-75; Mr 14.69-72; Lc 22.58-62)

²⁵ Sun dan le, nijágua Pédro abácharagua larúgürügü wátu, ába jaríñagun lun.

—¿Másan amúrü ában jádaangiñe láni gürígia le dípulugu?

Ába leyéedagun Pédro, ába laríñagun.

—Uá, máma áu.

²⁶ Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ní lumuti tídi bu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto
(Mt 27.1-2, 11-14; Mr 15.1-5; Lc 23.1-5)

²⁸ Ábati janúgüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebélutiñati juríu palásiurugún lueí marúma jamá, siñáme gádan lániña adíneruni le lánina páscua. ²⁹ Ligía láfuridunbei Piláto lun ladímurejan jáma, ába laríñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madúgün lan wuríbani, medéregerun wamúti jamúga bun.

³¹ Ábati laríñagun Piláto joun.

—Barújumei, agúseragüda jumeí quei laríñaguni jilúrudun guánarü.

Jaríñaga juríu lun.

—Wagía juríu, maríchatywa lun wáfarun ni ában jilágubei.

³² Ítara líña lagúnfulirún le laríñagubei Jesúsu luágu ligáburí ída lúba lan loúnwen. ³³ Ábaya lebélorun Piláto palásiurugun, ába lagúarun lun Jesúsu, ába laríñagun lun.

—¿Amúrü Jarúeitebeí Juríu?

³⁴ Ába laríñagun Jesúsu lun.

—¿Luágu báni búngua bálügüdaja luágu líra, ódi ladúga jaríñaguni ámu bun nuágu?

³⁵ Laríñaga Piláto lun.

—¿Juríu funági áu? Binásiñun jáma jábutigu fádorigu, jagía edéregerubalibu nun. ¿Cági bidúnrunbei?

³⁶ Ábati laríñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati laríñagun Piláto lun.

—¿Urúei lubeíti amúrü?

Laríñaga Jesúsu lun.

—Urúei áu quei baríñaguni. Agúriajouátina, ñúbin áu lídoun ubou le lun naríñaguni le inárünibeí. Sun ja

gagáambadibaña lun inárüni, agáamba jamúti le naríñagubei.

³⁸ Laríñaga Piláto lun.

—¿Cáteiti inárünibeí?

Lasádirúniwa Jesúsu lun ouweni
(Mt 27.15-31; Mr 15.6-20; Lc 23.13-25)

Lárigiñe ladúgüni Piláto álügüdajani le, ábaya láfuridun adímureja jáma juríu, ába laríñagun joun.

—Madáritina ni murúsun dúru luágu wügúri le.

³⁹ Quei jéchu jumá lun nígiragüdün ában adaürúti jun lídan fédu le láni páscua, ¿buséntün lun náfuridagüdüni Jesúsu le jarúeitebeí juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda! Barabási ligía, ában jíwer uti.

19 Ábati lanúgüni Piláto Jesúsu, ába loúnajan abeíchagüdei, ² ába jíchugun ában súdeara ába rídi láuti jíyu leréberugu Jesúsu, ába jadáüraguagüdüni táu ában anáanguni colóru gúchu. ³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuañan ligíbuagun.

⁴ Ábayati láfuridun Piláto, ába laríñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati laríñagun Piláto joun.

—¡Niján wügúri ligía!

⁶ Dan jaríjinalin jábutigu fádorigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barújumeiti, dágua jumeí luágu gurúwa, ladúga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni según walúrudun, lúnti loúnwen ladúga laríñagun luoúgua luágu Liraú lan Búngiu.

⁸ Dan lagáambunbalin Piláto le, ábatima lanúfudun. ⁹ Ábaya lebélorun palásiurugun, ába laríñagun lun Jesúsu.

—¿Jalíanasan amúrü?

Moúnabunti Jesúsu ni cáta.

¹⁰ Ábati laríñagun Piláto lun.

—¿Moúnabun bumútina? ¿Ibídiñetisan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubeí lidúnrun le edéregerubalina bun sügú báu.

¹² Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.

—¡Ánjein bígiragüda, máma amúrü lumáda urúei Rómana! ¡Furúmieguarügü le aríñaguti luoúgua luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan asá-garei Jesúsu, ába lañúurun luágu jalaú le agúseragülei, ubáraü le únbei jaríñaga Dúbü, Gabáta lídan jerérun juríu. ¹⁴ Queí buri amídirugujaali, le ában wéyu lubá páscua. Ábati laríñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa? Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, aba ledégereruni Piláto joun lun lá-darawagún luágu gurúwa, ába janúgüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barúinaleí lugúruwan lun lídin lídoun fulásu le únbei jaríñaga Lufúlasun Lábu Ichúgü, Gólgota lídan jerérun juríu. ¹⁸ Ñi jádaraguei luágu gurúwa, dágua jagía bián wügúriña úara lúma, ában lueígiñe cáda louba. ¹⁹ Ába loúnajan Piláto íchigagüda ában abúrújoúni luágu gurúwa, laríñaga ñi. “Jesúsu Nazarétna, Jarúeite Juríu”. ²⁰ Sarágu jáña jádaangiñe juríu alíjati abúrújoúni ligía ladúga fulásu le ñí lubei jádaraguei Jesúsu luágu gurúwa, madíseti ubúrugugiñe, áni abúrújoúati abúrújoúni ligía lídan buri dimúrei hebréo, güríegu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabúrüdabá ñi “Jarúeite Juríu”, bürúba “Le aríñagubei luágu Jarúeite lan Juríu.”

²² Ába laríñagun Piláto joun.

—Le bürúnaalíbei bürúnaalíbei, ítara lúba.

²³ Lárigiñe jádaraguni súaara Jesúsu luágu gurúwa, ába janúgünun lanáangun, ába jadúgün gádürü fánreinti táu, ába fánreinti lun cáda súaara. Ába giñe janúgünun lisímisin, quei májüchawagún tubeí, ában rügüñoun fiésu íñugiñe lun únabun, ²⁴ ába jaríñagun súaara jámagua.

—Majeíridagua wamoún, ájurera wamá tuágu, aríja wamámuga cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurera jagía tuágu nisímisin cába lan agáñiroun.” Ítara líña lubeíti jadúgüni súaaragu.

²⁵ Ñíñoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶ Dan laríñabarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraú.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladúgüni luágu wasá-barun, ába laríñagun, lun lagúnfulirún le taríñagubei Lerérun Búngiu.

—Mágürabujadina.

²⁹ Ñíñein ában fúdu táu diweín garújütu, ába jadúdüragüdün ában mudúsi tídan diweín tugúya, ába jíchuguni luágu ában wéwe, ába jiñúrui luágun liyúma. ³⁰ Ába látunun Jesúsu diweín garújütu tugúya, ába laríñagun.

—Gúnfulija sun cátei.

Ába larábachun ligiina, ába loúnwen.

Límiruni ában súaara louba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu gürígia luágu gurúwa lídan wéyu le eméraaguagülei, ladúga weíriti wéyu ligía. Ligía jamúriaajaanbei lúma Piláto lun loúnajan ájalajei járuna ja dáwaguñubaña luágu gurúwa, lun giñe lagídarún jágubu ñígiñe. ³² Ábati jóudin súaara, ába jájalachuni lúruna furúmiñeti, jalá jameí lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáli lubeí lúruna.

³⁴ Ába liábin ában súaara, ába límiruni Jesúsu loubawagun táu ában efeín, ába láfuridun jítaü lúma dúna ñígiñe. ³⁵ Áu Juan, le abúrújabalin le, ában le aríjubilin, áni aríñaga numúti inárüni, subúdi numúti luágu aríñaga nání inárüni lun giñe jafíñerun jugúya. ³⁶ Ladúga lasúseredunbei buri cátei le, lun lagúnfulirun le taríñagubei Lerérun Búngiu. “Májalachúnwabei ni ában ábuu luágu.” ³⁷ Aríñagati giñe tídan Lerérun Búngiu. “Jaríjubei le jímiragubei.”

Lábunajoún Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, ñíñein ában wügúri Arimatéana, gíriti José, falá lumuti meja wügúri ligía Jesúsu, láu sun arámudaguarügü lan ladúga lanúfude jaweí juríu, ába lamúriajani lúgubu Jesúsu lúma Piláto. Ába líchuguni lun, ába lanúgüni José lúgubu Jesúsu.

³⁹ Ába giñe liábin Nicodémo, lé meja ñúdünbei ayánuja lúma Jesúsu gúñoun, ába liábin láu sarágu ibíñei.

⁴⁰ Ábati janúgüni José lúma Nicodémo lúgubu Jesúsu, ába jóiburaguni táu gamísa to túaguatu láu ibíñei ligía según jagáburi juríu lubá jábunajan. ⁴¹ Ñíñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñíñein ában umúajaü iséri le mayúsurungili. ⁴² Ñíjin jíchigei lúgubu Jesúsu, ladúga yaráfa lan umúajaü ligía, ladúga giñe agúñeeli lan, gumése wéyu le eméraaguagülei.

Lásaarun Jesúsu lídaangiñe óuweni

(Mt 28.1-10; Mr 16.1-8; Lc 24.1-12)

20 Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachúlürünbei ñi, úaali dübü le lidaü umúajaü ñi. ² Ába tídin eibaagueina le ñijin wabeí áu lúma Simón Pédro, ába taríñagun woun.

—Barújama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába woúdin luágun umúajaü. ⁴ Úara woúdin biángubei wagía eíbaagueina, furésetina lueí Pédro, ába nachúlürün furúmiñe luágu umúajaü. ⁵ Ába nélemuchun aríja ñijin, gamísa rügúñoun naríja ñi, mebelútina. ⁶ Lárigiñe, ába lachúlürün Simón Pédro, ába lebélorun lídoun umúajaü. Gamísa to aúboun lagúrawagua Jesúsu, tugúya rügúñoun gíñe laríja ñi. ⁷ Gamísati to áboun loúbarawagúa lichúgü Jesúsu, máma lídaañoun ában túma tó buri áboun lagúrawagúa, jóuburagu tíña, tábugua. ⁸ Ába giñéti nebélorun, ába naríjini le asúseredubei, ába nafíñerun luágu saráali lan Jesúsu lídaangiñe óuweni. ⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe óuweni. ¹⁰ Ábati wagíribudun wábiñoun.

Larúfudagun Jesúsu lúngua tun María Magdaléna

(Mr 16.9-11)

¹¹ Ánjounti María, ába teréderun boúgudi ayájuaa lubádu umúajaü. Sun nuján lan ayájua, ába télemuchun aríja lídoun umúajaü, ¹² ába taríjin bián ánjeligu, jarútu jadáüragun, ñun le ñí lubeí buga lúgubu Jesúsu, ában lichúgügiñe, ában lugúdigiñe. ¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barújama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le óunigirubalin fulúri-ágei adímurejabei tun, ába taríñagun lun.

—Ánjein banúgün lubeí, aríñagabeí nun jalía lan bíchigei, barú námugei.

¹⁶ Ábati laríñagun Jesúsu tun.

—¡María!

Ába tagáraragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdbabá nuágu, ladúga mawéinrungidina le ñijin lubeí Nóguchi. Beíba, baríñagame joun náni disípulugu luágu neíbuga lan le ñijin lubeí Nóguchi, le gíñe Jóguchi, Nubúngiute le gíñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñagun joun.

Larúfudagun Jesúsu lúngua joun disípulugu

(Mt 28.16-20; Mr 16.14-18; Lc 24.36-49)

¹⁹ Wéyu méme ligía gúñoun, oúndaragu jáña disípulugu, darúgu béna jáu ladúga janúfude jaweí juríu. Ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñagun líra, ába larúfuduni lújabu lúma loúba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilaü jídan. Ítara quei loúnajanina Nóguchi, ítara líña gíñe noúnajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu. ²³ Ánjein ferúduna jumá jafígoun ámu, ferúdnawaali, ánjein úa ferúduna jumáni, reídeijali, úouga ferúdnawa lan.

Laríjini Tomás Jesúsu lárigiñe lásaarun lídaangiñe óuweni

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le lábinbei Jesúsu.

²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun loúba, siñábei nafíñerun.

²⁶ Wídü wéyu lárigiñe, oúndaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun noúba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladúga aríja báadina lan, gúndaatiña ja afíñerubaña, maríjinga jamána.

Ca lan lébubei tabúrjoun líburu to

³⁰ Adúgayati Jesúsu ámu sarágu miláguru jagíbugiñe láni disípulugu, le úabei búrüñu tídan líburu to.

³¹ Labúrüdúnbei buri le lun jafíñerun luágu Jesúsu lan Crístubei, le Liraú Búngiu, lun gíñe láu lan jafíñerun, gabágarí jumá queísi lánigu.

Larúfudagun Jesúsu lúngua joun sédü jádaangiñe láni disípulugu

21 Lárigiñe, ábaya larúfudagun Jesúsu lúngua joun láni disípulugu láru dúna le gíribei Tibérias. Ni-

ján ligáburí ladúgüni. ² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóudin, mañúguntiña ni cáta áriebe ligía. ⁴ Dan le arúgadeina lan, ába jaríjini Jesúsu ñi lárú dúna, ibídiñetí yebe joun disípulugu luágu Jesúsu lan. ⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma luegiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jibe úduraü tídan. ⁷ Ábati naríñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáürunun lanáangun, ába lachúbarun dúnarugun.

⁸ Ja jíbiri disípulugu, ába jóudin lárún béya táu ugúnein, adúrujeina jamoún séni buin jáu úduraü, quei ában rügúñein lan san bádun jadíse lueí béya.

⁹ Dan le jarárirun múarugun, ába jadárirun wátu gemetí láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹ Ába ládínun Simón Pédro tídoun ugúnein, ába ladúrujanun séni lárún béya buin jáu úduraü weínamutiña, san dimí-san úrüwañanu, láu sun jibe, majeíridaguntu séni. ¹² Ábati laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álügüdüti cátei lan, ladúga subúdi jamáni luágu Jesúsu lan. ¹³ Ába liábin, ába lanúgünun fein lújaburugu, ába líchugunun joun, ligía méme ladúga láu úduraü.

¹⁴ Ligía lúrüwan larífudagun Jesúsu lúngua joun láni disípulugu lárigi lásaarun lídaangiñe ouweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraú Jonás, ¿jínsiñetinasan bun sügú jáu ja?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti.

¹⁶ Ábaya lálügüdüni luágu libíaman weíyaasu.

—Simón, liraú Jonás, ¿jínsiñetinasan bun le tímati-maati?

Laríñaga Pédro lun.

—Ánja, Nabúreme, subúdi bun luágu jínsiñe ban nun.

Laríñaga lun.

—Toúnigi báñati nánigu.

¹⁷ Ábaya lálügüdüni luágu lúrüwan weíyaasu.

—Simón, liraú Jonás, ¿jínsiñetinasan bun?

Ába lírudagun Pédro ladúga lálügüdüni Jesúsu luágu lúrüwan weíyaasu ánjein jínsiñe lubeí lun, ába laríñagun lun.

—Nabúreme, subúsi sun cátei bun. Subúsi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún

buíti. ¹⁸ Ninárün báu, luágu dan lán meja ñúraütimagidibu, ábaja badáuragun, ába bídin le ñíjin lumúti babúseera, dánme le weíyaadibu,

iñúrarügübalime barúna, ábame ladáüraguagüdüni bu ámu, ábame lanúgünibu le ñíjin lumúti mabúseerun ban bídin.

¹⁹ Láu laríñaguní Jesúsu cátei le, lasúbudiragüdüñein ída lúba lan ligáburí loúnwen Pédro, lun líchugun uweíriguní lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loúbagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei. ²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amúrü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, maríñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abúrúja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladúga Jesúsu, ánjein jamúga abúrújoúa ában ában, afíñetina luágu mábara tan jamúga buri líburu to abúrújoútu láu lídan sun ubóu.

HECHOS

Loúnajani Búngiu Sífiri Sándu

1 Lun teófilo.

Abúrüjatina bun tídan furúmiñetu nigáradan luágu sun le ladúgübei Jesúsu, lúma le larúfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga lumúti cátei lé buri labúseerubei lun jadúgüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lí-daangiñe ouweni, arúfudaguati lúngua furáangu joun sarágu weíyaasu luágu wínwan lan. Ába buríti ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lí-daangiñe ubúrugugun Jerusalén, laríñaga joun.

—Agúraba jumá lagúnfulirun dimúrei le líchugubei Nóguchi jun, le uágubei naríñaga jun. ⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu máljadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oundaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladúgei Nóguchi cátei le buri, ligía rügüñein gayára laríñagun ídame lan ladúgei. ⁸ Anjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun loubawagu Judéa, Samária, chülú lúmoun lidíse-ágei fulásu ubouágu.

⁹ Lárigiñe laríñaguni Jesúsu cátei le, sun añája lan aríaguei, ába liñurúniwa lun lanügúniwa siélun, ába liábin ában juánriñu, ába ladáuragun láu, ába maríjin jamáali lan. ¹⁰ Níñanu aríagua siélun sun amúdeireina lan Jesúsu, ligía jasáriragun bián wügúriña, jarútu jadáuragun jarúgabú, ¹¹ ába jaríñagun joun.

—Wügúriña Galiléana, ¿ca uágu jerédera aríagua siélun? Jesúsu méme le, le amúdeirubei siélun jumagiñe, liábiyaba ítara quei jaríjin lídin.

Lanúadirún Matías lewéñeguame Júdas

¹² Ábati jagíribudun disípulugu lueigiñe wúbü le gíribei Olívos lun ubúrugun Jerusalén, lidíse ában

kilómetro. ¹³ Dan le jachúlürünbei ubúrugun, ába jamúdeirun tídoun rúmu to ní lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraú Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo. ¹⁴ Oúndaraguatiñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würiña.

¹⁵ Luágu ában wéyu lídan dan ligía, ába laráramun Pédro jagíbugiñe sun affíñetiña ja ñibaña—jawára sanwein gürígia—ába laríñagun joun.

¹⁶ —Nidújeñu, lúnti buga lagúnfulirun le laríñagubei Sífiri Sándu liyúmulugugiñe Davíd tídan Lerérún Búngiu, lídan le ladímurejánbei luágu Júdas, le adundejabáliña ja anúgübalin Jesúsu adáüra. ¹⁷ Ában meja jádaangiñe wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeirúbei lun luágu wuríbani le ladúgübei. Ába láburujan láu lúblulugu únabun, ába lafáüñchün, ába láfuridun sun litíripan. ¹⁹ Dan le jagáambunbalin gürígia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jí-taü.

²⁰ Ába lasígirun Pédro aríñaga.

—Bürúwañu líña dimúrei buri le luágu Júdas tídan líburu to gíriboun Sálmos. Laríñajare ní.

Reídeitá lúban málouga,
ú a jamá aganoútiña tídan.
Aríñagati gíñe ní.

Rúalá lubára lun ámu.

²¹ Ítara líña lubeiti, lúnti wanúadajan ában wügúri wádaangiñe lé meja wámati sun dan le wáma lubei Jesúsu, ²² lúmagiñe dan le labásterágüdünbalin Juan Jesúsu darí lúmoun dan le lamúdeirúnbei siélun, lun lewéñegua lan Júdas. Wügúri ligía, líchuguba fe úara wáma luágu lásaarun Jesúsu lídaangiñe ouweni lúnya labágaridun.

²³ Ábati jíridun bián jádaangiñe. José, le méme gíribei Barsabási, le méme gíñe gíribei Jústo, lúma Matías.

²⁴ Ába jayúmuragun lun Búngiu ítara.

—Wabúreme, amúrú le subúdiñabubei tun janígi sun gürígia, arúfudabei woun ca lan jádaangiñe bián wügúriña ja anúadira báalibe ²⁵ lun lesériwidunibu queisi apóstolu lewéñegua Júdas. Ladúga féridi láali Júdas lubára ladúga lafigounjan, áni ñúdüñja lídoun fulásu le ladúnabei.

²⁶ Ábati jíchaajan ubúnuruni, ába láburujan luágun Matías. Lúmagiñe óra ligía, ába ábanjali lan jádaangiñe apóstolugu.

Liábin Sífiri Sándu

2 Dan lachúlürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñúbinti siéluigiñe quei dan le láfurun ában garábali jéreti, ába lagaambún tídan sun múna to ñí jabei. ³ Ábati lasáli-ragún buri cátei joun camá ligémeri wátu, afánrein-jouáñu lun ñi lan ában murúsun lougiñe lóbulugu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwúyeri dimúrei lueí jerérun quei ladímuregüdüniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñúbintiña lídaangiñe sun fulásu ubouágu. ⁶ Dan le jagáambunbalin ireíni ligía, ába joundaragunga gürgía, ibídiñeja joun cába lan jasáminara ladúga cáda ában jádaangiñe gürgía jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe? ⁹ Añájein gürgía Pártiana ya, Médi-ana, Elámna, Mesopotámiana, Judéana, Capadócia, Póntona jáma Ásiana, ¹⁰ Fríjiana, Panfíliana, Ejíptona luma lídaangiñe buri fulásu África le yagúroun mémebei lueí Ciréne. Añájein giñe Rómána aganóutiña ya, añájein jádaangiñe, juríu ladúga juríu jamá jagúbürigu, jíbiri, barú jamaali ligáburi jafíñen juríu. ¹¹ Añájein giñe gürgía Crétana jáma Arábiana, sun wagía agáamba wamútiña adímureja luágu luweírigun Búngiu lídan werérun guánarü.

¹² Weíríti janígi súnqubei, ibídiñeja joun cába lan jasáminara, ába buri jálügdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun gürgía ja ñíbaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügúriña Judéana jáma sun ja aganóubaña Jerusalén, agáamba jumeí le lúnbei naríñaguni jun buídu, subúdi jumámugei ca lan lílabei cátei le jaríjubei.

¹⁵ Mabácharuántiña wügúriña ja quei jarítagun, néfugubeigili bináfin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagunbei.

¹⁷ Lídoun buríme lagúmujoun wéyu, líña laríñagun Búngiu,

nóunajabei náni Espíritu jádoun sun gürgía, nadímurejaba jayúmulugugiñe jisáanigu. Nayáwadaguba joun irájüñü, luma joun weíyaaña mútu.

¹⁸ Nóunajabei giñe náni Espíritu jádoun ja eséri-widubaña nun lídoun buri wéyu ligía, wügúriña jáma würiña,

ábame nadímurejan jayúmulugugiñe.

¹⁹ Narúfuduba buri cátei garíyawaseti siélu, narúfuduba seíni ubouágu.

láubei jítaü seíni buri ligía, láu wátu geméti, luma láu juánriñu láuti gumúlali.

²⁰ Labúrigaduba wéyu,

láfuaramé játi funáti quei jítaü,

lubáragiñe lachúlürün luwéyuri Wabúreme,

le lúnbei ában lan wéyu weíríti, le marijngilíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² 'Agáamba jumeí lubeíti le lúnbei naríñaguni,

jugúya wügúriña Israelítagu. Jesúsu le Nazarétna,

ában meja wügúri le larúfudubei Búngiu jigíbugiñe

quei wügúri úraguati láu buri cátei weínamuti,

miláguru, luma buri seíni le ladúgubei Búngiu jagá-

naga lídaangiñe, quei le jisúbudin. ²³ Láu sun líra, dan

le ledéregerúnbei jun, quei ligáburi aráansejani le larí-

tagubei Búngiu lúmagiñe furúmiñeti dan, ába jáfaruni

jilágubei láu jedéregeruni joun wügúriña wuríbatiña

lun jádaraguni luágu gurúwa. ²⁴ Ába leséfuruni Búngiu

lídaangiñe lubáfu ouweni, sarágüda lumúti lúnya labá-

garidun, ladúga siñá lan gabáfu lan ouweni luágu.

²⁵ Laríñajare urúei David, dan le ladímurejan luágu

Jesúsu.

Subúdi numúti luágu núbabei lan Nabúreme Búngiu súnwandan,

nóubagiñeñein lun úa lan ni cáta lun lebélaagüdün

anúfudei nídoun.

²⁶ Ligía lébubei téjerajan nanígi,

ába nadímurejan luágu ugúndani le nídaanbei.

Láu sun wügúri nan garaúwarügüti,

jemenigítina buágu luágu nabágaridayaba lan,

²⁷ ladúga mígirun bubóun nuwáni lídan jabára jiláaña,

mígirun amúrúme lun lañáladun nógubu, áu le

bánigu le jínsiñebei bun.

²⁸ Arúfuda bumúti úma le anúgubei gürgía lídoun

ibágarí magúmuchaditi nun,

áni babuínchagüdübadina láu ugúndani láu abúnja

lan nubádu.

²⁹ 'Nidújeñu, cátei furánguti le, luágu jilá lan meja

wadúje David, bunáwa ligía, gayáraagili waríjini

lumúaja chúlú lúmoun wéyu le. ³⁰ David, ában meja

proféta ligía, áni subúdi lumúti meja luágu aríñaga

láli lan Búngiu lun luágu jádaangiñeiba lan linébaan-

fan liábin Crístu, le lúnbei lañúurun luágu lála. ³¹ Adí-

murejati lubeíti David luágu lásaarun Crístu lídaangiñe

ouweni, luágu giñe merédeboun lan luwáni lídan

jabára jiláaña, mañáladun ligíame lúgubu. Ítara líña

ladímurejan David luágu Crístu camá jamuga aríagu

líña lun, áni ítara líña lasúseredun. ³² Sarágüda lumúti

Búngiu Jesúsu méme le lídaangiñe ouweni, sun wagía

geféentiwa luágu líra. ³³ Ñurúgüda lumúti Búngiu

lueígiñe loúnwenren láu sarágu uweíriguni, ába lerési-

biruni Sífiri Sándu lúmagiñe Búngiu queisi laríñaguni

Búngiu lun, lun gayáraabei lan loúnajani méme Sífiri Sándu ligía joun sun lánigu ubouágu. Ligía cátei le aríja jumáalibei lúma le agáamba jumáalibei guetó.

³⁴ Mára David amúdeirubei siélun, aríñagati David guánarügü.

Laríñajare Búngiu lun Nabúreme.

“Ñürúba lueígiñe nouwenren,

³⁵ daríme níchuguniña báganiñu lábugiñoun bubáfu.”

³⁶ Lúnti jasúbudiruni sun jugúya linásiñun Israél luágu Jesúsu méme lan le, le jádaragubei luágu gurúwa, adúga láali lan Búngiu lun ligíaba lan Wasálbaragüle, ligíame giñe Wabúreme.

³⁷ Dan jagáambunbalin cátei le, ába lebélorun igárigu tídon janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadúga?

³⁸ Ába laríñagun Pédro joun.

—Sáansi jumeí jigáburu ligíbugiñe Búngiu, badísei jugúyame cáda ában lídan líri Jesucrístu, ferúdonawa lámuga jíffigoun, ru lámugei Búngiu Sífiri Sándu jun.

³⁹ Ladúga aríñagaali Búngiu luágu líchugubei lan giñe Sífiri Sándu jun, lúma joun jadúgawagun, lúma joun ja aganoúbaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dímuerei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun gürígia wuríbatíña ja.

⁴¹ Ítara líñati ába jabásterun, ja adúgübaña gásu láu lerérun, ába jayábin queí buri úruwa mílu gürígia lun jafíñerun luágu Jesucrístu wéyu ligía. ⁴² Ába jedégeragun jóungua lun jafúnrendeiruni le jarúfu-dajabei apóstolugu joun, aganoúa jagía lídan úarani jámagua, ayúmuragua jagía buri lun Búngiu, óundaragua jagía lun jeíginun fein to arítaguagülei luágu loúnwen Jesúsu, queísi meja laríñaguni joun apóstolugu lun jadúgüni.

Jabágaru furúmiñetiña lánigu Crístu

⁴³ Súngubei láuñanu luweírín anígi luágu buri seíni lúma buri miláguru le ladúgübei Búngiu jádaangiñe apóstolugu. ⁴⁴ Sun ja afíñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgu-rajeí buri jafúlasun lúma le jámati, ába jafánreinjani lebégi según lemegeirun cáda ában. ⁴⁶ Ságü wéyu jóundaragun témpulurugu lun jájuduragun lun Búngiu. Lárígiñe, ába jóundaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírígu luágu Búngiu, ábati jínsiñe jamá joun gürígia, ábatija anájeina láníña Búngiu ja asálbareinabaña jánwoun.

Lareídagun ában meíbugunti

3 Luágu ában wéyu, ába lídin Pédro lúma Juan témpulurugu ladaúnrun úruwa rábounwéyu, le lórate

ayúmuraguni lun Búngiu. ² Ságü wéyu, níñein lan ában wügúri meíbugunti lúmagiñe lagúriajoun, barúwarügütíja añúura lubádu tubéneri témpulu le gíríbei “Béna Buídumeraüti” lun lamúriajan seínsu jáma ebélurutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurugun, ába lamúriajan seínsu jáma. ⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába líñuraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírígun Búngiu. ⁹ Ába jaríjini sun gürígia eíbuga lúma adímureja luágu luweírígun Búngiu. ¹⁰ Weírítiti janígi luágu le asúseredubei lun, queí subúdi jabálin wügúri ligía, subúdi jameí luágu ligía lan léñaja añúrubei amúriaja tubéneri témpulu le gíríbei “Béna Buídumeraüti”.

Lapúrichijan Pédro témpulurugu

¹¹ Mígiragüdüni lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírín janígi luágun tubárandá témpulu le gíríbei Salomón, le ní jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírída janígi? ¿Ca uágu jaríaguawa camá jamuga wagía areídaguagüdübalin wügúri le, eíbugagüdei láu wabáfu o láu lan wagúnfulin lúma Búngiu? ¹³ Mára líña, Búngiu, le Jabúngiute binádu wagúbürígu Abrahám, Isáac lúma Jacób, ligía areídaguagüdübalin wügúri le lun líchuguni líñun-ágei uweíríguni lun Jesucrístu le Liraú, ligíra lé meja jedégerubei joun lúrudugu, áni dan lálugan Piláto lígiragüdüni, májatün. ¹⁴ Lubáragiñe jamúriajan lun lígirawagüdüni Jesúsu le jarúmabei áni richágu, amúriajarügü jugúya lun lígirawagüdüni ában gáfarajati. ¹⁵ Ítara líña jáfaruni le íchugubalin ibágaru tímatimaati. Ába lásaaragüdüni Búngiu lídaangiñe óuweni, áni geféentiwa luágu líra. ¹⁶ Niján wügúri le jaríjubei áni subúdi jumeí, láu lubáfu méme Jesúsu ligía, lerésibira érei. Wafíñen luágu Jesúsu, ligía areídaguagüdübalin buídu buídu queí jaríjini.

¹⁷ Subúdi náali, nidújeñu, luágu ibídiñe lán meja jun ca lan jadúgübei dan le jáfarunbálin Jesúsu, jugúya jáma jábutinu. ¹⁸ Láu sun líra, gúnfuli lumúti Búngiu le meja laríñagubei jádaangiñe profétagu, luágu lúnti lan lasúfuriruba lan Crístu. ¹⁹ Ligía lubeíti, ígira jumeí binádu jigáburu, giríbu jumá lun Búngiu, chibáwa lámuga jíffigoun. ²⁰ Ábamei gayára lan loúnajan Búngiu eméraaguni tun juwáni, óunajaya leíme Jesúsu le Crístu, le aráanseelibeí lubáragiñe furúmiñeti dan woun.

²¹ Láu sun, lúnti lan leréderun Jesucrístu siélu guetó

daríme laráanseruni Búngiu sun cátei quei laríñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeíti aríñagati meja Moisés joun binádu wagúbürigu. “Loúnajaba Wabúreme Búngiu ában proféta jádaangiñe guánarügü quei loúnajana. Ánja jumá lun sun le lúnbei laríñaguni jun, ²³ ladúga sun ja amájarutiña lun le laríñagubei proféta ligía, jagídarúba jádaangiñe lánigu Búngiu, ábame jagúnrinchawagún.”

²⁴ Ítara líña lubeíti, sun profétagu lúmagiñe Samuél darí lárigiñe, adímurejatiña libúgürü buri cátei le lúnbei lasúseredun lídoun buri wéyu le. ²⁵ Jugúya lúnbei jeresibiruni sun le laríñagubei Búngiu jádaangiñe profétagu, luáguti gíñe jufúleisein darádu lé meja ladúgübei Búngiu jáma binádu wagúbürigu dan le laríñagunbei lun Abrahám. “Nabínirubaña sun gürígia ja ubouáguabaña láu ában jádaangiñe binébaanfaangu.” ²⁶ Ába lanúadajani Búngiu Liraú lun loúnajani jun furúmiñe, jugúya juríu, lun labínirunün cáda ában jídaangiñe, láu laságarunün lídaangiñe luríban jigáburi.

Pédro lúma Juan jagíbugiñe gumádimatiña

4 Nígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu. ² Gáñitiña ladúga jarífudajan Pédro lúma Juan joun gürígia, aríñaga jagía luágu arúfudúa lan luágu jásaaruba lan gürígia lídaangiñe oúweni lúnnya jabágaridun ladúga sará lan Jesúsu. ³ Ábati janügüniña adáüra, ába jádaruniña furísunrugun darí larúgan quei dárüjali lubeí. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügüriña, quei buri seíngü mílu.

⁵ Larúgan, ába jóundaragun jábutigu juríu, wügüriña weírigutiña lídan jafíñen, jáma arúfudajatiña lilúrudun Moisés, Jerusalén. ⁶ Níñein gíñe Anás le fádiri le íñuti-maabei, Gáifasi, Juan, Alejándro jáma sun ja jádaangiñebaña lufámilian Anás. ⁷ Ábati jóunajan anúgei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

⁸ Buin líña Pédro láu Sífiri Sándu, ába laríñagun joun. —Jábutigu juríu jáma wügüriña weírigutiña lídan wafíñen. ⁹ quei jálügüdüniwa luágu buíti le adúgübei lun ában wügüri sánditi, ída líña lan lareí-dawaguágüdü, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubeí wügüri le ja jigíbugiñe areídaguañu. Láu lubáfu Jesucrístu, le meme jádaragubei luágu gurúwa, le lásaaragüdübei Búngiu lídaangiñe oúweni, lareídagua. ¹¹ Jesúsu le, ligía queísi dúbü le áubei jíchiga mebéreseni, jugúya le queibaña ábunagutiña múna, áni ñúbinjali Jesúsu lun ligíaba lan quei dúbü le mégeiwatimaabei lídan bunáguau. ¹² Úati ámu lun lasálbaruniwa lueídügüya

Jesucrístu, ladúga míchuti Búngiu ámu íri ubouágu lun gayára lan wasálbarun lueígiñe.

¹³ Dan jaríjini gumádimatiña luágu adímureja jamá Pédro lúma Juan manúfudeiga ni murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja eíbugubaña lúma Jesúsu. ¹⁴ Queíti níñein lubeí wügüri le areídawaguágüdübei jáma, rára ligía, siñáti jaríñagun lúrudugu ni cáta. ¹⁵ Ábati jóunajaniña lúrudugu Pédro lúma Juan lúma wügüri le areídaguaalibeí bougudin lueí jadámurin lun gayáraabei lan jayánujan jámagua. ¹⁶ Jaríñagati.

—¿Cábasan wadúga jáu wügüriña ja? Sun ja aganoubaña Jerusalén subúdi jamúti luágu adúga jamáali lan miláguru le, áni siñáti wayeedagun láu.

¹⁷ Lun mabúruchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugüñe.

¹⁸ Ábati jagúarun joun lun jebélurun, ába jaríñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jaríñagun Pédro lúma Juan joun.

—Samína jumá júngua ánjein buídu lubeí ligíbugiñe Búngiu lun ladügún le jubeíbei, ígira le lubeíbei Búngiu. ²⁰ Wagía, siñáti wámanichun láu cátei le aríja wamáalibeí lúma le agáamba wamáalibeí.

²¹ Ábayati jewéridiruniña gumádimatiña, ába jígi-ragüdüniña. Madáritiña ída lúba lan jadügün ni cáta jáu ladúga adímurejatiña buri gürígia buíti luágu Búngiu luágu cátei le asúseredubei. ²² Wügüri le areídagubei láu miláguru ligía, sügü láu bián-wein irúmu láu.

Jamúriajan afíñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóudin le ní jabei jíbiriugu, ába jabájüdaguni sun le jaríñagubei jábutigu fádirigu jáma wügüriña weírigutiña joun. ²⁴ Dan jagáambubalin, ába jayúmura-gun sun jagía lun Búngiu, ába jaríñagun.

—Wabúreme, amúrü Búngiubei le adúgübalin siélu, ubou, barána lúma sun cátei. ²⁵ Amúrü, aríñagatibu láu lubáfu Sífiri Sándu liyúmulugugiñe Davíd lé meja esériwidubei bun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni?

²⁶ Iñúruguatiña lurúeitegu ubou jóungua, oúndaraguatiña lábutigu fulásu lun jadügün wuríbani lun Wabúreme Búngiu lúma lun Crístu le lanúadajabei.

²⁷ Áni suséreti ítara, oúndaraguatiña Heródes luma Póncio Piláto lídan ubúrugu le, jáma ja mámabaña juríu, lúma jáma Israelítagu lun jadügün wuríbani lun Biraú Jesúsu le sándubei, le banúadajabei. ²⁸ Láu líra, adúga jamúti sun le baráansejabei lun lasúsereduba lan. ²⁹ Guetóti, Wabúreme, aríjabei jasiadiruniwa, rúba anígi woun, wagía le esériwidubalibu, lun wadímure-

jan buágu manúfudeiga, ³⁰ gayára lámuga gíñe wareídaguágüdüñ sánditiña, adúga wagíame milágu-ru lídan líri Biraú Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñi lubei jóundaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súngua luágu

³² Sun ja afíñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súngua luágu.

³³ Ába jasígirun apóstolugu adímureja luágu lásaarun Wabúreme Jesúsu lídaangiñe ouweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeiruti ni cáta ladúga sun ja gafúlasunbaña o gában, ába buri jalúgurunun, ába janúgüni tebégi, ³⁵ ába jadéregeruni joun apóstolugu lun lafánreinjóun jádan ja emégeirutiña. ³⁶ Queíburi, ñíñein ában jádaangiñe ladúgawagun Leví jádan, gíriti José, agúriajóuti luágu ubóju le gíribei Chípre, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügúri ligía, ába lalúguruni lufúlasun, ába lanúgüni seínsu edéregera joun apóstolugu.

Jaffigoun Ananías túma Safíra

5 Ñíñein gíñe ában wügúri gíriti Ananías, túma Safíra, to lúmari, ába gíñe jalúgurun ában fulásu. ² Wügúri le, ába lanúgün lídaangiñe seínsu, ába lídin láu líbiri joun apóstolugu, lafámura camá jamuga ligía rügúñein libíjin luágu fulásu. Áni subúsititi sun cátei tun lúmari. ³ Ábati laríñagun Pédro lun.

—Ananías, ¿ca uágu bígira lun lagáñiruni Máfia barítangun lun layéejagüdüñibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badúgüni le babúseerunbei láu? ¿Ca uágu basáminara badúgüni cátei le? Búngiu bálugubei bayéedagun, máma wügúriña.

⁵ Dan lagáambuni Ananías cátei le, ába láburujan ouwe. Súnti ja asúbudirubalin cátei le, ába janúfudedagun. ⁶ Ábati jayábin wügúriña, ába jóuburaguni Ananías, ába janúgüni ábuna.

⁷ Queíburi úrúwa óra lárigiñe, ába tebélorun lúmari Ananías, ibídíñoun ni cáta tun luágu le asúseredubei.

⁸ Ába laríñagun Pédro tun.

—Aríñagabei nun, ¿luágu ebégi le jaríñagubei jalúgurei fulásu?

Ába taríñagun.

—Ánja, luágu ebégi ligía.

⁹ Ábati laríñagun Pédro.

—¿Ca san uágu jebélura lídoun úraduni lun jóuchaguni láni Búngiu Espíritu ítara? Añatén ja anúgübalin búmari ábuna, janúgadibu gíñe.

¹⁰ Lídan méme óra ligía, ába táburujan ouwe lubádu lugúdi Pédro. Dan jebélurun wügúriña, jadáriroun jiláaru, ába jaságarunun, ába jábununun loubagiñe túmari. ¹¹ Súnti gürígia ja afíñebaña luágu Crístu jáma sun ja asúbudirubalin cátei le, ába janúfudedagun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri jóundaragun sun afíñetiña lídan fulásu témpulurugu le gíribei “Barandá Salomón”. ¹³ Úati meja ni ában jádaangiñe ja mámabaña afíñetiña lun jóundaragun jáma afíñetiña ladúga janúfude, láu sun jínsiñe jamá sun afíñetiña joun gürígia, sarágu. ¹⁴ Eíbu wéyu, eíbu jayábin gürígia lun jafíñerun luágu Jesucrístu, dándu wügúriña queísi wúriña. ¹⁵ Quei jadúgüña lan apóstolugu sarágu miláguru, ába jaságaruniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Núbintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatíña, sun jagía areídaguatiña.

Jeibaajóun Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janúgüniña apóstolugu, ába jadáürüniña. ¹⁹ Ába ladáraruni ában láni Wabúreme Búngiu ánjeli tubéneri furísun áriebeu ligía, ába láfuridagüdüniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja ñíbaña luágu iséri ibágarí le líchugubei Jesucrístu joun gürígia.

²¹ Dan jagáambuni cátei le, ába jóúdin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóúndaruniña líñun-ágei lúrudu, ja súnbaña Israelítagu weírigutiña, ába jóúnajan anúgaña apóstolugu furísunrugugiñe. ²² Dan jachúlürünbei polisía furísunrugugu, madári jamútiña ñi. Ába jagíríbudun, ²³ ába jaríñagun.

—Darúñu líña wadárirunun furísun, ñíñanu súaara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádirigu lúma jábuti súaara ja oúnigirubarun témpulu cátei le, ába jálügüdagun jóungua cába lánfuna ídan lébeda cátei le. ²⁵ Lídan óra ligía, ligía liábin ában wügúri, ába laríñagun joun.

—Ja wügúriña ja jádarubaña furísunrugun, añájein témpulurugu arúfudaja joun gürígia.

²⁶ Ábati lídin jábuti oúnigirutiña jáu súaara, ába janúgüniña láu buídu, ladúga janúfude lueí jachámuragun gürígia dúbü jawágun. ²⁷ Dan jachúlürün jáu,

ába jíchuguniña ligíbugiñe líñun-ágei lúruđu, ába laríñagun fádiri íñutimaati joun.

²⁸ —Wéridi wamáadún lun marúfudajandügüya jumá lídan líri Jesúsu, áni ¿ca jadúga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügúri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadúgüni le lubeíbei lubáragiñe le jabeíbei wügúriña. ³⁰ Le Jabúngiute binádu wagúbürigu, ligía ásaaragüdúbalin Jesúsu, le méme jáfarubei láu jádaraguni luágu ában gurúwa. ³¹ Rúlaali Búngiu uweíriginu, ñurúgüdaleí lueígiñe loúnwenren, adúga láali Ábutime lúma Asál-baragülei, gayára lámuga jígiruni Israelítagu binádu jagáburi, lun gíñe ferúndunawa lan jafígoun. ³² Geféentiwa luágu líra, geféenti gíñe Sífiri Sándu le líchugubei Búngiu joun ja ñúdümbaño láu le lubeíbei.

³³ Dan jagáambunbalin líñun-ágei lúruđu cátei le, ába jagáñidun, ába yebe jabúseerun jáfaraguniña jilágubei. ³⁴ Ñíñein ában fariséo jádan lúrudugu, gíriti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janúgüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúruđu. ³⁵ Ába laríñagun joun gumádimatiña.

—Wügúriña Israélna, toúnigi jumátia láu le lúnbei jadúgüni jáu wügúriña ja. ³⁶ Jarítagua jumátia luágu íñuragua lán meja Teudás lúngua aríñaga luágu ában lan wügúri weíriginu ligía, ába jafálaruni gádürü-san wügúriña, áni afarúati jilágubei, súnti ja afálarubalin, ába jawáragadagun, ába lagúmunchun sun cátei. ³⁷ Lá-rigiñe, lídan lidáani jabájüdüniwa gürígia, ligía líñuragun Júdas le Galiléana lúngua, sarágu jáña afálaruti lídan labúseerun yebe lagáragun luágun gumádi. Afarúati gíñe, ába gíñe jawáragadagun sun ja afálarubalin. ³⁸ Ígira jumáña lubeíti wügúriña ja, memétera jumá jámoun. Ladúga ánjein jáni lubeí wügúriña cátei le jarúfudajabei lúma le jadúgübei, lagúmunchaguba, ³⁹ ánjein láni lubeí Búngiu, siñá jubei agúnrinchagua. Toúnigi jumá, mageíndagua jumá lúma Búngiu.

⁴⁰ Ába jánjanrun súngebei láu le laríñagubei. Ábati jebélaagüdüniña apóstolugu, ába jabeíchuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámagiñe lúrudugu, gúndaañu láu laríñiniña Búngiu queísi gürígia gadúnamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tidan buri múna ságü wéyu, aríñaga jagía luágu Jesúsu lan Crístubei le agúrabajóubei.

Jáluajóuniwa sédü ídejatiña

6 Lídan dan ligía, quei agíbedeina jamátima afíñetiña luágu Jesucrístu, ába jagúmeserun ja adímurejabaña güríegu adárra jadúnrun ja adímurejabalin jerérun juríu, ába jaríñagun luágu mibíjin jamá wúriña güríegu ja jiláañabaña úmari eíginu dan le

lafánreinjóuniwa, ságü wéyu. ² Ábati jóundaruniña dúusu apóstolugu afíñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eíginu. ³ Ligía lubeíti nidújeñu, áluga jumá sédü wügúriña jídaangiñe ja gafíñerúati jawágu, ja chúbaña áu, ja derégeguañi joúngua lun Sífiri Sándu le gumúti, lun jadúgüni wadágimanu le. ⁴ Wagía, wedéregerubei wadáani lun ayúmuraguni lun Búngiu luma lun warúfudajani lerérun.

⁵ Ába júaradun súngebei lídan cátei le, ába janúadiruní Estéban, le ában wügúri buín líña láu afíñeni luágu Jesucrístu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquiana, lé meja afálarubalin ligáburi jafíñen juríu. ⁶ Ába janúgüniña le ñíjin jabeí apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afíñetiña Jerusalén furése, ába gíñe jafíñerun sarágu fádriugu juríu luágu Jesucrístu.

Ladáürün Estéban

⁸ Adáaguatíja Estéban, le ábanbei wügúri le buínbei láu ubáfu lúma abíniruni lúmagiñeti Búngiu, miláguru lúma seíni jádan gürígia. ⁹ Ábati jagúmeserun gürígia asígeneja luágu, gürígia jagía, tídaangiñetiña jalígilisin juríu to gíriboun “Idámunigu Joúnguaña”, jáma Ciré-nena, Alejandríana, Cilíciana jáma Ásiana. ¹⁰ Siñáti joun lúma Estéban, ladúga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügúriña lun jaríñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdüniña gürígia, jáma arúfudajatiña lilúrudun Moisés, jáma wügúriña weíriginu lídan jafíñen juríu, ába jarúgüdüni Estéban, ába janúgüni ligíbugiñoun líñun-ágei lúruđu. ¹³ Ába gíñe jálugun yéetiña lun jaríñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jaríñaga.

—Agáamba wamúti laríñagun luágu lagúnrinchaguboun lan Jesúsu Nazarétna témpulu, sáansi leíme igáburi le lígirubei Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjei.

Ladímurejan Estéban luágu lufúleisein

7 Ábati laríñagun fádiri le íñutimaabei lun Estéban. —¿Inárüni sun cátei le?

² Ába loúnabun.

—Nidújeñu, nagúbürigu, agáamba jumána. Weíriginu Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába laríñagun lun. “Ígirabei bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéag-

iñe, ába lídin agánawa Harán. Lárigiñe, ába loúnwen lúguchi, ába lanúgüni Búngiu Abrahám lídoun fulásu le ñí lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachúlürüba lan dan lun lánibeí lan ageíraü le jáu sun ladúgüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganóuba lan ladúgawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati gíñe Búngiu lun. “Nagúser-agüdübaña lílana fulásu le anúgübalíña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.” ⁸ Adúgati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagúriajóunbei liraú Abrahám le Isáac, ába lerésibiruni circuncisión luágu wídú wéyu láu, ítara gíñe ladúga Isáac lun Jacób le liraú, adúgaleí Jacób, le méme gíribei Israél, joun dúusu lirájüñü, ja jagúbürigubaña dúusu túríbu ja gíribaña Israelítagu guetó.

⁹ Lirájüñü Jacób ja, ja binádubaña wagúbürigu, ába jagímugajan lun José le jamúlen, ába jalúguruni lun lanügún Ejiptoun quei idámuni. Ñíñein Búngiu lúma José, ¹⁰ ába leséfuruni lídaangiñe sun lidíjeri láu líchugun gunfaráandaü lun. Ába lagáñeiragüdüni lufúleisein Faraón, le lurúeite Ejipto lun, ába líchuguni José ábutime ñi Ejipto lúma tídan lúban Faraón.

¹¹ Ábati ladágarun ában ilámaü lídan fulásu le Ejipto lúma Canaán, deréti meja dan ligía, madáritiñati binádu wagúbürigu cába lan jeíga. ¹² Ába lagáambun Jacób luágu níjein lan eíginí Ejipto, ába loúnajaniña lirájüñü, ja binádu wagúbürigu, ñi. Ligía furúmiñetibeí jaweíyasun. ¹³ Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúei lidújeñu José. ¹⁴ Ábati loúnajan José anúgei Jacób le lúguchi jáu sun lufámilian, Ejiptoun, úrúwañanu-wein-queínsi gürígia jagía. ¹⁵ Ítara líña lídinbei Jacób agánawa Ejipto, le ñí lubei louwe, ñí lubei giñe jóúwegua binádu wagúbürigu. ¹⁶ Átiri irúmu lárigiñe, ába lanügüniwa jábu ñígiñe lídoun fulásu le gíribei Síquem, ába jabunún lídan umújaü lé meja lagáñijabei Abrahám jámagiñe lirájüñü Hamor ñi Síquem.

¹⁷ “Dan le layárafadúnbei dan lun lagúnfulirun dimúrei le líchugubei Búngiu lun Abrahám, gíbeeña ladúgawagun Israél Ejipto. ¹⁸ Ábati lagúmeserun ában urúei agúmadija Ejipto le ibídiñejabubei lun José. ¹⁹ Ába layéeraguniña urúei ligía warásan juríu, amúdiragua láña binádu wagúbürigu, águragüdáña jasáanigu ja figígiña joun lun jóúwegun, gumúgua lámuga warásan. ²⁰ Lídan dan ligía, ligía lagúriajóun Moisés, ában irájü buídumeraüti, ába jagúriajani lagúbürigu jábiñe luágu úrúwa játi. ²¹ Dan lachúlürünbei dan lun jáguruni, ába jáguruni, ába tabúduni liraú urúei Ejiptona, ába tagúriajani quei tiraú. ²² Ligía lafúrendeirubalin Moisés líchú jáu Ejiptona, áni gabáfutiti lídan le laríñagubei lúma le ladúgübei.

²³ “Dan le bián-weínjali irúmu láu Moisés, ába lálugun lídin aríjaña lirásan ja ladúgawagun Israél, ja ñibaña Ejipto. ²⁴ Ába laríjin ában Ejiptona amúdiragua ában jádaangiñe, ába lídin Moisés íderaguei lidúje, ába leséfuruni láu láfaruni Ejiptona ligía jilágubei. ²⁵ Moisés, jarítaguati luágu jasúbudirúbei lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdüniña jámagua. Ítara líña laríñagunbei joun. “Ában mémestia mútu jugúya, ¿ca uágu jageíndagua júmagua?” ²⁷ Ábati ládaruni wügüri le áluajabei wuríbu lúma le ában, ába laríñagun lun. “¿Ca íchubalibu ábutime lúma agúseragüdütime wádan? ²⁸ ¿Buséntibu gíñe báfarunina quei báfaruni Ejiptona ligía gúñaarü?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi quei teréncha, ába jáguchi lan bián irájüñü ñi.

³⁰ “Bián-wein irúmu lárigiñe, ába lasáliragun ában ánjeli lun lídan fulásu mageírawati, yaráfa lun wúbü le gíribei Sinaí, liábin lun quei wátu geméti lídan ában búbugati. ³¹ Ába laweíridun lanígi Moisés láu cátei le laríjubei, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagúbürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudei, májaali ni lun laríjin ñíjin. ³³ Ába laríñagun Búngiu lun. “Gidáboun bigeídin lueígiñe bugúdi, ladúga fulásu le ñí bubei rára, fulásu sánduti. ³⁴ Aríja náali jasúfurirun numútuniña Ejipto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejipto.”

³⁵ “Láu sun mebéresen jamá láu Moisés, álügüda jameí ca lan íchubalin ábutime lúma agúseragüdütime, oúnaja lumúti Búngiu quei ábuti lúma quei eséfujati, adímurejeina Búngiu lídaangiñe ánjeli le asáliragubei lun lídan búbugati. ³⁶ Moisés aságarubaliña binádu wagúbürigu Ejiptogiñe, adúga ligía miláguru buri lúma buri cátei weíriguti lídan fulásu ligía, lídan Barána Funáti, lúma lídan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Loúnajaba Búngiu ában proféta jun jádaangiñe guánarügü jibíriña, quei loúnajanina. Adúga jumá gásu láu.” ³⁸ Lídan le añája lubeí Israelítagu adámurigu lídan fulásu mageírawati, Moisés meme le, ába ladímurejan lúma ánjeli luágu wúbü le Sinaí, ába lásügüragüdüni lerérun ánjeli ligía joun binádu wagúbürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

³⁹ “Májatiña meja binádu wagúbürigu jagáambuni Moisés, mebéreseruntiña láu, busénrügü jagía jagíribudun Ejiptoun. ⁴⁰ Ábati jaríñagun lun Aarón. “Buséntiwa lun badúgün búngiugu woun lun jóudin wabá wabá, ladúga ibídiñeti woun ca lan susébebei lun Moisés, le aságarubaliwa Ejiptogiñe.” ⁴¹ Ábati jadúgün

ában tiyáwa bágasu lun jasándunme, ába jáfarun aní-maalugu lun jadágaragüdün tun jasándun, ába jadügün fédu lun jagúndaarun láu cátei le jadügübei láu jájabu. ⁴² Ábati ladíreirun Búngiu jawei, ába lí-giruniña lun jájuduragun joun warúguma ja siélubaña. Ítara líña labúrüdün tídan jalíburun profétagu.

Jugúya Israelítagu, ¿áfaratün funági anímaalugu lun jadágaragüdün nun lídan bián-wein irúmu le jáubei lí-dan fulásu mageírawati?

⁴³ Madügün jumúti líra, lubáragiñe lira, barú jumuti jisándun Molóc tídan lágei to jadügüboun lun, túma tiyáwa warúguma to giriboun Renfán, to gíñe janügüboun quei jisándun, iyáwaü buri ja jadáagun guánarügü lun jájuduragun joun.

Ligía naságarubadún lubei jageíragiñe, nouñajaünme yagúroun méme luei Babilónia.

⁴⁴ Lídan fulásu mageírawati, ñíñoun méja lúban Búngiu to gadíñurúwadiboun jáma binádu wagúbürigu, ñí lubei lerédera Búngiu jáma. Adúga lumútu Moisés lúban Búngiu tugúya queisi larúfuduni Búngiu lun lun ladügünun. ⁴⁵ Nújeingua méja múna tugúya jáma jadúgawagun binádu wagúbürigu, ába janügünun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lí-dan fulásu le darí lidáani Davíd. ⁴⁶ Daríti urúei Davíd fuleisei ligíbugiñe Búngiu, ába labúseerún yebe ladügün ában témpulu lun laganoún Lubúngiute Jacób ñi, ⁴⁷ Salomón adúgubarun témpulu tugúya, ⁴⁸ láu sun, maganoún lan Búngiu le weirigutimaabei tídan buri ligílisi to jadúga gürígia, quei meja laríñaguni proféta.

⁴⁹ Siélu nálabei le ñí lubei nañúura lun narúeijan, ubou, le ñí lubei neméraaguagüdei nugúdi. ¿Cába tuwúyeri múna jadúga nun? Líña laríñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadúga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñóun janígi, magáambaditün lun lerérun Búngiu, ítara jíña quei ja ibídiñe-jabúbaña lun Búngiu. Súnwandan májatün lun Sífiri Sándu, ítara jíña quei binádu jagúbürigu. ⁵² ¿Ca já-daangiñe profétagu mouserun jabáña binádu jagúbürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Loúnwen Estéban

⁵⁴ Dan jagáambunbalin cátei le, ába jagáñidun buídu, ába lacúnrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélun, ába laríjini luweirigun Búngiu, lúma Jesús-u rára lueigiñe loúnwenren Búngiu. ⁵⁶ Ába laríñagun joun.

—¡Aríja jumá! Aríagu níña lun siélu darágu, lúma Jesús-u le Wügúri Garaúwarügüti, lueigiñe loúnwenren Búngiu.

⁵⁷ Ába jadáuruni jarígei láu jájabu luei jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáan-gun lábugiñe laríaaajan ában wügúri gíriti Sáulo, ába jachámuragun dúbü luágun Estéban. ⁵⁹ Súnti añája lan achámuragua dúbü luágun, ába layúmuragun Estéban lun Jesús-u, ába laríñagun.

—Nabúreme Jesús-u, resíbiboún nuwáni.

⁶⁰ Larígiñe, ába lájuduragun, ába lagúaragun.

—Nabúreme, míchigabá dúru jawágun lueigiñe figoú le.

Larígiñe laríñaguni le, ába loúnwen.

Leíbaajaniña Sáulo ja afíñebaña luágu Crístu

8 Sáulo, gúndaatiti láu láfarún Estéban.

Wéyu méme ligía, ába lagúmeserun ában oúnwenbun eíbaajouñi jawágun ja afíñebaña luágu Jesu-crístu, Jerusalén. Ába janúragun lídoun buri lirájúñü fulásu Judéa lúma Samária le míbetiña gürígia ñi, apóstolugu rügúñanu manúrajan. ² Ába jayábin wügúriña ja derégeguatiña jóungua lun Búngiu, ába jábununi Estéban láu sarágu íruni luágu loúnwen. ³ Ábati lasígirun Sáulo eíbaajaña afíñetiña, ábaja lebélorun tídoun sun múna lun laságaruniña wügúriña jáma würiña adúruujeina, ába loúnajaniña furísunrugun.

Lapúrichijouñ ugánu buíti luáguti asálbaruni Samária

⁴ Apúrichija jamúti ja anúrajabaña Jerusaléngiñe ugánu buíti luágu chúlú lan Jesu-crístu lun lasálbaruniña sun gürígia, sun le ñí lumuti jóúdin. ⁵ Ába lídin ában jádaangiñe, gíriti Felípe, lídoun ában ubúrugun Samária, ába lagúmeserun adímureja joun ja ñíbaña luágu Crístu. ⁶ Ábaja jóúndaragun gürígia, ru jagía jarígei lun le ladímurejabei Felípe, aríja jamei buri gíñe miláguru le ladáagubei. ⁷ Ladúga sarágu buri gürígia ja gawágutiña espíritugu wuríbatiña, areídaguatiña, ába buri jáfuridun espíritugu wuríbatiña jagía agúarajeina jádaangiñe, areídagua jagía sarágu derégúdaaña jamá, meíbuguntiña. ⁸ Súnti gürígia lídan fulásu ligía, gúndaatiña luágu cátei le.

⁹ Ñíñein ában wügúri lídan fulásu ligía, gíriti Simón, gabíñarajati meja, lúñajaali ayéejaña gürígia Samariána láu laríñagun joun luágu máma lan furúmiegurügü gürígia ligía. ¹⁰ Agáambaja jamútitíja sun gürígia buídu, jámagiñe ja gudémegutiña dagá já-moun ja weirigutiña, ába jaríñagun.

—Ibíja lumúti gürígia le oúnwenbun lubáfu Búngiu.

¹¹ Adúgatiñatíja gásu láu, ladúga lúñajaali ayéejaña láu labíñarajan. ¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesu-crístu, dándu wügúriña quei würiña, ába jabásterún. ¹³ Simón meme ligía ába gíñe lafíñerun, ába gíñe labásterún, ába lagúmeserun afálarei Felípe,

le luweírin lanígi láu buri oúnwenbun buri miláguru lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalén-baña luágu resíbi jamáali lan Samariána lerérun Búngiu, ába jóunajani Pédro lúma Juan ñi. ¹⁵ Dan le jachúlürünbei, ába jayúmuragun jawágu affíñetiña ja Samariána lun liábiba Sífiri Sándu jádoun, ¹⁶ ladúga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñúbin lan Sífiri Sándu jádoun gürígia dan le jíchuguni apóstolugu jájabu jawágu, ába lálugun lagáñijani ubáfu ligía jámagiñe láu seínsu. ¹⁹ Ába laríñagun joun.

—Rújumei gíñe ubáfu le nun, lun dánme lan níchuguni nújabu luágu furúmieguárügü, lun gíñe lerésibiruni Sífiri Sándu.

²⁰ Ábati laríñagun Pédro lun.

—Beiba máfiougatin láu sun biseínsun, ladúga jarítaguatibu luágu gayára lan lagáñijoun cátei le ledéweejan Búngiu. ²¹ Maríchatibu, mafánran bugúya lídan weséridun lun Búngiu, ladúga múaraantu banígi ligíbugiñe Búngiu. ²² Ígirabeí buríban le, ayúmuraguabá lun Búngiu, lun ferúduna lánibu luágu luríban barítangun. ²³ Ladúga aríja numúti luágu buin tíña lan banígi láu wuríbaní, áni ragúñu liñálibu Máfia.

²⁴ Ábati laríñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárigiñe jíchugun fe luágu Jesucristu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucristu gürígia lídaangiñe jafígoun lídan sarágu lirájüñü fulásu Samária, luágu jaweíyasun járiogún Jerusaléoun.

Felípe lúma wügúri le Etiópiana

²⁶ Lárigiñe cátei le, ába laríñagun lání Wabúreme Búngiu ánjeli lun Felípe.

—Aráansebá, beíba luágun sur lídaangiñe úma le arárirubei Jerusaléngiñe lun ubúrugun Gáza.

Ligía úma le ásügürübei lídaangiñe fulásu mageírawati. ²⁷ Ába laráanserun Felípe, ába lídin. Luágu leíbuguniwágu, ába ladárirun ában wügúri Etiópiana lubá lubá. Wügúri ligía siñáti garaú lan, ában wügúri weíriguti, ligía gíñe gamánijaribei láu sun tiseínsun Candáce to lurúeite Etiopía. Liábiñati wügúri ligía Jerusaléngiñe lárigi lídin ájuduragua lun Búngiu. ²⁸ Lagíribuduñáti lageíroun, ñun tídan ában cárü, alíjeinaloún lilíburun proféta Isaías. ²⁹ Ábati laríñagun Sífiri Sándu lun Felípe.

—Yaráfabá tuágun cárü túra.

³⁰ Ába leíbaagun tuágun cárü, ába lagáambuni lalíjaña lan tídan lilíburun Isaías, ába laríñagun lun.

—¿Gunfaráanda bumúntisan le balíjabeí?

³¹ Ába laríñagun wügúri ligía lun.

—¿Ída lubági gunfaráanda náani, úaga cába lan afúnraanguágüdei nun?

Ába laríñagun lun Felípe lun ládinun lúmoun lun lañúurun loúbagiñe.

³² Niján buri dimúrei le lalíjabeí.

Quei mudún, lanügúwa lun lafarún jilágubei, ítara quei leréderun mudún maníñu jagíbugiñe ja ásarubalín líyu,

ítaña líña gíñe maríñagun lan ni cáta.

³³ Ünabuti lanügún, áni michugúnwati lirícha lun, siñábei ladímurejóun jawágu ladúgawagun, ladúga gumúja lan labágaridun uboúagu.

³⁴ Ába laríñagun wügúri ligía lun Felípe.

—Adúgabeí fuleísei nun, aríñagabeí nun, ¿cáteisán le uágubei laríñagei wügúri le abúrújabeí dimúrei le, luóuga, ódi luágu ámu?

³⁵ Ábati lagúmeserun Felípe arúfudajei Lerérun Búngiu lun, lúmagiñe le ñígiñe lubeí lagúmesera alíja, ába líchuguni ugánu luáguti Jesúsu lun. ³⁶ Dánti le jásügürünbei lídaangiñe ában fulásu le ñí lubei dúna, ába laríñagun wügúri ligía.

—Nijántia dúna, ¿siñátisan nabásterun?

³⁷ Laríñaga Felípe lun.

—Ánjein afíñe bubeí luágu Jesucristu táu sun banígi, gayáraati babásterun.

Laríñaga wügúri ligía lun.

—Afíñetina luágu Jesucristu lan Liraúbei Búngiu.

³⁸ Ábati laráramagüdúnun cárü, ába jarárirun bián-gubei jagía dúnarugún, ába labásterágüdüni Felípe.

³⁹ Dan jamúdeirun dúnarugugíñe, ába lanügüni lání Búngiu Espíritu Felípe ñígiñe, ába maríjin lálali lan wügúri ligía. Ába lasígiruni leíbugun, gúndaañu. ⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinaleí ugánu luáguti Crístu darí lachúlürün Cesaréa.

Lerésibiruni Sáulo Crístu queísi lasálbaragüle

9 Sun dan ligía, merédeti lasíadiruniña Sáulo affíñetiña luágu Jesucristu. ² Ligía lídinbei lúmoun fádiri íñutimaati lídan jafíñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanügüniña adáüragua Jerusalén, dándu wügúriña quei wúriña. ³ Luágu leíbuguniwágu, dan yaráfali lun Damáscu, sódini ába ladúnraagun ában larúgounga siélugiñe, geyégua láu. ⁴ Ábati láburijan Sáulo múarugún, ába lagáambun laríñagun ában umálali lun.

—Sáulo, Sáulo, ¿ca uágu beíbaajana?

⁵ Ábati laríñagun Sáulo.

—¿Cátabusan Nabúreme?

Ába laríñagun umálali ligía.

—Jesúsu áu, le méme beíbaajabeí. ⁶ Sarába, belúba ubúrugun, laríñawagúba bun ñi cába lan badúga.

⁷ Wügúriña ja úarabaña lúma Sáulo lídan luweíyasun, ába jaráramun láu luweírin janígi ladúga agáamba jamúti umálali, áni maríjin jamúti le adímurejabeí.

⁸ Ába lásaarun Sáulo múarugugíñe, dan le léfegechún-

balin lágu, maríjnjali. Ábati járugüdüni lújabu, ába janúgüni ubúrugun Damásco. ⁹ Ába leréderun úrwüwa wéyu ñi maríjnga, meígin líña, mátun ni cáta.

¹⁰ Ñíñein ában afíñeti luágu Jesucristu ñi Damásco gíriti Ananías, le únbei layáwadagua Wabúreme Jesús, ába laríñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesús lun.

—Beíba guetó guetó luágu úma le gíribei Surúti, danme le bachúlürün lúbiñe Júdas, bálügüdjame luágu ában wügúri Társona gíriti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügúri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágu wügúri ligía lúma luágu sun wuríbani le ladágubei joun ja afíñebaña buágu, Jerusalén. ¹⁴ Guetó, liábiña ñájoun láu ubáfu jámagiñe jábutigu fádirigu lun ladáuraguniña sun ja bánigubaña.

¹⁵ Ába laríñagun Jesús lun.

—Beíba, ladúga anúadira náali wügúri ligía lun ladímurejan nuágu joun gürija ja mámabaña juríu lúma joun jarúeitegu, lúma gíñe joun Israelítagu. ¹⁶ Narúfudubei sarágu cátei le lúnbei lasúfuriruni nueigiñe lun.

¹⁷ Ábati lídin Ananías lídoun fulásu le ñi lubei Sáulo. Ába lebéllurun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesús le arúfudagubei lúngua bun luágu úma le ñigiñe lubeí biábin, lun gayáraaya lan baríjin, lun gíñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueigiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leígin, ábaya lejéredun, ába leréderun átiri wéyu jáma afíñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesús lun Liraúbei Búngiu. ²¹ Súnti ja agáambubalín, ába laweíridun janígi, jaríñagati.

—¿Másan niján wügúri léñaja eíbaajabáliña ja afálarubalin Jesús Jerusalén? ¿Ma ligía méme le ñúbinbei ya lun lanáanguniña adáúra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesús lun Crístubei le lúnbei lasálbaruniña gürija lídaangiñe jafígoun, darí lun labúlieidaguágüdüñ jáu juríu buri ja aganoúbaña Damásco.

Leséfurun Sáulo jaweí juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdüñ le jabúseerubei jadúgün lun Sáulo. Wéyuagu, áriebu, jagúrabanja juríu luágu béna le áfuridagülei le láni ubúrugun Damásco lun jáfaruni jilágubei. ²⁵ Ába jíchuguni afíñetiña lídoun ában faníñe weíriti, ába jarárigüdüni áriebu lueigiñe baríeru le geyégubei láu ubúrugun, ába leséfurun.

Sáulo ubúrugun Jerusalén

²⁶ Dan le lachúlürünbei Sáulo Jerusalén, ába yebe lálugun ládaragun lúngua jádoun afíñetiña, sun jagía, janúfudetiña lueí, ladúga mafíñetiñá yebe luágu afíñejali lan luágu Jesucristu. ²⁷ Ába lanúgüni Bernabé jagíbugiñoun apóstolugu. Ába labájüdagun joun luágu laríjini Sáulo Jesús luágu leíbuguniwágu, lúma luágu ladímurejan Jesús lun, lúma luágu lapúrichijan Sáulo furáangu luágu Jesús ubúrugun Damásco. ²⁸ Ábati jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesús furáangu. Lárigiñe ladímurejan luágu Jesús jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirünbalin afíñetiña cátei le, ába janúgüni Sáulo ubúrugun Cesaréa, ñigiñe ába jóunajani Társoun.

³¹ Lídoun buri dan ligía, buíti jóuserúniwa afíñetiña luágu Jesucristu ja aganoúbaña Judéa, Galiléa, lúma Samária. Ába jedérebugudún lídan jafíñen luágu Jesucristu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebélujaña lubeí Pédro lídan buri fulásu lun líderaguniña ja afíñeñaabaña luágu Jesucristu, ába gíñe lídin aríjaña lánigu Búngiu ja ubúrugubaña Lída. ³³ Ñi ladárra ában wügúri gíriti Enéas, wídü irúmu láu gabánarugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucristu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafíñen, ába jafíñerun luágu Jesús.

Tágujugun Dórcas

³⁶ Lídan meja dan ligía, ñíñoun meja ában afíñetu aganoútu Jópe, gíritu Tabíta, lídan jerérun güriégu, gíritu Dórcas. Wúri tugúya, súnwandan táu adúga buíti, íderagua tugúya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jágawagüdüñun, ába jaríwachaguagüdüñun. ³⁸ Yaráfati Jópe lun Lída le ñi lubei Pédro, queíti jagáambuni afíñetiña luágu níjein lan ñi, ába jóunajan bián wügúriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachúlürünbei, ába janúgüni tídon rúmu to ní tubei jiláaru, ába jagúriridágun sun würiña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájüchagubouún Dórcas dán meja mouñwengiru, lun. ⁴⁰ Ába láfuridagüdüniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñuragun túngua. ⁴¹ Ába lárügüdüni tújabu, ába lásaaragüdünnun. Lárigiñe, ába lagúarun joun würiña jagía jáma jíbiri afíñetiña ja ñíbaña, ába larúfudunun joun, winwañu. ⁴² Ába lagaambún cátei le lídan sun ubúrugú Jópe, ába sarágu jamá afíñerutiña luágu Jesu-crístu. ⁴³ Ába leréderun Pédro sarágu dan lídan ubúrugú ligía, lúbiñe Simón le aráansejabei úraü.

Loúnajan Cornélio ougei Pédro

10 Níñein ában wügúri ubúrugú Cesaréa gíriti Cornélio, gumándan joun súdaara ja Italiána. ² Wügúri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá juríu. Rúti buri gíñe sarágu seínsu lun jíderawagún juríu, áni súnwandan layúmuragun lun Búngiu. ³ Luágu ában wéyu, quei buri ladaúnrün úrúwa rábounwéyu, ába lasálriragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjalei buri cátei le badúgübei lun bíderaguniña gudémetiña.

⁵ Oúnajabá lubeíti wügúriña ubúrugú Jópe lun jóuguni Simón, le gíñe gíribei Pédro, lun liábin bun. ⁶ Lúbiñe Simón le aráansejabei úraü, le gábanbei láru barána.

⁷ Dan le ñúdünjali ánjeli le adímurejabei lúma Cornélio, ába lagúarun joun biáma jádaangiñe lumú-suniña lúma ában lisúdaaran, súdaara ligía, ában wügúri derégeguati lúngua lun Búngiu, leménigira Cornélio. ⁸ Ába labájüdaguni sun cátei joun, ába loúnajaniña ubúrugú Jópe.

⁹ Larúgan amídirugu, sun ayárafadeina jamá wügúriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu.

¹⁰ Weírijaliti liláma óra ligía, busénjali leígin. Dan le añája lan aráanserei leígin, ába lasálriragun ában cátei lun ítara. ¹¹ aríja lumúti lánjunrenchun siélu, ába tiábin ában cáton camá jamuga gamísa weíritu gürágu leúgiñe gádürü tarígei, tiábin arárireina múarugun.

¹² Tídan gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beígin.

¹⁴ Ába loúnabun Pédro.

—Uá, Nabúreme, meígiñajágidina ni cáta le wanúgübei quei mabuídunti según lilürudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdü Búngiu, maríñagabá luágu luágu mabuídun lan.

¹⁶ Úrúwañein weíyaasu lasúseredun cátei le, lárigiñe, ábaya tamúdeirun gamísa tugúya siélun. ¹⁷ Súnti niján lan Pédro láu luweírin arítangun luágu, asáminara ca lan laníchigubei cátei le laríjubei, ligía jachúlürün luwügüriñan Cornélio, álügüdajeína tuágu lúban Simón. ¹⁸ Dan jachúlürün tubéneri múna, ába jálügü-dajan rein ánjein ní lubei lagánawa ában gíriti Simón le gíñe únbei jaríñaga Pédro. ¹⁹ Queíti buga nijágua lan Pédro asáminara luágu cátei le asálriragubei lun, ába laríñagun Sífiri Sándu lun.

—Añája úrúwa wügúriña álugabu, ²⁰ raríba, oufud-abá, beíba jáma láu afíñeni ladúga áu lan oúnajabalíña.

²¹ Ábati larárirun Pédro le ñíjin jabei wügúriña ja loúnajabaña Cornélio, ába laríñagun joun.

—Áu le jáluajabei. ¿Ca gabúgürübalún?

²² Ába jaríñagun.

—Loúnajan gumándan le gíribei Cornélio wagía, ában wügúri surúti, derégeguati lúngua lun Búngiu, jínsiñeti joun sun juríu. Núbinti ában ánjeli aríñaga lun lun loúnajan ougabun bidin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi áriebu ligía. Larúgan, ába lídin Pédro jáma, ñúduntiña gíñe jádaangiñe afíñetiña ja aganoúbaña Jópe jáma.

²⁴ Larúgan, ligía jachúlürün Cesaréa, le ní lubei Cornélio agurabajaña jáu lidújeñu jáma jabuídun-ágei lumádagu ja lamísurajabaña. ²⁵ Dan lachúlürün Pédro, ába láfuridun Cornélio erésibirei, ába lájuduragun ligíbugiñe láu sarágu inébesei. ²⁶ Ába liñúraguni Pédro, ába laríñagun lun.

—Ráramabá, wügúri giñe áu bíledi.

²⁷ Súnti niján lan adímureja lúma, ába lebéllurun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan wafíñen wagía juríu lun jóundaragun juríu jáma ja mámabaña juríu quei jugúya, ni lun webélurun tídon jában luei wasálrin mabuídunga ligíbugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña juríu queisi gürígia mabuíduntiña. ²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóunajanan nuágu.

³⁰ Ábati loúnabun Cornélio.

—Úrúwa wéyu guetó, queíburi óra le, ñáñadina núbíñe ayúmuragua lun Búngiu ladaúrün úrúwa rábounwéyu, queisi wéchun, ligía lasálriragun ában wügúri nun táu ában dáüguaü mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badúgübei lun bídera-

guniña gudémetiña. ³² Oúnajabá lubeíti wügúriña ubúruгу Jópe oúgei Simón le gíñe gíribei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti nouñajan oúgabu furése, áni buítiti badúga biábin. Guetóti awánja sun wagía ya ligíbugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanúgüniña Búngiu sun gürígia. ³⁵ Resíbirügü lumútiña sun ja inébejabúbaña lun áni adúga jameí le buídubei, dándu juríu quei ja mámabaña juríu. ³⁶ Adímurejati Búngiu joun ladúgawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia.

³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragúdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsú Nazarétna, luágu meja gíñe ladáagun buíti, lúma lareídaguagüdüniña ja asúfurirubaña lábugiñe lubáfu Máfia. Ladúgünbalin buri meja cátei le, ladúga ñíñein lan Búngiu lúma. ³⁹ Wagía geféentiwa luágu sun cátei le ladúgübei Jesúsú Jerusalén lúma lídan sun líbiri jageíra juríu. Lárigiñe, ába jáfaruni jilágubei láu jádara-guní luágu ában gurúwa. ⁴⁰ Sarágüda lumúti Búngiu lídaangiñe oúweni luágu lúruwan wéyu, ába larúfudaguágüdüni lúngua wíwnañu woun. ⁴¹ Marúfudagúnti lúngua joun sun gürígia, lueídügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe oúweni. Joutiwa lúma, gurá wagía lúma lárigiñe lásaarun lídaangiñe oúweni lúnya labágaridun. ⁴² Ába louñajaniwa apúrichija joun gürígia luágu, lun giñe waríñaguni luágu rúlaali lan Búngiu Jesúsú méme le lun lagúseragüdüniña ja wíwnangiñabaña jáma ja jiláguaañábaña dánme le lagíribudun ubouágun. ⁴³ Adímurejaaña meja gíñe sun profétagu luágu Jesúsú lúmagiñe binárü, luágu sun lan ja afíñebaña luágu, resíbi jamáni ferú-dun luágu jafígoun.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afíñetiña luágu Jesucrístu ja ñúbinbaña úra lúma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majouábei funági lun jabásterún gürígia ja, quei resíbi jamáali lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

Labájüdagun Pédro joun tílana ligílisi to Jerusalénboun luágu le asúseredubei Jópe

11 Ába jagáambuni apóstolugu jáma jíbiri afíñetiña ja Judéabaña luágu ánjaaña lan gíñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja afíñetiña, ³ jaríñaga.

—¿Cámesan bídin aríjaña ja mámabaña juríu, áni jou amúru jáma?

⁴ Ábati labájüdaguni Pédro sun le asúseredubei joun lúmagiñe lagúmesaja, ába laríñagun.

⁵ —Ubúruгуñadina Jópe, ayúmuragua lun Búngiu, ligía naríjin ában cátei lasálriragun nun camá jamuga ában gamísa weírítu tarárirun siélugiñe, gürágu lueígiñe gádürü tarígei, tiábin chülü le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gáñitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.” ⁸ Ába naríñagun. “Uá, Nabúreme, ladúga meígiñajágidina ni cáta le wanúgübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdüñ Búngiu, maríñagabá luágu luágu mabuídun lan.” ¹⁰ Úruwañein weíyaasu lasúsere-dun cátei le, lárigiñe, ábaya tamúdeirun siélun. ¹¹ Lídan óra ligía, ligía jachúlürün úruwa wügúriña tídoun múna to ñí nubei, oúnajoutiña Cesaréagiñe álugana. ¹² Ába laríñagun Sífiri Sándu nun lun nídin jáma láu afíñeni. Ñúdüntiñá giñe sísi afíñetiña ja núma. Dan wachúlürün Cesaréa, ába webélurun sun wagía lúbiñoun ában wügúri, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügúriña lun joudin ubúruгу Jópe oúgei Simón le gíñe gíribei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun quei meja liábin wádoun furúmiñe. ¹⁶ Ábati naríttagun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Ánjeinti ru lubálin Búngiu líbe le líchubei woun, wagía le afíñeelibe luágu Jesucrístu, joun, ¿cátanañadináti lun neréderubei lan le labúseerubei Búngiu ladúga?

¹⁸ Dánti le jagáambuni afíñetiña ja Jerusalénbaña cátei le, ába jámanichun. Ába jadímurejan luágu luweírigun Búngiu, ába jaríñagun.

—¡Rújali lubeí giñeti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin íbágarí magúmchaditi!

Ligílisi to Antioquíana

¹⁹ Dan le láfarúnbei Estéban, ába gíñe jagúmeserun eíbaajaña ja jíbiri afíñetiña, ába janúrajan jíbiri chülú Fenícia, Chípren, luma Antioquíana. Ñi jíchigei ugánu luáguti lasálbaruniña Jesucristu gürígia lídaangiñe jafígoun jóunrügü juríu, máma joun ámu gürígia. ²⁰ Ánjeinti afíñetiña ja Chíprena jáma Cirénena, ába jachúlürün Antioquíana, ába gíñe jadímurejan joun ja mámabaña juríu, ába jíchuguni ugánu luáguti Wabúreme Jesucristu joun lun jasálbarun. ²¹ Ñíñein lubáfu Búngiu jáma afíñetiña jagía, sarágu ja mámabaña juríu, ába jígiruni binádu jafíñen, ába jafíñerun luágu Jesucristu.

²² Dan lachúlürünbei ugánu le lábun jagáambun afíñetiña ja Jerusalénbaña, ába jóunajani Bernabé Antioquíoun. ²³ Dan lachúlürünbei Bernabé, ába laríjini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súngebun lun jafálaruni Wabúreme Búngiu táu sun janígi. ²⁴ Bernabé, ában meja wügüri buíti, derégeguati lúngua lun Sífiri Sándu le gumúti, buin líña gíñe láu afíñeni luágu Jesucristu, ítara líña lagáñeirun sarágu gürígia lun Jesucristu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanúgüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ñí Antioquíana lagúarúa joun afíñetiña “Cristiánugu” furúmiñe.

²⁷ Lídan dan ligía, ába jóudingua já buri profétagu Jerusaléngiñe lun Antioquíoun. ²⁸ Ában jádaangiñe, gíríti Ágabo, ába laráramun jádan afíñetiña, ába laríñagun láu le lasúbudirágüdübei Sífiri Sándu lun luágu líábiba lan ában óunwenbun ilámaü lídan sun ubou, áni suséreti lídan lidáani larúeijan Cláudio. ²⁹ Ábati jóundaragun afíñetiña ja Antioquíana lun jóunajan seínsu joun afíñetiña ja Judéabaña según le jayáraati íchiga. ³⁰ Ítara líña jadúgüni, ába jóunajani seínsu ligía luma Sáulo joun tábutigu jalígilisin afíñetiña Judéana.

Loúnwen Jacóbo luma ladaürún Pedro

12 Lídan dan ligía, ába jagúmeserun urúei Heródes eíbaajaña jádaangiñe afíñetiña. ² Ába láfaragüdüni Jacóbo le lamúlen Juan táu efeín, ³ queíti laríjin láu gúnda jamá juríu láu cátei le, ába gíñe lanúgüni Pedro adáüra. Lídan buri wéyu le fédu le ídaanbei teigüa fein magánatu ísi lasúsereda cátei le. ⁴ Lárigiñe lanúgüni Heródes Pedro adaüra, ába ládaruni furísunrugun jáu díisi-sísi súdearagu óunigira gádürü gádürü, larítangun lún yebe laságaruni jagíbugiñe lílana fulásu lárigiñe fédu lun lagúserun. ⁵ Ñíñein lubeíti Pedro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pedro furísunrugúgiñe

⁶ Áriebu le lubáragiñe wéyu le yebe lúnbei laságaruni Heródes Pedro jagíbugiñoun gürígia, larúmuguña Pé-

dro jamídaangua bián súdeara, gürágu ligía láu bián güríngüri, jámaya bián súdeara luágu béna óunigira. ⁷ Sódini, ligía lasáliragun ában lání Wabúreme ánjeli, ába larúgoundagún furísunrugu. Ába lagúuruni ánjeli ligía louábawagu, ába lagáguduni, ába laríñagun lun. —Sarába furése.

Ábati láburujan güríngüri lueígiñe lújabu Pedro, ⁸ ába laríñagun ánjeli ligía lun.

—Murúbei bubélitin, daúbounme bigeídin.

Lárigiñe ladúgüni Pedro sun líra, ába laríñagun ánjeli ligía lun.

—Daúboun babíte, falábana.

⁹ Ába láfuridun Pedro lárigi ánjeli ligía, ibídiñoun lun ánjein inárüni lubeí lúmoun máma lan inárüni cátei le ladúgübei ánjeli ligía. Genégetimáati lun camá gewénediñein. ¹⁰ Ába jásügürün jáu furúmiñetiña óunigirutiña, sügü jamaña jabíaman, dánti le jachúlürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjíñuragun ában úma, ába lígiruni ánjeli ligía Pedro lábugua. ¹¹ Ligíaali lárügüdagun Pedro lúngua, ába laríñagun.

—Aná guetó, subúdi náali luágu óunaja láali lan Búngiu ánjeli lun leséfurunina lueí Heródes luma lueí sun le yebe jabúseerubei juríu jadúgün náu.

¹² Asáminareína ligía Pedro luágu cátei le, ába lídin túbiñoun María to lúguchu Juan Márcos, le ní jabei sarágu gürígia adámuriñu ayúmuragua lun Búngiu luágu. ¹³ Dan lacaújan luágu lubéneri bürürü, ába táfuridun ában irájü músu, gírítu Róde, aríja ca lan agúajabei. ¹⁴ Dan tasúbudiruni luágu Pedro lan luágu lumálali, buléi tumúti tánjunrenchuni béna, le luweírin tugúndan, ábarüga teíbaagun múnadoun awísaja luágu niján lan Pedro bénabu. ¹⁵ Ábati jaríñagun tun.

—¡Lúlüjaali báu!

Ába taríñagun joun luágu choúru tan luágu ligía lan. Ába jaríñagun.

—Máma ligía, fágua láfurugu.

¹⁶ Niján mémeti Pedro acaúnja luágu béna. Dan jánjunrenchuni, ába laweíridun janígi dan le jaríjini. ¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo luma joun jíbiri afíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdeara, ladúga ibídiñeti joun ca lan susérebei lun Pedro. ¹⁹ Ába loúnajan Heródes áluajei, quei madári jamáni, ába lálügüdaguniña súdeara já buga óunigirubalin, lárigiñe, ába láfaraguágüdüniña jílágubei. Lárigiñe, ába láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíríti ligáñi Heródes jáma gürígia ja aganoúbaña Tíro luma Sidón, ánjein jagía, ába jebélurun lídoun ában arítangun lun jóunajan wügüriña lun jadímurejan

lúma luágu jafúleisein. Dan le jachúlürün, ába jagáñeiruni Blásto, ában wügúri íñuguti láni Heródes, lun líderaguniña adílíjei sun cátei, ladúga lageirágiñe Heródes jabíja eíginí. ²¹ Ába lagúaragüdún Heródes jawágu luágu ában wéyu, wéyu ligía, ába ladáürunun lanáangun to lanáangun urúei, ába lañúurun luágu lála le ñígiñe lubei lagúmadíja, ába ladímurejan joun. ²² Ábati jagúmeserun gürígia agúaraja.

—¡Máma wügúri adímurejabei, búngiu adímurejabei!

²³ Lídan óra ligía, ába lasándiragüdúni láni Búngiu ánjeli Heródes, ladúga lanáangun lúngua luágu jerérun gürígia, míchu lumúti linébase Búngiu lun, ába jeígini jéweraü, ába loúnwen.

²⁴ Abúrchagueínatimá ligíati ugánu le láni Búngiu, apúrichijóati lídan sun fulásu.

²⁵ Dan jagúmuchuni Bernabé lúma Sáulo jawádigi-mari, ába jagíribudun Jerusaléngiñe barúina jamei Juan Márcos jamagua.

Jagúmeseruni Bernabé lúma Sáulo jawádigimari apúrichijei Lerérun Búngiu

13 Tídan ligílisi to Antioquáboun, ñíñanu profétagu jáma maésturugu. Wügúriña jagía. Bernabé, Simón, le únbei jaríñaga Wuríti, Lúcio le Cirénena, Manaén le agúriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumei Bernabé lúma Sáulo nun lun wadágimanu le únbei nanúadiraña.

³ Lárígiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóudin Seléucia, ñígiñe, jádina lun jóudin luágun ubóuju le Chípre. ⁵ Dan jachúlürün lídan ubúrugun le gíribei Salamína, líbiri méme Chípre, ába jagúmeserun apúrichijei lerérun Búngiu tidan jalígilisin juríu. Ñúdúnti gíñe Juan Márcos jáma, íderaguaaña. ⁶ Eíbuga jamúti sun ubóuju ligía chülú lúmoun fulásu le gíribei Páfos. Ñi jadárira ában juríu gírítí Barjesús, garíyajati wügúri ligía, ye ligía, laríñaga luágu proféta lan. ⁷ Garíyajati ligía lúmañein gumádimati le Sérjio Páulo, ában wügúri janíchiguti. Ába loúnajan gumádimati ligía luágu Bernabé lúma Sáulo ladúga busén lan lagáambuni lerérun Búngiu. ⁸ Ánjein garíyajati ligía, le méme gíribei Elímas, sigéne lumútiña luei yebe lafíñerun gumádimati luágu le jaríñagubei lun luágu Jesucrístu. ⁹ Sáuloti, le méme gíribei Páblo, buin líña láu lubáfu Sífiri Sándu, ába laríñagun Elímas, ¹⁰ ába laríñagun lun.

—¡Yéetibu, buin bíña láu wuríbani, liraú Máfia amúrü, lágani sun le buídubei! ¿Ca uágu meréde lubei beyéjejan luágu lémeri Búngiu le surúbei? ¹¹ Guetó

láburuja ligáñi Búngiu buágun, berédera maríjinga luágu átiri dan.

Lídan óra ligía, ába labúrigadún láu, ába láluajan cába lan árújei lújabu, ladúga maríjinjali lan. ¹² Dan laríjini gumádimati cátei le, ába lafíñerun luágu Jesucrístu, weírítí lanígi láu le jarúfudajabei luágu Wabúreme Jesucrístu.

Páblo lúma Bernabé ubúrugun Antioquía

¹³ Ába láfayarun Páblo jáma líbirigu Páfosgiñe lun ubúrugun Pérgé, le lídaanbei fulásu gírítí Panfília. Ánjein Juan Márcos, ába lígiruniña, ába lagíribudun Jerusaléoun. ¹⁴ Lárígiñe, ába jásügürün Pérgégiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei tídoun jalígilisin juríu, ába jañúurun ñi. ¹⁵ Lárígiñeti talijjóuniwa líburu to lánina lílürudun Moisés túma buri líburu to jabúrújaboun profétagu, ába jóúnajan ábutigu aríñaga joun.

—Wadújeñu, ánjein níjein lubei dimúrei lun jaríñaguní joun gürígia ja, aríñaga jumei guetó.

¹⁶ Ábati lásaarun Páblo, ába ladúgün seíni joun láu lújabu lun jámanichun, ába laríñagun.

—Agáamba jumá, wügúriña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute Israelítagu, anúadaja lumútiña meja binádu wagúbürigu lun lánigubaña lan, ába ladúgüniña ábanme oúnwenbun násiñun dán meja le añájagua lan agánawa quei teréncha Ejípto, lárígiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu. ¹⁹ Lárígiñe, ába lagúmochaguagüdüni sédü násiñun ja aganoútiña Canaán lun líchuguni jafúlasun joun binádu wagúbürigu luára gádürü-san-dimí irúmu. ²⁰ Lárígiñe, ába líchugun gürígia lun jagúseragüdüniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraú Cis, ladúgawagun Benjamín. ²² Lárígiñe, ába lagídaruni Búngiu arúejani luei Saúl, ába líchuguni lun Davíd, le uágubei laríñaga. “Darína Davíd, liraú Isaí, ában wügúri le áubei nagúndaara, áni ladúgübei sun le nabúseerubei.” ²³ Jádaangiñe ladúgawagun Davíd ligía liábin Jesúsu le loúnajabei Búngiu lun jasálbarun Israelítagu, quei meja laríñaguni. ²⁴ Lubáragiñebei liábin Jesúsu ubóuagun, apúrichijati Juan joun sun Israelítagu, laríñaga joun luágu lúnti lan jasáansiruni jagáburi, badísei jagíame. ²⁵ Dan le layáfadúnbei dan lun loúnwen Juan, ába laríñagun. “Mámatia áu le uágubei jarítagua luágu áu lan, liábiba ában nárigi, ni cáta áu loúbagiñe, madúnatina ni íbini lun nafáragadunun ligeídin.”

²⁶ ‘Nidújeñu, jugúya le jarájüñübei ladúgawagun Abrahám, júma jugúya le mámabei ladúgawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle. ²⁷ Já meja gürígia ja aganoúbaña Jerusalén jáu sun jábutigu, ibídíñetí yebe joun ca lan Jesúsubei, úa ligía

gunfaráanda jamáni jerérun profétagu, láu sun ali-
ijoúa lan jerérun tídan jalgílisin ságü luwéyuri emé-
raa-
guni, jagía guánarügüti gúnfuli jamúti le bü-
rúwañubei láu jasiadiruni Jesúsu lun loúnwen.
²⁸ Láu sun madári jamá lidúnrun Jesúsu
lun gayára lan jáfaruni jilágubei, amúria-
jatiña lúma Piláto lun láfaragüdúni jilágubei.
²⁹ Dánti le adúga jamáli sun le taríñagubei
Lerérun Búngiu luágu, ába jarárigüdúni
lueígiñe gurúwa, ába jíchuguni lídoun
lumúaja. ³⁰ Ába lásaaragüdúni Búngiu
lídaangiñe oúweni lúnya labágaridun. ³¹
Arúfudaguati Jesúsu lúngua wínwañu
luágu sarágu weíyaasu joun ja ñúbin-
baña lúma luágu luweíyasun Galiléagiñe
lun Jerusaléoun, jagíati geféenbaña luágu
joun gürgia guetó.

³² Wíchiguñein lubeíti ugánu le jun, luágu
darádu lé meja ladúgubei Búngiu jáma
binádu wagúbürigu

³³ gúnfuli láali woun, wagía le jadúgawagun,
láu lásaaragüdúni Jesúsu, quei laríñaguni
tídan lilíburun, lídan libíaman Sálmo.
“Niraú amúrú, rúnaali ubáraü le bun
ugúñe.” ³⁴ Aríñaga láali meja Búngiu
luágu lásaaragüdúni Jesúsu lídaangiñe
oúweni lun mañáladun lan lúgubu,
dan laríñagun tídan líburu to Lerérun.
“Níchugubei abíniruni le uágubei naríñaga
lun Davíd bun, gayáraati beménigidun
luágu.”

³⁵ Laríñaga gíñe Davíd lídan ábanya
Sálmo. “Mígirunbadibu lun lañáladun
lúgubu Biraú le jínsiñebei bun.”

³⁶ Davíd, seríwiti méja joun ja lánina
lidáani quei laríñaguni Búngiu lun,
lárigiñe, ába loúnwen, ába labunún le
ñi lubei jabunúa lagúbürigu, ába lañáladun
lúgubu.

³⁷ Ánjeinti Jesúsu, sarágüda lumúti
Búngiu lídaangiñe oúweni, mañáladun
lúgubu. ³⁸ Nidújeñu, lúnti lubeíti
jasúbudiruni luágu lídaangiñe lan Jesúsu
ferúdunawa lan wafígoun. Ligía ugánu
wanúgubei jun. ³⁹ Lídaangiñeti gíñe,
chibáwaali lubei sun wafígoun, sun
wagía le afíñebei luágu, gidáwa ligía
wadúnrun ligíbugiñe Búngiu, cátei lé
meja siñá lubei lilúrudun Moisés adúga.
⁴⁰ Toúnigi jumá lubeíti lueí láburi-
jan ligáñi Búngiu juágun queísi jaríñaguni
profétagu dan le jaríñagunbei.

⁴¹ Jugúya le éjerajabei náu, weírilá
janígi, áni gumúgua jumá,

ladúga áu le Búngiubei, nadúgüba cátei
weínamuburiti, daríme lun mafíñen jumá,
íbini jabájüdaguni ámu jun.

⁴² Dan le láfuridunbei Páblo jáma
lánigu tídaangiñe ligílisi, ába jamúria-
jan jáma lúnya jadímurejan joun luágu
buri cátei le lewéñegua dimáasu. ⁴³
Dan lagúmuchun jadámuridagun ligí-
lisirugu, sarágu jádaangiñe juríu jáma
buri ja ígirubalin binádu jafíñen lun
jafálaruni jafíñen juríu, ába jafálaruni
Páblo lúma Bernabé. Ába jadímurejan
Páblo lúma Bernabé jáma, ába jaríñagun
joun lun jasígirun eménigira luágu
lareídun Búngiu.

⁴⁴ Lewéñegua dimáasu, le luwéyuri
eméraguni, ába jóundaragun jíbe-á-
gei lílana fulásu lun jagáambuni lerérun
Búngiu. ⁴⁵ Láu jaríjin juríu sarágu
gürgia agáambajei lerérun Búngiu,
ába jeméendüjan, ába jagúmeserun
asígenerei Páblo, anába jameí líri
Jesúsu.

⁴⁶ Ábati jadímurejan Páblo lúma
Bernabé manúfudeiga, ába jaríñagun.

—Lúnti yebe wíchuguni ugánu
lúmagiñeti Búngiu luágu Wasálbaragüle
jun furúmiñe, jugúya le juríu, quei
mabúseerun jumá jerésibiruni ugánu
ligía, láu líra jarúfuduñein luágu
madúna jumáni ibágari le magú-
muchaditi, ítara líña weíbugagubeíti
apúrichija joun ja mámabaña juríu.
⁴⁷ Ladúga ítara líña laríñaguni
Wabúreme woun.

Níchuguñadibu lun bíchuguni
larúgounga joun ja mámabaña juríu,

lun gayáraabei lan jasálbarun
ja aganoúbaña lídan lagúmujoún
fulásu uboúagu.

⁴⁸ Dan jagáambuni ja mámabaña
juríu cátei le, ába jagúndaaragun,
ába jagúmeserun aríñaga luágu buí-
du lan láni Búngiu ugánu, ába jafíñerun
sun ja lúnbaña jafíñerun luágu
Jesucrístu, ja lúntiñabaña ibágari le
magúmuchaditi. ⁴⁹ Ítara líña
lapúrichijoún lerérun Búngiu lídan
sun fulásu ligía. ⁵⁰ Ába jadímurejan
juríu jáma würiña gúnfulitiña,
inébewa jagía, lúma jáma wügúriña
weírigutiña ñi ubúrugu, ába jínchajaniña
lun jeíbaajaniña Páblo lúma Bernabé
darí lun jabúguniña lídaangiñe
fulásu ligía. ⁵¹ Ábati jáfuruduní
calquí lueígiñe jagúdi, arúfudei
luágu mabuídun lan jóuserun lílana
fulásu ligía, ába jóúdin ubúrugu
Icónio. ⁵² Gúndaañu jáña
afíñetiña Antioquía luágu jabágari
lúma Crístu, weíruti jedéregeragun
jóungua lun Sífiri Sándu.

Páblo lúma Bernabé ubúrugu Icónio

14 Ába jebélurun Páblo lúma
Bernabé tídoun jalgílisin juríu
ubúrugu Icónio, ába japúrichijan,
buíti jadímurejan darí lun jafíñerun
sarágu, dándu juríu quei máma
juríu, luágu Jesucrístu. ² Juríu ja
mafíñebaña luágu Jesucrístu, ába
jínchajaniña ja mámabaña juríu,
amásiñedagúdaña afíñetiña joun.
³ Ligía jeréderunbei Páblo lúma
Bernabé sarágu dan ñi, ába jadímurejan
furáangu, manúfudeiga, jeménigiñu
luágu Búngiu, arúfuda lumúti
Wabúreme luágu inárüni lan cátei
le japúrichijabei luágu lareídun,
láu líchuguni ubáfu joun lun
jadáagun seíni lúma milágu-
ru. ⁴ Fánreinguañu jáña lílana
ubúrugu ligía, jíbiri jámagiñeñanu
juríu, jíbiri jámagiñe apóstolugu.
⁵ Játi juríu jáma ja mámabaña
juríu, ába jebélurun lídoun ában
arítagni jáma gumádimatiña lun
jeíbaajaniña apóstolugu lúma
lun jachámuragun dúbü jawágun.
⁶ Ánjein Páblo lúma Bernabé,
ába jasándiruni, ába jóúdin
lídoun buri fulásu le gíribei
Lístra lúma Dérbe, bíama fulásu
le láni méme fulásu le Licaónia,
lúma geyégua láu, ⁷ apúrichija
jamúti gíñe ugánu luáguti
Wasálbaragüle Jesucrístu ñi.

Jachámuragun dúbü luágu Páblo lídan fulásu le Lístra

⁸ Ñíñein ában wügúri meíbugunti,
Lístra, ñun líña ladúga ítara-
gubeíñein lan lúmagiñe lagúria-
joún, meíbugungubeíti. ⁹ Lagáambajañein
wügúri ligía le laríñagubei Páblo,
láu laríjin Páblo luágun, ába
lasúbudiruni luágu afíñe lan
wügúri ligía luágu gayára

lan lareídagun. ¹⁰ Ábati laríñagun Páblo lun láu umálali jéreti.

—Ráramabá luágu bugúdi.

Ába lachúbarun wügúri ligía arárama, ába lagúmeserun eíbuga. ¹¹ Dan jaríjini gürígia cátei le ladúgübei Páblo, ába jagúmeserun agúaraja lídan jerérun Licaóniana, jaríñaga.

—¡Raríjaña búngiugu quei jagáburi wügúriña wámoun!

¹² Jaríñaga luágu Bernabé búngiu Júpiter, luágu Páblo búngiu Mercúrio, ladúga ligía lan adímurejabei. Nújein lúban jabúngiute Júpiter bougudiñoun lueí ubúru, ¹³ ába líabin lufádirin Júpiter ñígiñe barúina wügúriña bágasu lúma buri fulúri luágun lubéneri ubúru, buséti yebéti ligía jáma buri gürígia lun jáfaruniña bágasu jagía lun jadágaragüdún joun Páblo lúma Bernabé. ¹⁴ Dan jasúbudiruni Páblo lúma Bernabé cátei lan jabúseerunbei gürígia ja jadúgün, ába ja jeíridagunun janáangun le luweírin lubéresen cátei le joun, ába jádaragun jóungua jádoun gürígia agúarajeina.

¹⁵ —¡Wügúriña! ¿cámesan jabúseera jadúgüni cátei le? Wügúriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wíwanbei, le adúgübalin siélu lúma ubou, barána lúma sun cátei le lídaanbei. ¹⁶ Lídan meja dan le sügújalibe, ígira lumútiña meja Búngiu gürígia lun jadúgüni le jabúseerubei, ¹⁷ láu sun, arúfuda láani joun gürígia cáteinein lan láuja buídu le ladúgübei joun. Rúti júya woun lúma alúbajani buíti, ru ligía eíginu buídurügüti woun, belúgüda lumúti ugúndani tídoun wanígi.

¹⁸ Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia lueí jáfaruniña bágasu jagía lun jadágaragüdún joun.

¹⁹ Ábati jachúlürün juríu Antioquíagiñe lúma Icóniogiñe, ába jagáñeiruni jarítangun gürígia lun jachámuragun dúbü luágun Páblo. Lárigiñe, ába jadúrüguduní bougudín lueí fulásu, sun jaríñagun luágu jiláali lan. ²⁰ Dan le jagúriridágun afíñetiña láu Páblo, ába lásaarun, ábaya lebéllurun fulásurugún. Larúgan, ligía lídin lúma Bernabé ubúrugun Dérbe.

²¹ Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu gürígia afíñerutiña luágu Jesucrístu, ába jagíribudun, ába jóudin Lístra, Icónio lúma Antioquí. ²² Rútiña gurásu joun afíñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafíñen, aríñageina jagía joun luágu lúnti lan wasúfurirun sarágu lun gayára lan webéllurun lídoun larúeijan Búngiu. ²³ Rútiña gíñe ábutigu lídan cáda jadámurin afíñetiña. Lásunti jayúmuragun lúma jayúnarun, ába jederegeruniña lábun laríaajan Búngiu le uágubei jafíñera.

Lagíribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachúlürün Panfília. ²⁵ Ába japúrichijaní ugánu luáguti Jesucrístu ubúru Pérgé, líbiri méme Panfília, ábati

jóudin Atálioun. ²⁶ Ñígiñe jádina, ában jóudin Antioquíoun, le fulásu le ñíjin lubeí jóunajoúa lábugiñe laríaajan Búngiu adúgei wadágimanu le jagúmchubei guetó. ²⁷ Dan jachúlürün Antioquí, ába jóundaraguniña tánigu jalígílisin afíñetiña, ába jabájüdaguní sun cátei le ladúgübei Búngiu jáu joun, lúma luágu lánjunrenchuní Búngiu béna joun ja mámabaña juríu lun gíñe gayáraabei lan jafíñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afíñetiña ñi.

Adámuridagúni Jerusalén

15 Ligía jayábin wügúriña Judéagiñe lun Antioquíoun, ába jagúmeserun arúfudaja joun afíñetiña luágu lun lan jasálbarun, mósu lan jerésibiruni wügúriña circuncisión, quei laríñaguni lilúrudun Moisés. ² Barúti Páblo lúma Bernabé ában sigénei weíriti jáma luágu cátei ligía, lagúmujóun óra, ába loúnajoún Páblo, Bernabé, jámaya ámu wügúriña Jerusaléoun lun jóudin aráanserei cátei le jáma apóstolugu jáma tábutigu ligílisi to ñíboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loubawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafíñen lun jafálaruni Crístu. Ába jagúndaaragun sun afíñetiña láu ugánu le.

⁴ Dan jachúlürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adúga láalibe Búngiu jádaangiñe.

⁵ Ñíñanu jádaangiñe jadámurin fariséogu ja afíñetiña luágu Crístu, ába jaráramun, ába jaríñagun.

—Lúnti jerésibiruni wügúriña afíñetiña ja mámabaña juríu circuncisión, lúnti gíñe jagúnfulirun lúma lilúrudun Moisés.

⁶ Ábati jóundaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába lásaarun Pedro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jádaangiñe lun níchuguni ugánu le lánina asálbaruni joun ja mámabaña juríu, lun gíñe gayáraabei lan jafíñerun luágu Jesucrístu. ⁸ Búngiuti, le subúdi jabúbei tun anígi, arúfuda lumúti luágu resíbi lániña ja mámabaña juríu láu líchuguni Sífiri Sándu joun quei líchuguni woun. ⁹ Manúgün lumútiwa Búngiu ámu jaweí, jarúmagüda lumútu gíñe janígi láu jafíñen luágu Jesucrístu. ¹⁰ ¿Cáti uágu lalóuguada jafíñen guetó luágu le adúga láalibe Búngiu, ru jugúya ában ijúrúgu jawágun afíñetiña ja, le wásiñerubei wagía guánarügü anúga—ni wagía ni binádu wagúbürigu? ¹¹ Afíñetiwa luágu sálbaadiwa lan láurügü wafíñerun luágu Jesucrístu, madúgünga wagía ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña gíñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguru le ladúgübei Búngiu jádaangiñe, jagá-

nagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána. ¹⁴ Abájüdaguaali Simón Pedro woun ída líña lan fuleisei lániña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabúrjabei profétagu tídan Lerérun Búngiu.

¹⁶ Gumúguaali jarúeijan ladúgawagun David, queísigubeirügü tagúmuchagun ában múna eíguadutu.

Lachúlürüba wéyu nun, áu le Búngiu, lúnyame naríjin jawágun ladúgawagun David, ábame níchuguni ubáfu lun ában jádaangiñe lun larúeijan jádan.

¹⁷ Nadúgübei líra lun gayáraabei lan jayábin sun jíbiri gürígia lun jáluajanina queísi Jabúreme, lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdúbalin cátei le lúmagiñe buga binádu dan.

¹⁹ Ligía naríñagunbei luágu moun láni wíchugun sarágu lúrudu jawágun ja mámabaña juríu, ja ígirubalín binádu jafíñen lun jafálaruni Búngiu, ²⁰ buídurügüti láu labúrjajoun joun lun jebé lan jeígin eígin le adágarawagüdúti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigiwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri cátei le lun jíchugun inébesei joun juríu, ladúga lúmagiñe bugája binádu dan, añájein gürígia apúrichijati lilúrudun Moisés lídan ságü fulásu, alijóuati lúrudu luágu tídan buri jalígilisin juríu ságü luwéyuri eméraa-guni.

²² Ábati jarítangun apóstolugu jáma tábutigu ligílisi jáma sun tílana ligílisi janúadajan wügúriña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le gíribei Barsabási, lúma Sílas, bián wügúriña weírigutiña jádan afíñetiña. ²³ Ába jóunajan ában gárada jáma, laríñajare tídan gárada tugúya.

“Wagía le apóstolugu, tábutigu ligílisi, jáma sun jíbiri afíñetiña, mábuga wáña joun wadújeñu lueígiñe Jesucrístu ja mámabaña juríu ja aganoúbaña Antioquía, Síria, lúma Cilícia. ²⁴ Agáambaadiwa luágu añájein lan gürígia ñúdüntiña yágiñe ibídiñoun woun ebéreseja jun láu jadímurejan, áni dájaña ámu arítangun jídoun láu jaríñagun jun luágu mósu lan jerésibiruni wügúriña circuncisión, queísi laríñaguni lilúrudun Moisés. ²⁵ Ligía wúwaradúnbei lídan warítangun lun wanúadajan gürígia wádaangiñe lun jóudin aríjaün úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucrístu. ²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to wóunajaboun jun, jun. ²⁸ Maríbaanti laríjin lun Sífiri

Sándu lúma woun, míchugúniwa lan ámu ijúrügu jun lueídügüya murúsun cátei le, le lunbei jadügüni. ²⁹ Lun meígin jumá úwi le jáni anímaalu ja adágarawagüdútiña joun sándu, meígin jugúyame jítaü, ni úwi le jáni anímaalu ja tigiwarügütiña, madáagun jugúyame cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadúga. Buídu lámuga lídin jun.”

³⁰ Lárigiñeti jóunajoun luágu jaweíyasun, ába jóudin Antioquía. Dan le jachúlürünbei ñi, ába jóundaraguniña afíñetiña, ába jíchugunun gárada joun. ³¹ Dánti le jalíjanbarun afíñetiña, ába jagúndaarun sarágu luágu gurásu le tíchugubei joun. ³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afíñetiña láu jadímurejan joun, ru jagía idérebugu lun jafíñen. ³³ Lárigiñe jásügürün átiri dan ñi, ába jayoúragun afíñetiña joun lubá jagríbudun jámoun já meja oúnajabaliña Jerusalén. ³⁴ Ánjeinti Sílas, ába leréderun. ³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichije uganu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñagun Páblo lun Bernabé.

—Queímounya aríjaña afíñetiña lídan sun ubúruguburi le ñi lubei apúrichija wamáali lan uganu luágu Crístu, aríja wamámu ída jáña lan.

³⁷ Buséti yebe Bernabé janúgüni Juan Márcos jámagua, ³⁸ májati Páblo janúgüni ladúga meja ígira láaña lan Panfília, masígiti jáma lídan wadágimanu. ³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanúgüni Bernabé Márcos, ába jóudin Chípre, ⁴⁰ ába lanúgüni Páblo Sílas. Lárigiñe jedéregeruni afíñetiña Páblo lúma Sílas lújaburugun Búngiu, ába jóudin, ⁴¹ ába jásügürün Síriagiñe lúma Cilíciagiñe, íchaajeina gurásu joun afíñetiña ligílisirugu.

Lídin Timoteo úara jáma Páblo lúma Sílas

16 Ába jachúlürün Páblo lúma Sílas lídoun buri fulásu le Dérbe lúma Lístra, le ñi lubei jadárira ában afíñeti gíriti Timotéo, tiraú ában wúri juríu afíñetu luágu Jesucrístu, güriégu lúguchi. ² Afíñetiña ja aganoúbaña Lístra lúma Icónio, buíti jadímurejan luágu. ³ Buséti Páblo lun lídiba lan Timotéo jáma, íhigeina uganu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladúga güriégu lan lúguchi. ⁴ Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afíñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdún tílana ligílisi lídan jafíñen, ába jagánwoundun afíñetiña ságü wéyu.

Lasáliragun ában wügúri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachúlürün luágu fadáguau le Mísia. Nígiñe yebe jaritagua lun jebélurun loúbawagun Bitínia, májati lání Jesúsu Espíritu le méme Sífiri Sándu lun jadúgüni. ⁸ Ábati jóúdin surúrugu Mísioun, ába jarárirun Tróas. ⁹ Ní lasáliragua ában wügúri Macedóniana lun Páblo, áriebu, rára ayúmuragua lun, laríñaga lun. “Queímoun Macedónia íderagua bámu-gawa.” ¹⁰ Lárigiñe lasáliragun wügúri ligía lun Páblo, ába waráansejan lun woúdin Macedónia láu wafíñen luágu lagúajaña lan Búngiu woun lun wíchuguni ugánu luágu Crístu le Wasálbaragüle joun Macedóniana.

Páblo luma Sílas ubúrugu Filípos

¹¹ Ábati wáfayarun Tróasgiñe, ába woúdin sügúlügü luágun ubóju le Samotrácia, larúgan, ligía wachúlürün Neápolis. ¹² Nígiñe ába woúdin Filípos, Filípos lábugiñeñein lagúmadijan Róma, ligía gíñe ubúrugu le weírigutimáabei luágu loúba Macedónia. Reideitiwa átiri wéyu ñi. ¹³ Luágu ában wéyu le luwéyuri eméraaguni, ába wáfuridun boúgudin lueí ubúrugu, lárún dúna, lídan ában fulásu le ñi lubeija layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun wúriña ja oúndaragubáña ñi. ¹⁴ Níñoun ában jádaangiñe, gírítu Lídia, ubúruguna Tiatíra, tifísiute alúguraja gamísa fínutu to gúchu tágu. Judúguatu wúri tugúya lun Búngiu, tagáambajañádiwa, ába lánjunrenchunun Búngiu tanígi lun tadúgün gásu láu le laríñagubei Páblo. ¹⁵ Ába tabásterun jáu sun tílana túban, lárigiñe, ába tayúmuragun woun ítara.

—Ánjein afíñe jubeí luágu afíñe nan le tímatimaati luágu Wabúreme Crístu, reidei jumá ya núbiñe.

Jéretu wawágu, ába weréderun.

¹⁶ Luágu ában dan, dan le woúdiña lan lídoun fulásu le ñi lubeiñaja layúmurawagúa lun Búngiu, ába wadúnragun túma ában irájü gawágutu ában espíritu wuríbati le íchugubei ubáfu tun lun tasábiujan. Ában idámuni irájü tugúya, ibíjatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía luma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu úma lánina asálbaruni lídaangiñe figoú jun.

¹⁸ Gibeti wéyu táu adúgei cátei le darí lun tebéresedun lun Páblo, ába lagáragun, ába laríñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáali lan jagáñeirun seínsu tueigiñe, ába járügüdüni Páblo luma Sílas, ába janúgüniña jagíbugiñoún ábutigu lamídaangua ubúrugu. ²⁰ Ába jarúfuduniña jagíbugiñe gumádimatiña, ába jaríñagun.

—Wügúriña juríu ja, jachágaraguñein wabúrugute, ²¹ jarúfudajaña igáburi le wásiñerubei erésibira ni adúga ladúga Rómána wagía.

²² Ábati jiñúrágun gürígia jóungua jawágu, ába jarágachaguágüdüniña gumádimatiña, ába jíchugun dimúrei lun jabeichúniwa láu wéwe. ²³ Lárigiñe sarágu abeichúni, ába jádaruniña furísunrugún, ába jaríñagun lun oúnigiruti adaürútiña lun goúnigi láníña buídu. ²⁴ Dan libíjini oúnigiruti lúrudu le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi áriebu, ñíñanu Páblo luma Sílas ayúmuragua luma erémuja urému lun Búngiu, ja jíbiri, agáambaja. ²⁶ Sódini, ába liábin ában oúnwenbun járabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güringüri le jawágubei adaürútiña. ²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeíte lún yebe láfaragun lúngua, sún yebe laríñagun luágu ñúdúngua jamá adaürútiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebéllurun eíbaagueina, adádagareina láu anúfudei, ába láguragun lúngua lubádu jagúdi Páblo luma Sílas. ³⁰ Ába laságaruniña furísunrugugiñe, ába laríñagun joun.

—Wügúriña, ¿ca cátei lúnbei nadúgüni lun nasálbarun?

³¹ Ába jaríñagun lun.

—Afíñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña. ³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. ³⁴ Lárigiñe, ába lanúgüniña lúbiñoun, ába líchugun eígini joun, ¡máti lugúndan jáu sun lufámilian láu jafíñerun luágu Búngiu!

³⁵ Larúgan bináafin, ába jóúnajan gumádimatiña polisía aríñaga lun oúnigiruti lun lígiragüdüniña Páblo luma Sílas. ³⁶ Ábati laríñagun oúnigiruti lun Páblo.

—Oúnajaaña gumádimatiña aríñaga nun lun nígiragüdünnün, gayáraajali lubeíti jídin darángilaña.

³⁷ Ába laríñagun Páblo joun polisía.

—Láu sun Rómána wamá, beíjamutiwa jagíbugiñe gürígia, míchigunga dan woun lun wadímurejan waweígíñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Núbin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómána jamá Páblo luma Sílas.

³⁹ Ábati jóúdin amúriaaja ferúduun jáma, ába jaságaruniña, ába jayúmragun joun lun jáfuridun ñígiñe ubúrugugiñe. ⁴⁰ Dan le jáfuridunbei furísunrugugiñe, ába jóúdin túbiñe Lída, lárigiñe jaríjiniña afíñetiña lúma jíchugun idérebugu joun, ába jasígiruni jaweíyasun.

Chagáguau ubúругu Tesalónica

17 Lídán jaweíyasun Páblo lúma Sílas, sügútiña Anfípolisgiñe lúma Apolóniagiñe, ñígiñe, ába jachúlürün ubúrugun Tesalónica le ñí tubei ában jalígilisin juríu. ² Quei léchun Páblo, ñúdünti tídan ligílisi tugúya, adímurejati jáma úruwa dimáasu, ságü luwéyuri eméraguni. ³ Arúfudajati joun quei taríñaguni Lerérun Búngiu luágu lúnti lán meja lasúfurirun Crístu, lárigiñeme lan loúnwen, aba lánme lásaarun lídaangiñe ouweni lúnya labágaridun. Laríñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña güriña.

⁴ Ábati jafíñerun jádaangiñe juríu, ába júaradun lúma Páblo lúma Sílas. Afíñetiña gíñe sarágu ja mámabaña juríu ja judúguatiña lun Búngiu, jáma sarágu würiña weírigutiña. ⁵ Juríu ja mafíñebaña luágu Jesúsu lan Crístubei le lunbei liábin, magúndaantiña láu cátei le, ába jóúndaragun wügúriña wuríbatíña ja eíbugañajádügübaña úmada, ába jachágaraguágüdüniña güriña ñi ubúругu. Ába jaságarajanun lúban Jasón, álujaña Páblo lúma Sílas lun jaságaruniña lun jedéregaruniña jájaburugún güriña. ⁶ Queíti madári jamániña ñi, ába janúgüni Jasón jáma átiri jádaangiñe afíñetiña jagíbugiñoun gumádimatiña lídan ubúругu ligía, ába jagúaragun aríñaga.

—Wügúriña ja, ja ebéresejabaña lídan sun fulásu, chúlújaña gíñe ñájoun, ⁷ resíbi láaña Jáson lúbiñe. Sun jagía dúrúgua jamúti lilúrudun Urúei César, ladúga aríñagatiña luágu níjein lan ámu urúei, ában nege gíríti Jesúsu.

⁸ Dan jagáambuni gumádimatiña jáma sun jíbiri güriña cátei le, ába jachágaragun. ⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúругu Beréa

¹⁰ Furése furése, dan le labúrigadun, ába jóúnajaniña afíñetiña Páblo lúma Sílas ubúrugun Beréa. Quei jachúlürün ñi, ába jóúdin tídoun jalígilisin juríu. ¹¹ Juríu ja ñibaña, buítimaati jagáburi jaweí ja Tesalónicabaña, resíbi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubei le aríñawagúbei joun. ¹² Sarágu jáña lubeíti afíñerutiña jádaangiñe, afíñe jagía gíñe sarágu ja mámabaña juríu, dándu würiña weírigutiña quei wügúriña. ¹³ Dan le jasúbudirunbalin juríu ja Tesalónicabaña luágu lapúrichijañein lan gíñe Páblo Lerérun Búngiu Beréa, ába jóúdin achágaraguágüdaña güriña ñi. ¹⁴ Ába jóúnajani afíñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja

ñúdümbaña láu Páblo, ába jáfayajan lúma chúlú ubúругu Aténas. Lárigiñe, ába jagíribudun barúina jagía dimúrei lun Sílas lúma Timotéo lun jóúdin lárigi Páblo lídan lufúresen.

Páblo ubúругu Aténas

¹⁶ Sun niján lan Páblo Aténas agúrabajei Sílas lúma Timotéo, medéraaguágüdünti larítangun láu laríjini ubúругu ligía buin jáu bürúbün sándu. ¹⁷ Ligíaja ladímurejaanbei tídan jalígilisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma güriña ja úmadarugubaña, ñi lubei jadámuridagua. ¹⁸ Níñanu jádaangiñe wügúriña ja atúriajabalin jarúfudajan epicúreogu, jáma ja atúriajabalin jarúfudajan estoícogu, ába jadímurejan lúma. Jaríñaga jíbiri.

—¿Cáfunasan laríñagubei wügúri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti ítara ladúga lapúrichijan Páblo joun luágu Jesúsu lúma luágu ásaaruni lídaangiñe ouweni. ¹⁹ Ábati janúgüni lídoun ában fulásu gíríti Areópago, le ñi lubeíja jóúndaragua lun jagáambagun jóúngua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marítanguntiña luágu ámu cátei lueídügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügúriña Aténasna, aríja numúti luágu afíñe jumá jawágu jisándun, ²³ ladúga dan le aríaajeina nubálin fulásu buri le ñi lubei jájuduragua joun jisándun, darítina ában latárü le ñi lubei bürúwañu lan dimúrei le. “Lun Búngiu le ibídiñewabei”. Búngiu le, le únbei jájuduragua, le ibídiñebebei jun, ligía Búngiu le uágubei nadímureja jun.

²⁴ Ligía Búngiu le adúgübalin ubou lúma sun cátei le ubouagubei, ligía labúremebei síelu luma ubou. Maganoúnti tídan ligílisi to jadúga güriña, ²⁵ memégeirun lumúti gíñe le gayáraabei jadúgüni güriña luágu lufúleisein, ligía guánarügü íchugubei ibágari lúma garábali, lúma sun cátei woun, sun wagía.

²⁶ Lídaangiñe ábanrügü wügúri ladúgaña sun néchaanigu lun jaganoun lídan sun fulásu, aráanseleí dan le lúnbei jabágariduni lúma fulásu le lúnbei ñiba lan jagánawa. ²⁷ Adúga lumúti Búngiu sun líra lun gayáraabei lan jáluajani güriña, gayára lámuga jadáriruni láu jáluajani, láu sun inárüni lan luágu madíse lan Búngiu lueí cáda ában wádaangiñe.

²⁸ Ladúga lídaangiñeti Búngiu awánjein lubei, gabágarí wagía, eíbuga wagía ligíbuagu ubou le, quei jaríñaguni poétagu jádaangiñe. “Lirájüñü Búngiu wagía.” ²⁹ Queíti lirájüñü wabei Búngiu, mouñ lumuti wanúgüni Búngiu

quei ában sándu le gólu, o pláta o dúbü le jadúga wügúriña quei jarítangun luágu ítara líña lan Búngiu. ³⁰ Mebéresegúnti méja Búngiu láu cátei le jadúgübei gürígia lábugiñe libídiñe joun, ánjein guetó, aríñagati joun sun gürígia lídan sun fulásu lun jasáansiruni jouserun. ³¹ Ladúga anúadajaali Búngiu ában wéyu lun ligíaba lan wéyu lagúseragüdüniña gürígia ja uboúagubaña láu ísuruni láu ában wügúri le anúadaja láalibeí, wügúri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiriñiña Páblo. ³⁴ Ába jafíñerun jádaangiñe luágu Jesucristu, ába jafálaruni. Níñein Dionísio jádan, lé meja ában jádaangiñe ábutigu lídan fulásu le gíríbeí Areópago, túma giñe ában wúri gírítu Dámaris, já-maya ámu gürígia.

Páblo ubúrgu Corínto

18 Lárígiñe cátei le, ába láfuridun Páblo Aténas-giñe, ába lídin ubúrgu Corínto. ² Ñi ladárra ában juríu gírítu Aquíla, túma lúmari to gíríiboun Priscíla, Póntona jagía. Málügili luegiñe jayábin Itáliagiñe, jayábinbei ñígiñe ladúga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lifísiute já-ma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáani eméaaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucristu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichijei Lerérun Búngiu. Aríñagati joun juríu furáangu luágu Jesúsu lan Crístubei le jagúrabajabei lun lasálbaruniña lídaangiñe jafígoun. ⁶ Anjaña juríu, ába jasígeneruni le lubeíbei, anábagua buri jameí. Ábati láfuridunun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Anjaünme eféridira jídaangiñe, mámaalime ní-daangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbiñoun ában wügúri gírítu Jústó, wügúri ligía, judúguati lun Búngiu, ñi toúbagiñe ligílisi lagánawa. ⁸ Críspo, le tábuti jalígílisin juríu, ába lafíñerun luágu Wabúreme Jesucristu, jáu sun tílana lúban. Sarágu giñe jádaangiñe Coríntona, dan jagáambunbalin ugánu luáguti Jesúsu, ába jafíñerun, ába jabásterún. ⁹ Ábati lasáliragun Wabúreme Jesúsu lun Páblo luágu ában áriebu, ába laríñagun lun.

—Manúfudebá, bapúrichija méme, mámanichabá, ¹⁰ ladúga anájein búma, úabei ni ában agúruruti

buágu lun ladúgün wuríbani bun. Anájein sarágu gürí-gia lídan ubúrgu le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajeí Lerérun Búngiu joun lílana fulásu.

¹² Lídan dan le Galíon lan gumándanbei Acáya, ába jóundaragun juríu lun járügüdüni Páblo. Ába janúgüni ligíbugiñoun lúruðu lun lagúserawagüdún. ¹³ Ába jaríñagun lun gumándan.

—Wügúri le, leréde arúfudaja joun gürígia lun jájuduragun lun Búngiu láu ában igáburi le múaraan-beí lúma lúruðu.

¹⁴ Dán yebe ladímureja lan Páblo, ligía laríñagun Galíon joun juríu.

—Lun jamúga ában lan wuríbani o dúru júrúti ladúgübei wügúri le, níchaaguña jamúga núngua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jilúrudun, aráanse jumeí júngua, ladúga mabúseeruntina nagúseragüdün luágu buri cátei le.

¹⁶ Ába labúgaguniña ñígiñe. ¹⁷ Ábati járügüdüni sun güríégugu Sóstenes le tábuti jalígílisin juríu, ába jabúleiseiruni ñi guánarügü ligíbugiñe gumándan. Mebéresegúnti Galíon láu líra.

Lagríbudun Páblo Antioquíoun, lagúmeseruni lúruwan luweíyasun apúrichija

¹⁸ Lárígiñe líra, ába leréderun Páblo átiri dan ñi Corínto. Lárígiñe, ába layoúragun joun afíñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúrgu Céncrea lubáragiñe ládinun, lun lagúnfulirun láu ában méja darádu le ladúgübei lúma Búngiu. ¹⁹ Dan le jachúlürün ubúrgu Éfeso, ába lígiriñiña Páblo Priscíla lúma Aquíla lun jeréderun ñi lí-dan ubúrgu ligía. Lubáragiñe lígiriñi Páblo Éfeso, ába lídin ligílisirugu adímureja jáma juríu. ²⁰ Ába jamúriajan lúma lun leréderun méme ñi jáma, májati. ²¹ Ábati layoúragun joun, laríñaga joun.

—Mósu ñi nan Jerusalén lubá fédu le lúnbei ladúgún, nagríbudayaba aríjaün ánjein busén Búngiu.

Ába ládinun, ába lídin Éfesogiñe. ²² Túrúti Cesaréa, ñígiñe ába lídin Jerusalén abúsura joun tílana ligílisi, lárígiñe, ába larágachun Antioquíoun. ²³ Lárígiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dúgüdaguau joun afíñetiña.

Lapúrichijan Apólos ubúrgu Éfeso

²⁴ Lídan dan ligía, ába lachúlürün ában juríu gírítu Apólos ubúrugun Éfeso, Alejandríana juríu ligía. Gapúrichijati, áni subúdi lumúti giñe Lerérun Búngiu buídu buídu. ²⁵ Subúdi luáguti Asálbaragülei le lúnbei liábin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun loúgua lan lasúbudirun luágu, le rügúñein larúfudajabei Juan le abásteragüdajabei luágu Jesúsu le lúnbei liábin lárígiñe, lasúbudira.

²⁶ Luágu ában wéyu, dan le ladímurejaña lan Apólos tí-

dan jalígilisin juríu láu sarágu ichoúruni, ába jagáambuni Priscíla lúma Aquíla. Dan lagúmuchun lapúrichijan, ába janúgüni Priscíla luma Aquíla jábiñoun lun jafúnraanguagüdünitima luáguti Jesúsu le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin loúbawagun Acáya, lúmagiñeñanu afíñetiña Éfeso lun lídin, ába jóunajan ában gárada joun afíñetiña ja ñíbaña Acáya lun jerésibiruni buídu. Dan lachúlürünbei Apólos Acáya, íderagua lumútiña ja lafíñeragüdübaña Búngiu luágu Jesúsu, láu lareíni, ²⁸ arúfuda lumúti joun gürgia láu richaú le siñá jamuti asígenera, luágu marícha lan le jarúfudajabei juríu, arúfudaleí joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

Páblo ubúругu Éfeso

19 Sun niján lan Apólos ubúругu Corínto, ligía lásügürün Páblo labádinaguagiñe buri fulásu, ába lachúlürün Éfesoun ñi lubeí ladárira sarágu afíñetiña. ² Ába laríñagun joun.

—¿Resíbi jumútisan Sífiri Sándu dan le jafíñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdüni Juan.

⁴ Laríñaga Páblo joun.

—Labásterágüdüniña méja Juan gürgia, arúfudei luágu sáansi jamáali lan jóuserun, aríñagati gíñe joun luágu lúnti lan jafíñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu. ⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügúriña jádan sungubei.

⁸ Ürüwañein játi láu Páblo abásija tídoun jalígilisin juríu le ñi lubeíja lapúrichija, adímureja ligíaja furáangu luágu larúeijan Búngiu, afíñegüda láña gürgia luágu.

⁹ Níñanu gíñe, edéreragüdütu janígi, májatiña jafíñerun, adímurejarúgü jagía wuríba luágu lémeri Crístu jagíbugiñe gürgia. Ábati ladíreirun Páblo jaweí, ába lanúgüniña ja afíñebaña luágu Jesucrístu tídoun ában lescuéla to ñi lubei larúfudaja ában wügúri gíríti Tiránno, ábaja ladímurejan ságü wéyu joun, ñi. ¹⁰ Ítara líña lasígirun luágu bián irúmu, súnti ja aganoúbaña loúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adúgati buríti Búngiu oúnwenbun buri miláguru lídaangiñe Páblo, ¹² darí lun tánügúniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatíña jádaangiñe.

¹³ Níñanu juríu eíbugañajádügütiña, aságajatiña gíñe espíritugu wuríbatíña jaweí gürgia, álugatiña yebe jayúsuruni líri Wabúreme Jesúsu lun jaságajaniña, jaríñaga buri joun espíritugu.

—Gumádi numútibu lídan líri Jesúsu, le uágubei lapúrichija Páblo, lun báfuridun.

¹⁴ Níñanu sédü lirájüñü ában juríu gíríti Escéva, jábuti méja fádirigu, jádan ja adúgübalin buri cátei le. ¹⁵ Níjein ában jadúgüni, ába loúnabuniña espíritugu wuríbatí ligía.

—Subúdi numúti Jesúsu, subúdi gíñe nun cátei lan Páblobei, ánjein jugúya, ¿cátaün?

¹⁶ Ába lachúragun wügúri le láubei espíritugu wuríbatí lúngua jawágun, gabáfuti sügú jáu sungubei, ába labúleiseiruniña buídu, ába jeíbaagun ñígiñe surúsu lúma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weíríti linébedun líri Wabúreme Jesúsu joun.

¹⁸ Sarágu gíñe buri jádaangiñe ja afíñerubaña, ába jayábin agúfeserei buri cátei wuríbatí lé meja jadúgübei, ¹⁹ sarágu gíñe buri jádaangiñe já meja gabíñarajadibaña, ába janúgünun jalíburun buri, ába jágdunun jagíbugiñe sungubei. Dan jabájüdübalin tebégi líburu buri tugúya, gebégitu quei buri dimí-san mílu murúsun seínsu le pláta. ²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburi gürgia.

²¹ Lárigiñe sun cátei le, ába laráanserun Páblo lun lídin aríjaña afíñetiña Macedónia luma Acáya, lubá lasígirun luweiyasun Jerusaléoun. Aríñagati gíñe luágu lárigiñe lanme lídin Jerusalén, lídiba lan gíñe Róma. ²² Ábati loúnajan biáma jádaangiñe ja íderagubalin lubá, Macedónia, wügúriña jagía, Timotéo luma Erásto, ligía, ába leréderun átiraüya dan Ásia.

Chagáguau ubúругu Éfeso

²³ Lídan dan ligía, ñíñein ában oúnwenbun achágaraguní Éfeso jaweígiñeti ja afálarubalin lémeri Crístu, ²⁴ lídaangiñeti ában wügúri gíríti Demétrio, ladáawagun cátei láuti pláta lífisiutebei. Wügúri ligía, adáaguati tirájüñü ligíli lú pláta to tilígilisin sándu to gíríboun Diána, belútiti sarágu seínsu joun ja ñadágimeinbaña lúma. ²⁵ Ábati loúndaruniña ja ñadágimeinbaña lúma úara jáma ámu ja ñadágimeintiña ámu físu le lenége jafísiute, ába laríñagun joun.

—Wügúriña, subúdi jumúti luágu ñulú lan wabágarí láu físu le, ²⁶ agáamba jamáali, aríja jumeí ída líña lan lídin Páblo aríñaga luágu máma jamá búngiugu sándu ja jadúgübaña wügúriña, áni gíbeeña gürgia jafíñeragüdüni, mámarügü ya Éfeso, lídan gíñe líbe-ágei Ásia. ²⁷ Nóunguati cátei le, ladúga gayáraabei weféridiruní wabísinisin, gayáraabei gíñe teféridiruní tilígilisin búngiu Diána tuweírigun, ábame tanügún búngiu Diána to únoun jájuduragua sun gürgia Ásia lúma lídan sun uboú quei ní cáta.

²⁸ Dan le jagáambunbalin cátei le, ába jagáñidun buídu, ába jagúragun.

—Weírigutu Diána to jabúngiute Éfesona!

²⁹ Níñeinti ában oúnwenbun achágaraguní lídan sun ubúrugú ligía. Ába járügüdüni Gáyo lúma Aristárco, biáma wügúriña Macedóniana ja úarabaña lúma Páblo, ába jadúrüguduniña chúlú tuágún muna to ñi lubeíja jóundaragua. ³⁰ Álugatí yebe Páblo lebélorun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélorun. ³¹ Níñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélurun lan ñíjin. ³² Níti lídan adámurini, jíbiri agúaragua ában cátei, jíbiri agúaragua ámu, ladúga chagágujaña gürígia, jibeágei, ibídiñeti joun ca lan lébubei jadámuridagun. ³³ Níñanu jádaangiñe gürígia, ába jafúnraanguágüdüni cátei le lun Alejándro, le jádajabei juríu ligíbugiñoún guríriguaü lun ladímurejan luágu jafúleisein. Ába ladúgün Alejándro seíni láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—Weírigutu Diána to jabúngiute Éfesona!

³⁵ Dánti le gálumagüda láaña abúrújati le láni ubúrugú ligía gürígia, ába laríñagun. —Gürígia Éfesona, sun gürígia subúdi jamúti luágu Éfesona lan oúnigirubárun tilígílisin búngiu Diána, túma tiyáwa to áburujaboun siélugiñe. ³⁶ Quei úa lan ni ában lun lasígeneruni cátei le, gáluma jumá, madúga jumá ni cáta masáminarunga jumei buídu. ³⁷ Wügúriña ja, ja janúgübaña ñájoun, míwerujan jamágiru jilígílisin, madímurejan jagía wuríbati tuágu jubúngiute. ³⁸ Ánjein níjein lubeí cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubeí agúseragüdüti lúma agúseragülei, gayáraati jidin ligíbugiñoún lúruđu lun ladímurejan cáda ában lueígiñegua. ³⁹ Ánjein ámu lubeí cátei jamúriajabei, lúnti laráanserún lídan ában adámurini le richáti, ⁴⁰ ladúga gayáraabei laríñawagúniwa luágu wagúbujaña lan wuríbani ladúga cátei le asúseredubei ugúñe, ibídiñebeí woun cába lan woúnabagüle ánjava álügüdüwa luágu chagáguau le.

⁴¹ Lárigiñe laríñaguni cátei le, ába lagúmuchaaguagüdüni adámuridaguni.

Luweíyasun Páblo Macedónioun lúma Grécioun

20 Dan le lagúmuchaunbei chagáguau Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábati loúburuniña, ába layóuragun joun, ába lídin Macedónioun. ² Luágu luweíyasun, chúlúgueina líña jámagiñe afíñetiña lídan buri fulásu le ídaangiñebeí lásügüra, ru ligía sarágu dúgüdaguaü joun láu lerérun. Ítara líña lachúlürün lídoun ageíraü le Grécia. ³ Reídeiti úrúwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeiti laráanserun lun lagíríbudun múarugugíñe, sügüina ligíaya Macedóniagiñe. ⁴ Gíbetiña wügúriña ñúdüntiña úara lúma. Sópater, le liraú Pyrrhus,

Beréagiñe, Aristárco lúma Segúndo, Tesalónicagiñe, Gáyo, Dérbegiñe, Timotéo gíñe, lúma gíñe Tíquico lúma Trófimo, Ásiana. ⁵ Afíñetiña ja, ába jóudin wabá, ába jagúrabuniwa ubúrugú Tróas. ⁶ Wagía, lárigiñe fédu le teígín fein to magánaboun ísi, ába wáfuridun Filíposgiñe tídan ugúnein, seíngü wéyu lárigiñe, ligía wátürün Tróas, le ñí lubei wúwarada jáma ja ñúdüntiña wabáragiñe, ába weréderun ñi sédü wéyu.

Bisída láni Páblo ubúrugú Tróas

⁷ Samúdi güñoun, ába jóundaragun afíñetiña lun jeígin fein le jarítaguagüle luágu loúnwen Crístu, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebu. ⁸ Íñuñanu lídan lúruwan túbanana muna to ñí lubei jóundaragua, ñíñein sarágu lámpu durúngu. ⁹ Níñein ában irájü agáambaja, ñun líña luágu funédere, Eútico líribei. Queíti lílubei lapúrichijan Páblo áriebu ligía, ába ladábudun lágu irájü ligía, ába larúmugun ñi, ába leíguadun lídaangiñe lúruwan túbanana muna, múarugun. Dan le jarárirunbei lun jirúraguni, jiláali. ¹⁰ Ábati larárirun Páblo, ába laróunrun ligíbuagu irájü ligía, ába loúburuni. Ába laríñagun joun afíñetiña.

—Madíjeri jumá, gabágaríyaali.

¹¹ Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaaali lídin. ¹² Irájüti buga ligía, ába janúgüni águyu wínwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába gíñe woúdin, ába wádinun tídoun ugúnein, ába woúdin chúlú Asón, le ñí lubei lúnti lan wabúduini Páblo quei wadáradun, ladúga busén lan lídin Asón múarugugíñe. ¹⁴ Dan le wadúnragun lúma ñi Asón, ába ládinun wáma, ába woúdin Mítiléne. ¹⁵ Larúgan, ába wáfuridun ñígiñe, sügüina wagía ligíbugiñe ubóju Quío, ában wéyu lárigiñe, ligía wachúlürün ubóju Sámos. Ába weméraagun ubúrugú Trojílio, larúgan, ligía wachúlürün ubúrugú Miléto. ¹⁶ Mátürüntiwa ubúrugú Éfeso luágu waweíyasun ladúga mabúseerun lan Páblo leréderun sarágu dan ageíraü Ásia, busénti lachúlürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachúlürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachúlürün Ásioun. ¹⁹ Sun dan le jagánaguañadina lubeí, seríwitina lun Búngiu láu únabuni, láu sarágu águiraü, súfuri áu sarágu láu cátei lé buri jabúseerubei juríu jadúgün nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furáangu lídan guríriguaü lúma júbiñe. ²¹ Dándu joun juríu quei joun ja mámabaña ju-

ríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jafíñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügúñein nasúbudirubei, luágu sun lan ubúru le ñi lumuti nídin, aríñagati Sífiri Sándu nun luágu nadaürúba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebésera, ni nibágari guánarügü, mebégiti ni cáta nun, adúgarügü náali ligía le uágubei loúnajana Búngiu láu ugúndani darí lúmoun lagúmujoún, lun nadímurejani ugánu buíti luágu línsiñejabu Búngiu.

²⁵ Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. ²⁶ Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ ladúga subúdigüda náali sun laráansejan Búngiu jun, marámuduntina ni cáta jueí. ²⁸ Toúnigigua jumá lubeíti júngua, toúnigi jumáñame affíñetiña ja líchugubaña Sífiri Sándu lun jóunigiruniña, ja tánigu lilgílisin Búngiu, ja lagáñijabaña láu líta Liraú guánarügü. ²⁹ Subúdi numúti luágu dánme lan nídin, jayábinba lan ámu áluga jagúnrinchaguni jafíñen, quei lebéllurun geígusi jádoun mudún áfaraguaña. ³⁰ Ñíbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña affíñetiña. ³¹ Toúnigi jumá lubeíti, jarítagua jumeí luágu úrúwa lan írúmu náu ewéridijaún wéyuagu áriebu, ayájua buri áu.

³² Guetóti, nidújeñu, derége numútün lun Búngiu lúma lun ugánu le luáguti línsiñejabu, le gabáfubei lun léredagüdüni jafíñen lúma lun líchugun ubáraü jun siélu jádan ja derégeguáañabaña jóungua lun.

³³ Mabúseerun nágili ni liseínsun ni ában, ni lanáan-gun, ³⁴ lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemégeirubei ja númabaña. ³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemégeirun, luágu gíñe lúnti lan larítawagún luágu dimúrei le laríñagubei Wabúreme Jesúsu dan le laríñagunbei. "Gúndaatimáati le íchugubei sügú láu le erésibirubei."

³⁶ Lárigiñe laríñaguni Páblo cátei le, ába lájuduragun, ába layúmuragun lun Búngiu jáma súnubei. ³⁷ Ába jayájun súnubei láu igárigu, ába jóuburuni Páblo, ába jachúruni. ³⁸ Jírutiñati ladúga laríñagun joun luágu maríjindügüya jamáali lánme. Ába jóúdin íchaajei tuágu ugúnein.

Luweiyasun Páblo ubúrugun Jerusalén

21 Dan le wígiruniña affíñetiña, ába woúdin sügúlügü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara. ² Ñi Pátara wadárira ában ugúnein teíbuga Fenícia, ába wádinun tídoun, ába woúdin. ³ Dan wásügürün, ába waríjini uboúju le Chípree, ába wígiruni lueígiñe wabaúna, ába wasígirun darí wachúlürün Síria. Queíti taráriguágüdüba lan ugúnein lídan

ubúru le gíribei Tíro, ába warárirun ñi. ⁴ Áluaja wamútiña affíñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jaríñagun lun lun mídin lan. ⁵ Dan lásügürün sédü wéyu ligía, ába woúdin. Sun affíñetiña jáu jámarigu jáma jasáanigu, ñúdüntiña íchaajawa chúlú bougudi lueí ubúru, ñi béyabu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagríbudun jábiñoun.

⁷ Ába wagúmuchuni waweíyasun baránaja lúmagiñe ubúrugugiñe Tíro darí Tolemáida, le ñi lubei wabúsura joun affíñetiña, ába weréderun ában wéyu jáma ñi.

⁸ Larúgan, ába láfuridun Páblo wáma, wagía le lúmabei, ába wachúlürün ubúru Cesaréa. Ñi woúdin lúbiñe Felípe le apúrichijabalin ugánu luáguti Jesucrístu, ába gíñe jídaangiñe sédü wügúriña já meja anúadajoúbaña Jerusalén lun jeténirun lun le jemégeirubei affíñetiña, ába weréderun lúma.

⁹ Gasáaniguti Felípe gádürü wúriña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligia lachúlürün ában proféta Judéagiñe, gíriti Ágabo, ¹¹ liábiña aríjawa. Ába lanúgüni lubélitin Páblo, ába lagúraguni lugúdi guánarü lúma lújabu láu, ába laríñagun.

—Laríñajare Sífiri Sándu luágu ítara lúba lan jagúra-guni juríu labúreme bélitu le ubúru Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén.

¹³ Ába laríñagun Páblo.

—¿Ca uágu jayájua, írudagüdána? Aráansetina mámarügü lun nagúrawagún Jerusalén, aráansetina darí lun noúnwen lueígiñe Nabúreme Jesúsu.

¹⁴ Quei siñá wamani larítagun agáñeira, ába wígiruni, ába waríñagun lun ladügúniwa lugúndan Búngiu.

¹⁵ Dan le gumújali webélujan ñi, ába waráanserun, ába woúdin Jerusalén. ¹⁶ Ñúdütiña jídaangiñe affíñetiña wáma Cesaréagiñe, ñíñein ában Chípreea jádan, gíriti Mnasón, lújali lueígiñe laffíñerun luágu Jesucrístu, lúbiñeba wagánawa.

Bisída láani Páblo Jacóbo

¹⁷ Dan wachúlürün Jerusalén, ába jerésibiruniwa affíñetiña láu ugúndani. ¹⁸ Larúgan, ába woúdin lúma Páblo aríjei Jacóbo, ñíñanu gíñe sun tábutigu liglísi Jerusalén. ¹⁹ Ába labúsurun Páblo joun, ába labájüdaguni sun cátei le ladügübei Búngiu lídaangiñe joun, jádan ja mámabaña juríu. ²⁰ Dan le jagáambunbalin ugánu le, ába jadímurejan luágu luweírigun Búngiu. Ábati jaríñagun lun Páblo.

—Wadúje, aríjabásan, añájein sarágu mílu juríu affíñerutiña luágu Jesucrístu, áni sun jagía, aríñagatiña luágu lúnti lan lasígiruniwa lilúrudun Moisés.

²¹ Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madúgün jamá gásu luágu lé meja laríñagubei

Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. ²² ¿Cábasan wadúga? Joun-daragubátia juríu dánme le jasúbudiruni luágu chülú-jadibu lan, lun jadúgün wuríbani bun. ²³ Niján cátei le lúnbei badúgüni. Añájein gádürü wügúriña ya wádan, gásu jagúnfulirun ában darádu lúma Búngiu. ²⁴ Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárigiñeme gayárajálme jásaragüdüni jádiburi. Ítara lúba jaríjini sun juríu luágu iyéeni lan le aríñawagúbei joun buágu, gúnfulirügütibu lan gíñe lúma lilúrudun Moisés quei lubúdub. ²⁵ Anjeinti jawágu ja mámabaña juríu áni affíñejaña luágu Búngiu, abürüjaadiwa joun lun madíjeri jamá luágu buri cátei le, lúnrügü meígin jamá úwi le dagágüdawaali joun sándu, ni jítaü, ni anímaalu le tigíwarügüti, lun gíñe úa lan ni ában agámariduti wúri to mamárieiduntu lúma.

Járügüdüni Páblo adáura tídan témpulu

²⁶ Ábati lanúgüniña Páblo gádürü wügúriña jagía, larúgan, ába larúmadaguagüdün lúngua jáma, ába lebélorun témpulurugun awísaja ídaba lan lagúmucha jawéyuri gádürü wügúriña jagía lun jarúmadun, léme lidáani jadágaragüdün cáda ában jádaangiñe lun Búngiu.

²⁷ Dan lé yebe yaráfaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába jarügüdüni Páblo, ²⁸ ába jagúaragun.

—¡Wügúriña Israelítagu, íderagua jumáwa! Niján wügúri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

²⁹ Jaríñagunbei ítara ladúga meja jaríjini Páblo ubúrugü lúma Trófimo le Éfesona, jarítaguatíñati luágu barúlaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati jarügüdüni Páblo, ába jadúrüguduní bougudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachúlürün ugánu lun gumándan luágu chagágujaña lan sun lílana ubúrugü Jerusalén. ³² Ábati lóundaraguniña gumándan lisúdaaranigu jáma jábutigu, ába lachúlürün eíbaagueina le ñíjin jabeí gürígia. Dan jaríjini gumándan jáma sudaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagúraguágüdüni láu bián güríngüri, lárigiñe, ába lálügüdajan cátei lan, lúma ca lan lidúnrunbei. ³⁴ Amuñegueinarügüti cátei jaríñagun gürígia, siñátiti gunfaráanda lan gumándan ni cáta ladúga irefíni le jadúgübei, ába lanúgagüdüni jábiñoun sudaara. ³⁵ Dan le jachúlürünbei luágu testépute mú-

na, ába janúgüni sudaara Páblo oúyuajeina lueí jáfaruni gürígia jilágubei, ³⁶ ladúga jayábiña súngebui járigi agúarajeina.

—¡Jilála!

Ladímurejan Páblo lueígiñegua

³⁷ Dan lé yebe jádaraali lan Páblo múnadoun, ába laríñagun lun gumándan le jáubei sudaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güríegu? ³⁸ ¿Máma lubeí bugúya Ejípton le meja adúgübei ában mabúchajaü luágu ában dan, ába lanúgün gádürü mílu wügúriña gáfara-jatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adúgabá fuleísei nun lun bígirunina lun nadímurejan joun gürígia.

⁴⁰ Ába líchugun gumándan úma lun, ába laráramun Páblo luágu estépu, ába líchugun seíni láu lújabu joun gürígia lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22 —Nidújeñu jáma jagúbürigu, agáamba jumeí le lúnbei naríñaguni jun nueígiñegua.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³ —Juríu áu, le gumúti, ubúrugü Társo loúbawagu Cilícia nagúriajouá, ya Jerusalén naweírda. Lábugiñe larúfudajan Gamáliele natúriaja, úarati larúfudajan lúma jalúrudun binádu wagúbürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburi jadúgüni jugúya ugúñe wéyu.

⁴ Áu, eíbaaja numútiña meja lánigu Crístu darí náfaraguniña jilágubei, barúgua áu wügúriña furísunrugun.

⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Núdüntina ñi áluajaña afíñetiña luágu Crístu lun nanúgüniña ñájoun lun nasúfuriragüdüniña.

Labájüdaguní Páblo luáguti lasáansiragun ligáburi

⁶ Dan luáguñadina lubeí úma, yaráfaadina lun nachúlürün Damáscu, queíburi amídirugu, sódini ligía ladúnraagun ában oúnwenbun larúgounga siéluigiñe náu, ⁷ ába náburujan múarugun. Ába nagáambun laríñagun ában umálali nun. “Sáulo, Sáulo, ¿ca uágu beíbaajanina?” ⁸ Ábati naríñagun. “¿Cátabusan Nabúreme?” Laríñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun. ¹⁰ Ábati naríñagun. “¿Cábagi nadúga, Nabúreme?” Ába laríñagun nun. “Sarába, beíba luágu buweíyasun Damáscoun, ñíba laríñawagúga sun le lúnbei badúgüni bun.” ¹¹ Queíti maríjingüda láadina lubeí buga larúgounga ligíra, ába jarügüdüni ja nómabaña núbabu darí wachúlürün Damáscu.

¹² Ñiñein ában wügúri Damásco gíriti Ananías, gúnfuliti buídu lúma lilúrudun Moisés, sun juríu ja aganoúbaña Damásco adímurejatiña buídu luágu wügúri ligía. ¹³ Ába liábin Ananías aríjana, dan lachúlürün, ába laráramun nubádu, ába laríñagun nun. “Nidúje Sáulo, ibíjayabeí baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati laríñagun nun. “Anúadaja láadibu Jabúngiute binádu wagúbürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladúga bíchuguba lan fe luágu Jesúsu joun sun gürígia, abájüdaguabeíme le aríja báalibeí lúma le agáamba báalibeí. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bifígoun.”

Labájüdagun Páblo luágu loúnajoun apúrichija joun ja mámabaña juríu

¹⁷ Dan nagíribudun ubúrugin Jerusalén, luágu ában wéyu dan le nídin témpulurugu ayúmura, ába lasálaragun Nabúreme Jesúsu nun, ¹⁸ ába laríñagun nun. “Furíba yágiñe Jerusaléngiñe, oufuda, ladúga madúgünbaña juríu gásu láu le baríñagunbei nuágu lídan fulásu le.” ¹⁹ Ábati naríñagun lun. “Nabúreme, subúdi jamúti luágu ñídü nán buri méja tídan sun jalígilisin afíñetiña anáajaña ja afíñebaña buágu furísunurugin, beí buri náña. ²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu oúnigirubárun janáangun ja áfarubalín.” ²¹ Ába laríñagun Nabúreme nun. “Beíba, ladúga nouñajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülú lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchati lun labágaridun!

²³ Queíti jasígirun agúaraja, achújoun buri janáangun, achúja calíqui íñun le jagáñi, ²⁴ ába laríñagun gumándan lun ladarúniwa Páblo jábiñoun súaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara. ²⁵ Dan le gürágua jamáali lun jabeíchuni, ába laríñagun Páblo lun jábuti súaara le ñibeí.

—¿Garíchatúnsan lun jabeíchun ában wügúri Rómana, magúserunga ligía?

²⁶ Dan le lagáambuni jábuti súaara cátei le, ába lídin aríñaga lun gumándan.

—Toúnigibátia láu le lúnbei badúgüni, Rómanatia wügúri le.

²⁷ Ábati lídin gumándan luágun Páblo, ába laríñagun lun.

—¿Inárüni luágu Rómana ban?

Laríñaga Páblo lun.

—Ánja.

²⁸ Ábati laríñagun gumándan.

—Fáyeitina sarágu seínsu lun Rómana nan.

Laríñaga Páblo.

—Ánjein áu, ñi nagúriajouá.

²⁹ Ába jígiruni já yebe lúnbei jabeíchuni furése, liábin gíñe gumándan, dan le lasúbudiruni luágu Rómana lan Páblo, ába lanúfudedagun luegiñe lagúraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágüdüniña jábutigu fádírugu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23 Ába laríjin Páblo jawágun lúrudugu jagía, ába laríñagun joun.

—Nidújeñu, jarúmati nasándiragun núngua ligíbugiñe Búngiu chülú lúmoun wéyu le.

² Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo. ³ Ába laríñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei laríñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jaríñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába laríñagun Páblo.

—Nidújeñu, ibídiñetí yebe nun luágu fádiri lan le íñutimaabei, ladúga taríñajare Lerérün Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába laríñagun láu umálali jéreti.

—Nidújeñu, fariséo áu, jádaangiñetiña fariséogu nagúbürigu, áni jagúseragüdüñadina ladúga afíñe nan luágu jásaaruba lan jiláaña lídaangiñe ouweni lúnya jabágaridun.

⁷ Dan le laríñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini. ⁸ Ladúga jaríñajare saduséogu luágu másaarunbaña lan jiláaña lídaangiñe ouweni, úatiña nege gíñe ánjeligu, ni espíritugu, ánjañati fariséogu, afíñetiña luágu sun cátei le. ⁹ Jaréinchatu súnigubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu gíñe jagía, ába jaríñagun.

—Wügúri le, úati ni cáta wuríbati ladúga, áni ánjeindügü ában lubeí espíritu adímurejabei lun o ában lan ánjeli, toúnigi wamátia lueí wadárirün oucha weréderuni luwádigimari Búngiu.

¹⁰ Weírjali sigénei darí lun lanúfudedun gumándan lueí jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janúgüni jábiñoun súaara.

¹¹ Le ában árieibu, ába lasálaragun Wabúreme Jesúsu lun Páblo, ába laríñagun lun.

—Manúfudebá, Páblo, ladúga ítara quei rújadibu lan fe nuágu ya Jerusalén, bíchuguba gíñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Jougiñe bián-wein wügúriña ja aríñagubalin cátei le. ¹⁴ Ábati jóúdin jámoun jábutigu fádírugu lúma jámoun wügúriña weírigutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanúgüni jun jarúga, jaríñagame lun luágu lun lántima jálügüdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachúlürün.

¹⁶ Ába lachúlürün cátei le lábun lagáambun tiraú lítu Páblo, ába lídin jábiñoun súaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

—Barúbei irájü le lúmoun gumándan, níjein cátei lun laríñaguni lun.

¹⁸ Ába lanúgüni jábuti súaara lúmoun gumándan, ába laríñagun lun.

—Wáti adaürúti Páblo nun, ába lamúriajan núma lun nanúgüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanúgüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banúgüni Páblo jagíbugiñoun lúrudugu íñutimaatiña lún nege jálügüdünitima luágu lidúnrun.

²¹ Mafíñerabá joun, añájein jóúgiñe bián-wein jawúgüriña arámudagu jabá úmada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügúñein boúnabagüle.

²² Ábati loúnajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Loúnajoun Páblo lun gumádimati le Félix

²³ Ába lagúarun gumándan joun bián jádaangiñe jábutigu súaara, ába laríñagun joun lun jaráanserun bián-san súaara lun jóúdin Cesaréa eibu, úara jáma úrúwa-wein-dísi ja jawágutiña gabáyu, jáma bián-san ja táutiña efeín, lun jóúdin ladaünrún néfu gúñoun.

²⁴ Aráansegüdáti gíñe gabáyu lun laweínjaniña Páblo, ru ligía dimúrei lun jachúlüragüdüni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun. ²⁷ Niján wügúri le, le nouñajabei bun, daújamaali yebe juríu áni jáfaraali yebe jilágubei, dan le nasúbudirúnbalin luágu Rómana lan, ába nídin jáu nisúdaaranigu, ába neséfuruni.

²⁸ Queíti nabúseerun nasúbudiruni ca lan lidúnrunbei jarúma, ába nanúgüni jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati iríchaü lun láfarún jilágubei, ni íbini lun ladaürún. ³⁰ Quei lachúlürün lábun nagáambun luágu jaráansejaña lan juríu lun jáfaruni jilágubei, ligía lébubei nouñajani bun madárasajaanga. Aríñagaadina gíñe joun ja íchugubaña lidúnrun lun búma lan jaráanserei le jánabei lúma.”

³¹ Ábati janúgüni súaara Páblo quei laríñawagúniwa joun, áriebe, chúlú Antípatris. ³² Larúgan, ligía jagíribudun súaara ja eíbubaña, súaara ja jawágubaña gabáyu, ába jasígiruni jaweiyasun láu Páblo. ³³ Dan le jachúlürünbei Cesaréa, ába jedéregerunun gárada lun gumádimati, derége jameí gíñe Páblo. ³⁴ Lárigiñe lalíjanun gumádimati gárada, ába lálügüdajan jalána lan Páblo, dánti le lasúbudirúnbalin luágu Cilíciana lan, ³⁵ ába laríñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

Ladímurejan Páblo lueígiñegua ligíbugiñe Félix

24 Seíngü wéyu lárigiñe, ába lachúlürün Ananías, fádiri le íñutimaabei, ubúrugun Cesaréa jáu wügúriña jádaangiñe juríu weírigutiña, lúma ában wügúri le subúdijabuti lun lúrudu, gíríti Tértulo. Ába jayábin lúmoun gumádimati lun jíchugun lidúnrun Páblo. ² Dan le lanúgüniwa Páblo jagíbugiñoún, ába lagúmeserun Tértulo íchiga lidúnrun, laríñaga.

—Luágu bareíni, gumádimati, lújadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibu luágu. ⁴ Lun magídarun wamáni bidáani sarágu, amúriajatina búma lun badúgün murúsun fuleísei woun lun bagáambuníwa luágu murúsun óra. ⁵ Niján wügúri le Páblo, beréseti, lerédera afánreinraguagüdaña juríu lídan sun fulásu, ligía gíñe ában jádaangiñe lichúgüdinabei jadámurin nazarénugu. ⁶ Álugati gíñe lawíyedagüdünnun témpulu ligíbugiñe Búngiu láu lebélaagüdünnun ában wügúri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburi walúrudun, ⁷ ába leméterun gumándan Lisías ñíjin, ába lagídaruni waweí láu érei, ⁸ ába laríñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei in-árüni luágu sun cátei le, le waríñagubei luágu.

⁹ Juríu buri ja ñíbaña, aríñagatiña gíñe luágu inárüni lan sun le laríñagubei Tértulo. ¹⁰ Ába ladúgün gumádi-

mati seini lun Páblo lun ladímurejan, ában laríñagun Páblo.

—Lau sun nugúndan nadímureja nueígiñegua bigíbugiñe ladúga subúdi náani luágu lúmagiñe lan sarágu irúmu bagúseragúdajan lídan fulásu le. ¹¹ Gayáraati bálügüdjagan ánjein inárüni lubei le lúnbei naríñaguni bun. Dúusurügügili wéyu lueígiñe nachúlürün ubúrugin Jerusalén lun nájuduragun lun Búngiu, ¹² madárirúnwatina asígeneja ni ca úma, ni achágaraguágüdaña gürígia témpulurugu, ni tídan buri túbiri jalígilisin juríu, ni lídan buri ámu fulásu ubúrugu. ¹³ Gürígia ja, siñáti jarúfuduni luágu inárüni lan ni ában lídaangiñe sun cátei le jaríñagubei nuágu. ¹⁴ Ában cátei naríñagubei bun, luágu nesériwiduña lan lun jabúngiute nagúbüriugu quei larúfudajani Jesucristu, le uágubei jaríñaga luágu marícha lan. Afíñetina luágu sun le bürúwañubei tídan buri líburu to lánina lilúrudun Moisés lúma lé meja jabúrújabei profétagu. ¹⁵ Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja wuríbabaña. ¹⁶ Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürígia.

¹⁷ Lárigiñe átiri dan náu eíbugei ámu buri fulásu, ába nagíribudun nageíroun lun nedéregerun seínsu joun gudémetiña Jerusalén lúma lun nadágaragüdünn lun Búngiu. ¹⁸ Nadügüñein yebe cátei le témpulurugu lárigiñe narúmudaguagüdünn nungua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürígia ñi, ni chagáguau. ¹⁹ Jagía lúnbaña jayábin arúfudagua jóungua ya lun jaríñaguni le lúnbei jaríñaguni ánjein níjein lubei lúnti jaríñaguni nuágu, ²⁰ jaríñaguni lan ja yábaña ánjein darí jabei nidúnrun dan le ligíbugiñe nubei líñun-ágei lúrudu juríu. ²¹ Siñáti jaríñagun ni cáta nuágu, lueídügüya luágu lan ában wéyu dan le jádaañadina lubei, ába nagúaragun aríñaga. “Jagúseragüdüñadina ugúñe lueígiñe afíñe nan luágu jásaaruba lan jiláaña lídaangiñe ouweni lúnya jabágaridun.”

²² Subúsiti sarágu luágu larúfudajan Jesúsú lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachúlürün gumándan Lisías.

²³ Ábati laríñagun Félix lun jábuti súaara lun lasígirun Páblo daúwañu, lun furáangu lan lun gayára lan jóudin lumádagu aríjei, eténira lun.

²⁴ Átiri wéyu lárigiñe, ábaya lachúlürün Félix túma Drusíla to lúmari, to juríu, ubúrugin Cesaréa, ába lagúaragüdünn luágu Páblo lun ladímurejan lun luágu ibágari le surúbei, lúma luágu ágüdaagúni únguaü luei le wuríbabei, lúma luáguti wéyu le lúnbei lagúseragüdüniña Búngiu sun gürígia, ába lanúfudedagun Félix, ába laríñagun lun.

—Beíba yebe, dánme le gadáni nan, nagúarayaba bun.

²⁶ Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma. ²⁷ Sügúti bián irúmu ítara, ábati lagúmuchun lagúmadijan Félix, ába lárügüdüni Pórcio Fésto lufúlasun. Queíti busén lan Félix leréderun buídu jáma juríu, ába lígiruni Páblo daúwañu.

Páblo ligíbugiñe Fésto

25 Ábati lachúlürün Fésto lun lárügüdüni lufúlasun queísi gumádimati, úruwa wéyu lueígiñe, ába lamúdeirun Cesaréagiñe lun ubúrugin Jerusalén. ² Ába jachúlürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleísei lúma lun loúnajan anúgei Páblo Jerusalén. Le jaráansejanbei, lún yebe jáfaruni jilágubei luágu úma. ⁴ Ába loúnabun Fésto luágu Cesaréa lan ladaürúwa Páblo, áni jarítagua lan lídin ñi madíse. ⁵ Ába laríñagun joun.

—Ligía lúnti lubei jóudin ja weírigutimaabaña jídaangiñe Cesaréa úara núma, áni ánjein adúgaali lubei wügüri ligía dúru, gayáraabei jaríñaguni.

⁶ Wídü rügüñein o díisi lan wéyu láu Fésto Jerusalén, ába lagíribudun ubúrugin Cesaréa. Larúgan, ába lárügüdüni lufúlasun lun lagúseragüdünn, ába loúnajan luágu Páblo. ⁷ Dan le lebéllurunbei Páblo, ába jagúriridágun juríu ja ñúbínbaña Jerusaléngiñe láu, ába jíchugun sarágu lidúnrun le júrüti, áni siñáti jarúfuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madügüngidina ni murúsun dúru ni lun jalúrudun juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünnibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñi lubei lúnti lan nagúserún. Queísi basúbudiruni buídu, madügüngidina dúru joun juríu. ¹¹ Ánjein adúgaadina lubei dúru le garíchati lun nafarún jilágubei lueígiñe, mebéresegüntina noúnwen, ánjein úa lubei ni cáta lánina inárüni lídan sun le aríñawagúbei nuágu, úati ni ában garíchati lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladúga láu Páblo, ába laríñagun lun.

—Amúriajaadibu lubeígia lun César lan agúseragüdünnabu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reidei jabei átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügúri lígirun Félix dáüwañu ya.
¹⁵ Dan le Jerusalén nubeí, rútiña jábutigu fádirigu jáma wügúriña juríu weírigutiña lidúnrun nigíbugiñe, amúriajatiña núma lun nasiadiruni. ¹⁶ Ába naríñagun joun luágu magáburí láani lúrudu Rómána lun lasiadirun ában gúrigía lun ouweni maríjinga láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubeí le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügúri ligía. ¹⁸ Ja ñúbinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei narítaqua. ¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma luágu ában nege wügúri gírítí Jesús—jiláti nege, laríñajare Páblo luágu wínwanya lán nege. ²⁰ Queíti ibidiñe lan nun cába lan nadúga lídan ában cátei líbe le, ába nálügüdüni Páblo ánjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdei, ába naríñagun lun lasígirun dáüwañu daríme gayára lan noúnajani lun Augústo César.

²² Ábati laríñagun Agrípa lun Fésto.

—Buséntina gíñe nagáambuni wügúri ligía.

Ába laríñagun Fésto lun.

—Bagáambubei jarúga.

²³ Larúgan, dan le jachúlürünbei Agrípa túma Bereníce, ába jebélurun láu oúnwenbun uweíriguni múnadoun, jáma jábutigu súdaara jáma wügúriña weírigutiña ñi ubúrugú. Ába loúnajan Fésto luágu Páblo, ²⁴ ába laríñagun.

—Urúei Agrípa, jáma wügúriña ja adámurígubaña wáma ya, niján wügúri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen. ²⁵ Laganoun nun camá madúgüngili ni cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, noúnajaali lun. ²⁶ Queíti úa lan cába lan cátei uágu nabúrúja lun Augústo luágu wügúri le, ligía nanúgübalin jigíbugiñoún, bigíbugiñoúntimá urúei Agrípa, lun bálügüdaguni, níjein lámuga cába lan nabúrúja. ²⁷ Ladúga garábaguati nun lun noúnajan ában adaürúti, mawísajaanga áu ca lan lidúnrunbei.

Ladímurejan Páblo lueígiñegua ligíbugiñe urúei Agrípa

26 Ábati laríñagun Agrípa lun Páblo.

—Gayáraati badímurejan bueígiñegua.

Ába liñúrúni Páblo lújabu lun jagáambuni, ába lagúmeserun adímureja, ába laríñagun.

²—Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalíbei juríu nuágu, ³ gúndaatimáatina ladúga subúdi báni jagáburí juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ Subúdi jamúti sun juríu ligáburi meja nabágaridun jádan, nageira lúma ubúrugú Jerusalén, lúmagiñe irájügídina. ⁵ Lúja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabeí lídan luwúyeri wafíñen, wagía juríu. ⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouweni lúnya jabágaridun, queí meja laríñaguni joun binádu wagúbürigu. ⁷ Dúusugubei familia le jadúgawagunbei lirájüñü Israél agúrabatiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárrira juríu nidúnrun, urúei Agrípa. ⁸ ¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leíbaajaniña affíñetiña

⁹ Nugúya guánarügü, jarítaguatina méja luágu lúnti lan neíbaajaniña ja afálarunbalin Jesúsú Nazarétna, ¹⁰ áni ítara líña nadúgüni ubúrugú Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasiadirúniwa lun jóúnwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígílisin afíñetiña, áni weírítí meja nigáñi joun darí lun neíbaajaniña chúlú lídoun buri ubúrugú le díseti.

Labájüdagunya Páblo luágu lasálbarun

¹² Ligía yebe cátei le gabúgürübalina ubúrugun Damáscó ában dan, jóúnajan jábutigu fádirigu. ¹³ Luágu úma, nurúeite, amídirugu, ába naríjin ában larúgounga siélugiñeti, jéreti sügú lau larúgounga wéyu, ába ladúnraagun geyégua náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beíbaajana? Basúfuriraguagüdüñatia búngua láu bamánjarun nun quei ladúga bágasu dan le líchaagun quíqui luágun cátei gágírítí.” ¹⁵ Ábati naríñagun. “¿Cátabusan, Nabúreme?” Ába laríñagun nun. “Jesúsú áu, le guánarügü beíbaajabei. ¹⁶ Sarába, ráramabá, ladúga narúfudagunbei núngua bun lun besériwidun nun, lun geféen ban luágu le aríja báalíbei guetó lúma le lúnbei narúfuduni bun. ¹⁷ Neséfurubadibu jaweí juríu lúma jaweí ja mámabaña juríu, ja únbaña noúnajabu guetó. ¹⁸ Noúnajañadibu jámoun lun béfegechagüdüni jágu nuágu, lun jebé lan jeíbugun lídan lubúriga, lun jeíbugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Noúnajañadibu joun, afíñe jamámuga nuágu, ferúdnawa lámuga jafígoun,

ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ Ítara líña lubeíti, urúei Agrípa, ába nadúgüni le laríñagunbei Jesúsu nun lídan le lasálriragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíribudun lun Búngiu, lun jadúgün cátei buíti, arijúa lámuga luágu sáansiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei járügüdünina juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weírigubaña queísi ja únabugubaña, chülú lumoun óra le. Maríñaguntina ni cáta joun gürígia bougudin lueí le uágubei jaríñaga Moisés jáma profétagu luágu lasúsereduba lan— ²³ luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafíñeragüdüni Agrípa luágu Jesu-crístu

²⁴ Lídan le laríñagunbalin Páblo cátei le buri lídan ladímurejan lueígiñegua, ába lagúaragun Fésto. —¡Lúlüjaali báu, Páblo! Lúlügüdá sarágu atúriajani báu.

²⁵ Ába loúnabun Páblo, ába laríñagun. —Málülünti náu, gumádimati, inárüni le naríñagunbei. ²⁶ Niján urúei Agrípa le subúdiabubei lún buri cátei le buídu, ligía gayára lubeí nadímurejan ligíbugiñe, furáangu, ladúga choúru nání luágu subúdi láani gíñe sun cátei le asúseredubei lun Jesúsu, ladúga máma cátei le adúgúti arámudaguarügü. ²⁷ ¿Afíñetibu luágu le jaríñagubei profétagu, urúei Agrípa? Subúdi numúti luágu afíñe ban.

²⁸ Ába laríñagun Agrípa lun. —¿Jarítaguatibusan luágu baffíñeragüdúbadina lan luágu Jesucrístu ítara ufúresen?

²⁹ —Furése yebe, o darása yebe, amúriajatina lúma Búngiu, mámarügü buágu, jawágu gíñe sun ja añá-jabaña agáambana ugúñe, lun jayábin lun jafíñerun quei nugúya, úouga güríngüri jawágu.

³⁰ Lárigiñe laríñagun Páblo cátei le, ába lásaarun urúei, sará gíñe gumádimati úara túma Bereníce jáma sun ja ñúnbaña ñi, ³¹ ába jadíñurun ñigiñe lun jadímurejan luágu cátei le. Jaríñagatí buri jámagua.

—Wügúri le, madúgünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügúri le lun lagúser-agüdüni Augústo César, gayáraati jamúga lígi-rawagüdüñ.

Loúnajóun Páblo ubúrugun Róma

²⁷ Lídan le jaráanserunbei lun jóunajaniwa Itálioun, ába ledéregerún Páblo jáma ja jíbiri adaürútiña lábu laríjin ában súdaara gíriti Júlio, ligía gumándanbei lun jadámurin súdaara le gíribei “lisúdaaranigu Urúei Augústo.” ² Ába wádinagun tídoun ában ugúnein ñúbintu Adramítigiñe lun Ásioun. Ñíñein gíñe Aristarco wáma, le Tesalónica, Tesalónica ában ubúrugü lání Macedónia. ³ Larúgan, ligía wachúlürün Sidón, lídan fulásu ligía, buíti loúseruni Júlio, le gumándan, Páblo, ígira lumúti lun bisída láníña lumádagu lúma lun jeténirun lun. ⁴ Lídan wáfuridun Sidóngiñe, ába woúdin únabugiñe libíti ubóuju Chípree ladúga wabánrouñein lan garábali. ⁵ Ába wájiñuraguni barána ligíbugiñe lubéyaari Cilícia lúma Panfília, ába wachúlürün lídoun fulásu le gíribei Míra, ában ubúrugü lání Lícia.

⁶ Ñi ladárra gumándan ában ugúnein Alejandría teíbuga Itália, ába ládinagüdüniwa lun wasígiruni wawéiyasun. ⁷ Áfayajatiwa jámaru luágu sarágu wéyu, láu lénreengun wachúlúra ligíbugiñe ubúrugü le gíribei Gnído. Queíti wabánroun mémegili lubeí garábali, ába wáfayajan únabugiñe libíti ubóuju Créta, sügüina wagía ligíbugiñe Salmón, ⁸ wasígira láu méme lénreengun láru láru, ába wachúlürün lídoun ában ubúrugü gíriti Buíti Fulásu, yaráfa lun ubúrugü Laséa.

⁹ Féridijadiwa sarágu dan, dénehajaliti áfayajani baránaja ladúga yaráfaali lidáani luríbouga, sügújali jafédun juríu le lánina ferúdu figou. Ligía lewéridirunbaliña Páblo, laríñaga joun.

¹⁰ —Arija numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei gíñe weféridiruni wabágari.

¹¹ Lubáragiñe ladúgün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubeí fulásu ligía lun lásügürün luríba dan ñi, ába jarítangun jíbe-ágei luágu buídutima lán yebe lun wáfuridun ñigiñe, lun waríjin ánjein gayára wachúlürün Feníce, ában fulásu lání ubóuju Créta, lun wásügürüni luríban-iga ñi. Ñi Feníce, níjein barána lueígiñe núru lúma sué-di.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdüñ woúngua lun lanúgüniwa. ¹⁶ Ába wásügürün únabugiñe libíti ában liraúraü ubóuju gíriti Cláuda, le ñi lubei mére lan láfujan garábali, ába wádinagüdüñun

tisálufun wagúne to atoujeina waboún, láu ában lén-reengun. ¹⁷ Lárigiñe wiñurunun ugúneirugun, ába lásügüragüdüniwa gúrudu tábugiñegiñe ugúnein lun jagúragunun, derébugu támuga. Queíti janúfudebei lueí jóudin adágara luágu sándala le gíribei Síрте, ába jagídaraguní bíra, ába jígiraguagüdüni jóungua lun lanúgüniwa garábali. ¹⁸ Larúgan, quei jére mémegili lubeí dan, ába jagúmeserun achágajei tíla ugúnein baránajoún, ¹⁹ luágu lúruwan wéyu, ába jachágajani lí-daangiñe tumégegungun ugúnein baránajoún láu jájabu guánarügü. ²⁰ Maríjintiwa wéyu ni warúguma lídan sarágu wéyu, láuti óunwenbun luríban dan le, féridi wamáali wafíñen luágu weséfuruba lan.

²¹ Queíti sügüjadiwa lubeí sarágu dan meíginga, ába laráramun Páblo wádan, ába laríñagun.

—Wügüriña, aríñagatiná yebe jun lun mayábin wamá Crétagiñe, buídutimaati jamúga lueí wasúfuriruni dáñu le, áni féridi wameí wálagu. ²² Gagúraasun jumá, úabei ni ában jídaangiñe óuweti, láu sun teféridiruba lan ugúnein. ²³ Chülújali ában láni Búngiu ánjeli númoun áriebe to, loúnagüle Búngiu le Nabúreme le gíñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladúga barúfudaguba búngua ligíbugiñe urúei César Augústo, áni badúgaba leséfuraña Búngiu sun ja tídaanbaña ugúnein búma lueí óuweni.” ²⁵ Gagúraasun jumá lubeíti, ladúga jeménigitina luágu Búngiu, áni choúru numúti luágu ítara lúba lan quei laríñaguni ánjeli luágu nun, ²⁶ láu sun, wadágaruba lan luágungun ában uboúju.

²⁷ Bián dimáasu wáu luágu waweíyasun, lubáranarugüñadiwa Ádria, labánreinja mémeñadiwa garábali, ligía, amídi áriebe, ába jasándirun mádulungu luágu achúlüreina wáña lan luágungun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguóun mémeraü, gádürüwein-díisi ugúdi. ²⁹ Léti janúfude lueí jabúguchun luágu dúbü, ába jágurun gádürü óunguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añája mádulungu asáminara lun jeséfuragun jóungua láu jeíbaagun tídaangiñe ugúnein, ába jagúmeserun aráriragüdoún salúfu dúnarugun, jadúga camá jágura óunguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdeara tugúrudun salúfu, ába jíragüdünnun dúnarugun.

³³ Lubá larúgan, ába laríñagun Páblo joun süngubei lun jeígin, laríñaga joun.

—Bián dimáasu guetó lueígiñe marúmugun jumá buídu, meígin sarágu, ladúga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Choúru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanúgün ában fein lújaburugu, ába líchugun eteíngiruni lun Búngiu jagíbugiñe süngubei. Ábati lagúbachagunun,

ába leígin. ³⁶ Ába jarügüdüni ja jíbiri gurásu, ába gíñe jeígin. ³⁷ Bián-sáñadiwa úruwa-wein-díisi-sísi gürígia tídan ugúnein. ³⁸ Dánti le jóujáña quimúle, ába jáguruni túrígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ní jabei mádulungu joun, ába jaríjin ában beídi gebéyaariti, ába jóuchun lun janúgünun ugúnein níjin. ⁴⁰ Ába jíbuguni lagúruga óunguru, ába jígiruni baránaja, ába jasílacürüni fágaayu le esériwidubei lun jabúgurunugun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya.

⁴¹ Ába tídin lídoun ában fulásu le ní lubei biángua lan ébeni, ába tadágarun, siñá lánjingichun tígiri ni murúsun, ába tagúmeserun aboúchagua tiyúnagiñe, le lére lugúdi barána. ⁴² Ába yebe jabúseerun súdeara jáfaraguniña adaúrútiña jílagubei lueí janúrajan áfuli-jeina. ⁴³ Ánjein le gumándan, quei busén lubei leséfuruni Páblo, mígirunti lun jadúgüni súdeara le jarítagubei. Ábati laríñagun lun lan jachúbaragun ja gáfulíjadíbaña baránajoun furúmiñe lun jachúlürün múarugun, ⁴⁴ jáme jíbiri, jóudinme ligíbuagu buri fuláansu lúma buri tífe ugúnein. Ítara líña jachúlürün süngubei múarugun séfuñu.

Páblo luágu uboúju le gíribei Málta

28 Dan le séfujadiwa sun wagía láru béya, ligía wasúbudiruni luágu Málta lan líribei uboúju ligía. ² Buíti jóuseruniwa gürígia ja aganoúbaña ní, ába jáfuragun ában óunwenbun wátu quei díliga lubeí áni níjan júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúrajaña lueí lára wátu, ába tárügüdüni luágu lújabu, ába tágürüni. ⁴ Dan le jaríjinbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun. ⁶ Agúrabatiñá yebe süngubei láludun lújabu, o láburijan lan óuwe. Lílwagu jagúrabajan, dan le jaríjinbei luágu masúseredun lan ni cáta lun, ába lasáansirun jarítagun, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, níñein lufúlasun ában wügüri le weírigutimaabei lídan sun uboúju ligía, Públio líribei, resíbi lumútiwa lúbiñe, seríwi láwa buídu luágu úruwa wéyu. ⁸ Roun líñáti lúguchi Públio láu sándi, abíruaü, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídagun. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídagun. ¹⁰ Ába jarúfuduni lubúidun jagáburi woun, edéweejatiña sarágu cátei woun, lárigiñe, dan le lachúlürün dan lúnya wádinagun lun wasígiruni

waweíyasun, ába jíchuguni sun le wemegeirubei woun lun waweíyasun.

Lachúlürün Páblo ubúrugun Róma

¹¹ Lárigiñe úrúwa játi wáu luágu ubóju ligía, ába wá-dinagun tídoun ában ugúnein to eréderuboun ásügürei luríbouga ñi luágu ubóju ligía. Alejandríana ugúnein tugúya, ñíñanu jayáwa bián sánda luágu tigíbu ugúnein tugúya, Cástor lúma Pólux. ¹² Ába wachúlürün ubúrugun Siracúsa, ába weréderun úrúwa wéyu ñi, ¹³ ñígiñe wasígira láru láru darí wachúlürün ubúrugun Régio. Larúgan, ába láfujan suédi, luágu libíaman wéyu ába wachúlürün lídoun liraúraü aúdü le gíribei Puteóli. ¹⁴ Ñi wadárira átiri afíñetiña, ába jamí-surajaniwa lun weréderun ában dimáasu jáma, lárigiñe, ába wígiragüdün lun ubúrugun Róma. ¹⁵ Agáambaña afíñetiña ja Rómabaña wawágu luágu awánte lan, ába jóudin wabároun, jíbiri chülú lúmoun fulásu le gíribei Fóro, le luágubei úma gírjiti Ápio, jíbiri, dúnguatiña wáma lídan fulásu le gíribei Úrúwa Jában Chülúdügütiña. Dan le laríjnbaliña Páblo, ába líchugun eteíngiruni lun Búngiu, ába lárügüdün gurá-su. ¹⁶ Dan le wachúlürünbei Róma, ába ledéregeruniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábugua láu ában sú-daara oúnigirei.

Lapúrichijan Páblo Róma

¹⁷ Úrúwa wéyu lárigiñe lachúlürün Páblo, ába loúnajawágu juríu weírigutiña ja Rómabaña, dan le adámuriguaaña, ába laríñagun joun.

—Nidújeñu, láu sun madúgün nan ni cáta wuríbati joun juríu, ni lun le uágubei jéchuda binádu wagúbürigu, derégawatina dáüwañu joun Rómána ubúrugun Jerusalén. ¹⁸ Lárigiñe jálügüdagúnina, álugatiñá yebe jígiragüdünina ladúga madári jamá nidúnrun le lúnti náfarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubeíti lébubei noúnajan juágu lun naríjinün lúma lun nadímurejan jun, ladúga lueígiñe cátei le uágubei weménigida wagía Israelítagu anája lubei gürágu láu güríngüri le.

²¹ Ábati jaríñagun lun.

—Wagía, merésibirúngidiwa ni ában gárada buágu Judéagiñe, úagili gíñe ni ában wapaísanu jádaangiñe ja núbinbaña ñígiñe aríñaguti wuríbati woun buágu.

²² Busétiwa jamúga wagáambuni ca lan barítagebei, ladúga subúdi wamúti luágu adímurejóua lan wuríba luágu iséri adamurini le, le lánina lémeri Jesúsú, lídan sun fulásu.

²³ Ábati jíridun ában wéyu lun, ába jachúlürün sarágu gürígia le ñi lubei lagánawa Páblo. Ába ladímurejan joun lúmagiñe bináafin darí gúñoun luágu larúeijan Búngiu. Louchun lun lafíñeragüdüniña luágu Jesúsú lan asálbaragülebei le jagúrabajabei láu layúsuruni lilúrudun Moisés lúma le jabúrújabei profétagu.

²⁴ Jíbiri, afíñetiña luágu le laríñagubei Páblo, jíbiri mafíñetiña. ²⁵ Queíti múaradun jamá jámagua luágu jarítagnun, ába jagúmeserun ñúdúngua, ábati laríñagun Páblo joun.

—Ligía laríñagunbei Sífiri Sándu joun binádu wagúbürigu lídaangiñe proféta Isaías.

²⁶ Beiba, baríñagame joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladúga deréeru janígi gürígia ja, áni wuríbati jagáambun,

darú jamuti jágu, lueí jaríjini laníchigu cátei le jaríjubei,

úati gíñe gunfaráanda jamáni cátei le jagáambubei, derétu gíñe janígi,

máluajan jamútina lun nareídaguagüdünun jawáni.

²⁸ Subúdi jumei luágu oúnaja láali lan Búngiu ugánu luáguti Jesúsú le méme Wasálbaragülebei joun ja mámbabaña juríu, áni jagía, jánjaruba lun.

²⁹ Dan le laríñagunbei Páblo ítara, ába jódingua juríu, adímurejeina jámagua luágu cátei le.

³⁰ Reídeiti Páblo bián irúmu dayáruti tídan lúban ájayajoútu, resíbi lumútiña sun ja ñúdünbaña aríjei.

³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucristu, mebérésejanga ni ában lun.

ROMANOS

Labúrűjan Páblo joun tílana ligílisi to Rómaboun

1 Anája áu, Páblo, nabúrűjañoun gárada to jun, jugúya lánigu Búngiu ja aganoúbaña ubúrugú Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse lálalibei jaba gürígia. ² Sabúdigüda lumúti Búngiu ugánu le lúmagiñé meja binárü jádaangiñe profétagu, bürúwati le jadímurejabei tídan Lerérun Búngiu. ³ Núbinti asálbaruni ligía woun lídaangiñe Wabúreme Jesucrístu. Gürígia ubouáguna Jesucrístu, Búngiu méme gíñe. Queisi gürígia, jádaangiñeti méja lufámilian Urúei David Jesucrístu, ⁴ arufudúati luágu Liraú lan Búngiu láu luweírín miláguru le ladúgübei láu lásaaragüdüni Jesucrístu lídaangiñe ouweni. ⁵ Fuleisei lumútiwa Búngiu lídaangiñe Jesucrístu lun loúnajaníwa lídan líri lun wasúbudiragüdün joun gürígia luágu queísi Wasálbaragüle lídan sun fulásu, gayára lámuga jafíñerun luágu, adúga jameíme le lubeibe. ⁶ Anjünjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabúrűjaña lubeíti jun, jugúya le aganoúbei ubúrugú Róma, ja jínsiñebaña lun Búngiu, wa ligía jun lun jabágaridun ában ibágari derégeguañu júngua lun. Ibíja jumá abíniruni lúma darángilaú lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírín neteíngiruni Nubúngiute lídaangiñe Jesucrístu juágu, sun jugúya, lugúndun adímurejóati luágu jafíñen luágu Jesucrístu lídan sun fulásu. ⁹ Áni Búngiu, le únbei nesériwida táu sun nanígi apúrichijei ugánu luáguti Liraú, geféenti luágu luweírín nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jafíñen, lúntima derégüdagú jumá, ¹² lun gíñe wíhugun gurásu wádaangua láu afíñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeíbugun lúma Búngiu, queísi naríjini jawáanserun jíbiri afíñetiña lídan buri ámu fulásu.

¹⁴ Lúnti níderaguniña sun gürígia, dándu ja chúlúguatiña queísi ja machúlaaguntiña, dándu chu táu queísi ibídiougua táu. ¹⁵ Lueígiñe lubeíti noubadina, buséntina gíñe lun napúrichijani ugánu luáguti Wasálbaragüle jun, jugúya le aganoúbei ubúrugú Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja afíñebaña luágu, juríu furúmiñe, lárigiñe, ja mámabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queísi lánigu. luwúyeri igáburi ligía, láurügü lafíñerúniwa luágu, libijúa. Ítara líña taríñaguni Lerérun Búngiu. “Le gürígia le richáguabei ligíbugiñe Búngiu láu lafíñerun luágu, libíjubei ibágari magúmchaditi.”

Jadúnrun gürígia ligíbugiñe Búngiu

¹⁸ Aríja wamúti láburujan lanárime ligáñi Búngiu siélugiñe jawágun sun gürígia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda lálali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladúgübei. Arijúaali furáangu lúmagiñe lagúmeserun ubou luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubeíti luágu jaríban, ²¹ lugúndun láu sun subúdi jamáni Búngiu ítara, míchugugiña inébesei lun queísi Búngiu, meteíngirun jameí. Queísi libídiouniga láu ligáburi jarítangun luágu Búngiu, féridi jamúti murúsun larúgounga luágu Búngiu lé meja jabíjubei. ²² Láu sun aríñaga jamá luágu chu lan jáu, ibídiougua táu, ²³ lubáragiñe jájuduragun lun Búngiu le weírígubei, le mouwedadibe, jájuduragarüga joun jayáwa gürígia ja gouwedaditiña, lúma gíñe joun jayáwa dunúru, jéwe jáma anímaalu ja gádürüga tugúdi.

²⁴ Ligía ígira láaña lubeí Búngiu láu luríban ayúmajani le gádaanbaliña, darí lún buri jadúgün cátei buri nibúsigarídünati jámagua. ²⁵ Ítara líña ligáburi jabágaridun lugúndun maffíñerun jamá luágu inárüni luáguti Búngiu, jafíñera luágu iyéeni, jájuduragua láu inébesei lún buri cátei le ladúgübei Búngiu lubáragiñe

jamúga jájuduragun lun Búngiu, le gadúnabei inébesi súnwandan. Ítaralá.

²⁶ Ligía ígira láaña lubeí Búngiu lun jadáagun cátei nibúsigarídünati, ásta würiña adáagutiña cátei jáma würiña jáledi lubáragiñe jamúga jagámaridun wügúri queísi lubúdubu. ²⁷ Ítara méme gíñe ígira jamáali wügúriña jayúsurun würiña lun jayúsuragun jóungua. Adáaguatiña wügúriña cátei buri nibúsigarídünati jámagua, ábati jasúfuriruni lafáyeiruaaja jawíye ja-wouga.

²⁸ Queísiti mabúseerúnjaña lan jíchuguni lilúgaarun Búngiu lun, ígira láañati láu lagúbüri jasáminan, lun jadúgüni le moún lubei jadúgüni. ²⁹ Buin jáña láu sun luwúyeri maríchaü, salúfuri, wuríbani, meménijabuni, iyéerejabúni, gimúgaü, áfarajadi, lanígiwa wuríbu, ayéeraguni, ibíbuni, marásualugu. ³⁰ Adímurejatiña wuríba jawágu jíbiri gürígia, iyéereguti Búngiu joun, minébenejabutiña, barúguatiña jóungua, pántatiña. Gachúgütiña lun jaságarun iséri cátei wuríbati, mabájüdüni jamútiña jagúbürigu, ³¹ ibídiouguati jáu, magúnfulirun jamúti jerérun, mínsiñejabutiña ni ca un, úati ferúduna jamá, magúdemejaabutiña. ³² Subúdi jamúti le laríñagubei Búngiu buídu buídu, subúdi jamúti luágu ja lan adúgütí buri cátei le, lúnti lan jóunwen lueígiñe. Láu sun líra, adúga méme jamúti, dari lun gúnda jamá dan l jasáminan, lun jadúgüni lee jaríjin ámu gürígia adúgei.

Agúseragüdáti Búngiu láu inárüni

2 Ligía gadúnrun lubeí le adímurejabei luágu le ladúgübei ámu, cáteinein lan, lugúndun dan le ladímurejan luágu wuríbani le ladúgübei ámu, líchuguña guánarügü dúru luougu, lugúndun líbe méme gíñe cátei wuríbati ligía ladúgübei. ² Subúdi wamúti luágu láu lan inárüni lagúseragüda Búngiu dan le lasíadiruniña ja adúgübalin buri cátei l jasáminan, lun jadúgüni lee. ³ Bugúyati le adímurejabei jawágu ja adúgübalin buri cátei wuríbati le, áni ligía méme gíñe badúgübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Ódi mebéresentibu láu lareíni Búngiu le magúmuchadibei lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afígounja? ⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bífígoun lubáme luwéyuri lagúseragüdün Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladúgübei. ⁷ Líchuguba ibágari magúmuchaditi joun ja áluajabalin uweíriguni, inébesi, lúma cátei lé buri magúmuchaditi yágüta siélu láu jadúgüni le buídubei súnwandan ya ubouágu. ⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálarei wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adúgübalin le wuríbabei, joun juríu furúmiñe, lúma gíñe joun ja mámabaña juríu. ¹⁰ Ánjeinti joun sun ja adúgübalin le

buídubei, líchuguba Búngiu uweíriguni, inébesi, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanúgüniña Búngiu sun gürígia. ¹² sun ja afígounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdúba bougudin lueí lúrudu ligía, tídiba jawáni máfiougatin. Játi afígounjabaña láu sun subúdi jamáni lilúrudun Búngiu, jagúserawagüdúba láu lúrudu ligía, tídiba gíñe jawáni máfiougatin. ¹³ Lugúndun máma ja agáambarügübalin lúrudu richáguabaña ligíbugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadúgüni le lubeíbei Búngiu láurügü laríñagun jarítagun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürüñu tídan janígi, arúfuda tumúti janígi líra, áni laríñagubei jarítagun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucristu, larítaguba luágu sún buri cátei le, ladúga lagúseragüdübei gíñe ásta cátei lé buri arámudagúabei tídan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüni Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun úma buíti lúma luágu gayára lan bíchugun larúgounga joun ja eíbugubaña lídan lubúriga. ²⁰ Jarítaguatibu luágu gayára lan barúfudajan joun ibídiougua táu luágu Búngiu, lúma lun barúfuduni úma joun ja isérigiñabaña lídan jafíñen, queísi barítagun luágu ibíja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? ²² Ánjein aríñaga bubeí luágu moún lumuti lan jagámaridúniwa jámari gürígia maríeitiña, ¿cámegei badúgei? Ánjein iyéeregu lubeí cátei lánina sándu bun, ¿cámegei bádaragua búngua lídoun buri cátei jánina sándu láu bíwerujani tirisín jalígilisin? ²³ Pántatibu láu lilúrudun Búngiu, ába bíchugun minébesi lun Búngiu láu magúnfulirun báani. ²⁴ Tinárün Lerérun Búngiu dan le taríñagunbei. “Ídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adúga jumúti jugúya juríu igáburi le circuncisión lé meja liseíni lidáradun Búngiu jáma lánigu. Buíti igáburi ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manúgünti circuncisión ni cáta jun, queígubeirügü madúgüniwa lan. ²⁶ Gürígia ja mámabaña juríu, ánjein jadúga buri cátei

le lubeíbei lilúrudun Búngiu, janügúba queísi lánigu Búngiu láu sun merésibirun jamáni circuncisión.

²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalíbei circuncisión, ja magúnfulirunbalin Lerérun Búngiu, láu sun jun lan labúrüdúwa. ²⁸ Le juríubei le tímatimaati, máma bougudigiñerügü libíti juríu lan, máma gíñe láurügü wadügün cátei le bouguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítangun gürígia luágu mabuídun lan.

3 Queísi ítara líña lubeí, zjaláñeinti jagáñiragüle gürígia lueígiñe juríu jamá? ² Sarágu, áni gíbeti gíñe lébuna. Furúmiñeti cátei, rúlumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, zmagúnfulirunbei funági Búngiu láu lerérun ladúga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Taríñajare Lerérun Búngiu.

Babájüdüba queísi richáti lídan le baríñagubei, áni buídubei báfuridun dánme le bagúserawagüdü. ⁵ Ábanya álügüdjani. ánjein seríwi lubeí luríban wagáburi lun larúfuduni luágu richágu lan Búngiu, zcábaga waríñaga? zMaríchatí funági Búngiu lugúndun larúfuduni ligáñi luágu luríban wagáburi? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, zída líña jamúgagi lagúseragüdüniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, zcáti uágu laríñawagúa wawágu luágu gáfígoun wamá? ⁸ zLúnti lubeí jamúga ladügün wuríbani lun larijóuniwa le buídubei? Niján cátei le jaríñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasíadirúniwa.

Sun wagía gadúnruntiwa ligíbugiñe Búngiu

⁹ zÍda liñági? zBuítimaatiwa wagía juríu sügú jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figoú. ¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,

¹¹ úati ni ában ánjaruti lun gunfaráanda lan, úati ni ában áluajati Búngiu.

¹² Yuríguaaña sùngubei, ñúdünjaña lídoun féridi.

Úati ni ában adúgüti le buídubei, ni íbini ában.

¹³ Eyéeraguatiña láu jayúma, júnren líña jayúma lun jadímurejan lagúburi dimúrei le mínsiñeguti

queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése queísi láfarajan lupeísini jéwe.

¹⁴ Anábajani rügúñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barúti jagáburi gürínguaü lúma igárigu,

¹⁷ áni ibídiñeti úma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei binádu lilúrudun Búngiu, joun lan ja lábugiñebaña lúrudu ligía laríñagei, lun jasúbudiruni gürígia jagía luágu gáfígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu. ²⁰ Lugúndun úabei ni ában eréderuti richágu ligíbugiñe Búngiu lueígiñerügü ladügüni le lubeíbei lúrudu, lúnrügü lasúbudiragüdüni lúrudu woun luágu gáfígoun wamá lesériwida.

Lídaangiñe afíñeni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin lueí lúrudu lé meja líchugubei lídaangiñe Moisés. Gayáraati wasúbudiruni líra láu walíjanun lilíburuna to meme lilúrudun Moisés, túma jalíburun profétagu. ²² Láu wafíñerun luágu Crístu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia, ²³ lugúndun afígounjaaña sun gürígia áni siñáti lagúndaarun Búngiu jáu. ²⁴ Láu lareíni Búngiu, resíbi lumútiña sun gürígia queísi lánigu, mafáyeijaanga jagía luágu, lugúndun fáyeijali Crístu luágu wafígoun lun gayáraabei lan weréderun richáguañu ligíbugiñe Búngiu. ²⁵ Adúgati Búngiu lun lébunabei lan ferúdu Crístu láu loúnwen luágu wafígoun, áni lídaangiñe wafíñerun luágu queísi Wasálbaragüle liábin ferúdu woun. Láu loúnwen Crístu queísi afáyeiragülei luágu figoú, ába larúfuduni Búngiu luágu úaragua lan áni iyéereguti figoú lun. Ába lachíbuni líta Crístu jafígoun gürígia já meja aganoubaña lídan dan le sügújalíbei, le uágubei mafáyeijagüdüni láañabaña lan, ²⁶ chibá lumuti gíñe jafígoun ja aganoubaña lídan buri dan le, lun larúfuduni luágu úaragua lan, áni sun ja afíñebaña luágu Jesucrístu queísi Jasálbaragüle barú lumútiña queísi úaraguatiña.

²⁷ Queísiti ítara líña lubeí, zcáti asúseredubei lun japántan gürígia luágu lubuídun jagáburi? Gumúguati. zCági uágu? Lugúndun lun jamúga gayára lan wasálbarun láu lubuídun wagúnfulirun lúma binádu lilúrudun Búngiu, gayáraati jamúga wanáangun woún-gua, queísi sálbañu wáña lubeí láurügü wafíñerun luágu Crístu, gumúgua lébuna wanáangun woún-gua.

²⁸ Subúdi wamáali lubeíti buídu luágu resíbi láani Búngiu gürígia le afíñeti luágu Crístu queísi gürígia richáguati, mebéresegúnga ánjein gúnfulijali lubeí lúma lilúrudun Moisés lúmoun magúnfulirungili lan.

²⁹ zJuríu rügúñanu funági Gabúngiutei Búngiu? zMa funági gíñe Jabúngiute ja mámabaña juríu? Jabúngiute gíñe, ³⁰ lugúndun ában rügúñein Búngiu, le erésibirubaliña sun gürígia ja afíñebaña luágu Jesucrístu

queísi Jasálbaragüle, mebésenga ligía ánjein resíbi jabálin circuncisión lúmoun merésibirun jamáni.
³¹ ¿Wayúsuruñein lubeíti afíñeni luágu Crístu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

Jémpulu luáguti Abrahám

4 ¿Cábatí waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladúgün cátei buíti lerésibirei Búngiu queísi ában gürígia richáguati, gébunati jamúga lapántajan, máma ligíbugiñe Búngiu. ³ Tariñajare Lerérun Búngiu. “Afíñeti meja Abrahám luágu Búngiu, luágu lafíñen lerésibirei queísi wügúri richáguati.” ⁴ Dan le ladúgün gürígia ában wadágimanu, fáyeiti le libíjubei lebégi luwádigi-mari, máma edéweejani. ⁵ Ánjeinti gürígia le asálbaruti lídaangiñe lifígoun láurügü lafíñerun luágu Búngiu le erésibirubaliña gáfígountiña, lerésibirubei Búngiu queísi ában gürígia richáguati luágu lafíñen, anáti líra, edéweejani. ⁶ Davíd guánarügü admurejati luágu jagúndan gürígia ja lerésibirubaña Búngiu queísi richáguatiña luágurügü jafíñen, mebésenga ligía ca lán meja jadúgübei. ⁷ Laríñajare Davíd.

Gúndaatiña gürígia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürígia le lanúgübei Búngiu queísi gürígia mafígounjaangili.

⁹ ¿Joúnti rügüñein funásan ja erésibirubalin circuncisión, ódi joúnti gíñe ja merésibirunbalin? Joúnti sun jawúyeri gürígia ugúndani ligía. Aríñagaadiwa luágu resíbi láani Búngiu Abrahám queísi wügúri richáguati, luágu lafíñen. ¹⁰ ¿Ída bugági lerésibirei, larígiñe lerésibiruni circuncisión ligía ódi lubáragiñe? Máma larígiñe, lubáragiñe. ¹¹ Larígiñe larúfuduni Abrahám lafíñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügúri richáguati ladúga lafíñen luágu. Ítara líña gíñe líabin Abrahám lun jáguchibeí lan sun ja afíñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña. ¹² Jáguchi gíñe ja resíbi jamáalibeí circuncisión Abrahám, ja afíñebaña luágu Búngiu queísi lafíñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagatí meja Búngiu lun Abrahám luágu líchugubei lan uboú lun jáu sun linébaanfaangu queísi jalágaante, máma ladúga lagúnfuliruni Abrahám lilúrudun Búngiu líchugúa dimúrei le lun, ladúga lafíñerun luágu Búngiu, ába lerésibiruni Búngiu queísi ában wügúri richáguati. ¹⁴ Lun jamúga já rügüñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeíti jamúga jafíñerun ja eménigidubaña luágu jafíñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan

linárün cátei, mabáfutiña gürígia lun jagúnfulirun lúma lilúrudun, ¹⁵ barúrügü lumúti lilúrudun Búngiu ligáñi jawágun gürígia luágu magúnfulirun jamáni. Ánjein le ní lumuti úa lan lúrudu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani luágurügüti afíñeni. Mámarügü joúnti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, joúnti gíñe sun ja mámabaña juríu áni máma gíñe lábugiñeñanu lúrudu ligía, ába jafíñerun luágu Búngiu queísi lafíñerun Abrahám luágu. ¹⁷ Ligíbugiñe Búngiu, ñúbinti lubeíti Abrahám lun wáguchibeí lan sun wagía le afíñebeí luágu Búngiu, queísi taríñagun Lerérun Búngiu. “Adúga náadibu lun jáguchi ban sarágu mútu.” Gabáfuti Búngiu lun ladúgüni líra queísi gabáfu lan lun líchugun ibágari joun jiláaña, níjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaú lan ladúga weíyaali lan, weíya tugúya Sára, afíñeti dán meja le laríñagubei Búngiu lun luágu ítara lúba lan jibe ladúgawagun queísi warúguma. Ába lasúseredun ítara lun jáguchibeí lan sarágu mútu.

¹⁹ Meféridirun lumúti lafíñen luágu dimúrei le laríñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru gíñe Sára lun tagáraüdün. ²⁰ Maloúguadunti lafíñen luágu dimúrei le laríñagubei Búngiu lun, weíritimáarügüti lafíñen.

²¹ Rúti uweírighuni lun Búngiu láu ában ichoúrni le tímatimaati luágu gabáfu lan Búngiu lun ladúgüni sun le uágubei laríñaga. ²² Ligía lerésibirunbalin Búngiu queísi wügúri richáguati, luágu lafíñen.

²³ Cátei le, luáguti lerésibiruniña Búngiu gürígia luágu jafíñen, mámarügü luágu Abrahám labúrújoúa, ²⁴ labúrújoúña gíñe wawágu. Lugúndun luágu wafíñen, resíbi lumútiwa gíñe Búngiu queísi richáguatiña, wagía le afíñebeí luágu le ásaaragüdubalin Wabúreme Jesúsú lídaangiñe ouweni. ²⁵ Jesúsú le edéregerúabei lun loúnwen luágu wafígoun, ába lásaarun lídaangiñe ouweni lun larúfuduniwa richáguañu ligíbugiñe Búngiu.

Niján lébubei weréderun madúnrunga

5 Queísiti resíbi láadiwa lubeí Búngiu láu wafíñerun luágu, lídaanjadiwa dan lúma, lídaangiñe Wabúreme Jesucrístu. ² Ladúga Crístu, biníwadiwa lubeí láu wafíñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírighun Búngiu. ³ Áni máma rügüñein líra, gúndaatiwa gíñe lídan wasúfurirun ya uboúagu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburí, áni láu líra, gayára lan weménigidun lun gafánraanbadiwa lan lídan luweírighun Búngiu yágüta siélu. ⁵ Áni máburujanbei warúna lurúma eménigini le, ladúgübei Búngiu le aríñaga láalibeí woun ladúga lín-siñejabu woun. Sandí wamaali línsiñejabu, buíngüda

láaru wanígi láu línsiñejabu, láu Sífiri Sándu le rúlaalíbei woun.

⁶Ladúga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figoú le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gaffigounbei. ⁷Máma cátei ménreengunti lun loúnwen ában gürígia jawágu ámu gürígia, ni íbini lueígiñe ában gürígia le buídubei, láu sun níjein lan gürígia gayáraati jamúga loúnwen lueígiñe ában gürígia le buíti le tímatimaati. ⁸Ánjein Búngiu, ába larúfuduni luweírin línsiñejabu woun láu loúnajani Jesucrístu le Liraú lun loúnwen wawágu, láu sún meja gaffigoungidíwa lan. ⁹Guetóti, láu resíbi láadiwa lan queísi gürígia richáguatiña láu loúnwen Crístu wawágu, choúruti-maati luágu weséfuruba lan lueí ligáñi Búngiu le lún-bei láburujan jawágun gaffigouñtiña lídaanme luwéyuri agúseruni. ¹⁰Lugúndun ánjein ru lubáliwa Búngiu lídan dan lúmagua láu loúnwen Liraú dán meja le lá-ganigídiwa, choúruti-maati luágu lasálbarubadiwa lan le gumúti, luágu Liraú le wínwañubei lúma, siélu. ¹¹Áni máma rügúñein cátei le, gúndaatiwa gíñe lúma Búngiu lídoun buri dan le, lídaangiñe Wabúreme Jesucrístu, le lídaangiñebei lídaanjadiwa lan dan lúma Búngiu.

Adán lúma Crístu

¹²Ítara queísi lídaangiñe lán meja ábanrügü wügúri le gíribei Adán lebélura figoú uboúagun, ába lanúgüni figoú ouweni lúmagua queísi lafáyeija, ítara líña gíñe jóweguba lubeí sun gürígia lugúndun afígounjatiña sún-gubei. ¹³Lubáragiñe meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afígounjaña uboúagu, láu sun úagili lan lúrudu ligía lun gayáraabei lan jadúraaguni. ¹⁴Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladúga magáambadi jamá jafígounbei queísi ladúgüni Adán le magáambadibei lun lerérun Búngiu lun. Lueígiñe ában oúbaü, Adán liyáwa Crístu le lúnbei liábin, ladúga biángubei jagía barútiña som cátei joun gürígia.

¹⁵¡Amuñegueinarügü gíñe cátei le janúgübei joun gürígia! Barúti Adán ouweni joun sun gürígia láu laffigounjan, ánjeinti Crístu, barúti asálbaruni joun sun gürígia, áni weíriti asálbaruni le líchugubei Búngiu láu lareíni woun lídaangiñe Crístu sügú láu lifígoun Adán. ¹⁶Weíriti gíñe le líchugubei asálbaruni sügú láu le líchugubei lifígoun Adán woun. Ladúgarügü ában figoú, chúlúti ouweni joun sun gürígia, ánjeinti ladúga loúnwen Crístu wawágu, ferúdunawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷Ánjein gabáfu lubeí ouweni jawágu sun gürígia ladúga lidúnrun ábanrügü wügúri—Adán, choúruti-maati luágu sun lan gürígia ja lerésibirubaña Búngiu láu lareíni queísi gürígia richáguatiña, jabíjubei ibágarí magúmuchaditi lúma Búngiu, jarúeijaba úara lúma Crístu, ladúga ábanrügü wügúri ligía.

¹⁸Ítara queísi líchuguniña Adán sun gürígia lábugiñe lisíadin Búngiu lun jóunwen láu ladúgüni le áubei magúndan lan, ítara líña gíñe lagídaruniña Crístu gürígia lábugiñegiñe asiadiruni ligía, rúleí ibágarí magúmuchaditi joun láu ladúgüni lugúndan Búngiu lun loúnwen jawágu. ¹⁹Ladúga lubeíti lumágaambadi ábanrügü wügúri, ñúbintiña sun gürígia lun jafígounjaba lan, ítara méme gíñe, ladúga lagáambadi ábanrügü wügúri, gayáraati jayábin sun gürígia lun richáguata jamá ligíbugiñe Búngiu.

²⁰Rúati lilúrudun Moisés woun lun gayáraabei lan wasúbudiruni cátei lan figoúbei. Láu sun gíbe lan figoú uboúagu, weíritimaabei lareíni Búngiu lun lachíbuni sun figoú ligía. ²¹Ítarati queísi gabáfu lán meja figoú lun lanúgüni ouweni, ítara gíñe gabáfuti lareíni Búngiu lun ladúgüniña gürígia richáguata ligíbugiñe, lúma lun líchugun ibágarí magúmuchaditi joun lídaangiñe Wabúreme Jesucrístu.

Jiláñu wáña lun figoú, wínwañu lun wesériwidun lun Crístu

6 ¿Cábati waríñaga? ¿Wasígiruba afígounja lun larúfuduntima Búngiu lídaangiñe lareíni woun? ²¡Máma lúba! Wagía, jiláadiwa lun figoú, ¿ída lubáti gayára lan wasígirun afígounja? ³¿Ibídíñeti jun luágu láu lan lídan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lídan loúnwen, lun mabáfujali lánme figoú wawágu? ⁴Láu wabásterun, queísigubeirügü jamúga bunáwa wamá úara lúma Crístu, áni reideitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe ouweni láu luweírin lubáfu, sarágüda láadiwa gíñe lun isérijali lan wabágarí.

⁵Lugúndun ánjein ñúbin wabeí lun lídaanbadiwa lan ában lúma Crístu lídan ában ouweni líbe loúnwen, ítara wába gíñe lídan lásaarun lídaangiñe ouweni.

⁶Subúdi wamúti luágu dáwagua lan binádu meja wagáburi lúma Crístu luágu gurúwa lun lagúnrin-chawagún lubáfu figoú lé meja wawágubei, lun merédeediwa lan queísi idámuni esériwida lun figoú queísi wayúbudiri. ⁷Lugúndun le jiláalíbei, furíjali lídaangiñe figoú. ⁸Ánjein jiláadiwa lubeí lúma Crístu, gayáraati wafíñerun luágu wabágariduba lan gíñe lúma, ⁹lugúndun subúdi wamúti luágu sará lan Crístu ában weíyaasu lídaangiñe ouweni, moúnwendügüyaali, mabáfujali ouweni luágu. ¹⁰Dan le loúnwenbei Crístu, ába lagúmuchaguagüdüni lubáfu figoú lun sun dan, áni ibágarí le labágaridubei guetó, lun méme lesériwidun lun Búngiu labágaridei.

¹¹Jugúya gíñe, rúgua jumá júngua queísi jiláguaaña lun figoú, áni wínwañu lun jesériwidun lun Búngiu, lídan ában lúma Crístu Jesúsu le Wabúreme.

¹²Ligía, mígira jumá lubeí lun gabáfu méme lan figoú juágu, afósuraün lun jadúgüni luríban jayúmajan.

¹³Míchaagua jumá júngua lun figoú lun layúsuruni júgubu lun cátei wuríbatí. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumeí júgubu lun Búngiu lun

layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadúgüni lugúndan.

Ában jémpulu luágu idámuni

¹⁵ Queísiti máma lubeí lídaangiñe wagúnfulirun lúma lilúrudun Búngiu le líchugubei lun Moisés líabin wasálbarun, lídaangiñe werésibiruni lareíni Búngiu, ¿gayáraati lubeíti wabágaridun lídan figoú ladúga líra? ¿Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeíti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara queí meja lidámun jumá sun luwúyeri figoú, guetó lúnti jíabin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéreseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanúgübeí buri cátei ligía jun le áubei buri nibúsigari jumá guetó? Ni cáta buíti, féridi rúgüñein lanúga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barútiti cátei le arúmani tun janígi lúma ibágari magúmuchaditi jun. ²³ Lugúndun ouweni lafáyeijabei figoú, ánjeinti edéweejani le líchugubei Búngiu woun, ibágari le magúmuchaditi ladúga lídaañadiwa lan ában lúma Wabúreme Jesucrístu.

Ában jémpulu lídaangiñeti maríei

7 Nidújeñu, jugúya le subúdijabúbei lun lúrudu, subúdi jumáli luágu dán rúgüñein lan wínwangili ában gürígia, ligía lábugiñeñein lan lúrudu. ² Quei jamúga, ában wúri to maríeitu, rúlumutu lúrudu lábun lagúmadijan túmari sun dan le wínwangili lan, ánjein ouwe túmari, boúgudijaru lueí lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wügúri sun wínwangili lan túmari, tadúgüña figoú le gíribei adultériu, ánjein ouwe túmari, gidáaru lábugiñegiñe lúrudu ligía, áni gayáraati tamárieidun lúma ámu wügúri, madúgüntu adultériu.

⁴ Ítara gíñe jugúya, nidújeñu, láu loúnwen Crístu, furíjadün lábugiñegiñe lagúmadijan lilúrudun Moisés queísi wúri to jíalali túmari, ába tagámaridun ámu. Guetó, lánijadün Crístu, le saráalibeí lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñé meja werésibiruni Crístu, seríwiti meja lilúrudun Moisés lun lagáguduni luríban ayúmaní wádan, áni ligía cátei le anúgübalíwa lídoun

ouweni. ⁶ Ánjeinti guetó, jílaadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürúwabei.

Igáburi lánina figoú le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¿Máma líña! Láu sun líra, lúrudu asúbudiragüdúbalin figoú nun. Ibídíñeti jamúga nun luágu figoú lan lawámadirun jamégen ámu ánjein jamúga maríñagunti lúrudu. "Mawámadirabeí jamégen ámu." ⁸ Ladúga méme gumádi le, ába lagáguduni igáburi lánina figoú le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figoú. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan úma lun féridi. ¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeirujaja. ¹¹ Lugúndun lárügüdün igáburi lánina figoú le nídaanbei lueígiñe lúrudu ligía, ába leyéeragunina lun nadúgüni le wuríbabei, ába lanúgünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úraguati, áni buíti. ¹³ ¿Ligía funásan cátei buíti le anúgübalina lídoun féridi? ¿Máma líña! Nifígoun anúgübalin neféridirun nun, áni ítara líña larúfuduni luágu figoú lan, láu cátei le buídubei, le méme lúrudubei, lanúgana igáburi lánina figoú le nídaanbei lídoun féridi, áni ítara líña larúfuduni lilúrudun Búngiu luágu wuríba lan figoú le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügúri garaúwarügüti, alúgurúañu níña queísi idámuni lun lubáfu figoú. ¹⁵ Úati gunfaráanda náani ca lan susérebbei nun, madúgün numúti cátei buíti le nabúseerubei nadúgün, nadúgei cátei le iyéreegubei nun. ¹⁶ Ánjein le lubeí mabúseerun nubeí nadúgün ligía nadúga, úraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúrudu quei cátei buíti. ¹⁷ Mámaadina lubeíti áu adúgübalin cátei wuríbati le nadúgübei, igáburi lánina figoú le nídaanbei, ligía adúgübalin. ¹⁸ Subúdi numúti luágu úa lan ni cáta buíti nídan boúgudin lueí Búngiu, áu queísi wügúri garaúwarügüti. Buséntina jamúga nadúgüni le buídubei, siñáti nadúgüni. ¹⁹ Madúgün numúti cátei buíti le nabúseerubei nadúgün, nasígirarúga adúgei wuríbati le mabúseerun nubeí nadúgün. ²⁰ Ánjein lubeíti le lubeí cátei le mabúseerun nubeí nadúgün ligía nadúga, lídan linárün cátei, máma áu le láni Búngiu adúgübalin, igáburi lánina figoú le nídaangilibeí, ligía adúgübalin.

²¹ Niján cátei le asúseredubei nun. dan le busén nan nadúgüni le buídubei, wuríbati rügúñein nadárra nídán. ²² Lídan nisáminan, jínsiñeti lilúrudun Búngiu nun, ²³ áni aríjatina luágu níjein lan cátei nídán, ageíndaguti lúma nisáminan, cátei ligía, igáburi lánina figoú le nídaanbei, le gámabalina adaürúwañu.

²⁴ ¡Fugiábu áu! ¿Cába eséfurana lídaangiñe igáburi lánina figoú le nídaanbei, le anúgübalina lídoun ouweni? ²⁵ Búngiu gubeírügü, lídaangiñe Wabúreme Jesucrístu. ¡Teínqui níña lun Búngiu! Gunfaráanda numúti lubeíti luágu áu lan láu náni núngua, úouga lubáfu Crístu nuágu, buséntina jamúga nagúnfulirun lúma lilúrudun Búngiu, siñá numuti ladúga igáburi lánina figoú le nídaanbei, seríwirügütina lun figoú queísi lidámun.

Wabágarí lúma Sífiri Sándu

8 Guetó, gidáwaali jadúnrun gürígia ja lídaanbaña ában lúma Jesús. ² Rúlaali Crístu lání Espíritu woun, áni Espíritu ligía, rúti iséri ibágarí woun, furígüda láadiwa lábugiñegiñe lubáfu figoú le anúgübalíwa lídoun ouweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figoú ladúga turíban wanígi, wagía gürígia garaúwarügütiña. Ába ladúgüni Búngiu le lásiñerubei lilúrudun adúga láu loúnajani Liraú ubouágun queísi gürígia garaúwarügüti le gíñe gayáraati lafígounjan (láu sun, mafígounjan lan). Ába loúnwen Liraú Búngiu, le Jesucrístubei, luágu wafígoun, ába lagúmchaguagüdüni lubáfu figoú wawágu láu loúnwen. ⁴ Ladúgünbalin Búngiu líra, lun gayáraabei lan wadúgüniwa gürígiame richáguatiña queísi lagúmadijan lilúrudun, gürígia ja mabágaridunjañabaña lídan luríban jagúndan, ja abágariduñabaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaúwarügütiña, luágu rügúñein cátei le lánina ubou jarítagua, ánjaña ja abágaridubaña queísi lugúndan Sífiri Sándu, luágu cátei le lánina siélu jarítagua. ⁶ Dan le jabágaridun gürígia queísi jagúndan, marítagunga jagía luágu Búngiu, barú lumútiña lídoun ouweni, ánjeinti dan le jabágaridun queísi lugúndan Sífiri Sándu, barú lumútiña lídoun ibágarí tímatimaati lúma darángilaü. ⁷ Ja arítagubaña luágu cátei le lánina ubou le, láganiñu Búngiu lugúndan mája jáña, áni siñá ligía jíchaagun jóungua lábun lilúrudun. ⁸ Ligía, ja lubeí abágaridubaña láu jagúndan queísi gürígia garaúwarügütiña, siñáti jadúgüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaúwarügütiña, jabágariduña lídan ában lúma lání Búngiu Espíritu, queísi aganoúa lubeí jídan. Le úabei lání Crístu Espíritu lúma, máma lánigu Crístu. ¹⁰ Ánjein wínwan lubeí lání Crístu Espíritu jídan, wínwanboun juwáni lun sun dan ladúga tarúfudúniwa richáguañu ligíbugiñe Búngiu, láu sun loúweba lan júgubu ladúga figoú le lídaanbei ubou le. ¹¹ Ánjein wínwan lubeí lání Espíritu jídan, Búngiu méme le ásaaragüdübalin Jesucrístu lídaangiñe ouweni,

líchuguba ibágarí iséri lun júgubu le goúwedadibeí, lídaangiñe lání Espíritu le jídaanbei.

¹² Ítara líña lubeíti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña. ¹³ Lugúndan ánjaün abágaridarügü queísi jugúndan, queísi gürígia garaúwarügütiña, jeféridiruba, mídinbadün siélu, ánjein jáfara igáburi lánina figoú le jídaanbei jilágubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña lání Búngiu Espíritu, lirájüñü Búngiu. ¹⁵ Sífiri Sándu le jerésibirubei, máma ában espíritu lánina idámuni lúnnya lanúfudedagüdünn lueí láburujan ligáñi Búngiu juágun, Espíritu le jerésibirubei, ligía le adúgübalün lun lirájüñü jumá Búngiu. Ligía gayára lubeí wagúaruni Búngiu Wáguchi.

¹⁶ Geféenti lání Búngiu Espíritu woun luágu lirájüñü-jadíwa lan Búngiu. ¹⁷ Áni ladúga lirájüñü wamá Búngiu, garíchatiwa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabeí luágu Crístu ya ubouágu, gafánraanbadiwa lídan luweírigin yágüta siélu.

¹⁸ Jarítaguatiña luágu ni cáta lan le wasúfurirubei ya ubouágu lúmoun uweírigin le lúnbei wabíjini siélu.

¹⁹ Láuñein sarágu ayúmajani lúma eménigini sun ubou le ladúgübei Búngiu, agúrabei dan le lúnbei jerésibiruni lirájüñü Búngiu jalágaante. ²⁰ Níjein mégeiti luágu sun ubou, máma jamúga ladúga labúseerun, ladúga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan ubou lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigin lirájüñü Búngiu. ²² Subúdi wamúti luágu chúlú lan lúmoun dan le, sun ubou le ladúgübei Búngiu ayájuati láu igárigu camá ában wúri to agáridutu. ²³ Áni máma rügúñein ubou asúfurira, súfuritiwa gíñe, wagía afíñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában oúnwenbun igári, áni agúraba wamúti dan le lúnbei wayábin lun lirájüñüjadíwa lánme Búngiu le tímatimaati, dánme le liséridun wágubu.

²⁴ Ligía lágüdjaja wasálbarun. Merésibirun wamágili sun ubuiduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga ibíja wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le ibíja jamáalibeí. ²⁵ Queíti merésibirun wamágili lubeí sun le lúnbei wabíjini queísi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguniwa Sífiri Sándu lun waríñaguni luweírín cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei.

²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe,

ába loúnabuniwa Búngiu lugúndun ayúmuraguati Espírítu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanúgün buíti woun, wagía le jínsiñejabúbei lun, wagía le wájali lan lun lánigu wamá queísi larítaguni.

²⁹ Lugúndun ja lasúbudirubaña Búngiu lúmagiñe lubáragiñe ladúgüni ubouú luágu lánigubaña lan, fánrein lumútiña lun ítara jamá queísi Liraú, lun Liraú lan íbugañaü joun sun ja lanúadirubaña lun lirájüñü jamá.

³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírigin queísi lirájüñü.

³¹ ¿Cábati waríñaga luágu buri cátei le? Queísi lueígiñeñein lubeí wafúleisein Búngiu, ¿cábagi jabáfu wáganiñu wawágu? ³² Mamájaanti Búngiu lun líchuguni Liraú guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ida lubáti míchugun láani sun líbiri cátei woun queísi líchuguni Liraú woun? ³³ ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasádiruniwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuragua wawágu.

³⁵ ¿Cábati gayára lagídaruniwa lueí línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajouni, o ilámaü, o manáanguni, o pelíguru, o ouweni? ¡Uá! ³⁶ Laríñajare tídan Lerérun Búngiu.

Yaráfatiwa lun wounwen bueígiñe ságü wéyu, ítara líña jouseruniwa wáganiñu queísi mudún anügútiña lun jafarún.

³⁷ Lídan sun cátei le, íbíja wamúti luweírín lubáfu Crístu, le jínsiñejabúbei woun, lun wagáñeirun lídan sun lénreengúnga. ³⁸ Chóuru numúti lubeíti luágu úa lan ni cáta lun lagídaruniwa lueí línsiñejabu Búngiu—ni ouweni, ni íbágarí, ni ánjelígu, ni máfianu, ni cátei le guetóbei, ni le lúnbei liábin, ³⁹ ni le siélubei, ni le ubouágubei, ní buri ámu cátei le ladúgübei Búngiu—siñáti lagídaruniwa lueí línsiñejabu le larúfudubei woun lídan Wabúreme Jesucrístu.

Anúadaja láaña Búngiu Israelítagu lun lánigu jamá

9 Inárüni le lúnbei naríñaguni guetó jawágu nirásan, áu queísi ában affíñeti luágu Crístu, áni meyéejantina, aríñaga tumúti nanígi nun to úraguaboun lúma Sífiri Sándu luágu inárüni lan.

² Weírítí nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun gíñe lábugiñe nan líñaragun Búngiu, díseñu lueí Crístu, ánjein jamúga ítara lúba lubeí gayára lan jerésibiruni Jesucrístu queísi jasálbaragüle lun jasálbarun.

⁴ Linébaanfaangu Israél jagía, áni resíbi lumútiña

Búngiu queísi lirájüñü. Reídeití meja Búngiu jádan láu sun luweírigin áni rulumuti gíñe darádu buri lúma lilúrudun lídaangiñe Moisés. Arúfudati igáburi joun lun jesériwidun lun, ligílísirugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadúnamabei lun liñurúniwa líri lun sun dan. Ítaralá.

⁶ Mámatia luágu jamúga reídei lan lerérun Búngiu joun ladúgawagun Israél magúnfulirunga, ladúga máma sun Israelítagu lánigu Búngiu le tímatimaati. ⁷ Máma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luágu úa lan ni ában liraú Búngiu luágurügü lirásan, ja rügúñanu lirájüñü ladúga jafíñerun luágu lerérun, jagía anügúbaña queísi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachúlürün dan ligía, ábame tagáraüdün Sára ában irájü.”

¹⁰ Áni máma rügúñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isáac, ¹¹ áni dán meja le magúriajoungiña, madúgüngiña gíñe ni cáta ni buíti ni wuríbatí, ába laríñagun Búngiu tun Rebéca. “Lumúsunbei amúleñein le íbugañaü.” Úraguati gíñe líra lúma le aríñawagúbei tídan Lerérun Búngiu. “Jínsiñetí meja Jacób nun, ánjein Esaú, iyéreeguti nun.” Ítara líña gufirümawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéresenga ligía ca lan jadúgübei.

¹⁴ ¿Cábati waríñaga? ¿Waríñaguba luágu múaran lan Búngiu? ¿Siñáti! ¹⁵ Lugúndun laríñajare lun Moisés. “Gareínibadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerún o wáfaagun, lugúdemejabu Búngiu woun, lídaañein lugúndan. ¹⁷ Tídan Lerérun Búngiu, bürúwañu líña dimúrei le laríñagubei lun urúei Ejíptona. “Nadúgünbálíbu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéreragüdünnun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladúgün cátei bouguditi lueí lugúndan Búngiu?” ²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soudíeru lun le adúgübalin. “¿Cáme badúgana ítara?” ²¹ Garíchatí le adáagubei soudíeru lun ladúgüni le labúseerun láu lubúñe soudíeru, gayáraati ladúgün ában soudíeru le díseguati layúsurun, lúma ában le ayúsurúti lun furúmieguarügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírín ligáñi jawágu

gürígia ja gadúnabaña jagúnrinchawagún. Áfaaga lumúti jaríban láu sarágu gurásu darí guetó ²³ lún-rügü gayára lan larúfuduni luweírin luweírigin woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigin. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan lilíburun Oséas.

Já meja mámabaña nánigu, naríñaguba joun. “Nánigu”,

gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ñí lubei laríñawagúa joun. “Máma nánigu jugúya”,

ñíba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gíbe jamá ladúgawagun Israeléi quei ságoun láru béya, biánraürügúbaña jádaangiñe erédera lun jasálbarun, ²⁸ lugúndun lagúnfulirubei Búngiu lerérun ligíbuagu uboú lun lagúnrinchaguniña ja magáambadibaña lun, lídan ában igáburi le gumúti, le gíñe furéseti.” ²⁹ Queísi méja laríñagun méme Isaías.

Lun jamúga meja mígirun lan Súnti Gabáfu jádaangiñe wadúgawagun woun,

wayábiña jamúga lun ítara wamá queísi ubúru gu buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámabaña juríu, ja mibíjinalin lilúrudun Búngiu lun jasúbudiruni le buídubei lúma le wuríbabei, jagía anügúbaña quei richáguatiña ligíbugiñe Búngiu ladúga jafíñerun luágu. ³¹ Ánjañati ladúgawagun Israeléi, ja áfaagubaña lun jerésibiruniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machúlüntiña lun richágu jamá ligíbugiñe Búngiu. ³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafíñen, jadúgeirüga láu cátei le guánarügü jadügübei. Ligía jachúgeragunbei luágu Jesucrístu queísi “dúbü le achúgeraguágülei”, ladúga siñá lan jafíñerun luágu queísi Jasálbaragüle. ³³ Laríñajare tídan Lerérun Búngiu.

Rútina ában wügüri le queísigubeirügübei dúbü le achúgeraguágülei Sión, dúbü gíñe le eíguadagüdúti gürígia.

Ánjeinti le afíñeruti luágu, maságüríjanbei.

10 Nidújeñu, le cátei le uágubei tayúmaja nanígi, lúma le uágubei nayúmragun lun Búngiu jawágu Israelítagu, ja méme juríubaña, lun jasálbarun. ² Aríñagatina luágu jafúleisein luágu níjein lan ában oúnwunbun gúnfuli jádan lun Búngiu, máma queísi laríñagun subúdi jagúnfulin. ³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madúgünga jameí le labúseerubei.

⁴ Lugúndun Crístu lébejabei lagúnfuliruniwa lilúrudun Moisés, áni adúgati lun sun lan ja afíñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, laríñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.” ⁶ Luáguti lerésibiruniña Búngiu gürígia queísi richáguatiña ligíbugiñe luágu jafíñen, laríñajare. “Maríñagabá tídan banígi. ¿Cába amúdeira siélun?” —queísigubeirügü barárigüdúñein lan Crístu le Wasálbaragüle siélugiñe. ⁷ Maríñagabá giñe. “¿Cába arárira le ñíjin jabei jiláaña?”

—queísigubeirügü bamúdeiragüdúñein lan Crístu jádaangiñe jiláaña ítara. Úati ni cáta lun wadúgüni lueídügüya lun wafíñerun luágu. ⁸ Cáteiti laríñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein gíñe ugánu ligía tídan banígi.” Ugánu le, elun?”

—queísigubeirügü barárigüdúñein lan Crístu le ligía ugánu le lánina afíñeni luágu Crístu le Wasálbaragüle, le wapúrichijabei. ⁹ Ánjabu aríñaga láu biyúma luágu Jesúsú lan Babúremebei, afíñe amúrü tídan banígi luágu sarágüda láani Búngiu lídaangiñe oúweni, basálbaruba. ¹⁰ Láu bafíñerun luágu Jesucrístu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

¹¹ Taríñajare Lerérun Búngiu. “Úati ni ában gürígia le afíñeruti luágu Jesucrístu lun laságüríjan luágu larígiñe.” ¹² Ában jáu juríu jáma ja mámabaña juríu, Wabúreme Jesucrístu, ligía Jabúremebei sún-gubei, áni fuleísei lumútiña sun ja agúarubaña lun lun líderaguniña. ¹³ Ítara líña quei laríñawagún tídan Lerérun Búngiu. “Sun ja aguáruti líri Wabúreme, jasálbaruba.”

¹⁴ ¿Ída lubáti gayára lan jagúaruni lun lasálbaruniña ánjein mafíñerungiña lubei luágu? ¿Ída lúba giñéti gayára lan jafíñerun luágu, ánjein magáambungiña lubei luágu? ¿Ída lubáti gayára lan jagáambun luágu, ánjein uá jabei apúrichijati ugánu luáguti asálbaruni joun? ¹⁵ ¿Ída lubáti gíñe gayára lan japúrichijan gürígia joun ánjein uá cába lan oúnajaña apúrichija? Queísi laríñawagún tídan Lerérun Búngiu. “¡Ma lubúidun jachúlürün ja anúgübalin ugánu luáguti aráandaruni lúma Búngiu, apúrichija jameí ugánu buíti luáguti asálbaruni!”

¹⁶ Másutiña gürígia ja agáamba jamáalibei ugánu luáguti asálbaruni ebéresera láu. Queísi laríñaguni Isaías tídan lilíburun. “Wabúreme, míbetiña afíñerutiña luágu ugánu luáguti asálbaruni le wapúrichijabei.” ¹⁷ Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

¹⁸ Ába naríñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Taríñajare Lerérun Búngiu.

Agaambúali jamálali lídan sun fulásu, chúlújali jerérun lídoun lagúmujóun larígei uboú.

¹⁹ Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés.

Naméendidagüdúbadün jadúga ában rása ja máma náni, nagáñidagüdúbadün jadúga ában rása ja ibídiñegidina joun.

²⁰ Aríñagati gíñe Búngiu liyúmulugugiñe Isafas.

Darí jamutina ja máluajaanbalina, arúfudaguatina núngua joun ja málügdajánbaña nuágu.

²¹ Ábaya laríñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

Israelítagu ja sálbabaña

11 Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. ² Barú lumútiña Búngiu Israel-ítagu queísi lánigu lumagiñé meja binárü, guetó, mamájaanti joun. ¿Magáambun jumúti le taríñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga.

³ “Nabúreme, áfaragua jamá profétagu jilágubei, güríngua jameí buri báni latárü, áu rügáli erédera jádaangiñe bánigu, áni buséntiña gíñe jáfarunina jilágubei.” ⁴ Ába laríñagun Búngiu lun. “Anuádajaadina sédü mílu wügúriña nubárua ja májuduragúngiñabaña ligíbugiñe liyáwa búngiu le Baal.” ⁵ Ítara méme gíñe lídoun buri wéyu le, reídeijaña átiri jádaangiñe juríu ja anúadaja láañabaña Búngiu láu lareíni. ⁶ Ánjeinti láu lubeí lareíni Búngiu lanúadiraña, mámaali láu cátei le liyáraati gürígia guánarügü adúga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei afíñeni luágu Búngiu, ába lígiruniña Búngiu táu tidere janígi. ⁸ Queísi taríñagun Lerérun Búngiu. “Adúga lumútiña Búngiu lun deré lan jachúgü lun cátei lánina Búngiu, rúti águu le maríjinti joun, arigeirugu le magáambuti. Ítara liñáti chülú lumoun dan le.” ⁹ Aríñagati Davíd.

Garábagua lámuga jefédujan lun sádaramé, lun jáburujan tídoun, lun jasúfurirun.

¹⁰ Darú lámuga jágu, maríjin jamámuga, sebúgua lámuga gíñe janágan lábugiñe janúgün lun sun dan.

Jasálbarun ja mámabaña juríu

¹¹ Nálügúdajaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámabaña juríu lun jabíjubei

lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadúgübei juríu buítme lun ubou, áni ánjein buíti lubeí lanúgübei jeféridirun joun ja mámabaña juríu, ¡sarágume buídutimaabei lan dánme le jasálbarun sun juríu!

¹³ Níjein gíñe ában cátei lun naríñaguni jun, jugúya le mámabei juríu. Quei loúnajañadina lan Búngiu apúrichija luágu Crístu joun ja mámabaña juríu, weíriri nubéresen láu nuwádigimari, ¹⁴ lun gayára lan jabúseerun nirásan jáyeijanün, lun gíñe jasálbarun.

¹⁵ Ánjein ladúga lubeí lamájarun Búngiu joun juríu, jayábin ja mámabaña juríu lun jaráandarun lúma Búngiu, ¿datimá lubáti dánme le jerésibirúniwa? Ítara lúba joun queísi ásaaruni lídaangiñe ouweni. ¹⁶ Ánjein derégewa tubeí furúmiñetu fein to adúgütu tídaangiñe fulúwaaru añóundawagutu lun Búngiu, derégewatu gíñe sun fulúwaaru ñóunwaguatu to ídaangiñeboun tiábin fein tugúya. Ánjein gíñe derégewa lubeí tílagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olívo tímatimaati, chaúnwatiña, gidáwatiña jagánaguagiñe lumútuniña Búngiu ladúga mafíñeni le jádaanbei. Jugúya jawéñegubei, jugúya le mámabei juríu, ja ítarabaña quei tilímun olívo to áraabuna. Ítara líña jábin lun gabára jumá lídan tílagüle lúma lídan tibá-gari olívo, resíbi jugúyame labínirun Búngiu, queísi lumútuniña. ¹⁸ Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágüdjabalín ílagülaü, luágu ílagülaü lan ágüdjabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jinárün luágu gidáwa jamá jagánaguagiñe lumútuniña Búngiu, jagídarúnbei lugúndun mafíñen jamá luágu Wasálbaragüle, jugúya, gabára jubeí ladúga jafíñen luágu. Manáangua jumá lubeíti júngua, duárirügü jumá.

²¹ Lugúndun ánjein úa lubeí ferúduna lánina Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámabei juríu, ánjaün ñúbin lun mafíñen jumá. ²² Aríja jumeí lubeíti luweírín lareídun Búngiu, derégüdati gíñe. Derégüdati joun ja mafíñebaña, areídati joun ja afíñebaña. Lúnti jasígirun lídan lareíni láu sun jafíñen luágu, ánjein madúgün jumá ítara, jagídarúba gíñe. ²³ Ánjaña ñúbin juríu lun jafíñerun luágu Crístu, jíchugúayaba lídoun jabára jagánagua lumútuniña Búngiu, lugúndun gabáfuti Búngiu lúnya líchuguniña járigouún. ²⁴ Jugúya le mámabei juríu, chaúnwatün tueígiñe ában olívo to áraabuna, ába jíchugún tuágun olívo to buítu, gúbume ladúgüwa joun juríu ja tilímunbaña olívo buítu ja tímatimaatiña, jíchugúayaba járigouún tuágun olívo to ñígiñe lubeí jagídarúa, naríñaguña luágu lachúlürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujuún

²⁵ Nidújeñu, buséntina lun jasúbudiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügüdagun júngua luágu buri cátei le. Luágu deréraügüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe, ábame lagídarun wuríbani jádaangiñe juríu.

²⁷ Nijánba nidáradun jáma, dánme le nagídaruni jafígoun.

²⁸ Luágu ugánu le luáguti asálbaruni, barúwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagúbürigu juríu. ²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰ Jugúya, magáambaditún meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnügü gudémejabu lan Búngiu joun queísi gudémejabu lan jun. ³² Ígira lumútiña Búngiu sún-gubei lun magáambun jamáni, lun gayáraabei lan gudémejabu lan joun.

³³ ¡Luweírín lareídun Búngiu, lúma lichú láu! Siñáti wasúbudiruni larítagun, siñá gunfaráanda wamáni lémeri. ³⁴ ¿Cági gunfaráandabalin larítagun Búngiu? ¿Cági arúfudajabei lun? ³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía gíñe ágüdagabalin sun cátei, áni lúngua gíñe ladúgei. ¡Uweíríguni lun Búngiu lun sun dan! Ítaralá.

Ibágari le derégewati lun Búngiu

12 Amúriajatina lubeíti júma, nidújeñu, lun jederegeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadúgüni lugúndun weírini woun. ² Jebé jabágaridun queísi lirájüñü ubou le, lubáragiñe líra, sáansi jumeí ligáburu jisáminan, sáansi lámuga gíñe ligáburu jabágaridun. Ítara lúba jíabin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luóguua weíri sügü láu le ligíabei. Lubáragiñe líra, cáda ában lúnti lasúbudiragun lúngua, según afíñeni le rúlaalíbei Búngiu lun. ⁴ Lugúndun ítara quei gíbe lán buri umégeguni luágu ában-rügü úgubu, áni máma ában méme lifísiute sun umégeguni ligía, ⁵ ítara wáña gíñe, wagía afíñetiña, láu

sun gíbe wamá, ában rügüñadiwa úgubu lídan ában lúma Crístu, áni íderaguatiwa woungua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadúgüni según afíñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dügüdaguaü joun ámu, lúnti líchaagun lúngua lun ladúgüni. Le edéweejati, lúnti magúraban lan láguyun lun, le ábutibei, lúnti lagúmadíjan láu sarágu duári, le íderaguti gudémetiña, lúnti ladúgüni láu ugúndani.

Ligáburu jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ín-siñeni le inárüniti. Iyéeregulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jíñúragüdüni jíri jidújeñu.

¹¹ Mamáguualigu jumá lídan luwádigimari Wabúreme, seríwi jumeí táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáña afíñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja ouserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juóguua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadúgüni le buídubei jagíbugiñe sún-gubei. ¹⁸ Adúga jumeí sun le juáraati lun jabágaridun lídan dan jáma sún-gubei. ¹⁹ Nidújeñu jínsiñetiña nun, máguyugüda jumeí wuríbani, ígira jumeí lun Búngiu lan afáyeigüda luágu. Taríñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.” ²⁰ Aríñagati gíñe Búngiu. “Ánjein lámá lubeí bágani, rúba eíginini lun, ánjein mágürabu lubeí, rúba dúna lun, lugúndun láu badúgüni líra, lebéloruba busíganu lun luágu luríban louserunibu.” ²¹ Mígiraguagüdadá búngua lun lagáñeirunibu wuríbani lun báguyugüdüni wuríbani luágu wuríbani, lubáragiñe líra, gáñibeí wuríbani láu buídu le badúgübei.

13 Lúnti jíchaagun sún-gubei júngua lábun jalúrudun gumádimatiña, lugúndun ítara líña laráansejan Búngiu lun níbei lan lúrodu, áni gumádimatiña ja lídaanbaña jabára, labúseerun Búngiu añájein lubeí ñi.

² Gürígia lubeíti le awúgüríjoúti lun gumádi, múaraanti láu le laríñagubei Búngiu, áni ja awúgüríjoútiña ítara, gadúnruntiña luágu líra áni jafáyeiruba luágu. ³ Mاما lúnñanu jíchugun gumádimatiña anúfudei joun ja adúgübalin le buídubei, aná joun ja adúgübalin le wuríbabei. ¿Buséntibu babágaridun manúfudeiga lueí lúrudu? Buídulá bouserun, ábame buídu ban lurúma lúrudu, ⁴ lugúndun lesériwiduña lun Búngiu luágu bufúleisein. Ánjein wuríba bouserun, lúnti janúfude ban, ladúga máma luágu ni cáta gabáfu lan lúrudu lun lafáyeijagüdüñ luágu dúru, quei lesériwiduña lubeí lun Búngiu lun lafáyeijagüdüñ luágu dúru. ⁵ Ligía lúnti lubeí úaragua wamá lúma lilúrudun wageíra, má-marúgü lun máburujan lan asúfuriruni wawágun, lúnti ítara lan lun jarúmañu lan warítangun. ⁶ Ligía gíñe lébubei jafáyeijan seínsu lun gumádi, lugúndun jesériwiduña lúrudu lun Búngiu áni lun cáteí le jeténira.

⁷ Ru jumeíme le jáni cáda gürígia joun. Fáyei jumeí le lagúburajabei gumádi luágu jufúlasun, lúma buri ámu cáteí líbe líra, fáyei jumeí le lúnti jafáyeiruni luágu cáteí le ñúbinbei jun bougudigiñe lueí jageíra. Gagáambadi jumá joun gumádimatiña, ru jugúyame inébesi joun queísi lubúdubu. ⁸ Máni jumá dúweiti ni ca úma, lueídügüya lidúweitina ínshiñeni le jadúweirubei jú-magua. Le jínsiñejabuti lun gürígia líledi, adúga láali sun le lubeíbei lilúrudun Búngiu láu ladúgüni líra. ⁹ Taríñajare Lerérun Búngiu. “Magámaridabá gürígia maríetiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queísi bín-siñegua búngua.” ¹⁰ Le jínsiñejabúbei, madúgünti wuríbati lun ni ában, ánjawa lubeíti jínsiñejabu, gúnfuli wamáali sun lilúrudun Búngiu queísi lubúdubu.

¹¹ Lúnti ítara lan ligáburu wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfati-maajali óra lun lagíribudun Wasálbaragüle ubouágun sügú láu dán meja le wafíñerunbei luágu ugánu luáguti asálbaruni. ¹² Belújali áriebu buídu, yarafaali larúgadun, ligía lúnti lubeí wígiruni wadúgüni cáteí wuríbati le adúgübei lábugiñe lubúriga, lun wadáürun-wadúüragun queísi súdaara ja lábugiñetiña larú-gounga. ¹³ Eíbuga wamá queísi lubúdubu ítara queísi gürígia ja buídubaña, úouga ni cáta luágu jagáburu lun jarámudagun lueí jaríjin gürígia. Mabágarida wamá lídan bacháruaü, lúma buri lanárime fédu, ni lídan salú-furi lúma iwíyeni, ni lídan gáganiguaü lúma gimúgaü. ¹⁴ Lubáragiñe líra, rújumei Crístu guánarügü jubáragiñe lídan sun cáteí, masáminara jumá lun jíchugun ugúndani lun lagúburi ayúmajani.

Madímurejabá luágu bidúje lueígiñe Jesucrístu

14 Ánjein débili lubeí ában gürígia lídan lafíñen, resíbi jumeí, maríñagunga ni cáta lun luágu cáteí le machouúrunbei luágu. ² Queí buri, añájein derégüdati jafíñen, jarítaguatiña luágu gayára lan jeí-

gin afíñetiña furúmiegurügü cáteí áni jeréderuba jarúmañu ligíbugiñe Búngiu. Añájein jíbiri, débilitiña lídan jafíñen, meígintiña úwi. ³ Le eígiti furúmiegurügü cáteí, moún lumuti únabu lan lanúgüni le meíginbalin, le gíñe májabei leígin furúmiegurügü cáteí, moún lumuti gíñe ladímurejan luágu le eíginbalin, lugúndun resíbi láali Búngiu gürígia ligía queísi lánigu.

⁴ ¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüni buídu.

⁵ Nijánya ában jémpulu. Añájein gürígia weíriri janúgüni ában wéyu lueí ámu wéyu, añájein jíbiri, afíñetiña luágu ában lan lábu sun wéyu. Cáda ában lúnti lachouúruruni le uágubei larítagua. ⁶ Le areídubei som wéyu, ladúgüñein lun líchugun inébesi lun Búngiu. Le eígibe furúmiegurügü cáteí, leígin lun líchugun inébesi lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladúga liloúguan lafíñen, lun líchugun inébesi lun Búngiu ladúgei, rúti gíñe eteíngiruni lun Búngiu luágu cáteí le gayáraabei leígin según lafíñen.

⁷ Naríñagubalin líra lugúndun úa lan ni ában wá-daangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadúgüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágaru queísi lídan ouweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banúgei quei ni cáta? Búngiu rügüñein lun lagúseragüdüñ, áni sun wagía, waráramuba ligíbugiñe lun wagúserun, ¹¹ queísi taríñagun Lerérun Búngiu.

Inárünti ítara quei gabágaru nan, líña laríñagun Búngiu, luágu jájuduraguba lan sun gürígia nigíbugiñe,

áni jasúbudirubadina súngebei ligíbugiñe guríriguaü. ¹² Cáda lubeíti ában wádaangiñe, lagúseruba luouúgua lúma Búngiu.

Machúgeraguagüdübei bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítangun lun madúgün jumá ni cáta le gayáraati lachúgeraguagüdüni jíbiri, o láburugüdüni lan lídoun figoú.

¹⁴ Subúdi numúti luágu úa lan ni cáta le leígibe gürígia lun lawíyeduni ligíbugiñe Búngiu, áni chouúru numúti líra, áu queísi afíñeti luágu Jesucrístu. Láu sun líra, ánjein jarítagua lubeí ában gürígia luágu marúman lan ában cáteí, marúmaanti lun, áni figoú lun lun leígini.

¹⁵ Ánjeinti bañáwurija lafíñen bidúje láu cáteí le beígibe, mámaali bagáburiduña láu ínshiñejabuni. Madúgabá lun leféridirun ában gürígia le ueígiñebei louwe Crístu, ladúgarügü beígin ítaga cáteí. ¹⁶ Míchiga jumá lubeíti lúgaaru lun ladímurejoún wuríba luágu

cátei le gayáraabei jadúgüni queísi affíñetiña luágu Crístu. ¹⁷ Larúeijan Búngiu máma cátei luáguti le eigíbei o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti gíñe jarúma gürígia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderagun wá-magua lun wawáanserun lídan cátei le lánina Búngiu. ²⁰ Magúrinchaguabeí luwádigimari Búngiu lídan libá-gari ában gürígia láu cátei le beígibei. Inárüni luágu jarúma lan sun eíginí ligíbugiñe Búngiu, le wuríbabei, lun leigin cátei le áburugüdütiña ámu gürígia lídoun figoú. ²¹ Buíti lun meigin ban úwi, matún bínu, madúgún ni cáta le achúgeraguagüdüti bidúje, o lábu-rugüdüni lan lídoun figoú, o ledébiliragüdüni lan lafíñe. ²² Afíñeni le buágubei, lúnti buágu guánarügü lan ligíbugiñe Búngiu. ¡Gúndaati gürígia le gayáraabei lariñagun luágu buídu lan cátei le ladúgübei, masándi-raguna ligía lúngua láu dúru! ²³ Ánjeinti le eígbiei ában cátei láu machóuruni luágu buídu lan leigini queísi affíñeti luágu Crístu, gadúnrunti ladúga leigíni, lugúndun meigin lumúti láu affíñeni. Sun le wadúgübei, ánjawa arítagua luágu fágua lan moun láani wadúgüni, figoú woun.

Gúndaagüdába gürígia bíledi, máma amúrü guánarügü

15 Wagía le jerebei lídan wafíñen, lúnti gagúraa-sun wamá jabá ja louguagiñabaña affíñe, lúnti warítangun luágu le buídubei joun, mámarügü luágu wíchugun ugúndani wouniwagua. ² Cáda ában wá-daangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni lafíñen. ³ Ni Crístu, míchugunti ugúndani lúniwagua, lubáragiñe líra, suséreti le abúrújoúbei tídan Lerérun Búngiu lun. “Núguchi, ábu-rujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binárü, lun larúfudajoún woun labúrújoúa, bürúwatí meja dimúrei buri ligía lun wanúgün gurásu lúma dúgüdaguaü lídaangiñe, gayára lámuga weménigiduntima luágu Búngiu. ⁵ Búngiu le íchugubei gurásu lúma dúgüdaguaü, íderagualaún lun jabá-garidun lídan dan jáma jíbiri, queísi ladúgüni Jesu-crístu. ⁶ Ítara lúba, sun lan wagía lídan ában, láu ában-rügü umálali, wíchuguba uweíriguni lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

⁷ Resíbigua jumá lubeíti júniwagua quei gíñe lerésibiruníwa Crístu, lun liñurúniwa líri Búngiu. ⁸ Le naríñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugübei joun binádu wagúbüri, lun larúfudún luágu gúnfuli láani Búngiu lerérun. ⁹ Liábinbei gíñe lun jíchuguba lan

ja mámabaña juríu uweíriguni lun Búngiu luágu lareí-dun, quei taríñaguni Lerérun Búngiu.

Ligía níchuguba lubeí uweíriguni bun jagánaguagiñe ja mámabaña juríu, nerémujaba gíñe luágu buweírigun.

¹⁰ Taríñajare gíñe Lerérun Búngiu.

Gúnda jumá, jugúya le mámabei juríu, úara jáma ja lánigubaña Búngiu.

¹¹ Taríñajare gíñe.

Rújuma sun ja mámabaña juríu inébesi lun Búngiu, adímureja jamá sun gürígia luágu luweírigun.

¹² Laríñajare gíñe Isaías tídan Lerérun Búngiu.

Liábiba ában ladúgawagun Isaí, le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngü-dalaún láu ugúndani lúma darángilaü lídan jaffíñerun luágu, lun buíñu jumá láu eménigini, láu lubáfu Sífiri Sándu.

¹⁴ Nadújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crís-tu, luágu gíñe gíchigadi jumá dimúrei buíti joun jíbiri. ¹⁵ Tídan gárada to, abúrújaadina jun láu sun furáangu luágu buri cátei le lun mabúlieidun jumáni. Nadúgüñein luágu wadágimanu le rúlaalíbei Búngiu nun láu lareíni, ¹⁶ lun nesériwidun lun Jesucrístu jagá-nagua ja mámabaña juríu. Seríwi le nadúgübei, napúrichijani ugánu lúmagiñeti Búngiu luágu Wasál-baragüle lun nanúgübaña lan ja mámabaña juríu lun Búngiu, lun lerésibiruniña queísi gürígia ja jarúmaaru janígi láu luwádigimaridun Sífiri Sándu jádan.

¹⁷ Ítara líña lubeíti, áu queísi ában affíñeti luágu Jesu-crístu, gébunati gúnda nan lídan nesériwidun lun Búngiu, ¹⁸ luágu rügüñein buri cátei le ladúgübei Crís-tu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírin buri seíni lúma buri miláguru le nadúgübei láu lubáfu Sífiri Sándu nídan, lun lanúgüniña ja mámabaña juríu lú-moun. Láu igáburi le, jóustagüda náali lapúrichijoún ugánu luáguti asálbaruni lídaangiñe Crístu, lúmagiñe Jerusaléngiñe darí loúbawagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ní lumuti magaambúngili lan líri Crís-tu. Mabúseeruntina nuwádigimaridun lun Crístu lídan fulásu le ní lumuti chülújali lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladúga nesériwiduña lan lun Crístu lídan ámu fulá-su, siñágili lubeí nídin bisídaün, láu sun gíbeeli lan weíyaasu nabúseerun nadúgüni. ²³ Guetóti, quei gumúnaali lan nuwádigimari lueígiñe oúbaü le, áni quei lúmagiñe lan binárü nabúseera nídin aríjaün,

²⁴ agúrabatina násügürün bisídaün dánme le nídin Espáña. Lárigiñeme aríja náadün lan lun wagúndaara-gun wámagua murúsuraü, agúrabatina lun jíder-agubadina lan luágu nuweíyasun yágütoun. ²⁵ Ánjein guetó, neíbuga Jerusalén, barúina cátei joun wadújeñu lueígiñe Jesucristu ñi. ²⁶ Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóunajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadúgüni cátei le, áni richátiña, lugúndun dúwei jamúti joun le tímatimaati, lugúndun itara quei jafánreinraguni afíñetiña ja juríu jarísin le lánina siélu jáma ja mámabaña juríu, lúnti giñéti jíderaguniña afíñetiña ja mámabaña juríu afíñetiña ja juríu luágu jemégeirun ya ubouágu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naúnme dánme le násügürün. ²⁹ Chóuru numúti luágu dan lánme nachúlürün júmoun, nachúlürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucristu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúri-aja jumá lúma Búngiu lun leséfurunina jaweí maffíñetiña ja Judéabaña, lun gíñe buídu lan lerésibirúniwa íderawaguni le nanúgübei joun wadújeñu ja Jerusalénbaña, ³² lun gúndaabadina lan dánme le nachúlürün júmoun eméragua murúsun, ánjein ligía lubeí lugúndaabei Búngiu. ³³ Júmalá Búngiu le íchugubei darángilaü. Ítaralá.

Mábugaü lun cáda ában

16 Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligílisi to Cencreáboun, jun. ² Dánme le tachúlürün júmoun, resíbi jumóun buídu lídan líri Wabúreme, queísi lúnti lan ladúgún jádan idújeñu lídan afíñeni. Íderagua jumóunme lídan furúmieguarügü cátei le temégeirun, lugúndun tugúya, sarágujaña tíderagun, íderagua táadina gíñe. ³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucristu. ⁴ Jagía, rújamuti jabágaru guánarügü lídoun lénreengúnga lun jasá-baruni nibágaru, teínqui níña lubeíti joun, áni má-marügü áu, sun gíñe wadújeñu ja tílana jalígilisin ja mámabaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmiñebei afíñeruti luágu Crístu ubúrugu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómana. ⁷ Mábuga níña joun nupaísanu Andrónico lúma Junías já meja níbirigubaña furísunrugu, buíti jadímurejan lání Crístu apóstolugu jawágu, jagía gíñe afíñerubaña luágu Crístu nubáragiñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba

lídan wawádigimari luágu Jesucristu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda lálalibeí lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupaísanu Herodión lúma joun tílana lúban Narciso ja afíñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügúri le buídubei igáburi le tímatimaati ligíbugiñe Crístu, mábuga níña gíñe tun lúguchu, to gíñe ítarajaruboun quei ában úguchuru nun.

¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña.

¹⁵ Mábuga níña gíñe lun Filólogo lúma tun Júlia, lun Neréo lúma tun Lítu, lun Olímpas lúma joun sun wadújeñu lueígiñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana líligilisin Crístu jun.

¹⁷ Nidújeñu, ayúmuraguatina jun lun jaríjiniña cátaña lan ja afánreinraguagüdübaña gürígia, ru jagía achúgeraguágülei lun jafíñen. Múaraanti le jadúgübei lúma le arúfudajoubei jun. Díse jumá jaweí gürígia jagía, ¹⁸ lugúndun gürígia jagía, mesériwiduntiña lun Wabúreme Jesucristu, jóungua guánarügü jesériwida. Jeyédañati gürígia ja únabugutiña láu buri líñúlu lúma lubuídun lagaambún jerérun. ¹⁹ Subúdi jamúti sun gürígia luágu ñúdun jumá láu le lubeíbei Búngiu, ligía gúnda nubeí, buséntina gíñe lun furése jumá lun jadúgüni le buídubei, máma lun le wuríbabei.

²⁰ Búngiu le íchugubalin darángilaü, lagáñeiragüdübadün luágu Máfia, furése. Binílaün Wabúreme Jesucristu.

²¹ Mábuga líña Timotéo jun, le noúba lídan wadági-manu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abúrújabarun gárada to, mábuga níña gíñe jun, nidújeñu lueígiñe Wabúreme.)

²³ Mábuga líña Gáyo jun. Naganoúña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdjabalin liseínsun fulásu, lúma gíñe wadúje Cuarúto.

²⁴ Binílaün Wabúreme Jesucristu sun jugúya. Ítaralá.

Rúwama uweíriguni lun Búngiu

²⁵ Guetóti, rúwama inébesi lun Búngiu, le gayáraabei ladúgünün lúntima derégüdagü jumá lídan jafíñen, según ugánu luáguti asálbaruni le napúrichijabei, lúma arúfudajani luágu Jesucristu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun ubou, láu sun abúrúja jamá meja profétagu luágu. ²⁶ Guetó, láu lugúmadin Búngiu le wíwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafíñerun luágu, gagáambadi jagíame lun Búngiu.

²⁷Uweíriguni lun Búngiu le ligíarügüti, ábanrügüti, le ligíarügüti chu áu, uweíriguni lun, lídaangiñe Jesu-crístu, lun sun dan! Ítaralá.

1 CORINTIOS

Labúrÿjan Páblo joun tílana liglisi Corínto

1 Áu Páblo, wálaadina Búngiu láu lugúndan lun ábanbadina la láni Jesucrístu apóstolu, le méme gíribei ában le loúnajan. Nabürÿjañoun gárada to, úara lúma wadúje Sóstenes, jun, ² jugúya le wadújeñu lueigiñe Jesucrístu ja tílanabaña lilígilisin Búngiu to ubúruguboun Corínto, ja lánigubaña Búngiu ladúga lí-daañadün lan ában lúma Jesucrístu. Wájali Búngiu jun lun jedéregeragun júngua lun le gumúti, queísi wájali lan joun sun ja agúarubalin líri Wabúreme Jesucrístu lí-dan sun fulásu lun jedéregeragun joúngua lun. Jesucrístu Jabúremebei, ligía gíñe Wabúremebei. ³ Resíbi jumeí abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Abíniruni le wánibei lídaangiñe Jesucrístu

⁴ Súnwandan neteíngiruni Búngiu juágu, luágu abíniruni le rúlaalíbei jun láu lareíni, lídaangiñe Jesucrístu. ⁵ Ladúga lídaañadün lan ában lúma Crístu, rújali Búngiu sun luwúyeri irísini le lánina siélu jun, rújali ában oúnwibun subúdi jun luóguua, lun gayáraabei lan jadímurejan luágu láu ában lichú áu. ⁶ Ítara líña geféen jumá luágu inárüni lan le waríñagubei jun luágu Crístu. ⁷ Láu igáburi le, úati ni cáta jemégeirun lídaangiñe le líchugubei Crístu, sun anjúnja lan agúrabajei wéyu le lúnbei lagíribudun Wabúreme Jesucrístu uboúagun. ⁸ Lágüdjabadün Búngiu derégüdagü lídan jafíñen darí lúmoun lagúmujoún, lun úa lan ni ában íchuguti jidúnrun luágu ni cáta dán-me le liábin Wabúreme Jesucrístu. ⁹ Súnwandan lagúnfuliruni Búngiu lerérun, áni ligía agúarubei jun lun lí-dan jumá ában lúma Jesucrístu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucrístu, lun júaradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Naríñagunbalin le, nidújeñu, lugúndan aríñagaña ja jádaangiñebaña lufámilian Cloé luágu níjein lán nege múarani jagánagua. ¹² Ámuñegueinarügü lán nege cátei laríñagun cáda ában jídaangiñe, añájein nege jídaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pédro áu”, jaríñaga jíbiri. “Áu, lánigu Crístu áu”. ¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein?

¿Ódi lídan níri jabástera? ¹⁴ Teínqui níña lun Búngiu luágu mabásteragüdün nan ni ában jídaangiñe lueídügüya Críspo lúma Gáyo, ¹⁵ ítara, úati ni ában lun laríñagun luágu lídan lan níri labástera lun nánigu lan. ¹⁶ Narítaguñein guetó luágu badíseigüda náani gíñe Estéfnas jáu sun tílana lúban, maríttaguntina ánjein badíseigüda nubeí ámu. ¹⁷ Moúnajan lumútina Crístu abásteragüdaja, loúnajañadina apúrichijei ugánu luáguti lasálbaruniña gürígia, máma láu apúrichijani le weíríguburiti, lueí lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

¹⁸ Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia. ¹⁹ Bürúwati tídan Lerérun Búngiu.

Nagúrinchagubei lichú áu le lánina uboú le, nadúgübei jafúrendeí furéndeitiña lun ni cáta me ánjein máma lubeí númagiñe liábin.

²⁰ ¿Cáti un ju lan le chúbei áu, o le arúfudajabei, o le lan gasígenejadibalín buri cáte le lánina uboú le? Úati ju lan lun ni cáta, adúga láali Búngiu lichú láu uboú le lun libídiounigame áu. ²¹ Láu lichú láu, adúgati lun masúbudirun jamáni ja lánigubaña uboú láu lichú áu le jawágubei. Láu gíñe lichú láu, ába laráansejan lun lasálbaruniña ja afíñebaña luágu lárigiñe jagáambuni ugánu luágu loúnwen Crístu jawágu, láu sun barú jamaani jíbiri gürígia ugánu le quei libídiouniga áu.

²² Buséntiña juríu jaríjin miláguru lun jafíñerun luágu Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni.

²³ Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragúlei le ouwebei láu ában luwúyeri ouweni le busíganudünati líbe líra, játi mámabaña juríu, janúgüni quei libídiouniga áu. ²⁴ Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lí-dan loúnwen Crístu, lúma lichú láu lun lasálbaruniwa ítara. ²⁵ Joun lirájüñü uboú, libídiouniga áu laráansejan Búngiu, wel, weíriti lichú láu Búngiu sügú láu le chúti-maabei áu uboúagu. ²⁶ Nidújeñu, lúnti jasúbudiruni luágu wájali lan Búngiu jun, láu sun míbe jamá jídaangiñe chúti jáu según uboú, áni míbetiña gíñe jí-

daangiñe weírigutiña, o jádaangiñetiña lan familia íñugutiña. ²⁷ Anúadaja láaña Búngiu ja ibídiouguabaña áu según ubou lun líchugun busíganu joun ja chúbana áu, láu jaríjini luágu ni cáta lan lichú jáu ligíbugiñe Búngiu. Anúadaja láaña gíñe ja lanúgübaña ubou quei mabáfutiña lun líchugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu. ²⁸ Anúadaja láaña Búngiu ja maweírigunbaña ubouágu, ja áubaña mebéresenwa lan, ja ni cátabaña, lun larúfuduni luágu ni cáta lan ja anángübaña jóungua ubouágu. ²⁹ Úati lubeiti ni ában gayáraati lanáangun lúngua ligíbugiñe Búngiu. ³⁰ Rúláadün Búngiu guánarügü jugúya afíñetiña lídoun ában lúma Jesucristu. Ladúga cátei líra, ibíjatiwa lichú áu lúmagiñe Búngiu, gayáraati lerésibiruniwa Búngiu queísi richáguatiña, derégeguañu woúngua lun, sálbañu. ³¹ Ítara líña lubeiti adúga wameí quei taríñagun Lerérun Búngiu. “Le busénti ladímurejan luágu uweírugini, adímurejalá luágu luweírin cátei le adúga lálalibeí Wabúreme Cristu woun.”

Ugánu luáguti Cristu le ádarawagúbei luágu gurúwa

2 Nidújeñu, dán meja le nídinbei lun nadímurejan jun luágu linárün Búngiu, adúga numúti mayúsungua dimúrei buri íñuguti. ² Dan lé meja júma nubeí, máluguntina meja napúrichijan luágu ámu cátei lueídügüya luágu Jesucristu le ádarawagúbei luágu gurúwa. ³ Ába narúfudagun nungua jun queísi ában wügúri gudémeguti, adádagareina láu anúfudei lueí jamúga níjein lan mégeiti lídan nuwádigimari luágu Wabúreme. ⁴ Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügúriña chu táu. Lubáragiñe líra, láurügü lubáfu láni Búngiu Espíritu nadímureja jun, ába jasúbudiruni luágu inárüni lan le naríñagubei jun. ⁵ Ítara líña jafíñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe láni Espíritu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafíñen. Ánjeinti lichú áu ligía, máma lánina ubou le, máma gíñe jáni ja agúmadijabaña ya ubouágu, ja madíseelibeí ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladúgüni ubou lun lasálbaruniwa lun sun dan, gafánran wámuga lídan sun luweírigun Cristu. Ligía rügüñein meja asúbudirei aráansejani ligía, guetó, subúdigüda lálali woun. ⁸ Játi gumádimatiña lánina ubou le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Cristu luágu gurúwa. ⁹ Ítara líña queísi taríñaguni Lerérun Búngiu.

Maríjifaja jamágili gürígia cátei buíti lé buri laráansejabei Búngiu joun ja jínsiñejabúbaña lun,

magáambuñajagiña gürígia luágu cátei buíti líbeina líra,

marítaguntiña ída lúba lan.

¹⁰ Ába lasúbudiragüdüni láni Búngiu Espíritu, le méme Sífiri Sándu, luáguti buri sun lubuídun cátei ligía woun, wagía afíñetiña. Aríaaja lumúti Sífiri Sándu sun cátei, áni subúdi lumúti lujúlilin-ágei larítagun Búngiu.

¹¹ ¿Ca jádaangiñe gürígia gayáraabei lasúbudiruni ca lan tídaanbei lanígi ában gürígia, lueídügüya espíritu le lídaanbei gürígia ligía? Ítara líña gíñe, láni rügüñein Búngiu Espíritu asúbudirei sun cátei le lánina Búngiu.

¹² Wagía afíñetiña, máma ában espíritu le lánina ubou werésibirubei, Sífiri Sándu le ñúbinbei lúmagiñe Búngiu, ligía werésibirubei, lun gunfaráanda wamáni le rúlaalibeí Búngiu láu lareíni. ¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnren-deirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja ibíjbalin Sífiri Sándu.

¹⁴ Gürígia le mibíjbalin Sífiri Sándu, májati lun larítagun Búngiu le larúfudajabei láni Búngiu Espíritu jádaangiñe gürígia, lugúndun libídiouniga áu lanúgüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan. ¹⁵ Ánjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubou, siñáti gunfaráanda jamáni cáteinein lan gürígia le eíbugubei lídan larúgounga le líchugubei Sífiri Sándu. ¹⁶ Queísi laríñawagun tídan Lerérun Búngiu. “¿Ca gunfaráanda jamáalibeí lisáminan Búngiu? ¿Ca gayáraabei larúfudajan lun Búngiu?” Láu sun líra, wagía afíñetiña, níjein lisáminan Cristu wádan ladúga ibíja wamáali Sífiri Sándu.

Luwádigimari Páblo lun Búngiu lídan ában jáma jíbiri

3 Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña jóungua lábugiñoun lagúmadijan Sífiri Sándu le gumúti—queísi joun irájüñü—luágu buri cátei le luáguti Cristu. ² Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígin le deréguati, lugúndun siñágili lan lájuluchun eígin le deréguati. Siñá jumuti meja líla lujúlilin-ágei larítagun Búngiu gunfaráanda, áni chúlú lúmoun dan le, siñá meme jumágili, ³ lugúndun gagáburigidün queísi jagáburi lirájüñü ubou. Níjeingua ligía gimúgaü jídan, gáñiguaü, fánreinguaü, máma jígiraguagüdüña júngua lun labúgurunün Sífiri Sándu, áni jadúgüñein le jadúgübei sun mútu.

⁴ Lugúndun láu laríñagun ában. “Lánigu Páblo áu”, laríñagaya ában. “Áu lánigu Apólos”, jadúgüña queísi gürígia ja lánigu ubou le.

⁵ ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñébaña jíabin afíñera luágu Cristu. Wadágimanu le líchugubei Wabúreme

lun cáda ában wádaangiñe, ligía wadúgübei. ⁶ Áu ábunagubalin Lerérun Búngiu queísi nádü tídon janígi, Apólos áturaguei nádü ligía láu larúfudajan méme jun luágu Crístu. Búngiu aweíridagüdübalin nádü, ligía edérebugüdübalin jafíñen. ⁷ Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdübarun nádü. ⁸ Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun. ⁹ Íbirigu wagía lídan wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gíñe queísi ában múna to lábunaguñounboun Búngiu. ¹⁰ Fuleísei láadina Búngiu láu líchugun ubáfu nun lun nuwádigimaridun úara lúma. Niábíti queísi ában wúgüri le subúsijabúbei lun labunún wagábu buídu—áú le íchugubalin ébuu lun jafíñen. Ámuti güriquia ábunagubei ligíbuagu ébuu ligía—jagía maésturugu ja arúfudajabaña luágu Jesucrístu jun, nárigi. Cáda ában, lúnti goúnigi lan ída líña lan lábunagun ligíbuagu ébuu ligía. ¹¹ Rúalaali ébuu lun jafíñen, áni siñáti líchugúniwa ámu ébuu. Ébuu ligía, Jesucrístu guánarügü. ¹² Gayáraati lábunagun güriquia ligíbuagu ébuu ligía laú cátei gebégiti le siñábei lágudúniwa, queísi gólu, pláta, lúma dúbü gebégiti, o gayáraati lábunagun láu cátei le mebégibeí sarágu, le gayáraabei lágudúniwa, quei fuláansu, murísi o mabúru. ¹³ Lachúlürüba wéyu lun louchuni Búngiu jawádigimari sun güriquia ubouágu lun laríjini ída líña lán meja, ánjein gebégi lubeí lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubeí lawándun, ánjein gebégi lubeí. ¹⁴ Ánjein buídu lubeí wawádigimaridun luágu Búngiu áni madúnamati lun lagúnrinchawagúniwa, queísi siñá lan tagúnrinchawagúniwa múna to adügútu láu cátei derébuguti, werésibirubei wafáyeirua ja lúmagiñe Búngiu. ¹⁵ Ánjein mabuídun lubeí wawádigimaridun luágu Búngiu, lagúnrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

¹⁶ ¿Íbídiñetísan jun luágu lílígílisin lan Búngiu jugúya, áni agánawa lan Sífiri Sándu jídan? ¹⁷ Ánjoun lagúnrinchagua ában güriquia lílígílisin Búngiu tugúya, lagúnrinchagubei gíñe Búngiu güriquia ligía, lugúndun Búngiu jabúremebei tílana lílígílisin, áni jugúya guánarügü tílanabei ligíli tugúya.

¹⁸ Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúlieiduni lichú áu ligía, lun lanügúniwa queísi ában ibídiougua táu según ubou, gayára lámuga lerésibiruni lichú áu le tímatimaati le líchugubei Búngiu. ¹⁹ Lugúndun lichú áu le lánina ubou le, ában libídiouniga áu lun Búngiu. Taríñajare Lerérun Búngiu. “Áburugüda lumútiña Búngiu ja chúbaña áu según ubou le tídon lisá-daraana jabíbun guánarügü.” ²⁰ Aríñagatu gíñe. “Subúdi lumúti Wabúreme Búngiu luágu mála lan jasáminan sábiugu.” ²¹ Ligía moún lubei lun janáangun júngua

luágu arúfudajati le jafálarubei, ladúga güriquia rügúñadiwa sun wagía, áni rúalaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúalaali gíñe sun cátei le ubouagubei jun lun jayúsruni. Rulumuti gíñe íbá-gari lúma ouweni jun. Sun le asúseredubei jun ugúñe lúma sun le lúnbei lasúseredun jun, jáni. ²³ Jáni sun cátei ladúga lánigu Crístu jugúya, áni Crístu láni Búngiu.

Jawádigimari apóstolugu

4 Lúnti lubeíti janügúniwa queísirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun. ² Le lubeíti íbjíti ában wadágimanu, lúnti ladúgüni buídu lun larúfuduni luágu gadúna lan lun leménigidun liyúbudiri luágu. ³ Ánjein luágu noubadina, maweírinti nebéreserun luágu ída líña lan janügüni nesériwidun lun Búngiu, ni jugúya ni furúmieguarügü le ubouaguna. Ni áu guánarügü, siñáti naríñagun ánjein buídu lubeí nesériwidun lun, o ánjein níjein lubeí mégeiti luágu, ⁴ láu sun madúnrun nan luágu ni cáta lurúma narítangun, máma lueígiñe líra lun madúnrunbadina lan, Nabúreme agúseragüdübalina. ⁵ Magúseragüda jumá lubeíti luágu buri cátei lubáragiñe dan, agúra jumá lagíribudun Wabúreme Jesucrístu ubouagun lun laságaruni cátei le arámudaguabei lídon larúgounga. Lasúbudiragüdübei Wabúreme tarítangun cáda ában anígi, ca lan ueígiñe wadúgei sun le adúga wamáalibeí. Ábame ladímurejan Búngiu buíti luágu güriquia le buídubei adúga.

⁶ Nidújeñu, adímurejaadina nuoúgua lúma luágu Apólos queísi ában jémpulu jun lun gayáraabei lan jafúnrendeirun lídaangiñe le naríñagubei wawougua. Le lúnbei jafúnrendeiruni, lun manügün jumá ában güriquia weíri lueí le lúnbei lanügúniwa, queísi búrúwañu lan, lun gíñe manáangun lan ni ában lúngua luágu ában arúfudajati le lafálarubei, áni lanúgeime le ában quei ni cáta. ⁷ ¿Cági adúgübalibu buídu jawéi jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubeí íchugubalin sun cátei bun, ¿cáti uágu banáangua búngua camá jamuga íbjárügü bumúti le búmabei láu báni búngua?

⁸ Jaganoún camá jamuga rísijadün lídan cátei lánina Búngiu, íbija jumáali sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buíti jamúga lun urúeigu jumá le tímatimaati lun jamúga gafánran wamá lídan jarúeijan! ⁹ Laganoún nun luágu ígira láadiwa lan Búngiu wagía apóstolugu lídan lagúmujoún ubáraü. Ítara wáña queísi güriquia ja siádi-wañabaña lun ouweni, ñúbinjadiwa lun ábanbadiwa lan aríawasei lun jaríaguniwa sun lílana ubou, dándu ánjeligu queísi güriquia. ¹⁰ Barúwatiwa queísi íbidiougua táu lueígiñe wesériwidun lun Crístu, sun jarítaguñu jumá juougua luágu chu lan jáu lídan cátei lánina Crístu. Según jugúya, wagía débilitiwa, jugúya

jeretün. Barú jamutiwa gürígia quei ni cáta, ánjein jugúya, inébetün joun. ¹¹ Chülú lúmoun wéyu le, áfa-gaadiwa ilámaü, mágürabu, lúma manáanguni, wuríbati jouseruniwa gürígia, mábantiwa, ¹² weíríti wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajoúatiwa, awánda wamúti. ¹³ Adímurejatiña wuríba wawágu, rútiwa dimúrei buíti joun láu gurásu. Chülú lúmoun wéyu le, oúsera jamútiwa camá ifei láni ubouú, quei cátei le mabúseerun jamáali gürígia.

¹⁴ Máma nabürüjañein le jun lun janúgün busíganu, nabürüjañein jun lun narúfudajan jun queísi joun nisáanigu jínsiñetiña nun. ¹⁵ Láu sun jamúga añájein lan dísi-mílu maésturugu arúfudajatiña jun luágu Crístu, áu rügüñein júguchi lídan jaffíñen luágu, ladúga áu lan anúgübalin ugánu jun luágu Wasálbaragüle lun gayáraabei lan jaffíñerun luágu. ¹⁶ Amúriajatina lubeíti júma lun jáyeijani nigáburi.

¹⁷ Ligía noúnajaanbalin Timotéo lun líderagunün luágu cátei le. Jínsiñeti nun sarágu, ítara líña queísi ában niraú lídan Jesucrístu, gayáraati neménigidun luágu. Larítaguagüdübadün luágu ligáburi nabágaridun queísi afíñeti luágu Crístu, lun jáyeijani. Niján luwúyeri igáburi le narúfudajabei tídan sun ligilisi lídan sun fulásu. ¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisídaün ladúga nanúfudei lun nagágibudagun júma.

¹⁹ Bulfeiguatiña, agúrabatina nídin aríjaün madíse, ánjein busén Wabúreme. Ábame naríjini ca lan jayáraabei barúgua túngua ja adúga lun jesériwidun lun Búngiu, mámarügü le jaríñagubei. ²⁰ Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadúgüni lugúndan.

²¹ ¿Cáteiti jímein jubeí. lun nabeíchunün dánme le nachúlürün, ódi lun nídin aríjaün láu ínsiñeni lúma uálini?

Lagúserawagüdüñ ában le adúgübei figoú

5 Agaambúali luágu níjein lan ában jídaangiñe lagámariduñoun lúmari lúguchi. Ában oúnwibun iwíyei líra, le majouábei lun ni jádan ja ibídiñejabubaña lun Búngiu. ² ¿Áni laú sun líra, anáanguagidün júngua! ¿Lúntirügü jamúga jírudagun luágu líra! Gürígia le adúgübalin lanárime iwíyei le, lúnti labugún jídaangiñe. ³ Láu sun úa nan júma le ní jubei, anájein júma narítangunrugu, áni darínaali lidúnrun le adúgübalin figoú le, camá jamuga níñadina júma lun nagúseragüdüni. ⁴ Guetó, le lúnbei jadúgüni, lun joun-daragun lídan líri Wabúreme Jesucrístu, níbadina júma narítangunrugu, níbei gíñe lubáfu Wabúreme Jesúsú júma. ⁵ Lúnti lubeíti jedéregeruni wügúri ligía lun Máfia láu jaságaruni lídaangiñe jidámurin, lun lagúnrin-chawagún lúgubu, sálba támuga luwáni dánme le lagíribudun Wabúreme Jesúsú ubouágun.

⁶ Moún lumuti janáangun júngua luágu le jadúgübei. ¿Magáambun jumágili cátei le. résigüda lumútu murúsun ísi sun fulúwaaru to idounboun líchugüa? Ítara

méme gíñe, murúsun figoú jagánagua gayáraati lagádeirunün súngebui. ⁷ Gidájumei lubeíti sun iwíyei le lánina binádu igáburi le ígirubei jídan, le ítarabei quei ísi le pasáali. Ábame jarúma jumá le tímatimaati. Ítara júba quei fein to eigíboun lídan fédu le páscua, to adúgüboun táu fulúwaaru to sún umuti tañóundawagún, to magánatu ísi. Jarúmaali wadáriragun woúngua ligíbugiñe Búngiu ladúga derége láani Búngiu Crístu lun loúnwen luágu wafígoun queí meja ladágaragüdüniwa mudún lídan fédu le páscua luágu figoú. ⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme in-árüni. Igáburi ligía, ítara líña quei fein to magánatu ísi. Moún lumuti wagáburidun queísi meja wagáburidun furúmiñe, moún lumuti woúserun wuríba, ni lun wasí-girin láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri. ¹⁰ Máma meja naríñaguña jun lun jadisedun le gumúti jaweí sun lirájüñü ubouú le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun ubouágugiñe. ¹¹ Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucrístu áni salúfuri, o meménijabuti, o judúguati joun sándu, o marásualuguti, bachárua o jíweru. Moún lumuti ni lun jeígin lúma idújei le ítarati. ¹² Máma áu lúnbei nagúseragüdüniña ja bougudibaña lueí Crístu, Búngiuba agúseragüdaña. Wagía, lúnti wagúseragüdüniña wadújeñu lueígiñe Jesucrístu ánjein jadúgüña lubeí wuríbati. Ligía gidájumei lubeí gafígounti le jagánaguagiñe.

Wuríbu buri jagíbugiñe agúseragüdütiña ja máma afíñetiña

6 Dan le níjein lan cátei lúnti laríñaajan ában jídaangiñe líri ámu, ¿cági uágu jídin jámoun agúseragüdütiña ja ibídiñebui Crístu joun, lubáragiñe jamúga jídin jámoun lánigu Búngiu? ² ¿Ódi ibídiñeti jun luágu jagúseragüdübaña lan lánigu Búngiu lánigu ubouú? Ánjeinti jagúseragüdübaña lubeí lánigu ubouú, ¿siñá jumuti buri cátei níbüriti le aráansera? ³ ¿Ibídiñeti jun luágu wagúseragüdübaña lan gíñe án-jeligu? ¿Gúbuméti gayára lan wagúseragüdüñ luágu buri cátei lánina ibágari le! ⁴ Ánjein níjein lubeí buri wuríbu jagánagua luágu buri cátei le lánina ibágari le, ¿cámegi jídin aríñaaja joun ja mafíñebaña luágu Jesucrístu, ja málabei lichú áu le jádaanbei ladúga máma lan lúmagiñeti Búngiu? ⁵ Naríñaguñein le lun janúgün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueígiñe Jesucrístu? ⁶ ¿Lúnti lídin ában idújei aríñaaja líri lidúje joun agúseragüdütiña ja mafíñetiña luágu Crístu?

⁷ Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le

adügúbei jun sügú láu jageíndagun ladúga. Buítimaati lun jígirun lun íwerujoún jueí. ⁸ Ánjein jugúya, lubáragiñe líra, adúgatün maríchaü, íweruja jugúya, íbini jaweí jidújeñu guánarügü.

⁹ ¿Ibídíñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamáriedunga, ja ájuduragubaña joun sándu, ja agámaridubaña ja maríeitiña, ja wügúriña ja agámaridutiña wügúriña jáledi, jíwerutiña, meméni-jabutiña, bacháruatiña, marásualugutiña, ja anügübalin láni ámu láu jabíbun—sun ja adügübaña wuríbani líbe buri le, siñábei jebélurun lídoun larúeijan Búngiu síelu. ¹¹ Añájein jídaangiñe, ítara jañá meja, ánjein guetó, chibáwaali jiffgoun, derégeguaadün júngua lun Búngiu, áni resíbi láadün queísi lánigu ladúga le ladügúbei Wabúreme Jesúsu juágu, lúma sun le ladügúbei láni Búngiu Espírítu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladügüni gürígia le labúseerun ladúga.” Inárüni líra, áni máma sun cátei lun buídu lan lanügún. Gayáraati ladügüni gürígia le labúseerun, wel, moún lumuti lígiraguagüdün lúngua lun lagúmadiruni layúmajan. ¹³ Inárüni le aríñawagúbei luágu ladügüni lan Búngiu eíginí lun weígini, adúgaleí warágeirugu lun ladügüni wadági-manu láu weígin. Inárüni, áni lagúmochaguagüdübei Búngiu biángubei cátei le, mamégeirun wamáalime. Ánjeinti wágubu, madügúnti lun wadügün salúfuri láu, ladügún wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴ Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadiwa gíñe láu sun wágubu, láu lubáfu.

¹⁵ ¿Ibídíñetisan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanúgeiméti nógubu le líbiribeí lúgubu Crístu lun nadügüni líbirime túgubu ában jóru? ;Madügün nubeí!
¹⁶ ¿Ódi íbídíñeti jun luágu dan lan le leméterun ában gürígia túmoun ában jóru, biángubei jagía ñúbintiña lun ítara jabá lan quei ában méme úgubu? Taríñajare Lerérun Búngiu. “Jayábinba biángubei lun ítara jamá quei ábanrügü.” ¹⁷ Ánjein dan le liábin ában gürígia lun lídan lan ában lúma Crístu, ában liábin láni Crístu Espírítu lun ában lan lúma láni gürígia ligía espírítu lun ábanrügü jamá espírítu.

¹⁸ Anúraja jumá lubeíti lueí salúfuri. Mítaraanti salúfuri queísi ámu figoú, furúmiñeguarügü ámu figoú le jadúga gürígia, bougudin lueí jágubu ladúga dáñu, ánjein le agámariduti mamáriedunga, ladügüña figoú luágu lúgubu guánarügü. ¹⁹ ¿Ibídíñeti jun luágu lúban lan Sífiri Sándu wágubu, le líchugubei Búngiu woun lun laganoún wádan? Máma wagía labúriñabei wágubu, Búngiu labúremebei. ²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espírítu lugúndun láni Búngiu biángubei.

Dimúrei buri luágu maríei

⁷ Guetó noúnabaali lé buri uágubei jálügüdana tídan jigáradan to jabúrújaboun nun. Inárüni luágu buídu lan lun wügúri lun magámaridun lan, ² quei níjein lubeí sarágu salúfuri, buítimaati lun lagámaridun wügúri, lun gíñe tagámaridun wúri, súnwandan láu amárieduni. ³ Lúnti lagúnfulirun wügúri túma lúmari queísi úmari, lúnti gíñe tagúnfulirun wúri lúma túmari. ⁴ Máma úmari to wúri labúremeboun túgubu guánarügü, láni gíñe túmari. Máma gíñe úmari le wügúri labúremebei lúgubu guánarügü, táni gíñe lúmari. ⁵ Mamájara jumá lun jesériwidagun júniwagua, ánjaün gubeírügü adúga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, lueí lásiñerun jágüdaagun júngua, ábame laffgoungüdünün Máfia láu jeméterun jámoun ámu jaweí jámarigu.

⁶ Máma naríñaguña luágu lúnti lan jagámaridun, gayáaarügüti jáluajan úmari lun jamáriedun jáma ánjaün busén. ⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queísi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigíñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queísi áu, ⁹ ánjein siñá lubei jágüdaagun jóungua, buíti lun jagámaridun (súnwandan láu amárieduni) sügú láu lun jeréderun láu ában luweírín ayúmajani le siñábei jawánduni.

¹⁰ Ánjaña ja maríeijañabaña, aríñagatina joun lun mígirun táni wúri túmari. Gumádi le, lídan lubúdubu máma nugúmadin, lugúmadin Wabúreme. ¹¹ Láu sun líra, ánjein tígira wúri túmari, lúnti teréderun mámariga, o taráandarun lan lúma túmari. Moún lumuti gíñe lígirunun wügúri lúmari.

¹² Joun jíbiri, aríñagatina queísi dimúrei le náni, máma láni Wabúreme, luágu ánjein lan mafíñen tubeí lú-mari ában le affíñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma. ¹³ Ánjein gíñe mafíñen lubeí túmari ában wúri to affíñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma. ¹⁴ Úmari le mafíñebei, derégewaali lun Búngiu láu lídaañein lan ában túma lúmari to affíñetu luágu Crístu, úmariti to mafíñetu, derégewaarú gíñe lun Búngiu láu lídaañoun lan ában lúma túmari le affíñebei luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafíñebaña, ítara, derégewañu jáña lun Búngiu. ¹⁵ Ánjein busén lubeí úmari le mafíñebei luágu Crístu lun lígirunun lúmari, o wúri to mafíñeboun lun tígiruni túmari, ígiragua jamá. Lídan oubaü líra, moún lumuti jafósuruníña úmarigu ja affíñebaña úmarigu ja mafíñebaña lun jeréderun jáma, lugúndun wájali Búngiu woun lun wabágaridun lídan darángilaü. ¹⁶ Ában gíñe cátei, ¿cági basúbudirubei,

amúrü wúri, ánjeindügü gayára lubeí basálbaruni bú-mari láu beréderun lúma? ¿O cági basúbudirubei, amúrü wügúri, ánjeindügü gayára lubeí basálbarunun bú-mari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubeí meja gíñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi. ¹⁸ Ánjein agúara Búngiu lun ában gürígia le resíbi lálalibeí circuncisión, lé meja liseíni lidáradun Búngiu jáma lánigu, lúnti leréderun ítara, ánjein gíñe agúara lun ában le merésibirungili circuncisión, moún lumuti lerésibiruni.

¹⁹ Mebéresenwati ánjein resíbi lubeí circuncisión lú-moun merésibirún lán, le busénwabei, lun lagúnfulirúniwa lugúmadin Búngiu. ²⁰ Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubeí dan le lagúarunbei Búngiu bun, madí-geribá luágu líra, ánjeinrügü liñáti gayára lubeí báfuridun lídaangiñe idámuni ban, adúgabeí. ²² Lé meja idámuni bei lun labúreme ya uboúagu dan le lagúarunbei lun lun laffíñerun luágu Crístu, gidáali lueí lubáfu figoú lun lesériwidun lun Wabúreme Jesucrístu, ítara méme gíñe, lé meja mámabei idámuni lun ában gürígia uboúagu dan le lagúarunbei lun, lidámunjali Crístu, ligíajali Labúreme. ²³ Agáñija láadún Búngiu luágu oúnwenbun ebégi, mígira jumá lun janúgünün wügúriña lidámunme jagúndan, lidámun jumá lugúndan Búngiu. ²⁴ Ítara líña lubeíti, nidújeñu, madíjeri jumá cátañañadún lan boúgudigiñe jibíti, reídei jumá ligíbugiñe Búngiu lídan méme igáburi lé meja gádaanbalún dan le lagúarunbei jun.

²⁵ Jawágu gürígia ja mámarigíñabaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queísi ában le gadúnati lun laffíñerúniwa luágu, luágu lareíni Wabúreme le rú-jalibeí murúsun lídaangiñe lichú láu nun. ²⁶ Lídan narítangun, lúnti leréderun gürígia quei lubeí, ladúga buri lidére dan le gádaanbaliwa. ²⁷ Ánjein gámari bubeí, málugabá bígiragun, ánjein mámari bubeí, málugabá bagámaridun. ²⁸ Ánjabu amárieida, máma figoú, án-joun gíñe amárieida ában irájü, máma gíñe figoú, láu sun líra, ñíbei asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei naríñagun. Murúsun rügáali dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña.

³⁰ Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagí-daruniwa lueí wadúgüni le lúnbei wadúgüni quei es-ériwidutiña lun Búngiu, ladúga louguati dan.

³¹ Masáminara jumá sarágu luágu lubuídun cátei lánina uboú le, le jánibeí lun jayúsuri, ladúga uboú le, le waríjibeí, lagúmuchaña, lúnti jarítangun luágu cátei le magúmuchadibeí.

³² Buséntina lun madíjeri lan jarítangun luágu ni cáta. Dan le mámari lan ában wügúri, larítangun luágu buri

cátei le luágu Búngiu lúma lun lesériwiduni buídu.

³³ Ánjeinti dan le gámarijali, larítangun luágu buri cátei le lánina ibágari le, lúma lun lesériwidunun lúmarí buí-du, ³⁴ biánguañein cátei lun leténirun lun—lun lesériwidun lun Búngiu lúma lun latoúnigirunun lúmarí. Ámuti gíñe touserun wúri maríeitu tueí to mámariboun. To mámariboun, tarítangun luágu buri cátei le luágu Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to gámariboun, tarítangun luágu buri berésegu lánina ibágari le, lúma lun tesériwidun buídu lun túmari.

³⁵ Naríñaguñein le jun luágu jáni fuleísei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, eséri-wideina lun Wabúreme, derégeguñu júngua lun, marítangun sarágu luágu cátei lánina ibágari le.

³⁶ Agúbürigu ja arítagubaña luágu buídutima lan lun tamárieidun jaraú lugúndun tawéiyaaduña lan, áni án-jein buítima lubeí líra, lúnti jadúgüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figoú líra. ³⁷ Ánjein añájein lubeí ámu agúbürigu, derégüdaguañe lídan jarítangun luágu moún lumuti lan lun tamárieidun jaraú, áni memégeiruati lun tíchugúniwa, áni gayáraati jadúgüni le jabúseerunbei, buíti jadúga lun míchugun jamánun jaraú lun tamárieidun. ³⁸ Ja lubeíti íchugutu jaraú lun tamárieidun, buíti jadúga, ja míchuguntu, buítimaati jadúga.

³⁹ Wúri to maríeitu, lábugiñeñoun leréreejan túmari, lurúma lúrudu, sun wínwangili lan, ánjein oúwe tú-mari, gayáraati tamárieidun lúma le tabúseerun, affíñeti rügáali ligía luágu Crístu. ⁴⁰ Láu sun líra, buítimaabei dan tun ánjounya mamárieidun. Ligía narítangunbei, áni affíñetina luágu ligía lan gíñe larítangunbei láni Búngiu Espíritu.

Eígini buri le adágarawagüdüti joun sándu

8 Guetó nadímureja luágu eígini le adágarawagüdüti joun sándu. Inárüni luágu subúdi wamáni luágu buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi. ² Le arítaguti luágu níjein lan lasúbudirun, ibídiñegilirügü líña ni cáta lun queísi lubúdubu. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luágu lubeíti leigín eígini le adágarawagüdüti joun sándu, inárüni luágu ni cáta jamá sándu uboúagu, máma jamá búngiugu ladúga subúdi wamúti luágu ában rügúñein lan Búngiu. ⁵ Añájein mútu uboúagu, jarítaguañe luágu añájein lan bürúbünu búngiugu jáma abúremeigu síelu lúma uboúagu, ⁶ ánjeinti woun, wagía le affíñebeí luágu Crístu, ában rügúñein Búngiu, le Wáguchibeí. Ligía adúgúbalin sun cátei, áni ligía le únbei wesériwida táu sun tarúman wanígi. Ában rügúñein gíñe Wabúreme,

le Jesucrístu, le ídaangiñebei ladügúwa sun cátei, áni ligía le ídaangiñebei wibíjei íbágari magúmuchaditi.

⁷ Másutiña ja afiñebaña luágu Crístu gayára jafiñerun luágu ni cáta jamá sándu, añájein já meja jéhubaña ájuduragua joun sándu, jou jamágili eíginí ligía queísi cátei adágarawagüdüti joun búngiu. Queíti lougua lubei jafiñen luágu gayára lan jeíginí afiñetiña eíginí ligía, ába mabuídun lan lasándi-raguagüdüniña jóungua ligíbugiñe Búngiu láu jeíginí eíginí ligía. ⁸ Inárüni le jaríñagubei luágu máma lan cátei le weígibeí gayáraagüdübalin lerésibiruniwa Búngiu, mabuíduntimaabadiwa ligíbugiñe Búngiu lueígiñe weígin, maríbaduntima wagíame lueígiñe meígin wáma. ⁹ Gayáraati jeígin eíginí le adágarawagüdüti joun sándu, lúntirügü goúnigi jumá luei jeíguadagüdüniña jidújeñu lueígiñe Crístu ja louguabaña jafiñen ánjein buídu lubei lúmoun mabuídun lan. ¹⁰ Quei jamúga guetó, amúrú le subúdi-jabúbei luágu gayára lan beígin furúmieguaugü eíginí, bañúura eíga lídan ában fulásu le jóunti sándu, laríjabu ában idújei le débiliti lafiñen luágu buri cátei le, ñi, lanúgüba gurásu buágu lun gíñe leígin lídaangiñe eíginí le, le adágarawagüdüti joun sándu. ¹¹ Ítara, ladúga bisúbudin, féridigüda bumúti bidúje le débiliti lídan lafiñen le gíñe ueígiñebei louwe Crístu. ¹² Dan lubeíti le jañáwarijani jarítangun idújeñu ja débilita ñi lídan jafiñen, jadúgüña lun jafígounjan jidújeñu, áni jugúya guánarügü jafígounjaña gíñe. ¹³ Ligía, ánjein lubei náburugüda nidúje lídoun figoú ladúga cátei le neígibeí, buítimaati lun meígingüya nan úwi luei nafígounjagüdüni.

Lirícha buri ában apóstolu

9 Áu, furángutina lun nadúgüni le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálirubaña lídaangiñe nuwádigimaridun luágu Wabúreme.

² Fágua manúgün jabáquina jíbiri queísi apóstolu, ánjeinti jugúya, gásu janúgünina queísi apóstolu, lugúndun láu afiñe jumá luágu Crístu, arúfuda lumúti líra luágu inárüni lan luágu ában nan apóstolu.

³ Niján nouñabagülebei joun ja adímurejabaña nuágu. ⁴ Garíchatina lun nerésibiruni sun le íchugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei. ⁵ Garíchatina gíñe lun namárieidun túma ában wúri to afiñetu luágu Crístu, lun gíñe nanúgünun númagua luágu nuweíyasun quei ladúgüni Pédro jáma ja jíbiri apóstolugu, jáma gíñe ja lamúlenu Wabúreme. ⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüda ja jumagiñe lun gayára lan wígiruni wawádigimaridun láu wájabu lun wapúrichijani Lerérun Búngiu? ⁷ Queísigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le oúnigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu naríñaguñein lan le queísirügü jarítangun gürígia, lugúndun aríñaga lumúti

gíñe lilúrudun Moisés. ⁹ Laríñajare tídan lílburuna lúrudu. “Magúraguabeí liyúma bágasu le lánina wadágimanu luei leígin lídaangiñe ílaü le léferejabei.” Máma laríñaguñein Búngiu líra jawáguurügü bágasu, ¹⁰ laríñaguñein gíñe queísi ában jémpulu woun. Luágu wáni fuleísei labúrüdúwa lúrudu le, lugúndun dándu le awoújabalin múa, queísi le éferejabalin líla nádü, lúnti jadúgüni láu eménigini luágu jerésibirubei lan jafánran lídaangiñe alúbajani. ¹¹ Queísi bunágu wamáali lubei Lerérun Búngiu tídan janígi, ¿gíbeti funági laríjin jun lun walúbajan murúsun cátei jumagiñe lun wágüdaagun woúngua? ¹² Ánjein garícha jabei ámu lun líra jumagiñe, garíchatimáatiwa.

Mayúsu wamúti íríchaü le wawágubei. Lubáragiñe líra, awánda wamáali sun le wemegeirubei luei lejénreendun jun agáambeí wapúrichijani Lerérun Búngiu, ladúga wamúriajan wágüda ja jumagiñe. ¹³ Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñi lubei líchugúa adágaragüdüni, jóutiña úwi jádaangiñe anímaalu ja adágarawagüdübaña ñi.

¹⁴ Ítara líña gíñe laríñaguni Wabúreme Jesúsu lun ja lan apúrichijabalin ugánu luágu, lun gíñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe íríchaü le, máma gíñe nabúrújañein le jun lun jíchugun som cátei nun. ¿jimein numúti nouñwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadúgüni. ¿Fugiábu áu ánjein mapúrichijan nan ugánu le! ¹⁷ Lun jamúga mínsiñe lan nun lun napúrichijan, láu sun luwúyeri mósu nadúgüni ladúga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeiruajatina, ¹⁸ afáyeiruajau ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigimari queísi apúrichijati.

¹⁹ Láu sun mábuti nan uboúagu lun nagáambuni, rúguaadina núngua jadámunme súngubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadúgün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía. ²¹ Lun nagáñeiruniña ja mámbaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubei lilúrudun Crístu.

²² Dan le jáma nan ja louguabaña afiñetiña, madúgüntina ni cáta le uágubei jarítagua luágu mabuídun lan ladúgüniwa, lun gayára lan nagáñeiruniña. Rúguaadina núngua queísi cáda jawúyeri gürígia lun añájein lan nasálbarun lídan furúmieguaugü luwúyeri. ²³ Nadúgüñein

sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanúgübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügúñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, jóuchatiña lun madúgün jamá ni cáta le gayáraabei lásíñeragüdüni jájurerun. Áni jadúgüni lun jagáñeirun ában rídi le láuti ubánaü. Ánjeinti wagía, wáfaaguña lun wibíjin ában rídi siélu le lúnti ladúrarun lun sun dan. ²⁶ Áu, neíbaaguña lídan ibágari le, rúñuneí naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu, ²⁷ lubáragiñe líra, áfara numúti lugúndan nógubu, fósuneí lun lagáambunina, lueí lubeígia neféridiruba lan lárigiñé buga arúfudajadina lan joun ámu luágu lubuídun úma lun wachúlürün lúmoun Búngiu.

Dimúrei luágu ájuduraguni joun sándu

10 Nidújeñu, buséntina lun narítaguagüdünün luágu lé meja asúseredubei joun binádu wagúbürigu lídan lé meja lídan jamá fulásu mageírawati, luágu níñein lán meja Búngiu lídan ában juánriñu jóugiñe lun loúnigiruniña. Séfuti gíñe lanúgüniña súnigubei dan le jájiñuragunbalin Barána Funáti. ² Ítara líña queísi ában abásteruni joun láu jásügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladúga ligía lan abúgurubaliña. ³ Jóútiña gíñe sun jagía lídaangiñe ában méme eíginí le líchugubei Búngiu joun, siélugiñe, ⁴ rúati gíñe dúna joun súnigubei lídaangiñe ában dúbü lun játun. Níñein Crístu jáma luágu sun jawéiyasun lun fuleísei láníña láu dúna lun játun. ⁵ Láu sun líra, madúgün jamúti jíbe-ágei lugúndan Búngiu, ába lamágundarun Búngiu jáma. Ligíati jóúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadúgüni. ⁷ Ligía májuduragua jumá lubeí joun sándu queí meja jadúga jádaangiñe, queísi taríñaguni Lerérun Búngiu luágu jefédujan joun sándu. “Ába jañúurun gürígia eíga lúma áta, lárigiñe, ába jásaarun eféduja.” ⁸ Moún lumuti wadúgün salúfuri queí meja jadúga jádaangiñe, ába larúfuduni Búngiu luágu wuríba lan le jadúgübei láu louwegüdüniña mílu gürígia jádaangiñe lídan ában wéyu. ⁹ Moún lumuti gíñe wálujaní lében lugúraasun Búngiu woun láu luríban wagáburi, queí jadúgüni jádaangiñe, ába jóúwegun láu lágüragüdüniña joun jéwe. ¹⁰ Mamágundara jumá gíñe lúma Búngiu queí jadúga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agúbürigu, ába labúrüdün tídan Lerérun Búngiu queísi jémpulu woun, wagía le wínwanbei lídan lagúmujoún dan le, lun wasúbudiruni buídu luágu mínsiñe lan figoú lun

Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú. ¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchawaguni le jásiñerun awánda. Lubáragiñe líra, dánme liábin oúchawagúni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun gürígia gunfaráandatiña, samína jumá júngua ánjein buídu lubeí le naríñagubei jun, lúmoun mabuídun lan. ¹⁶ Dan le werésibirun, dan le wátun lídaangiñe uníñein le uágubei wíhiga eteíngiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja loúnwenbei luágu gurúwa wawágu. Dan le weígin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía.

¹⁷ Queísi jou wabeí tídaangiñe ában méme fein, arúfuda lumúti líra luágu lídaañadiwa lan ában láu sun gíbe wamá.

¹⁸ Aríja jumá lun násiñun le linásiñun Israél. Ja eígibaña lídaangiñe eíginí lé buri adágarawagüdüti lun Búngiu luágu latárü, lídaañanu lan ában jámagua, lúma lúma Labúreme latárü. ¹⁹ Mára naríñaguña luágu wínwan jamá sándu, maríñaguntina gíñe luágu weírigutima lan úwi le adágarawagüdübei joun sügú láu ámu úwi. ²⁰ Le naríñagubei, luágu dan lan le jadágaragüdüni ja ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu.

²¹ Siñáti játun lídaangiñe licópun Wabúreme Jesucrístu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucrístu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

²³ Inárüni le aríñawagúbei luágu gayára lan jadúgüni gürígia le jabúseerun, láu sun líra, máma sun cátei buíti laburujan. Gayáraati jadúgüni gürígia le jabúseerun, láu sun, máma lan sun cátei lun líderaguniña ámu gürígia lun jóúdin jabáruaguoun lúma Crístu. ²⁴ Lúnti warítapun luágu le buídubei joun ámu gürígia, mámarügü lan wawóguoun warítagua.

²⁵ Niján le lúnbei jadúgüni luágu úwi. Jóújuma lídaangiñe sun cátei le alúgarajóubei mágudirugu, málungüdjanga jugúya ánjein dágüdwala lubeí joun sándu lúmoun madágarawagüdüni lan, ²⁶ maríbadalá jarítapun luágu, gayáraati jeígini, lugúndun lání Wabúreme múa láu sun le lídaanbei.

²⁷ Ánjaün lamísuraja ában gürígia le maffíñeti luágu Crístu lun jídin eíga lúma, gayáraati jídin ánjaün

busén. Joújumei le íchugúti jun, málügüdajanga ni cáta, mebéresen jumá ánjein dágüdawa lubeí eíginí ligía joun sándu furúmiñe, lúmoun madágaragüdúnwa lan.²⁸ Ánjein aríñawagua jun luágu dágüdawaali lan eíginí ligía joun sándu, meíga jumeí, lueí jadúgün dáñu lun le aríñagubalin jun, lueí gíñe laríbadun larítapun.²⁹ Nadímurejañatia luágu larítapun le ában, máma luágu barítapun.

Gayáraati jamúga funa laríñapun mútu. “¿Cásan uágu lúnti lubeí lafálaruni ában gürrígia le larítapun ámu?”³⁰ Ánjein gayára lubeí níchugun eteíngiruni lun Búngiu luágu le neígibeí, ¿cábaga uágu jadímureja nuágu lueígiñe neígini?”³¹ Ánjaün lubeíti eíga o áta o jadúgün furúmieguarügü cátei, adúga jumeí sùngubeí lídan ában luwúyeri le íchugubeí inébeséi lun Búngiu.³² Míchiga jumá lébuna eíguaduni lun ni ában, ni joun juríu, ni joun ja mámabaña juríu, ni joun ja lánigu Búngiu.³³ Áu, jóuchatina lun nagúndaaragüdúñiña sùngubeí lídan sun cátei, máma rügúñein nuóguua narítagua, jarítaguatina gíñe jawágu jíbiri lun gayáraabei lan jayábin lun jafíñerun luágu Jesucrístu lun jasálbaran.

11 Áyeija jumeí nigáburi queísi náyeijani ligáburi Crístu.

Würíña lídan jóundarapun afíñetiña

² Nidújeñu, gúndaatina jáu luágu súnwandan lan jarítapun nuágu, lúma luágu falá jumani arúfudajani le níchugubeí jun.³ Guetó, níjein ámu arúfudajani le nabúseerubeí lun gunfaráanda jumáni, luágu Crístu lan lichúgüdinabei cáda wügúri, wügúri tichúgüdina lúmari, ítara queí Búngiu lan lichúgüdinabei Crístu.⁴ Nibúsigarídünati lun ladáurapun ában wügúri láu lúblugun dan le layúmurapun lun Búngiu, eteíngireí lídan jadámurin afíñetiña, o dan lan le laríñapun ugánu le ladímurejan Búngiu liyúmulugugiñe wügúri ligía, ladúga láu líra, larúfuduñein luágu níjein lan ában wügúri weírigitumaati lanúgüni lueí lídan adámurini ligía, áni Crístu rügúñein weírigu jádan sun wügúriña.⁵ Nibúsigarídünati gíñe lun madáurapun tan wúri láu tábulugun dan le tayúmurapun lun Búngiu, eteíngireí lídan jadámurin afíñetiña, o dan lan le ladímurejan Búngiu tiyúmulugugiñe, ladúga láu líra tarúfuduñein tamájarun lun tanúgüni wügúri weírigu sùgú táu, wuríbati líra, queísigubeirügü jamúga lasarún tídburi queísi wügúri.⁶ Ánjoun madáurapun ában wúri láu tábulugun, buítimaati lun tásaruni sun tídburi, áni ánjein busíganudúna lubeí tíbuguni wúri tídburi o tásaruni lan tábulugun, darúguatá láu tábulugun.⁷ Moún lumuti ladáurapun wügúri láu lúblugun lídan jadámurin afíñetiña lugúndun liyáwa Búngiu ligía, áni arúfuda lumúti luweírigin Búngiu. Ánjounti wúri, arúfuda tumúti luweírigin wügúri,⁸ lugúndun dan le ladúgünbalin Búngiu wügúri, máma tídaangiñe wúri ladúgei, wúri ladúgüboun lídaangiñe wügúri.⁹ Adúga lumútu Búngiu wúri lun wügúri, máma wügúri tun wúri.¹⁰ Ligía lúnti lubeí tadáurapun wúri láu tábulugun lídan jadámurin afíñetiña queísi liseíni derégüdaguau

lábugiñe lagúmadijan wügúri, lúma lun jagúndaarun ánjeligu láu tagúfurumadun.¹¹ Láu sun líra, lídan wabágarí queísi afíñetiña, mégei lumútu wügúri wúri, mégei tumúti gíñe wúri wügúri.¹² Queísi inárüni lubeí luágu lídaangiñe lan wügúri tadúgüwa wúri, ítara líña gíñe inárüni lan luágu wúri lan íchugubalin wügúri uboúagu, áni sun cátei lúmagiñe Búngiu líabin.

¹³ Ítara líña lubeíti, samína jumá júngua ánjein buídu lubeí lun tayúmurapun wúri lun Búngiu lídan adámurini madáuraguna láu tábulugun.¹⁴ Jéchutiwa wagía gürrígia lun warítapun luágu busíganu lan lun migínagu lan lídburi wügúri.¹⁵ Ánjoun wúri, ában uwéndeni tun lun migínagu lan tídburi, ligía líchugünbei ídburi migínaguti tun lun tadáurapun láu tábulugun.¹⁶ Ánjein níjein lubeí buséti lasígenejan luágu cátei le, lúnti lasúbudiruni luágu ni lan wagía, ni já buri jíbiri tílana lílígilisin Búngiu masúbudiruntiwa ámu igáburi lueí líra.

Luríban jagáburi afíñetiña dan le jeígin luágu lidábulan Wabúreme Jesucrístu

¹⁷ Nabúrúja jun guetó luágu ában cátei le siñábei naríñapun luágu buídu lan jadúgüni, lugúndun genége lumúti luágu adúga lán buri jóundarapun dáñu jun lubáragiñe jamúga ladúgün buíti.

¹⁸ Furúmiñeti cátei, aríñawagúati nun luágu dan lan le jóundarapun, níjein lan fánreinguaü jídan, áni afíñetiña luágu níjein lan inárüni lídan le aríñawagúbei.

¹⁹ ¡Fágua lúnti ñi lan fánreinguaü jídan lun lasúbudirúniwa cátaña lan afíñetiñabaña ja tímatimaatiña!²⁰ Láu buri fánreinguaü le, dan le jóundarapun lun jeígin luágu lidábulan Wabúreme Jesucrístu, siñáti jeígin láu ában igáburi le íchugubeí inébeséi lun,²¹ lugúndun dan le lachúlürün óra lun jeígin, meígin-tún nege lídan ában. Lubáragiñe líra, cáda ában, ába loufudajan eígei eíginí le lanúgübei. Ja siñábei janúgün gíbeti, ába jeréderun láu jaláma. Jayábiti jídaangiñe, ába játun sarágu darí lun jabácharuadun.²² ¿Mában-tún funági lun jeígin lúma lun játun ñi? Láu igáburi le, barú jumutiña tílana lílígilisin Búngiu queí ni cáta, rújumaña ja úabei ni cáta jáma lídoun busíganu. ¿Cábaga naríñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu loúnwen Wabúreme

²³ Lúmagiñe guánarügü Wabúreme Jesucrístu nerésibirei igáburi le warítaguagüle luágu loúnwen, lé meja níchugubeí jun. Queísi le nubeíbei jun, luágu le lan áriebu le lalúgurünbei Wabúreme, ába lanúgünun fein lújaburugu,²⁴ lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába laríñapun. “Joújuma, nógubu le, le nedégerubei luágu jufúleisein. Adúga meme jumeí cátei le, jarítaguagüleme nuágu.”²⁵ Ítara gíñe, lásun jeígin, ába lanúgüni cópu táu diweín lújaburugu, ába laríñapun. “Cópu le táu diweín to, liseíni iséri lidáradun Búngiu júma, le achoúrurúabei láu níta le lúnbei

láwiyurun lídaangiñe núgubu juágu. Ságüme játuni, adúga jumeí lun jarítangun nuágun.”²⁶ Ítara líña lubeíti, daríme le lagíribudun Wabúreme ubouágun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti louñwen Jesúsu wawágu.

Ligáburi leigín eígin le arítaguagülei luágu Jesúsu

²⁷ Furúmieguarügü le eígitu fein tugúya, guráloun diweín to lání Wabúreme Jesucrístu lídan ában igáburi le míchuti inébesi lun Búngiu, ladúgüña figoú ladúga líchuguña lan minébesi lun lúgubu Wabúreme lúma líta.²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun.²⁹ Lugúndun ánjein erésibira marítangunga luágu laníchigu lánina lúgubu Wabúreme, labeíchubei Búngiu.³⁰ Ligía añájein lubeí sarágu jídaangiñe, sánditiña, débilitiña, jilágua jíbiri.³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara.³² Dan le labeíchuniwa Wabúreme, ladúgüñein líra lun wasúbudiragun woúngua, gayára lámuga wasáansiraguni wagáburi lueí weféridirunme úara jáma lirájüñü ubóu.

³³ Ítara líña lubeíti nidújeñu, dan le jóundaragun lun jerésibirun, agúrabagua jumá júngua.³⁴ Ja lamátiña, jóujama jábiñe, mabeíchun lámugaña Búngiu luágu luríban ligáburi jóundaragun. Lé buri líbiri cátei naráanserubei dánme le nídin aríjaün.

Ubáfu buri le líchugubei Sífiri Sándu lun cáda affíneti

12 Nidújeñu, níjein buri cátei nabúseerun lun jasúbudiruni luágutí buri ubáfu le líchugubei Sífiri Sándu lun cáda affíneti luágu Jesucrístu.

² Subúdi jumúti buídu luágu dan lán meja le mámagidün lánigu Crístu, ádajouátün meja lun jeibugun jarígi sándu ja maríñagadibaña.³ Ligía nabúseerunbei naríñagun jun guetó lun gayára lan jasúbudiruni ánjein lubáfu lubeí Sífiri Sándu ádajabálin ában gürígia lun ladímurejan lúmoun lubáfu lan espíritu wuríbatí. Siñáti ládajani Sífiri Sándu ában gürígia lun lanábaguni Jesúsu láu laríñagun luágu máma lan Liraú Búngiu, espíritu wuríbatí ádajabálin lun ladúgüni líra. Áni láu rügüñein lubáfu Sífiri Sándu gayára lan laríñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le affínebei luágu Jesucrístu, áni ában méme Sífiri Sándu íchugubálin.⁵ Níjein sarágu luwúyeri ligáburi esériwiduni lun Wabúreme Jesucrístu láu ubáfu buri le líchugubei Sífiri Sándu woun, áni lun méme ában Abúremein wesériwida.⁶ Lídan gíñe sarágu luwúyeri wayúsurei ubáfu buri le rúaalibe woun, áni ában méme Búngiu le íderagubaliwa lun wayúsuruni ubáfu ligía.⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri affínetiña.⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímure-

jan láu sarágu subúdi.⁹ Jíbiri resíbitiña ában affíneti weíríti lúmagiñe méme Sífiri Sándu ligía, jíbiri resíbitiña ubáfu lun jareídaguagüdün sánditiña.¹⁰ Añájein resíbitiña ubáfu lun jadúgün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubeí ádajabálin ában gürígia lun ladímurejan o ámu lan luwúyeri espíritu, jíbiri ibíjatiña ubáfu lun jadímurejan ámuñegueinarügü luwúyeri dimúrei lueí jerérun. Añájein ibíjatiña ubáfu lúmagiñe Sífiri Sándu lun jafúnraanguagüdüni le aríñawagúbei lídan buri dimúrei teréncha ligía.¹¹ Sún buri cátei le, ában méme Sífiri Sándu le ábanrügübei, ligía adúgübalin, le afánreinjabálin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súnigubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladúga. Ítara líña gíñe le únbei wagúara lúgubu Crístu, cáda ában affíneti ában lídaangiñe lumégegun lúgubu Crístu.¹³ Sun wagía affínetiña—juríu, máma juríu, idámuni, máma idámuni, furúmieguarügü le wawúyeribeí—láu wabásterun, ába ladúgüniwa Sífiri Sándu lun ában wamá jáma sun jíbiri affínetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegun lun jasúbudiruni luágu ítara wáña lan queísi lumégegun lúgubu Crístu. Wágubu, máma rügüñein ában umégeni luágu, gíbeti umégeguni luágu.¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámbabei lan líbiri úgubu,¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámbabei lan líbiri úgubu.¹⁷ Lun jamúga águu lan sun úgubu, zída líña jamúgagi wagáambun? O lun jamúga arígeirugu lan sun úgubu, zída líña jamúgagi wirímichun?¹⁸ Rúlaali Búngiu cáda lumégegun úgubu le ní lumuti labúseera.¹⁹ Lun jamúga ában rügüñein lan umégeni luágu úgubu, moustarunti jamúga úgubu ligía.²⁰ Láu sun gíbe lan lumégegun úgubu, ában rügüñein úgubu.

²¹ Siñáti laríñagun águu lun újabu. “Memégeirun numútibu”, siñáti gíñe laríñagun ichúgü lun ugúdi. “Memégeirun numútibu.”²² Lubáragiñe líra, lé buri lumégegun úgubu le laganounbei camá débiliti, ligíatima buri mégeiwabei,²³ lé buri lumégegun úgubu le wanúgübei quei ni cáta, ligíatima wadáüraguagüdübei láu uwéndeni. Le buríti líbiri lumégegun wágubu le arámudaguabei, ligíatima wouserunbei láu goúnigi,²⁴ le madúgünwabei lún buri líbiri lumégegun wágubu. Ítara líña laráanseruni Búngiu úgubu lun le lán buri líbiri umégeguni le anúgübei quei ni cáta, ligíatima lan weírigu,²⁵ lun níjein lan ában úarani luágu úgubu lídan le luwádigimaridun sun umégeguni lídan ában, láu ában toúnigi jóuniwagua.²⁶ Ánjein asúfurira ában lídaangiñe lumégegun úgubu, súfuriti gíñe buri le

líbiri, ánjein gíñe ouserúa ában lídaangiñe buídu, ába lagúndaarun lé buri líbiri lídan ában.

²⁷ Ítara méme líña gíñe, lúgubu Crístu jugúya, cáda ában jídaangiñe, lumégegun úgubu ligía. ²⁸ Rújali Búngiu wadágimanu jun tídan lílígílisin lun juwádigi-maridun luágu ában queísi luwádigimaridun lumégegun úgubu. Furúmiñetiña, apóstolugu líchuguniña Búngiu lun jesériwidun joun jíbiri afíñetiña, jabíaman, profétagu, júruwan, arúfudajatiña luágu cátei lání Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja íbíjubaña ubáfu lun jadímurejan dimúrei buri le teréncha. ²⁹ ¿Apóstolugu funági súngebui? ¿Profétagu funági súngebui? ¿Arúfudajatiña súngebui? ¿Ódi sun jagía adáaguatiña miláguru? ³⁰ ¿Gabáfutiña súngebui lun jareídaguagüdüñ sánditiña? ¿Adímurejatiña súngebui dimúrei buri teréncha? ¿Gayára jamúti súngebui míni lán buri dimúrei ligía aríñaga? Uá. ³¹ Buíti lubeíti lun jáfaagun lun jibíjini lubuídun-ágei buri ubáfu lúmagiñe Búngiu, áni níjein ában cátei lun jáfaagun lun jibíjini, buítimaati sügú láu sún buri ubáfu ligía, ínsiñeni cátei ligía, narúfudaja jun luágu.

Ínsiñeni

13 Ánjawa jamúga gabáfu lun wadímurejani sun luwúyeri dimúrei le adímurejoúbei ubouágu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asiedu le areínchuti. ² Ánjein jamúga gayára ladímurejan Búngiu wayúmulugugiñe, subúdi wamei sún buri lujúlilin-ágei inárüni arámudaguati áni níjein sun luwúyeri subúdi wáma, áni weíri ligía wafíñen darí jamúga lun gayára lan wagídaruni ában wúbü lídaangiñe lubára láu afíñeni ligía, sun líra áni mínsiñejabutiwa, ni cáta wagía. ³ Ánjein wíchiga sun le wámabei murúsun murúsun joun gudémetiña darí lagúmuchun, madúgünga wamei láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

⁴ Le jínsiñejabúbei gagúraasunti, areídati, áni magímugati, mapántati, manáangun ligía lúngua.

⁵ Manárimeguti, máma rügúñein luouguá laritagua, magáñidunti, máguayugüdünti wuríbani luágu wuríbani. ⁶ Magúndaarunti láu jafígoun ámu, lagúndaarun dan le janúgün gürígia ában úma le richábei. ⁷ Awánda lumúti sun cátei, afíñeti buídu jawágu súngebui, afíñeti luágu gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachúlürüba dan, dánme le lagíribudun Jesucrístu ubouágun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime gíñe subúdi. Ánjeinti ínsiñeni, leréderuba lun sun dan. ⁹ Guetó, murúsun

rügúñein wasúbudirun, murúsun rügúñein gíñe wafúraanguagüdüni dimúrei le ladímurejabei Búngiu wayúmulugugiñe. ¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibe guetó, memégeirunwabei, lagúmuchugaba.

¹¹ Dán meja le irájüñügiwiwa, quei meja irájüñü wadímureja, quei meja irájüñü wasáminara, quei gíñe meja irájüñü warítagua, ánjeinti dan le wügúriñajadiwa, ába wígiruni le jáni irájüñü. ¹² Guetó, louguati wasúbudirun luágu Búngiu lúma luágu luwádigimari, waríjini camá buri cátei le maríjinti buídu tídan ában isúbusein. Lachúlürüba wéyu lun waríjini Búngiu furáangu. Guetó, louguati wasúbudiruni buri cátei, wasúbudirubei Búngiu le gumúti lídanme wéyu ligía queísi lasúbudiruniwa Búngiu guetó. ¹³ Afíñeni, eménigini lúma ínsiñeni ladúraruba lun sun dan, áni ínsiñeni, weíritimaabei lídaangiñe úruwagubei.

Ladímurejoún dimúrei teréncha

14 Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá gíñe lun líchugun Búngiu ubáfu le líchugubei joun afíñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia. ² Buítimaati lun jáluajan ladímurejan Búngiu jiyúmulugugiñe sügú láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügúñein asúbudirei líla dimúrei le ladímurejabei. Le laríñagubei, lídaangiñe Sífiri Sándu laríñagei, ánjeinti laníchigu, arámudaguati luei jasúbudin gürígia. ³ Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dúgüdaguaü joun lúma gurásu. ⁴ Le adímurejati dimúrei teréncha, lúngua rügúñein líderagua lídan leíbugun lúma Búngiu, ánjeinti le iyúmulugugiñebei ladímureja Búngiu, awáansegüda lumútiña lánigu Búngiu lídan jeíbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügú láu ladímurejoún dimúrei teréncha, ánjein gubeirügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeíbugun lúma Búngiu. ⁶ Ligía lubeíti nidújeñu, ánjana ñúdüñ bisídaün, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeirügü gíñe adímureja jun lídan werérun luágu cátei le lasúbudiragüdüñ Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña quei ában jémpulu. ílagu buri ligía, mabágariti, quei buri fídu, gidára, ánjein wásiñera asúbudira furáangu ca lan nóta afarúbei, ibídiñebei woun ca lan urému le wagáambajabei. ⁸ Án-

jein mínwirun fídu ában ínwiruni furáanguti wuríbu-rugu, úabei ni ában aráanseruti lun lídin ageíndagua. ⁹ Ligía méme gíñe asúseredubei wáma. ánjawa maríñagun dimúrei le gayáraati gunfaráandawa lan, ¿ída lubági lasúbudirúniwa ca lan waríñagubei? ¿Wadí-murejaña lun garábali! ¹⁰ Gíbeti luwúyerigu dimúrei uboúagu, áni sún buri dimúrei ligía richáti joun ja gunfaráandabalin, ¹¹ ánjein úa lubeí gunfaráanda náni dimúrei le áubei ladímurejoúa nun, terénchabadiña lun gürígia le adímurejabei nun, áni terénchabei gíñe gürígia ligía nun. ¹² Ligía, quei weíri lubeí jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriaian lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía. ¹⁴ Ánjana ayúmuragua lun Búngiu láu dimúrei teréncha, inárüni luágu nayúmuruña lan láu náni espíritu, líla le naríñagubei, ibíñeti nun. ¹⁵ ¿Cáteiti lúnbei wadúgüni? Lídan adámurini gayáraati wayúmurgun láu dimúrei teréncha, lúnti gíñe wayúmurgun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati. ¹⁶ Ánjein badímurejaña lubeí lun Búngiu luágu luweírigin láu dimúrei teréncha, gürígia únabugutiña ja agáambubalibu siñábei júaradun búma, lugúndun úati gunfaráanda jamáni le baríñagubei. ¹⁷ Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügú jáu sun jugúya, ¹⁹ áni jímein numúti naríñagun seíngü dimúrei le gunfaráandawati lídan jóundaragun tílana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame quei weínamujaña lídan ligáburi jasáminarun. ²¹ Laríñajare tídan lilíburun lúrudu. “Nadímurejaba joun lílana fulásu le lídan ámu luwúyeri dimúrei, lúma jayúmugugiñe teréncha, ni ítara, mebésenbaña náu, líña laríñagun Jabúreme Búngiu.” ²² Ubáfu lubeíti lun ladímurejoúniwa ámuñegueinarügü dimúrei, seríwiti liseínime lubáfu Búngiu joun ja mafíñebaña, máma joun ja afíñebaña. Ánjeinti ubáfu lun ladímurejan Búngiu jayúmugugiñe gürígia, seríwiti liseínime lubáfu Búngiu joun afíñetiña luágu Jesucrístu, máma joun ja mafíñebaña. ²³ Dan lubeíti le oúndaragua jamá sun tílana ligílisi, ánjein jadímurejaña lubeí sun jugúya dimúrei teréncha, ába jebélurun mafíñetiña jánwoun, o gürígia lan ja ibídiñegilibei luágu ubáfu le joun, ¿ma jaríñaguba luágu lúlújali lan jáu? ²⁴ Ánjein ladímurejaña lubeí Búngiu jiyúmugugiñe, ába lebélorun ában le mafíñeti, ladáriraguba lúngua luágu gafígoun lan dánme le lagáambuni le jaríñagubei. ²⁵ Ítara lúba lafún-

raangudun cátei arámudaguati le tídaanbei lanígi, ábame lájuduragun íchiga inébesei lun Búngiu, aríñaga ligíame luágu níjein lan Búngiu júma le tímatimaati.

Adúga jumeí sun cátei lídan lubúdubu

²⁶ Nidújeñu, niján lubeíti igáburi le lúnbei jóuseruni lídan jidámurin. Dan le jóundaragun lun jájuduragun lun Búngiu, añájeinbaña jídaangiñe láu urému o arúfudajani, o cátei le lasúbudiragüdü Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adúga jumeí lun méme jawáanserun tílana ligílisi lídan cátei le luáguti Búngiu. ²⁷ Dan le ladímurejoún lídan dimúrei teréncha, biámarügü jamá gürígia adímureja, o úrúwa, áni ában ábanlá gíñe jadímurejan, lúnti gíñe níjein lan ában lun lafúnraanguagüdüni le jaríñagubei. ²⁸ Ánjein úa lubeí ni ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu. ²⁹ Ánjein gíñe luáguti lubeí ladímurejan Búngiu jayúmugugiñe gürígia, biámarügü o úrúwa jamá gürígia adímureja, ja jíbiri lun jaríjin ánjein lúmagiñeti lubeí Búngiu le aríñawagúbei lúmoun máma lan lúmagiñeti. ³⁰ Ánjein asúbudiragüda Búngiu ában cátei lun ámu gürígia le ñun umúti lun líchuguni lun guríriguaü, lúnti lámánichun le adímurejabei lun líchugun dan lun, lun ladímurejan. ³¹ Ítara, sun jugúya le iyúmugugiñebei ladímureja Búngiu, gayáraabei jadímurejan ában ában lun jafúrendeirun súngubei, ragú jugúyame gurásu. ³² Ja iyúmugugiñebaña ladímureja Búngiu, lúnti jágüdaagun jóungua darí lachúlürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queísi jagáburi jíbiri wadújeñu lídan wafíñen dan le jadámuridagun, ³⁴ moún lumuti jadímurejan wúriña lídan jadámurin afíñetiña lugúndun majoúati lun cátei le. Lúnti gagáambadi jamá quei laríñaguni lilírudun Búngiu. ³⁵ Ánjein busén jabei jasúbudirun ában cátei, álügüda jameí jámari jábiñe, lugúndun mabuídunti laríaajoún lun tadímurejan ában wúri lídan jadámurin afíñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün gíñe jugúya erésibirei. ³⁷ Le jarítagubei luágu gabáfu lan lun ladímurejan Búngiu liyúmugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabúrújabei jun. ³⁸ Ánjein manügún lan ítara, reideilá lídan libídiouniga láu.

³⁹ Ítara líña lubeíti nidújeñu, áfaagua jumá lun gayára lan ladímurejan Búngiu jiyúmugugiñe, mamájará jumá lun ladímurejoún lídan dimúrei teréncha, ⁴⁰ adúgarüga jumeí sun cátei lídan lubúdubu.

Lásaarun Crístu lídaangiñe óuweni

15 Guetóti nidújeñu, buséntina lun jarítangun luágu ugánu lé meja apúrichija náalibei jun luágu Jesu-crístu le Wasálbaragüle. Niján ugánu ligia le jerésibirubei, le gíñe ídaanbei derégüdagu lan jafíñen. ² Sálbatün gíñe lun sun dan ladúga jafíñen luágu ugánu le, ánjein jafálara le uágubei napúrichija jun, ánjein gíñe láu lubei jinárün jafíñera.

³ Furúmiñeti cátei, arúfudaja náali le furéndeí náalibei luágu Wasálbaragüle jun, luágu jilá lan Crístu luágu wafígoun, queisi taríñaguni Lerérun Búngiu luágu lúnti lan lasúseredun. ⁴ Lárigiñe meja loúnwen, ába labunún, ába lásaarun lídaangiñe óuweni luágu lúruwan wéyu queisi taríñaguni Lerérun Búngiu luágu le lúnbei lasúseredun. ⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu. ⁶ Lárigiñe, ába larúfudagun lúngua joun sügú jáu seíngü-san afíñetiña ja oúndarañubaña lídan ában, áni añájeingua sarágu jádaangiñe, wíngwagiña chülú lúmoun dán le, ja jíbiri, jilágu. ⁷ Lárigiñe, ában larúfudagun lúngua lun Jacóbo, lárigiñe, joun sun apóstolugu.

⁸ Agúmujoúni, járigiñe súngebui, ába gíñe larúfudagun lúngua nun, láu sun ítara níña lan quei ában le agúriajóuti lídan ában igáburi le múaraanti, ⁹ lugúndun áu lan ni cátatimáabei jádan apóstolugu, madúnatina ni lun nanügún quei apóstolu, lugúndun eíbaaja numútiña méja tílana líligilisin Búngiu. ¹⁰ Áu le áubei guetó lugúndun lareídun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaadina sügú jáu jíbiri apóstolugu, láu sun máma lan áu ñadágimeinbei, Búngiu le nómabei láu lareíni, ligía ñadágimeinbei nídaangiñe. ¹¹ Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe óuweni, áni niján gíñe uágubei jafíñera.

Jásaarun jiláaña lídaangiñe óuweni

¹² Queisi wapúrichijan luágu saráali lan Jesucrístu lídaangiñe óuweni, ába jerésibiruni, zída liñáti añájein lubei jádaangiñe aríñagatiña luágu másaarun jamá jíbiri jiláaña? ¹³ Ánjein másaarun jabei jíbiri jiláaña, másaarunti lubei gíñe Crístu lídaangiñe óuweni, ¹⁴ áni ánjeinti másaarun lubei Crístu lídaangiñe óuweni, málati ugánu le wapúrichijabei luágu asálbaruni, málati gíñe afíñeni le juágubei. ¹⁵ Ánjein ítara líña lubei, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe óuweni, ánjein máma lubei inárüni luágu sará jamá jiláaña, máma gíñe inárüni luágu sarágüda láani Búngiu Crístu lídaangiñe óuweni. ¹⁶ Lugúndun ánjein másaarun jabei jiláaña, ni Crístu, másaarunti gíñe lídaangiñe óuweni, ¹⁷ áni ánjeinti jiláñugili lubei Crístu, mesériwinti jafíñen lun ni cáta, lídaangidün jifígoun ligíbugiñe Búngiu. ¹⁸ Áni ánjein ítara líña lubei,

féridiñu jáña gíñe ja óúwegubaña láu jafíñen luágu Crístu. ¹⁹ ¡Ánjein lúntirügü lubei ibágari le weménigi luágu Crístu, fugiábu wagía jádaangiñe súngebui!

²⁰ Le inárünitibei, saráti Crístu lídaangiñe óuweni lúnya labágaridun, ligía furúmiñetibei ásaaruti lídaangiñe óuweni lun moúnwendügüyaali lan, áni ítara lúba jásaarun sun lánigu. ²¹ Ítara quei lídaangiñe lan ában wügúri lagúmesera óuweni uboúagu, lídaangiñe gíñe ában wügúri lagúmesera jásaarun jiláaña. ²² Ítara quei jóúwegun súngebui ladúga lídaangiñe lan Adán jayábin, ítara lubá gíñe gabágaríya jamá súngebui lárigiñe óuweni ladúga lánigu jamá Crístu. ²³ Lúnti lásaarun cáda ában lídan lídaani. furúmiñeti meja ásaaruti, Crístu, lárigiñeme, dánme le lagíribudun Crístu uboúagan, ligíame jásaarun lánigu lídaangiñe óuweni. ²⁴ Ligíabati liábin lagúmchagüle sun cátei, ábame lagúnrinchaguni Crístu sun líbiri luwúyeri árueijani, ubáfu, lúma érei le uboúagubei, ábame ledéregeruni árueijani lun Búngiu Úguchili. ²⁵ Larúeija-ba Crístu daríme gáñeigüda láali Búngiu wuríbu lun jawágu sun láganiñu, ²⁶ óuweni, ligiaba lagúmujoún ágani agúnrinchawagúti. ²⁷ Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu. ²⁸ Dánmeti le reideijali sun sun cátei lábugiñe lubáfu Crístu, ábame leréderun Crístu, le Liraú Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹ Añájein jádaangiñe, abásterutiña jewéñegua ja óúwetiña mabásterunga. ¿Cámegi jadúgei lira? Ánjein másaarun jabei jiláaña, ¿cámegi ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnrügü weíbaajoún lueigiñe. ³¹ Ságú wéyu yaráfa wamá lun woúnwen, inárüniti líra nidújeñu, queisi ugúndani le nasándirubei juágu queisi afíñetiña luágu Wabúreme Jesucrístu.

³² Ageíndaguatiña wügúriña ja ítarabaña quei anímaalugu janárimetiña ya Éfeso núma, ladúga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubei luágu úabei lan ibágari lárigiñe óuweni, richátiña jamúga ja aríñagubaña. “Jóuwama, guráwama, lugúndun jarúga woúwegua.”

³³ Mayeedúa jumá. Aríñawagúati. “Féridigüda jamúti jagúbüri umádagu lubuídun igáburi.” Inárüni líra.

³⁴ Darígua jumá júngua, giríbu jumá lun ában ibágari le surúti, mafígouja jumá. Añájein jádaangiñe, ibídiñeti Búngiu joun. Naríñaguñein le lun janúgün busíganu.

Ída lúba ligáburi jásaarun jiláaña

³⁵ Fágua níjeinbei álügüdajati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?”

³⁶ Libídiouniga láu álügüdajani líra. Dan le labunún ában ílaü, gásu lañáladun lábugiñe múa furúmiñe lubá gayára lan laboúchun. ³⁷ Máma nádü le lúnbei

lájüchün abunúbei, ílaü abunúbei, furúmieguárügü le luwúyeribei. ³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü. ³⁹ Mára ában lábu sun úgubu, ámu luwúyeri jágubu gürígia, ámu jágubu anímaalu, ámu jágubu dunúru, ámu jágubu úduraü. ⁴⁰ Níjein gíñe buri cátei siéluna queísi wéyu, játi, warúguma, queísigubeirügü níjein lan uboúaguna, ámu lubuídunmeraü buri le siéluna lueí le uboúaguna. ⁴¹ Ámu larúni wéyu lueí larúni játi, ámu gíñe jarúni warúguma, áni jádaanguanarügü warúguma, ámuñegueinarügü jarúni jawáriuagua. ⁴² Ítara líña gíñe lídan jásaarun jiláña, ámubei jágubu, labunúa ában úgubu le gañáladaditi, lásaarame le moúnwenjali. ⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti. ⁴⁴ Labunúa ában úgubu le ídaanbei wabágarida ya uboúagu, lásaarame ában úgubu le ídaanbei wabágarida yágüta siélu. Ánjein ibíja wabeí wágubu lánina uboú, wibíjibeí gíñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügúri, ában meja wügúri wíwanti”, ánjeinti Crístu, le gíríbeí gíñe lagúmujóun Adán, ában espíritu ligía le íchugubei ibágarí. ⁴⁶ Furúmiñe ibíja wamúti ibágarí le uboúaguna, lárigiñe, ábame wibíjini ibágarí le lánina siélu. ⁴⁷ Lé meja furúmiñeti wügúri le adügúbeí láu múa, uboúaguna meja, libíaman wügúri le Wabúreme Jesucrístu, siéluna. ⁴⁸ Sun gürígia uboúagu ítara líña jágubu quei lúgubu Adán le adügúbeí láu múa, sun lánigu Crístu, jabíjuba jágubu quei lúgubu Crístu, le siélnabei. ⁴⁹ Wágubu guetó, líbe lúgubu Adán, le lánina uboú, lachúlürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le naríñagubei, nidújeñu, luágu siñá lan jebélurun gürígia láu jágubu le uboúaguna lídoun larúeijan Búngiu siélu, lugúndun cátei le goúwedadibeí siñáti gabára lan lídan fulásu le ní lubei úa lan ouweni.

⁵¹ Buséntina lun jasúbudiruni cátei lé meja ará-mudaguabei le. Mára sun lánigu Crístu lun jóuweguba lan, jasáansirawagúba súnubei, ánjein wíngangiña lubeí dánme lagíríbudun Jesúsu o jiláña lan,

⁵² Lídan murúsun óra, furése furése quei ában léfegechun luma lámurudun águu, dánme le lagaambúniwa lumálali fídu, le liseíni lagúmujóun sun cátei. Línwiruba fídu, ábame jásaarun lánigu Crístu ja jiláñababañe lun moúnwendügüyaaña lan, ja moúnwengiñababañe, ábame jasáansirawagún lídan méme óra ligía. ⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le goúwedadibeí, lasáansiraguba lídoun le moúwedadibeí. ⁵⁴ Dánme le saansiguaali wágubu le goúwedadibeí lídoun le moúwedadibeí, ábamei lagúnfulirun le bürúwañubei tídan Lerérun Búngiu. “Gumúja lubáfu ouweni, féridilá wuríbu. ⁵⁵ Oúweni, ¿jigeígi bubáfu lun bagúmuchaaguagüdüniwa? ¿Jigeígi agáñeiruni lé nege lúnbei

badügüni?” ⁵⁶ Figoú lébunabei ouweni, áni binádu lilúrudun Moisés, ligía arúfudubalin woun cátei lan figoúbei lun wayúmajani. ⁵⁷ Teínqui wáña lun Búngiu luágu lagáñeiragüdüniwa luágu sún buri cátei le, láu lubáfu Wabúreme Jesucrístu.

⁵⁸ Ligía lubeíti nidújeñu jínsiñetiña nun, ítara méme jumá derégüdagu lídan jafíñen, meréderagunga, ñadágimein súnwandan, gánwoun gueíñarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadügúbeí lídan ában luma Wabúreme Jesucrístu.

Loúndarún seínsu joun idújeñu lueígiñe Jesucrístu

16 Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adúga jumeí quei narúfudajani tídan sun ligílisi loúbawagu Galácia. ² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachúlürün, merédedünme oundaragua seínsu. ³ Dánmeti le nachúlürün, noúnajabaña gürígia ja janúadajabaña ubúruyu Jerusalén, ábame níchugun gárada joun lun janúgüni seínsu le jóundarubei joun wadújeñu ja níbaña. ⁴ Ánjein gíñe lun lubeí nídin, jóudiba núma.

Laráansejan Páblo lubá luweíyasun

⁵ Lídan nuweíyasun, násügürüba loúbawagugiñe Macedónia lun neréderun átiri wéyu ní, nachúlürüba lubeíti ubúruyu Corínto lárigiñe. ⁶ Fágua neréderagun júma átiri dan, o násügürüni lan sun juyáabun ní, gayáraabeiti jíderagunina lídan nuweíyasun léme níjin lumúti nídin lárigiñe nebélujan júmoun.

⁷ Mabúseerúntina chúlúguarügü nan aríjaün, buséntina neréderagun átiri dan júma, ánjein busén Wabúreme. ⁸ Neréderuba ya ubúruyu Éfeso darí luwéyuri Pentecostés, ⁹ lugúndun níjein ában oúnwembun cháansi nuágu lun nadímurejan luágu Wabúreme Jesucrístu ya, áni buídubei lanúgün. Añájein gíñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubeí nígiruni Éfeso guetó.

¹⁰ Dánme le lachúlürün Timotéo, jóucha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queísi áu. ¹¹ Manúga jumeí quei ni cáta. Dánme le gumúlaali lidáni júma, jíderagueime lun gayára lan lagíríbudun númoun láu ában ugúndani tídan lanígi luágu lubuídun lidáni júma. Nagúrabajañein ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara luma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénreenguti lídin guetó, lídiba dánme le gayára lan.

Lagúmujoún buri mábugaü

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagu jumá lídan jafíñen. Agáburida jumá quei wügúriña ja awáanserubaña lídan le inárünibei, manúfudeiga, jére jumá, gáñei jumámuga luágu wuríbani. ¹⁴ Sun cátei le jadúgübei, adúga jumeí láu ínsiñejabuni.

¹⁵ Nidújeñu, subúdi jumúti luágu Estéfnas lan jáma sun tílana lúban furúmiñebaña louúbawagua Acáya ígirutiña binádu jagáburi lun jerésibiruni Crístu, luágu gíñe derégeguaaña lan jóungua lun jesériwidun joun wadújeñu lídan afíñeni lídan furúmieguaügü cátei le jayáraati. ¹⁶ Buséntina lubeíti lun gíñe jíchaagun júngua joun, lúma joun sun ja ídejabaña, ñadágimein jagía ítara. ¹⁷ Gúndaatina láu jayábin Estéfnas, Fortunáto, lúma Acáico ñájoun. Weíriñajati nisáminan

juágu, áni siñáti jíábin sun jugúya, ¹⁸ ába jíchugun wügúriña jagía gurásu nun láu janúgün ugánu nun juágu. Afíñetina luágu janúgüba lan gíñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña tílana ligílisi buri to louúbawaguboun Ásia jun. Mábuga jáña gíñe Aquíla túma Priscíla jáma sun ja óundaragubaña jábiñe jun, queísi afíñetiña luágu Crístu. ²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabúrújabei láu nújabu lúma nilétüan.

²² Le mínsiñejabuti lun Wabúreme Jesucrístu, reídeilá lábugiñe líñaragun Búngiu. ¡Giríbubá furése uboúagun, Wabúreme!

²³ Binílaün Wabúreme Jesucrístu. ²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

2 CORINTIOS

Abúsuraguni

1 Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabúrújañoun gárada to jun, jugúra le tílanabei ligílisi to ubúruguboun Corínto, lúma joun sun lánigu Búngiu ja loúbawagubaña Acáya. ² Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarügü óra. ⁴ Rúti gurásu woun lídan sun wasúfurirun, lun gíñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwúyeri igáburi le líchugubei woun. ⁵ Lugúndun ítara quei luweírín wasúfurirun luágu líri Crístu, ítara gíñe werésibirun ában oúnwenbun gurásu lúmagiñe. ⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun gíñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷ Derégüdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsiiti woun luágu láu sun lan jasúfurirun luágu líri Crístu queísi wasúfurirun, jerésibiruba lan gíñe gurásu lúmagiñe Búngiu queísigubeirügü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei loúbawagu Ásia. Deréti oúchawagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun ñígiñe. ⁹ Sandíguaadiwa yebe woúngua queísi gürígia ja síadiwaaña lun jounwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragüdüniña jiláaña, máma lun wawoúgua lan weménigida. ¹⁰ Séfu lumútiwa Búngiu dán buri meja ligía le yaráfa wabeí lun woúnwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan, ¹¹ ánjava jíderagua láu jayúmuragun lun Búngiu

wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteín-giruni lun Búngiu luágu fuleísei lániwa láu leséfuruniwa.

Ca lan uágu lasáansiraguei Páblo larítangun luágu luweíyasun ubúrugun Corínto

¹² Níjein ában cátei agúndaaragüdütiwa. laríñagun warítangun woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburidun ítara, madúgüntiwa ni cátei láu lichú wáu guánarügü. ¹³ Lídan le wabúrújanbei jun tídan wagáradan, úati ni cáta arámudaguati ñi le jásiñerun alíija o gunfaráanda. ¹⁴ Guetó subúdiraüjadün luágu gayára lan jagúndaaragun wáu quei jumáesturungu, chúlú lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanme wéyu le lagíribudagüle Jesucrístu uboúagun.

¹⁵ Queísi méja afíñe nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdüñun láu bisída nánün bián weíyaasu— ¹⁶ jarítagutiná yebe nachúlaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachúlaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun. ¹⁷ Madúgün numúti. ¿Jálügüdaguñasan júngua ca lan ueígiñe madúgün nubálin? ¿Masáminarun numúti funásan quei lubúdubu dan lé meja naríñagubei jun luágu nadúgübei lan cátei le? ¿Jarítaguatün luágu ítara níña lan queísi lirájüñü uboú ja aríñagubaña ában cátei áni magúnfuliruntiña láu jerérun? ¹⁸ Geféenti Búngiu luágu maríñagun wamá ában cátei jun magúnfulirunga wagía láu. ¹⁹ Sun wagía—Silváno, Timotéo, áu—apúrichijatiwa jun luágu Jesucrístu, le Liraú Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladúgüni le laríñagubei. ²⁰ Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadí-murejan lúma Búngiu luágu luweírigin, ayúmuragua wagía lun, ába waríñagun “ítaralá” lun warúfuduni wafíñerun luágu ladúgúwaba lan lídan líri Jesucrístu. ²¹ Búngiu adúgübei lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun. ²² Rúlaali Sífiri Sándu wádoun

lun larúfuduni luágu lánigu wamá. Sífiri Sándu le wádaanbei, ligía queísibeí lasúbudiraja le lúnbei werésibiruni queísi lánigu Búngiu. Queísi ítara líña lubeí, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedónioun queí yebe narítaguni lugúndun-rügü mabúseerun nan nírudaguagüdüünün láu ában ébechuni, geféenti Búngiu luágu líra. Ánjein máma lubeí líña, aráansetina lun noúnabun láu nibágari guá-narügü. ²⁴ Máma jamúgatia wabúseeruña waríñagun jun. “Nijánba jaffíñera”, derégüdaguaadün lídan jaffíñen, busénrügütiwa wíderagunün lúntima lagán-woundun jagúndaarun.

2 Ligía mídinya nubeí bisídaün lun nírudaguagüdüün. ² Lugúndun ¿ída lubásan gayára lan jamúga nagúndaarun lárigiñe níchuguni íruni joun gürígia ja agúndaaraguagüdübalina? Siñáti jamúga. ³ Ligía nabúrűjanbei jun ítara, lun gayára lan jaráanseruni cátei le mégeibeí jídaangua lubáragiñe nachúlűrűn júmoun, dánme lámuga nachúlűrűn, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani. ⁴ Dán meja le nabúrűjanbarun gárada tugúya jun, weíríti meja nidíjeri juágu darí lun nayájun lídan le nabúrűjabarun. Máma meja lun nírudaguagüdüünün nabúrűjoun jun ítara, nabúrűjanun lun jasúbudiruni luweírín nínsiñejabu jun.

Ferúndun lun lé meja afigounjabei

⁵ Le rújalibeí íruni láu luríban leménerun, máma rügűñein nun líchiga íruni, rúlumuti gíñe jun lídan ában luwúyeri. Naríñagunbei “lídan ában luwúyeri” lun maweírín lan naweírídaguagüdüni jun. ⁶ Abeíchuni lé meja jaríñagubeí lídan jadámurin lun líchugúniwa luágu gürígia ligía, buídurügaali. ⁷ Guetó, lúnti ferú-duna jumáni, ru jugúyame gurásu lun lueí ladúgün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsiñejabu lun. ⁹ Abúrűjatina jun luágu cátei le lun gíñe nasúbudiruni ánjein aráanse jubeí lun jadúgüni le nubeíbei jun. ¹⁰ Guetóti, le únti ferúnduna jumá furúmiegurügü cátei, ferúnduna nubeí gíñe, ánjein gíñe níjein lubeí cátei le lúnti ferúnduna náni gürígia ligía luágu, ferúnduna numúti ligíbugiñe Crístu, jueígiñe. ¹¹ Lídan ában cátei líbe líra, mabúseerútiwa wíchugun lúgaaru lun Máfia lun lanúgün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítagun Páblo ubúruгу Tróas

¹² Dán meja le nachúlűrűnbei ubúruгу Tróas lun napúrichijani ugánu luáguti Crístu, ába nibíjin ában oúnwenbun cháansi ñi lun nuwádigimaridun luágu Wabúreme. ¹³ Madárangilaanti narítagun lugúndun madári náni wadúje Títo Tróas lun nagáambun lúma

juágu. Ligía nayoúragunbei joun wadújeñu ja Tróas-bañá, ába nídin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasálirun sun cátei. Teínqui wamúti Búngiu le anúgübaliwa lídoun sun fulásu, amáhareina wagía lábugiñe lagúmadijan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lírimichúniwa lí-jeme cupáli. ¹⁵ Lugúndun ítara wáña queí cupáli le lágudajabei Crístu lun Búngiu, ñűdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun je-féridirun. ¹⁶ Joun ja merésibirunbalin ugánu ligía, ítara líña queí ában íjemeni le gáfarajati, ánjein joun ja erésibirubalin, ítara líña queí ában árani le areídaguagüdüti. ¿Cáti gabáfubeí lun lasúbudiragüdüni ugánu luáguti Crístu? ¹⁷ Wagía le loúnajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárűn Búngiu queí jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérun Búngiu queí lubeí, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

Ugánu luáguti iséri darádu

3 Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawoungua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruniwa, o wamúriajan lan gárada júmagiñetu joun ámu mútu, queí jadúga jíbiri mútu? ² Uá, lugúndun jugúya afíñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña queí ában gárada to bűrűwañutu tídan wanígi, to gayáraaboun jalíjanun sun gürígia, asúbudiragüdei cátawa lan. ³ Ítara jíña queísi ában gárada to labúrűjan Crístu guá-narügü, to wedéregeruboun, ában gárada jugúya to abúrűjóuboun láu láni Búngiu le wínwanbei Espíritu, máma láu tínta, áni tídan janígi ladúgei Espíritu ligía wadágimanu, máma luágu dübü.

⁴ Gayáraati waríñagun luágu buídu lan wesériwidun lun Crístu ladúga wadúgüni jeménigiñu luágu Búngiu lun líchuguni ubáfu woun lídaangiñe Jesucrístu.

⁵ Mabáfutiwa lun ni cáta láu wáni woúngua, sun le wayáraabei adúga, lúmagiñe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti queí lé meja binádu, lé meja lánina lúrudu bűrűwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü

lumúti wafígoun ligíbugiñe Búngiu, figoú ligía, óuweni lafáyeijabei. Ánjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abúrújouati luágu dúbü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában óunwenbun larúgounga lúmagiñeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíríti lámiridun ligíbu. Láu sun líra, ába éñeguicheina lan larúgounga ligía murúsun murúsun. Ánjein láu lubeí sarágu uweíríguni liábin lúrudu ligía le asíadijabei gürígia lun óuweni, ⁸ ;weírítimaati luweírígoun ugánu le lanúgübei Sífiri Sándu woun luágu Wasálbaragüle! ⁹ Ánjein weíri lubeí luweírígoun meja lúrudu le esériwidubei lun larúfuduni wadúnrun ligíbugiñe Búngiu woun, ;weírítimaati luweírígoun ugánu luágu Wasálbaragüle le adúgübalíwa richágu ligíbugiñe Búngiu! ¹⁰ Ni cáta luweírígoun lilúrudun Moisés ligíbugiñe luweírígoun Wasálbaragüle. ¹¹ Ánjeinti weírígu lubeí meja darádu le lúnbei ladúrarun murúsunrúgü dan, weírítimaati luweírígoun darádu le lúnbei ladúrarun lun sun dan.

¹² Ladúga níjein lan eménigini le wawágu, luágu siñá lan leféridiruni ugánu luáguti Crístu luweírígoun, wapúrichijánbei furáangu. ¹³ Madúgüntiwa queí meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chúlú lúmoun dan le, dan le jalíjanun líburu buri to labúrújaboun Moisés, darúguatu ában bélu láu jachúgü lueí gunfaráanda jamá. ¹⁶ Ánjeinti dan le lígiruni ában gürígia binádu ligáburi lun leíbugun lúma Crístu, ába tagídarún bélu tugúya lueí. ¹⁷ Wabúreme Crístu, ligía Espírítu le íchugubei ibágari. Láu Espírítu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubeí wagía afíñetiña luágu Crístu, gidáwaaru bélu lueí wasáminan, subúdi wamúti Crístu furáangu, láu sun luweírígoun. Ítara wáña queí ában isúbusein to arúfudubalin luweírígoun Wabúreme Crístu, áni láu wasígirun íchigei warítagun luágoun, sáansiguagüda lumútiwa láni Espírítu murúsun murúsun lun ítara wamá queí ligía.

4 Máburujalá lubeíti warúna, lugúndun rúlaali Búngiu wadágimanu le lábun waríajaan, láu lareíni. ² Mayúsuruntiwa ibíbuni lun wafíñeragüdüniña gürígia luágu Crístu, rúwamuti wanágan luágoun cátei le adúgübei arámudaguarügü, le nibúsigarídünabei. Masáansiragun wameí Lerérun Búngiu, inárüni

rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu. ³ Ánjein mafúraangun lubeí werérun luáguti Wasálbaragüle, jóun rügüñein ja lúnbaña jeféridirun mafúraangun lan. ⁴ Queí mafíñen jabei luágu werérun, darúlaali Máfia, le lubúngiutebei uboú le, jaríjin lun siñá lan larúgoungadagüdüni ugánu luáguti Crístu le weírígubei, le liyáwabei Búngiu wínwanti, jasáminan. ⁵ Dan le wapúrichijanbei, máma wawoúgua wapúrichija, luágu Jesucrístu wapúrichija, queísi Wabúreme, waríñagati wawoúgua luágu esériwidutiñarügü lan wagía jun, luágu wínsiñejabu lun Jesúsu. ⁶ Lugúndun Búngiu, le méme íchugubalin lámputu siélu lun lagídarúniwa lubúriga, ligía gíñe adúnraaguagüdübalin lilámpun tídan wanígi, lun gayáraabei lan wasúbudiruni luweírígoun Búngiu le waríjibeí lídan Jesucrístu.

Abágariduni láu eménigi luágu Búngiu

⁷ Larúgounga le wibíjubei luágu luweírígoun Búngiu le lídaanbei Crístu, ítara líña queí ában irisini woun. Barú wamuti irisini ligía lídan fugiábu wágubu, le ítarabei queí ában soúdieru, lun laríjiniwa luágu lúmagiñe lan Búngiu liábin óunwenbun ubáfu le wawágubei, máma wámagiñe. ⁸ Ítara, láu sun súfuri wamá sun luwúyeri lénreengúnga, súnwandan larúfudun Búngiu ában úma woun lun wáfuridun lídaangiñe furúmieguarügü lénreengúnga. Níjein dan, weíríti wadíjeri luágu cába lan wadúga, máburujaanti warúna, lugúndun íderagua lániwa Búngiu. ⁹ Eíbaajouatiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu queí jiláaña, siñáti jagúmuchaaguagüdüniwa. ¹⁰ Le ñílumuti wóudin, buséntiña wáganiñu jáfaraguniwa jilágubei queí jáfaruni láganiñu Jesúsu jilágubei. Lúnti ítara lúba lan lun gayáraabei lan laríjiniwa lubáfu Crístu le wínwanbei wádaangiñe. ¹¹ Wagía, sun awánja lan abágarida, yaráfañu wáña lun woúnwen furúmieguarügü wéyu lueígiñe Jesúsu, lun gayára lan laríjiniwa libágari Jesúsu wádaangiñe. ¹² Ítara líña lubeíti, láu yaráfañu wamá lun óuweni lun wíchuguni ugánu jun luágu Wasálbaragüle, resíbi jumúti ibágari magúmuchaditi.

¹³ Laríñajare David tídan Lerérun Búngiu. “Afíñetina, ligía nadímurejánbei”, ítara giñéti afíñetiwa luágu Búngiu láu méme ligáburi afíñeni le meja luágubei David. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdübalin Jesúsu lídaangiñe óuweni, lásaaragüdübalíwa lan gíñe lúnya wabágaridun, úara lúma Jesúsu, ábame lanúgüniwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja áñarubaña lun lareíni Búngiu joun, gíbe jamámuga gíñe íchugutiña eteíngiruni lun luágu lareíni. Ítara lúba iñurúañu lan líri Búngiu.

¹⁶ Ligía máburujan lubeíti warúna. Óuwedeina líña wágubu murúsun murúsun, wawáni, tedérebuguduña ságü wéyu. ¹⁷ Ni cáta le wasúfurirubei lídan ibágari le, lídan le wasáminarun luágu óunwenbun ugúndani le lúnbei wibíjini yágüta siélu dánme le ñi wamá lúma

Crístu lídan luweírigan. Maweírinti lidáani wasúfurirun woun ya uboúagu dan le wasáminarun luágu lúntibei lan dan magúmuchaditi wagúndan siélu. ¹⁸ Marítangun-tiwa sarágu luágu cátei lánina uboú le, ladúga murúsuraü lan dan ladúrarun. Le uágubei wíhigei warítangun, luágu cátei lánina siélu, ladúga cátei ligía, lúnbei sun dan ladúrarun.

5 Subúdi wamúti lubeíti luágu gayára lan woúnwen lubáragiñe lagíribudun Jesucrístu uboúagun, gayáraati loúnwen wágubu quei teíquadun ában múnawéiyáaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan.

Úgubume ligía, mámabei lánina uboú quei ában múnadügútu láu újabu, ábanbei úgubu lánina siélu.

² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu.

⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Mára jamúga wabúseeruña woúnwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibei furése furése lídoun wágubu le magúmuchadibei, moúnwenga wagía. ⁵ Búngiu aráanserubaliwa lun gabágarí wamá le magúmuchaditi, áni rúlaali Sífiri Sándu woun queisi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan uboúagu abágarida lídan wágubu, boúgudiñadiwa lan tueí wában yágüta siélu, máma lan lúmañadiwa Wabúreme. ⁷ Ya uboúagu, siñáti waríjini Crístu, gayáaruügi wafíñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímeín wamáni lun wígiruni ibágarí le ya uboúagu lun woúdin agánawa lúma Wabúreme Jesucrístu siélu. ⁹ Ligía wáfaagunbei lun wadúgüni lugúndan Wabúreme súnwandan, ya wagía yebe uboúagu, yágüta wagía yebe siélu. ¹⁰ Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbati lé meja wadúgübei dán meja le uboúagugidiwa.

Ugánu lánina darángiläü

¹¹ Ligía, quei subúdi wabálin lanúfudewa lueí lagúseragüdü Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun gíñe subúdi jumáni. ¹² Mára wadímurejañaya buídu wawoúgua, wíhuguña ában cháansi jun lun jasándiragun júngua gúndaañu wáu, lun gayára lan jóunabuniña arúfudajatiña jagánagua ja apántajabaña luágu lubuídun jarúfudagun jóungua boúgudi jabíti, áni tídan janígi mabuíduntiña. ¹³ Ánjein weíri lubeí wesériwidun lun Búngiu darí lun waríjín camá lúluñein wáu, ladúga luweírín wínsiñejabu lun Búngiu lasúsereda. Ánjein genége lubálin luágu

wesériwiduña lan lun Búngiu láu ában lidíli ichúgü, ladúga luweírín wínsiñejabu jun wadúgei. ¹⁴ Mósu nesériwidun lun Crístu táu sun nanígi lárígiñe larúfuduni luweírín línsiñejabu woun láu loúnwen lídan wafúlasun súngebei. Queísigubeirügü jamúga jilá jamá sun gürígia úara lúma dán meja le loúnwenbei.

¹⁵ Jiláti Crístu jawágu súngebei, lun sun lan ja ánjabaña lun jerésibiruni ibágarí lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni.

¹⁶ Ligía manúgün wabeí ni ában quei janúgün lirájüñü uboú gürígia, según boúgudi jabíti. Luágu méja ában dan, barú wamuti meja Crístu quei janúgüni lirájüñü uboú, mítaranjaali guetó. ¹⁷ Le lubeíti lídaanbei ában lúma Crístu, ábanjali gürígia iséri, gumúja sun cátei le lánina binádu ligáburi, labágariduña ában iséri ibágarí lúma Crístu.

¹⁸ Adúga lumúti Búngiu sun cátei le. Gáganiguatiwa meja lúma ladúga wafígoun, ába loúnajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun gürígia lúma. ¹⁹ Le naríñagubei, láu loúnwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun gürígia. ²⁰ Wayábiña lubeíti queisi wügúriña ja loúnajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueígiñe loúbadina Crístu. aráandara jumá lúma Búngiu.

²¹ Madúgünti Crístu ni ában figoú, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachúlürün abágaridei ibágarí lánina ísuruni le labúseerubei Búngiu lun wabágaridun.

6 Wagía, queisi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburi luágu máma lan luágu ni cáta jerésibirei lareíni Búngiu jun. ² Laríñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun gürígia, níderagubadibu lídan nuwéyuri lun nasálbarun gürígia.

Chülújali lidáani Búngiu lun fuleíseijabu lan joun gürígia, niján buri wéyu le luwéyuribei Búngiu lun lasálbaruniña gürígia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa gürígia lueí jagáambuniwa. Mabúseerúntiwa jamúga wanúgün minébesei lun luwádigimari Búngiu láu wagáburi, ⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírín wagúraasun lun wawánduni asúfuriruni, mégei, lúma lénreengúnga. ⁵ Beíjamaadiwa, dáüjamáwa, ínchajouátiña gürígia lun jeíbaajaniwa, jéreti wawádigimari lun Búngiu darí lun wasándirun oúnwenbun lubúcha uágu. Reídeijadiwa marúmugunga, áfaaga wagía ilá-

maü. ⁶ Arúfuda wamúti gíñe luágu esériwidutiña lan lun Búngiu wagía láu larúman wabágari, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun ibágari, dándu lun woúdin jabároun wáganiñu quei lun waráramuniña dan le jayábin wabároun. ⁸ Níjein dan ibíjatiwa inébesei, níjein dan anábawaguatiwa. Níjein dan adímurejóuati buídu wawágu, níjein dan adímurejóuati wuríbati. Níjein dan, oúsera jamútiwa quei yéetiña, níjein dan quei wügúriña ja aríñagutiña inárüni. ⁹ Níjein dan, oúsera jamútiwa quei ibídiñewatiña, níjein dan quei subúdiwatiña buídu, níjein dan, agúrabañu wáña lan woúnwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe, ¹⁰ moúnwentiwa lídaangiñe asúfuriruni ligía. Láu sun níjein lan cátei lun lírudaguagúdüniwa, níjein gíñe ugúndani lúmagiñe Búngiu tídan wanígi. Láu sun gudéme wamá según uboú, aríñagatiwa joun gürígia luágu irisini inárüniti le gayáraabei jadáriruni lídan Jesucrístu, láu sun úa lan ni cáta wáma según jarítangun lánigu uboú, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírín jínsiñe nun. ¹² Masáansiragúnti wínsiñejabu jun, láu sun affínetina luágu sáansigua lan jínsiñejabu woun. ¹³ Ayúmuraguatina jun quei layúmuragun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürígia ja mafíñetiña luágu Crístu, lugúndun janúgüba ában ibágari le múaraanti. Mamádaguati ísuruni lúma wuríbani, siñáti gíñe gamádagua lan larúgouna lúma lubúriga. ¹⁵ Siñáti níjein lan úarani lídan Crístu lúma Máfia, siñáti gíñe lúaradun ában affíneti luágu Crístu lúma ában le mafíñeti. ¹⁶ Siñáti gadúnama jamá sándu tídan lúban Búngiu, áni lúban Búngiu le wínwanbei wagía, quei laríñagun Búngiu guánarügü.

Naganoúba jagánagua, eíbuga áume jagánagua, ába Jabúngiute, jagíame nánigu.

¹⁷ Ligía gíñe laríñagunbei Wabúreme Búngiu.

Furíjuma jagánaguagiñe ja mafíñebaña nuágu, díse jumá jaweí, líña Jabúreme.

Mádaragua jumá júngua lídoun le wíyebei.

Ábame nerésibirunün,

¹⁸ ábame ában nan úguchili jun,

jugúyame nirájüñü, líña laríñagun Jabúreme, le Súnti Gabáfu.

7 Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lún-ti lubeí wachíbuni sun luwúyeri iwíyeni wawárua, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladúga luweírín inébesei le wawágubei lun Búngiu.

Lasáansiragun jagáburi Coríntona

² ¡Rújuma ában ubáraü woun tídan janígi! Madúgüngidiwa dáñu lun ni ában, maríbadagúdüw wagía ni ában, mayéedagun. ³ Máma naríñaguñein le lun níchugun jidúnrun, lugúndun quei buga naríñagun jun, tídaañadün nanígi, lídaañadiwa ában ínsiñejabúni le mébejati, lídan yebe ibágari o lídan yebe oúweni. ⁴ Weíríti naffíñen lúma nugúndan jáu, labádinagua sun le nasúfurirubei, sandítina dúgüdaguaü, áni buin níña gíñe láu ugúndani, jueígiñe.

⁵ Lúmagiñe meja wachúlürün Macedónioun, meméraagüngidiwa, darírügütiwa lénreengúnga lídan sun fulásu geyégua wáu, geyéguati wuríbu wáu, weíríti wadíjeridun juágu. ⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachúlürün Títo, ⁷ áni mámarügü láu lachúlürün, lugúndun gíñe gagúraasun lan juágu. Aríñagati woun luágu luweírín jabúseerun jaríjiniwa, abájüdagua ligía woun luágu íruni le juágubei luágu le asúseredubei lúma luágu luweírín jabúseerun lun jóudin láu nerérun jun. Ábatima nagúndaarun láu líra.

⁸ Láu sun jírugua jumá tadúga gárada to nabúrújaboun jun, maságürijaantina luágu, guetó. Aságürijat-iná meja furúmiñe láu nasúbudiruni luágu jírugua jumá tadúga gárada tugúya luágu murúsun dan.

⁹ Guetó gúndaatina, máma ladúga jírudagun, ladúga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubeíti madúgütiwa ni murúsun dáñu jun. ¹⁰ Lugúndun dan le wíchugun úma lun Búngiu lun layúsuruni íruni le wawágubei ladúga luríban wagáburi lun lasáansiraguni wagáburi, barú lumútiwa lídoun asálbaruni le magúmuchaditi, maríbaanti íruni ligía woun. Ánjein wanúga íruni ligía queísi janúgüni lirájüñü uboú, magáraragunga wagía lun Búngiu, lanúgübadiwa lídoun féridi lun sun dan.

¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadúga gárada tugúya, ába jatátirun asáminara buídu cába lan jadúga láu wügúri le affígounjabei jagánagua. Arúfuda jumúti luágu magúndan jumá láu figoú le ladúgübei, áni gáñitün luágu busíganu le líchugubei jun, janúfudetün lueí jamuga jabeichúniwa lueígiñe. Ába jabúseerun jaríjinina lun nasúbudiruni jínsiñejabu nun. Weíríti jabúseerun lun jadúgüni le richábei, lun jabeíchuni le adúgübalin figoú, adúga jumáali sun le lúnbei jadúgüni lun jaráanseruni cátei le. Madúnrunjadün guetó. ¹² Dan lubeíti le nabúrújanbarun meja gárada tugúra jun, mámadúgüya jamúga ladúga nasáminaruña lan sarágu luágu gürígia le adúgübalin wuríbani, ni luágu le asúfurirubalin lueígiñe, nabúrújanbarun lun geféen júma ligíbugiñe Búngiu luágu luweírín jínsiñejabu woun.

¹³ Ligía ragúguaadiwa lubeí woúngua.

Lánwoun sun gurásu le barú wamáalibeí juágu, oúnwenbun wagúndan láu waríjini luágu gúnda lan Títo, íderagua jumáali sun jugúya lun lasándirun darángi-

laü. ¹⁴ Adímurejatina bugája buíti juágu lun Títo, áni gúnfuli jumúti nerérun juágu. Quei sun lan le aríñaga wamáalibei jun, inárüni, ítara líña gíñe inárüni lan le waríñagubei lun Títo, luágu gunda wamá jáu. ¹⁵ Áni weírítimaati jínsiñe lun dan le larítapun luágu jadúgüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemégeiruba lan lídan jagúnfulirun láu lerérun. ¹⁶ Gúndaatina láu gayára lan nafíñerun juágu le gumúti.

Wíchugun joun gudémetiña

8 Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loúbawaguboun Macedónia. ² Láu sun ában lan oúnwenbun oúchawaguni lun jafíñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña. ³ Geféentina luágu rújamaali lan sun le jayáraabei láu sun tarúman janígi, ru jagía sügú láu lé yebe jayáraabei. ⁴ Ayúmuraguatiña sarágu woun lun wígiruniña lun jíchuguni jafáran lídan jíderawagúniwa idújeñu lueígiñe Jesucrístu. ⁵ Adúgatiña sügú láu lé yebe wagúrabubei jadúgün, furúmiñe, ába jedéregeragun jóungua le gumúti lun Wabúreme Jesucrístu, lárigiñe ába jedéregeragun jóungua woun, queísi lugúndan Búngiu. ⁶ Weíríti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmchaguagüdüni labúdajóun seínsu lé meja lagúmeserubei jídan. ⁷ Jugúya ubáraübei lídan sun cátei—lídan jafíñen, lídan jisúbudin luágu Lerérun Búngiu lúma jubáfu lun jarúfudajani furáangu joun ámu, lídan jabúseerun jesériwidun lun Crístu, lúma lídan ínsiñejabuni woun—lúnti lubeíti gíñe ubáraü jumá lídan ídejaní le.

⁸ Mára naríñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan gíñe jarúfuduni jínsiñejabu láu jíchugun táu sun janígi quei jagía. ⁹ Jarítagua jumá luágu lareíni Wabúreme Jesucrístu woun. rísiti bugája dan le siélu lan, ába lagúdemedun láu liábin ubouágun ladúga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei naríñagei narítapun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adúga jumúti gíñe táu sun janígi. ¹¹ Guetó lubeíti, ítara méme jumá darí jagúmchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le jumatí. ¹² Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Mára lun jáfagun mégei ladúga jíderagun ámu, ¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni

le jemégeirubei. Ítara lúba ñi lan úarani, ¹⁵ quei taríñagun Lerérun Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídoun tídoun lanígi Títo lun líderagunün. ¹⁷ Gúndaati Títo lúnya lídin aríjaün quei namúriajani lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua maríñagunga áu ni cáta lun.

¹⁸ Úara lúma Títo, woúnajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle. ¹⁹ Áni mámarügü líra, anúadaja jamúti gíñe tílana buri ligílisi idújei ligía lun ladúgün weíyaasu wáma lun líderagun lídan loúndarún seínsu le. Wadúgüñein wadágimanu le, le lánina ídejani, lun wíchugun ugúndani lun Búngiu, lun gíñe warúfuduni luágu busén jamá afíñetiña lun jíderaguniña jadújeñu ja gudémebaña. ²⁰ Waráanseruñein sun cátei lébei lun míchugun wamá lúgaaru lun ladímurejóun wuríba wawágu lueígiñe loúndarun seínsu le wadúgübei. ²¹ Wáfaaguña lun wadúgüni sun cátei láu arúmani, mámarügü ligíbugiñe Wabúreme, jagíbugiñe gíñe gürígia.

²² Woúnajaña gíñe ábanya jádaangiñe wadújeñu lúma Títo lúma le ában. Wügüri le, arúfuda láalibei luweírín labúseerun lesériwidun lun Crístu woun lídan sarágu luwúyeri, guetótima láu oúnwenbun afíñeni le luágubei luágu jíchuguba lan sarágu seínsu láu sun jugúndan. ²³ Le álügüdajati libúgürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabúgürü biáma idújeñu lueígiñe Jesucrístu ja lúmabaña, jaríñagame joun luágu jóunajan lan tílana ligílisi buri, luágu jíñuragüdüñein lan líri Crístu láu lubuídun jagáburi. ²⁴ Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügüriña jagía luágu inárüni lan lubuídun werérun juágu, áni lun gíñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

Loúndarún seínsu joun idújeñu ja gudémebaña

9 Luágu loúndarún seínsu joun idújeñu lídan afíñeni, memégeirunwati lun nabúrújan jun, ² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügújalibei, áni jíbe-ágei Macedóniana ragújaña gíñe dúgüdaguáü láu jagáambun luágu luweírín jáfaagun luágu ídejani le. ³ Láu sun líra, nouñajaña idújeñu jun nubáragiñe lun jaráanseruni luáguti labúdajóun seínsu, lun mámbabei lan iyéeni, buíti le naríñagubei juágu libúgürü cátei le, lun abúdajóuali lan sun seínsu

lubáragiñe nachúlürün jumóun, ⁴ ñúdündügü jañeín jádaangiñe Macedóniana núma, jadáriráunme maráanserunga. Líchuguña jamúga líra busíganu woun, júntima, lárigiñe rúwamaali lan sarágu waffíñen juágu. ⁵ Lígia narítangunbei namúriajan jáma idújeñu ja lun jóudin bisídaün nubáragiñe, lun gíñe jíderangunün abuinchagüdei seínsu le uágubei jaríñaga jóundarun. Ítara, aráanseñu lúba seínsu le jóundarubei lun jarúfuduni jareíni, máma quei ában cátei le lúnti wafósurunün luágu.

⁶ Jarítagua jumá luágu cátei le. Le loúguati lábunagun, loúguabei gíñe lalúbajan, le gíbeti lábunagun, gíbebei gíñe lalúbajan. ⁷ Cáda ában jídaangiñe, lúnti líchugun queísi ligáburu larítangun, máma láu magúndani ni ladúga aríñawagúa lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame gíñe sarágu júma lun jídejan. ⁹ Taríñajare Lerérun Búngiu luágu gürígia le íchugubei sarágu.

Rújali sarágu joun gudémetiña, áni reídeiti cátei buíti le ladúgübei lun sun dan. ¹⁰ Búngiu, le íchugubalin ílaü lun lábunún, ában lalúbajagüdüñ sarágu lídaangiñe lun gayára lan weígin buídu, líchuguba gíñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüni Búngiu murúsun fuleíse le jadúgübei joun, daríme lun jabíjin óunwembun abíniruni lúmagiñe Búngiu queísi ában óunwembun alúbajani. ¹¹ Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóunajani joun wáma, weírubei jateíngiruni Búngiu. ¹² Lugúndun láu wíchuguni íderawaguni le joun wadújeñu, máma wíchiga rügüñein seínsu le jemégeirun joun, wadúgüña gíñe lun jíchugun sarágu etéíngiruni lun Búngiu láu líra. ¹³ Jíchuguba uweírugini lun Búngiu lugúndun arúfuda lumúti ídejani le joun luágu adúga jumáni le lubeíbei Crístu, jíchuguba gíñe uweírugini lun Búngiu luágu íderawaguni le jíchugubei joun lúma joun súngubei. ¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírín lareíni Búngiu le larúfudubei jídaangiñe. ¹⁵ Teínqui wáña lun Búngiu, luágu rújali lan ában óunwembun cátei woun le siñá wabeí adáriru dimúrei le buídurügüti ubuídun lun wadímurejan luágu! Cátei ligía, Liraú.

Lubáfu Páblo queísi apóstolu

10 Aríñawagúati luágu gudémeju nan dan le júma nan, ánjein lan dan le díse nan jueí, derégüda lan nóuserun júma. Áu Páblo, ayúmuraguatina jun láu ában únabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdüñün luágu wuríbati le jadúgübei, dánme le nachúlürün júmoun. Sáansi jumeí ligáburu jarítangun wawágu, jugúya le aríñagubei luágu

lun lan waríjin cába lan waságara lídaangiñe wesériwidun lun Crístu. Ánjein madúgün jumá, aráansetina lun nagágibudagun júma. ³ Inárüni luágu ubouáguna wamá láu sun jadébilin gürígia ubouáguna, máma queísi wügüriña lánina ubou le wawúribuja luágu wuríbani. ⁴ Máma ubouáguna áruma to áuboun wawúribuja, larúmate Búngiu wayúsuruboun lun tagúnrinchagun érei. ⁵ Ítara líña lubeíti, láu lubáfu Búngiu güríngua wamúti sun arítangun le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gíñe jasáminan gürígia ubouágu rúwamuti lábugiñoun lubáfu Crístu lun lúaraduba lan láu le lubeíbei. ⁶ Áni lárigiñe jíchaagun júngua le gumúti lábugiñoun lagúmadíjan Crístu, aráanseñu wáña lun wasúfuriragüdüniña ja magáambadigiñabaña lun.

⁷ Barú jumuti cátei quei laríjiniwa bougudigiñe libíti. Aríñagatina jun luágu ánjein lan choúruga lubeí ában gürígia lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu. ⁸ Fágua jarítangun luágu néredun murúsun lueí le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdüñün lídan cátei lánina Búngiu, máma lun nagúnrinchaguni jafíñen, queísi jadúgüni arúfudajatiña jagánagua guetó. ⁹ Mabúseerúntina lun jarítangun luágu náluguña lan nebélaagüdüñ anúfudei jídoun táu nigáradan.

¹⁰ Aríñagatiña náganíñu luágu abúrúja nánun gárada queísi ában gürígia láuti sarágu ubáfu, áni derégüdati nege nerérun jun tídan, dan le júma nan, débilitiná nege, áni mínsiñegu lán nege ligáburu nadímurejan. ¹¹ Furúmieguarügü le aríñagubalin cátei le, lúnti gíñe lasúbudiruni luágu ítara lan quei nubeí láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawougua, mítaraantiwa quei jagía. Jagía, adúgatiña ában libídiouniga áu láu jamísuraagun jóungua láu guánarügü jamísuraagüle lúma láu jíchaagun jóungua jámagua. ¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñíllumuti míchugun lan Búngiu úma woun lun wesériwidun lun ñi, queísi jadúgüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía ánjarubei lun wachúlürün júmoun ubúrugin Corínto. ¹⁴ Lígia mídin wabeí sügü láu le labúseerubei Búngiu wadúga lídan le wáfaagun lun wíderangunün, ladúga wagía anúgübalin ugánu luáguti Crístu jun furúmiñe.

¹⁵ Mapántajaanantiwa láu wadágimanu le jadúgübei ámu, camá jamuga wadúga. Agúrabarügütiwa lun quei lan lagánwoundun jafíñen, gayáraabei lan wawádigimaritima jagánagua, súnwandan quei lugúndan Búngiu. ¹⁶ Lárigiñeme, jarítaguatiwa wadiseduntima lun wapúrichijani ugánu lánina asálbaruni lídan buri fulásu le díseti jueí, le ñíllumuti magáambungiña lan luágu Crístu, lueí wapántajan luágu wadágimanu le jadúgübei ámu, camá jamuga wadúga.

¹⁷ Le busénti ladímurejan luágu uweíriguni, ladímureja luágu luweírigun Crístu, máma luágu luweírigun guánarü. ¹⁸ Lugúndun gürígia le buídubei, máma le adímurejabei buídu luoúgua, le uágubei buídu lan ladímurejan Wabúreme Crístu, ligía buídubei.

Páblo jáma yéetiña ja aríñagubaña luágu apóstolugu jamá

11 ¡Buséntina jamúga lun jawánduni libídiouniga náu murúsun! Awánda jumá, ² lugúndun eméendütina jáu láu ában eméendüni le lúmagiñeti Crístu, lueí jamuga jígiruni Crístu. Áu asúbudiragüdübalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügúri. ³ Ítara quei layéedunun Máfia Éva, janúfudetina lueí gíñe jígiraguagüdün júngua lun jeyeedún lídan jarítangun, lueí jesériwidun lúnrügü Crístu táu sun tarúman janígi. ⁴ Naríñagubalin le, ladúga resíbi jumáaña ja ññbintiña adímureja iyéeni jun luágu Crístu, áni bulíeiguatün lueí cátei inárüniti le warúfudajabei jun. Resíbitün gíñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün gíñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe. ⁵ ¡Afíñetina luágu múnabun nan sügú jáu súper-apóstolugu ja jafálarubaña! ⁶ Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adúga wamáalibei.

⁷ ¿Ódi wuríbati nadúga napúrichijani ugánu lánina asálbaruni jun magúburajanga áu ni cáta, únabudaguagüda núngua ítara lun niñúragunün lídaangiñe binádu jigáburi? ⁸ Barútina seínsu jámagiñe tílana ámu buri ligílisi láu nerésibiruni le jafáyeirubei nun, lun nayúsuruni esériwida jun magúburajanga naün. ⁹ Áni dan lé meja níjein lan nemégeirun dan le júma nubeí, merédetina quei ijúrügu lun ni ában, idújeñu ja ññbinbaña Macedóniagiñe, jagía íchugubalin le nemégeirubei nun. Ítara líña náfaagun lun mámadina lan ijúrügu jun lídan ni cáta, áni ítara méme lúba nadúga. ¹⁰ Ítara quei choúru náni luágu subúdi náni linárün Crístu, ítara líña gíñe nasúbudiruni luágu manúgübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúbura-janga. ¹¹ ¿Cásan uágu nadímureja ítara? ¿Ladúga funásan jimísiñe nun? Subúdi luweírín jínsiñe nun lun Búngiu.

¹² Nadúga mémebei le nadúgübei lun míchugun nan lúgaaru joun arúfudajatiña jagía ja áluajabaña lun gayáraabei lan jaríñagun luágu ítara méme líña lan jesériwidun jun queisi wagía. ¹³ Máma Crístu oúnajabaliña yéetiña jagía jagánaguóun láu sun jafámurun camá lánigu Crístu apóstolu jagía. ¹⁴ Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgoun-

ga, ¹⁵ ligía giñéti jafámurubei ja esériwidubaña lun queisi gürígia ja adúgütiña buíti. Wel, lachúlürüba wéyu lun jerésibiruni le jadúnabei luágu wuríbani le jadúgübei.

Lasúfurirun Páblo luágu lesériwidun lun Crístu queisi apóstolu

¹⁶ Naríñaguñaya jun. Úa la ni ában arítaguti luágu ladúga lan lúlü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lúlü táu, lun gíñe gayára lan napántajan murúsun. ¹⁷ Dan le nadímurejan buíti nuoúgua, madímurejaantina láu ában únabuni quei ligáburi ladímurejan Crístu, nadímurejan quei jadímurejan ibídiouguatiña áu. ¹⁸ Queisi japántajan arúfudajatiña jagánagua láu buri cátei le lánina ubou le, napántajaba gíñe. ¹⁹ ¡Quei lanárimebei lichú jáu, awánda jumútiña lúlü táu láu ugúndani! ²⁰ Lugúndun awánda jumútiña ja afósurubalün lun jesériwidun joun, jáma gíñe ja aságarubalin le júmati, ja anúgübalün jánime, ja oúserubalün quei ni cáta, ja agáyuajabaña jigíbuagun. ²¹ Láu sun nibúsigari nan lun naríñaguni, ¡weírítí buga wedébilin lun wadúgüni cátei líra!

Ánjeinti le uágubei gayára lan janáangun jóungua, gayáraati gíñe nanáangun núngua luágu (nadímurejaña méme queisi ában lúlü táu). ²² ¿Jarásan Hebréona jagía? Áu sun. ¿Linásiñuna Israél jagía? Áu sun. ¿Linébaanfaangu Abrahám jagía? Linébaanfan gíñe áu. ²³ ¿Esériwidutiña lun Crístu jagía? Sügútimaatina jáu láu sun nadímurejaña lan queisi ában lúlü táu dan le naríñaguni. Ñadágimeinjadina sügú jáu, beíwaadina sügú jáu, dáüwaadina sügú jáu, sarágujali weíyaasu yaráfa nan lun noúnwen. ²⁴ Seíngüjali weíyaasu jabeíchunina juríu láu darándi-néfu beíti. ²⁵ Úrúwa weíyaasu jíchaagun Rómána wéwe nuágu, ában weíyaasu jachúragun juríu dúbü nuágu. Úrúwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebu lúma ában wéyu anágü baránaja lárigiñe tabúluchun ugúnein náu. ²⁶ Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguaadina núngua lídan pelíguru ubúrugu, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucrístu, le jayéeni. ²⁷ Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tiloúgua anáanguni.

²⁸ Bougudi lueí buri cátei le lúma buri ámu cátei, ságü wéyu nasándiruni lijúrü nidíjeri jawágu tílana sun ligílisi. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figou, weírítí nigárigu luágu. ³⁰ Ánjein lúnti lubeí napántajan lun gayáraabei lan jerésibirunina queisi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi

Wabúreme Jesucrístu, le únbei lúnti lan líchugúniwa uweíriginu lun sun dan, subúdi lumúti luágu inárüni lan naríñagubei. ³² Dán meja le ubúrugú nubei Damásco, ába líchugun gumádimati le esériwidubei lun urúei Aréetas ónigirutiña luágu buri lubéneri fulásu ligía lun janúgünina adáúra. ³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúrugú, ítara líña neséfurun jájaburugugiñe náganiñu.

Labájüdagun Páblo luágu buri cátei le larúfudubei Jesucrístu lun

12 Magáñeirunti gürígia ni cáta láu ladímurejan buídu luoúgua. Láu sun líra, nabájüdagua jun guetó luágu buri cátei lé meja larúfudubei Jesúsú nun. ² Catoúrusu irúmu guetó lueígiñe nanügúniwa lídoun lúruwan siélu, áu le afíñebei luágu Crístu. Ibídiñeti nun ánjein láu sun lubei nógubu nídin, lúmoun máma lan láu, Búngiu asúbudirubalin. ³ Subúdi numúti luágu barúwa nan lídoun lúruwan siélu, le méme gírubei paraíso, ibídiñeti nun ánjein láu sun lubei nógubu o máma lan láu sun nógubu, Búngiu rügúñein asúbudirei. ⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladúga ará-mudaguati buri cátei ligía luei jasúbudin gürígia. ⁵ Gayáraati jamúga napántajan luágu naríjini buri cátei líra, láu sun líra, siñáti napántajan nuoúgua, nadímurejanrügü luágu luweírín mabáfu nan nurú-mawagua. ⁶ Láu sun ánjana lan jamúga busén nadímurejan buídu nuoúgua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madúgün nubei lun úa lan ni ában anúgütina weíri sùgú láu laríjinina o sùgú lan láu le lagáambubei naríñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámbabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdünina. ⁸ Úrúwaali weíyaasu namúriajan lúma Nabúreme Crístu lun lagídaruni sándi ligía nuei, ⁹ laríñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati laríjin nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰ Ligía nagúndaarúnbei láu débili, anabúni, mégei, eíbaajóuni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weíritimaabei nasándiruni lubáfu Crístu nuágu.

Lidíjeri Páblo jawágu tílana ligílisi Coríntona

¹¹ Ábanjadina lúlü táu láu nadímurejan buíti nuoúgua, áni jugúya adúgagüdübalin nun, lugúndun jugúya yebe lúnbei jadímurejan buídu nuágu, máma áu. Múnabuntina sùgú jáu súper-apóstolugu ja jafálarubaña, láu sun ni cáta nan. ¹² Lídan wadági-

manu le nadúgübei láu sarágu gurásu jagánagua, arú-fudúati láu seíni lúma miláguru weíríti le nadúgübei luágu ában lan apóstolu tímatimaati áu. ¹³ Mouserun numútün únabu jawei tílana tíbiri ligílisi, ánjein gubeirügü láu lubei meréde nan quei ában ijúrgu jun. ¡Ferúduna jumána luágu líra!

¹⁴ Guetó aráanseedina lun nídin bisídaün lúruwan weíyaasu, áni mámbadina ában ijúrgu jun. Máma náluguñein le júmabei, jugúya nálugubei lun jederegeragun júngua le gumúti lun Crístu. Ítara jíña nun queísi isáanigu, áni agúbürigu lúnbaña jóundarun seínsu jabá jasáanigu, máma isáanigu jabá agúbürigu. ¹⁵ Nagástarubei le nómabei láu ugúndani juágu, daríme lun níchaagun núngua le gumúti luágu jufúlei-sein lun gayáraabei lan jeíbugun buídu lúma Crístu, láu sun genége láni luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijúrgu jun, aríñagatiña luágu barú nan seínsu júmagiñe lídan ámu luwúyeri láu ibíbuni.

¹⁷ ¿Ayéeda numútün funági láu ában jádaangiñe gürígia ja noúnajabaña jun lun lanúgüni seínsu júmagiñe nubá? ¹⁸ Amúriajatina lúma Títo lun lídin bisídaün, óunaja áu ában idújei lúma. ¿Yéegua lumútün funági Títo? ¿Ma ában láu woúserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woún-gua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamálibei, waríñaguñein lúnrügü jawáanserun lídan jeíbugun lúma Búngiu, nidújeñu jínsiñetiña nun. ²⁰ Nidíjeritina luei dan lánme nídin aríjaün, fágua madárirun nubádün agáburida queísi nabúseerun jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina luei nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdüniña jidújeñu lueígiñe Jesucrístu, láu marásualugu, agúseragüdüña jidújeñu, láu pántaü, lúma lídan chagáguaü. ²¹ Nidíjeritina luei lídan lánme nídyna bisídaün, lanúgagüdünina Nubúngiute busíganu jáu, luei gíñe nayájun jawágu sarágu jádaangiñe ja affgounjañabaña lúmagiñe binárü áni mígirun jamágili iwíyeyi, salúfuri, lúma buri ámu luwúyeri wuríbani.

Ewéridijani lúma lagúmujuún buri mábugaü

13 Nijánme lúruwan weíyaasu nídin bisídaün. Dánme le nachúlürün júmoun, lagúseragüdúwaba cáda ában le gadúnrunti ánjein añájein lubei bíama o úruwa geféentiña luágu lidúnrun. ² Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburi. Láu sun díse nan juei guetó, naríñaguñaya joun sun ja asígirubaña adáagua wuríbani, luágu dánme lan nídin bisídaün lúruwan weíyaasu, nasúfuriragüdúbaña lan láu ában érei weíríti. ³ Narúfudubeiti jun luágu adímureja lan Crístu nídaangiñe. Áni medébilinti Crístu lí-

dan ligáburu louuserunün, arúfudarügü lumúti luweírin lubáfu jagánagua. ⁴Inárüni luágu jilá lan luágu gurúwa queísi débiliti, ába labágaridun láu lubáfu Búngiu. Débilitiwa gíñe queísi ligía dán meja le laganoúnbei ya ubouágu, áni quei sará lan Crístu lídaangiñe ouweni láu sun lubáfu Búngiu luágu, wachúlürüba júmoun láu sun lubáfu Búngiu wawágu ladúga lídaañadiwa lan ában lúma Crístu.

⁵Jouchagua jumá júngua lun jaríjini ánjein lánigu jubeí Crístu le tímatimaati, jouchagua jumá júngua, mouchugua jumána. ¿Ibídiñeti jun luágu níjein lan Crístu jídan ánjein afíñe jubeí le tímatimaati luágu? ⁶Agúrabatina jasúbudiruni luágu affíñe wamá luágu Crístu le tímatimaati, áni níjein lan agánawa wádan láu sun lubáfu, ⁷ladúga mabúseerun wamá warúfuduni wabáfu quei apóstolugu láu wasúfuriragüdünnün luágu luríban jigáburu. Busénrügütiwa lun buídu lan jeibugun lúma Búngiu láu sun jamúga ígirúa wamá marúfudunga wabáfu quei apóstolugu. ⁸Dan rügúñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdüni gürígia luágu lifígoun, dan le buídu

lan jóudin lúma Búngiu, mabúseerúnwati narúfuduni nubáfu láu abeíchuni. ⁹Gúndaatina lun naganoun quei mabáfuti ánjein buídu lubeí jigáburu, áni wayúmuraguamémeba lun jiábin lun jabuídurun le gumúti. ¹⁰Nabúrüjañoun gárada to jun lubáragiñe nídin aríjaün, lun gayáraabei lan jasáansiruni jigáburu lubáragiñe nachúlürün júmoun, lun memégeirúniwa lan narúfuduni nubáfu juágu quei apóstolu láu nasúfuriragüdünnün. Lugúndun rúlumuti Búngiu ubáfu nun queísi apóstolu lun nawáanseragüdünnün lídan jeibugun lúma, máma lun neréderunün lueí.

¹¹Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburu, ragújuma dúgüdaguaü, abágarida jumá lídan úarani lúma darángilaü. Ítara lúba júmabei lan Búngiu láu lidárangilan lúma línsiñejabu. ¹²Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³Mábuga jáña sun wadújeñu lídan afíñeni jun.

¹⁴Resíbi jumeí labíniragüle Jesúsu, lúma línsiñejabu Búngiu, sandí jumeime Sífiri Sándu júmagua. Ítaralá.

GÁLATAS

Labúrūjan Páblo joun tílana ligílisi buri to Galáciaboun

1 Anája áu Páblo, le láni Jesucrístu apóstolu. Máma gürígia anúadirubalina lun apóstolu nan, máma gíñe gürígia oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdübalin lídaangiñe oúweni, jagía oúnajabalina quei apóstolu. ² Áu jáma sun wadújeñu lueígiñe Jesucrístu ja nómabaña ya, wabúrūjañoun gárada to jun, jugúya le tílana sun ligílisi to Galáciaboun. ³ Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe. ⁴ Rúlumuti Jesúsu libágarí wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboú le, queísi labúseeruni Búngiu. ⁵ ¡Uweírighuni lun Búngiu lun súnwandan! Ítaralá.

Ában rügúñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladúgübei Crístu juágu, láu luweírín línsiñejabu! Furéseti jasáansiruni jafíñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chülújaña wügúriña jagánaguóun, ja buséntiña jañáwuriyani jarítangun lun jafálarun ában úma le maríchatí—ámu lueí jafíñerunrügü luágu Jesucrístu lun jasálbarun. ⁸ Wel, furúmieguaarügü gürígia le ñúbinbei adímureja jun luágu ámu luwúyeri asálbaruni lueí le arúfudaja wamáalibeí jun, cáteíñein lan gürígia ligía, ¡reídeílá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Aríñaga náali meja áni naríñagayaali guetó. Ánjein ñúbin ában gürígia arúfudaja ámu luwúyeri ligáburi asálbaruni lídaangiñe figoú jun lueí le resíbi jumáalibeí, ¡reídeílá lábugiñe líñaragun Búngiu!

¹⁰ Dan le naríñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachúlürün Páblo lun ábanbei lan láni Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmagiñe ni ában

gürígia nibíjei, máma gíñe larúfudajan ni ában gürígia nun, Jesucrístu guánarügü asúbudiragüdübalin nun.

¹³ Agáamba jumáli ída líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáli ída líña lán meja lanárime neíbaajaniña tílana lílígílisin Búngiu, áfaagua áu lun nagúmuchaguagüdüniña. ¹⁴ Lídan ligáburi jagúnfulirun juríu lúma Búngiu, furésetina meja sügú jáu sarágu jádaangiñe nupaísanun ja madíseguati jagúriajoún núma, ladúga derégüdatimáatina meja lídan nagúnfulirun láu jagáburi binádu nagúbürigu. ¹⁵ Ánjeinti Búngiu, anúadira láadina méja lubáragiñe nagúriajoún lun nesériwidun lun, ába lagúarun nun luágu luweírín línsiñejabu lun lánibadina lan. ¹⁶ Lídan lidáani, ligía lugúndaanbei Búngiu lun lasúbudiragüdüni Liraú nun lun gayáraabei lan napúrichijani lubuídun ugánu joun ja mámbabaña juríu luágu ligía lan Wasálbaragülebei. Lárigiñe nasúbudiruni Jesucrístu, míditina álügüdaja ni ca úma, ¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése loúbawagun Arábia. Lárigiñe, ábaya nagíribudun ubúrugin Damáscu. ¹⁸ Darí úrúwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰ Ninárün jáu ligíbugiñe Búngiu luágu inárüni lan le nabúrūjabei jun.

²¹ Lárigiñe líra, ába nídin loúbawagun Síria lúma Cilícia. ²² Ja wadújeñu lueígiñe Crístu ja tídaanbaña lílígílisin Crístu to loúbawaguboun Judéa, maríjin jamágidiná meja lídan dan ligía, ²³ agáambarügütiña laríñawagún. “Wügúri lé meja eibaajabaliwa, lapúrichijañein ugánu le lánina afíñeni luágu Crístu queísi Wasálbaragüle guetó, áni ligía lé meja busénbei lagúnrinchaguni wafíñen luágu Crístu.” ²⁴ Ába jíchugun uweírighuni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2 Catoúrusu irúmu lárigiñe, ábaya nídin Jerusalén úara lúma Bernabé, barú numuti gíñe Títo númagua. ² Nídinbei ñi ladúga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afíñetiña, ába nabájüdaguni joun ída líña lan narúfudajan joun ja mámbabaña juríu luágu wasálbarun, nadúgünbalin líra lun gayára lan jánjarun lun le narúfudajabei, lueí leréderun le adúga

náalibei lúma le nadúgübei quei ni cáta. ³ Resíbi jamúti, áni ni Títo, le nouíbabei, mafósurun jamúti lun lerésibirun circuncisión, láu sun máma lan juríu. ⁴ In-árüni luágu añájein lan eyéejatiña luágu idújeñu jamá lueígiñe Jesucrístu, ádaragutiña jóungua wagá-naguouñ arámudaguarügü, buséntiña lun líchugúni-wa gumádi luágu lúnti lan lerésibiruni Títo circuncisión ánjein busén lubeí lun lání lan Búngiu. Belútiña yéetiña jagía quei aríaaajatiña lun jaríjini ida líña lan wagáburi bougudi lueí lilúrudun Moisés lídan wouñ-daragun lúma Jesucrístu, buséntiña jamúga lúnya wayábin lun idámunime lun lúrudu ligía. ⁵ Mígi-raguagüdüntiwa woungua joun ladúga busén wamá lun ñi méme lan inárüni le lánina ugánu luáguti asál-baruni júma, jugúya le mámabei juríu, meméterunga ámu buri cátei lánwoun le lúnbei jadúgüni lun jasál-barun lueídügüya lun jafíñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladúga magúser-agüdünti Búngiu luágu cátei le genégerügüti—míchugutiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷ Lubáragiñe líra, ábarüga jasúbudiruni luágu Búngiu lan íchugubalin wadági-manu le lánina lapúrichijouñ ugánu luáguti asálbaruni joun ja mámabaña juríu nun, ítara quei buga líchuguni wadágimanu lun Pédro lun lapúrichijani ugánu méme ligía joun juríu. ⁸ Arija jamáli luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan gíñe ñadágimeinbei ní-daangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügúbaña quei weírgutimaatiña, luágu Búngiu lan fuleiseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu gíñe gúnda jamá lun wouñdin ñadágimein lídan jageíra ja mámabaña juríu, sun añája lan jagía ñadágimein lídan jageíra juríu.

¹⁰ Amúriajarügütiña wáma lun warítangun jawágu gudémetiña, áni nijánti cátei le nouchubei nadúgün láu sarágu gouñigi.

Ladeíñjan Páblo lun Pédro ubúругu Antioquía

¹¹ Dan le lídinbei Pédro ubúругu Antioquía, ába nadeíñjan lun ligíbuagun, lugúndun mabuídun lan le ladúgübei. ¹² Furúmiñe meja, jóuti meja jáma affíñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachúlürün gürígia loúnajan Jacóbo, ligía lagúmeserun Pédro adíseda jawéi ja mámabaña juríu, ába meíginjali lan jáma ladúga lanúfude lueí le gayáraabei jaríñagun ja afíñebaña luágu lúnti lan jerésibiruni wúgúriña circuncisión lun jasál-barun, lun gíñe meígin jamá juríu lídan ában jáma ja mámabaña juríu. ¹³ Játi jíbiri juríu ja affíñebaña luágu Crístu, ába júaradun lúma Pédro lídan cátei mabuídun-ti le ladúgübei, ába gíñe lúaradun Bernabé jáma lídan cátei ligía. ¹⁴ Dan le naríjinbei luágu meíbugun jamá

úara lúma inárüni le larúfudajabei ugánu luáguti asál-baruni (luágu man lan asálbaruni ni cátei lúma lilúrudun Moisés), ába naríñagun lun Pédro ligíbugiñe sun adamurini. “Amúrü le juríu, berédera abágarida quei ja mámabaña juríu, mabágaridun-tibu quei juríu. ¿Ída líñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queísigubeirügü sun gürígia, luágurügü jafíñen luágu Jesucrístu

¹⁵ Ába nasígirun aríñaga joun.

—Juríu wagía lúmagiñe wagúriajouñ, aríñagatiwa luágu mafígoun wamá, luágu mítaran wamá quei ja mámabaña juríu ja agúriajoubaña bougudi lueí lilúrudun Búngiu. ¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladúgüni le lubeíbei lilúrudun Moisés, láurügübei laffíñerun luágu Jesucrístu lerédera richágu ligíbugiñe Búngiu. Ligía gíñe lébubei wafíñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lídaangiñe affíñeni le, máma lídaangiñe wadúgüni le lubeíbei lilúrudun Moisés, lugúndun úabei ni ában eréderuti richágu ligíbugiñe Búngiu lueígiñe ladúgüni le lubeíbei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucrístu, ába waríjin luágu gafígoun méme wamá queísi ja mámabaña juríu ladúga wabágariduña lan gíñe guetó bougudi lueí lilúrudun Moisés, ¿gayáraati waríñagun lueígiñe líra luágu Crístu lan gafíngoungüdübaliwa? ¡Ni cátei líbe líra! ¹⁸ Lubáragiñe líra, lun jamúga wagíribudun lun weménigidun luágu wagúnfulirun lúma lilúrudun Moisés lun wasálbarun lárigiñe weménigidun luágurügü wafíñerun luágu Crístu, warúfuduñein luágu magúnfulirun wamá lúma linárün laníchigu lúrudu ligía, áni gafíngountiwa. ¹⁹ Áu, queígubeirügü jiláadina lan lun lilúrudun Moisés, lúrudu méme ligía ouwedagüdübadina lun, lun gayára lan nabágaridun lun Búngiu. ²⁰ Rúguatina núngua quei jiláadina lun figou, dáwaguañu luágu gurúwa lúma Crístu. Mámaadina lubeíti áu méme abágaridubei ní-daangua, Crístu abágaridubei nídan. Ibágarile le nabágaridubei lídan nógubu, nabágariduñein láu sun nafíñen luágu Liraú Búngiu le jínsiñejabúbei nun, ába ledéregeragun lúngua lun loúnwen nuágu. ²¹ Mabúseerúntina lubeí namájarun lun lareíni Búngiu láu nagíribudun lún buri igáburi lánina lilúrudun Moisés, lugúndun lun jamúga gayára lan leréderun gürígia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Crístu.

Lúrudu ódi affíñeni

3 ¡Jugúya Galáciana, magáambaditün gíñe! ¿Ca abíñaragubadün lun magáambun jubeí lan ugánu le inárünibe libúgürü wasálbarun? Lídan meja wapúrichijan jun, arúfuda wamúti laníchigu loúnwen

Crístu luágu lugúruwan jun, furáangu. ² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafíñerun luágu le jagáambubei luágu Crístu? ³ ¿Ída líña ítara lubeí jumágaambadi? Gumésetün eíbuga lúma Crístu láu lubáfu Sífiri Sándu, ¿guetó jarítaguatün funági luágu buítimaabei lan jeíbugun lun jígiruni Sífiri Sándu lun jagúnfulirun lúma jagáburí juríu? ⁴ ¿Marúfudajaangili sun le jasúfurirubei jun? ¿Arúfudajaali lámuga jun! ⁵ Dan le líchuguni Búngiu lání Espírítu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeíbei lilúrudun Moisés ladúgei, ladúgünbalin lugúndun afíñe jumá luágu le jagáambubei luágu Liraú.

⁶ Jarítagua jumá luágu Abrahám. Rúlumuti meja sun lafíñen luágu Búngiu, luágu lafíñen, ába lerésibiruni Búngiu queísi ában wügúri richáguati. ⁷ Ligía lubeíti jugúya, lúnti jasúbudiruni luágu ja lan afíñebaña, jagía lan linébaanfaanbaña Abrahám tímatimaatiña. ⁸ Queísi subúdi lání Búngiu lubáramegiwa luágu ñibaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafíñerun luágu Jesucrístu, ába laríñaguni ugánu buíti lun Abrahám lubáramegiwa, queísi bürúwañu lan tídan lilíburun. “Jabínirúaba sun gürígia uboúagu bídaangiñe.” ⁹ Ítara líña lubeíti, ja afíñebaña, biníwatiña úara lúma Abrahám le afíñerubei luágu Búngiu.

¹⁰ Ja afíñerubaña luágu jasálbaruba lan láu jagúnfulirun lúma lilúrudun Moisés, bulfeiguatiña, lábugiñeñanu líñaragun Búngiu, lugúndun taríñajare Lerérun Búngiu. “Sun ja magúnfulirunbalin sun le bürúwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.”

¹¹ Furáanguti lubeíti luágu úa lan ni ában eréderuti richágu ligíbugiñe Búngiu luágu ladúgüni le laríñagubei lilúrudun Moisés, lugúndun taríñajare Lerérun Búngiu. “Láu lafíñerun gürígia luágu Búngiu lerédera richágu ligíbugiñe, ibíjaleíme ibágari magúmchaditi.” ¹² Ánjein lilúrudun Moisés máma cátei lánina afíñeni, lánina cátei le adúgúwarügüti ladúga laríñajare lúrudu ligía. “Láu rügúñein jamúga lagúnfulirun gürígia láu sun igáburí lánina lúrudu le, libíjei ibágari magúmchaditi.”

¹³ Wagía queísi gürígia garaúwarügütiña, mabáfutiwa lun wagúnfuliruni sun lúrudu ligía. Ába laséfuruníwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barú lumuti Crístu líñaragun Búngiu luougua wewéñagua lídan le loúnwenbei luágu gurúwa, lugúndun taríñajare Lerérun Búngiu. “Íñarawagúati sun le ádarawagúti luágu gurúwa.”

¹⁴ Adúga lumúti loúnwen Crístu lun liábinba lan abíniruni le uágubei laríñaga Búngiu lun Abrahám, lídaangiñe Jesucrístu joun gíñe ja mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafíñen.

Lilúrudun Moisés, lúma lerérun Búngiu lun Abrahám

¹⁵ Nidújeñu, níchiga ában jémpulu jun lídaangiñeti jabágari gürígia. Dan le ladúgün wügúri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun. ¹⁶ Ítara líña gíñe, rúlumuti meja Búngiu lerérun lun Abrahám lúma lun linébaanfan. Maríñaguntu Lerérun Búngiu “binébaanfaangu”, camá jamuga jawáguti sarágu gürígia, taríñajare “lun binébaanfan”. Laníchigu líra, “ábanrügü gürígia”, le Crístu. ¹⁷ Niján le naríñagubei. Adúgati Búngiu ában darádu lúma Abrahám, ába lachoúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubeí lé meja ladúgübei Búngiu lúma Abrahám siñáti lagúluudúniwa láu ában lúrudu le ñúbinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga. ¹⁸ Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madúgünga ni cátei lun lagáñeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruníwa? Núbinti lúrudu ligía sarágu irúmu lárigiñe lidáradun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Crístu, le gíñe úmabei ladúgúwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia. ²⁰ Ánjeinti dán meja le ladúgübalin Búngiu lidáradun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adúgübalin sun cátei.

Ca lan uágu níjein lubeí lilúrudun Moisés

²¹ ¿Laríñaguña funági le luágu múaradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²² Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi laríñagun Búngiu tídan Lerérun. “Sun gürígia lábugiñeñanu lubáfu figoú.” Ítara líña lun lídaangiñerügü lan afíñeni luágu Jesucrístu gayára lan jáfuridun gürígia lábugiñegiñe lubáfu figoú lun jeréderun richágu ligíbugiñe Búngiu láu jafíñen luágu Jesucrístu, queísi meja laríñagun Búngiu lun Abrahám.

²³ Lubáragiñebei liábin Crístu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴ Ába lubeíti lanúgüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí

liábin Crístu lun dánme lan wafíñerun luágu, gayáaraa-jalíme weréderun richágu ligíbugiñe Búngiu.

²⁵ Guetóti, quei chúlújali lubeí Crístu, mámaadiwa lábugiñe loúnigirun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Crístu, lídaañadün ában lúma. ²⁷ Sun jugúya le belújalibeí lídoun ában lúma Crístu láu jabásterun, ibí-jaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügúri o wúri, ladúga láu lí-daañadün lan ában lúma Crístu Jesúsu, sun jugúya ábanrügüñadün. ²⁹ Ánjein lánigu jubeí Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám quei jalágaante.

4 Niján cátei le nabúseerubei naríñagun. Dan le loúnwen ában úguchili áni ñúraügili liraú le lúnbei lerésibiruni alágan, mabuíduntimaati dan lun irájü ligía sügú jáu lumúsuniña lúguchi, láu sun ligía lan labúremebei alágan, ladúga siñágili lan layúsuruni.

² Añájein gürgia oúnigiruti, aríja jagía láu lalágaante darí lachúlürün dan le líridubei lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu uboúagun, lábugiñeñadiwa meja lúrudu lúma buri igáburi le mámbabeí lúnti ladúrarun lun sun dan. ⁴ Dan le lagúnfulirunbei dan, ába loúnajani Búngiu Liraú, le agúriajóubei tídaangiñe ában wúri, ába liábin quei juríu lábugiñe lilúrudun Moisés.

⁵ Liábinbei ítara lun laságaruníwa lábugiñegiñe lúrudu ligía, lun lerésibiruníwa Búngiu quei si lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraú Espíritu, le méme Sífiri Sándu, tídoun wanígi, áni agúajati Espíritu ligía wádaangiñe lun Búngiu. “¡Núguchi!” ⁷ Lirájüñü lubeíti Búngiu wagía, mámaadiwa idámuni, áni ladúga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afiñebaña

⁸ Dán meja le ibídiñegili Búngiu jun, jadámuñadún meja “búngiugu” ja mámbabaña búngiugu lídan linárün cátei. ⁹ Ánjein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu —¿ída lubáyan gayára lan jarítangun lúnya jíchaagun júngua quei idámuni lábugiñoun lúrudu lúma buri igáburi le mabáfubei lun ladúgün ni cáta jun?

¹⁰ Adáaguatün buri fédu ítaga wéyu, ítaga játi, ítaga dan, ítaga irúmu quei si laríñaguni lilúrudun Moisés lun jeréderun richágu ligíbugiñe Búngiu, lídan jarítangun. ¹¹ Janúfudetina lueí masériwidun lan wadági-manu le nadúgübei jagánagua lun ni cáta.

¹² Nidújeñu, ayúmuraguatina jun lun jarítangun quei si áu luágu buri cátei le, ladúga furíjadina lun mámaadi-na lan lábugiñe lilúrudun Moisés quei si meja má-mañadün lan lábugiñe lúrudu ligía. Madúgüntün ni ában wuríbani nun lídan meja júma nan, ¹³ quei subúdi jumáni, ladúga meja ában sándi le nuágubei gayára lubeí neréderun júma furúmiñeti dan lun napúrichijani ugánu lánina asálbaruni jun. ¹⁴ Sándi ligía lé meja nuágubei, ában meja ouchúni nun, múnabunti

janúgünina luágu líra. Lubáragiñe líra, ába jerésibirun-ina quei si ában láni Búngiu ánjeli, camá jamuga Jesu-crístu guánarügü áu. ¹⁵ ¿Ca susérebei lun ugúndani lé meja jasándirubei náu? Gayáraati naríñagun luágu jáni fuleisei luágu ánjein lan jamúga meja lúnti, jasá-garuñein lan jamúga jágu lun jíchuguni nun. ¹⁶ Guetó, ¿jáganijadina funági lueígiñerügü naríñaguni inárüni jun?

¹⁷ Weíríti juwámaan joun mútu ja, mabuídunti jarítangun jubá. Le jabúseerubei, lun jadísedagüdünnün waweí lun ában lánme jawámaadun jun. ¹⁸ Buíti lun juwámadirun joun ámu, ñi áu yebe júma o úaadina lan júma, ánjein láu lubeí lubuídun arítangun ladúgüwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asú-furira daríme lun jarúfuduni luágu níjein lan Crístu jí-dan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumeí cátei le nun.

¿magáambun jumágili le laríñagubei lilúrudun Moisés?

²² Laríñajare luágu garájüñü lán meja Abrahám bián irájüñü, ában táu lidámuni, le ában táu lúmari to ában wúri to máma idámuni. ²³ Le tiraú idámuni, ítara líña lagúriajóun quei jagúriajóun sun irájüñü, ánjein le tiraú to máma idámuni, lagúriajóun lun lagúnfuliruba lan le uágubei laríñaga Búngiu lun Abrahám. ²⁴ Ítara líña cátei le quei si ában jémpulu. Bián wúríña ja, ítara jáña quei si bián darádu le ladúgübei Búngiu. Adúgati ában darádu lúma Moisés dan le líchugunbalin lilúrudun lun luágu wúbü Sinaí. Darádu ligía, ítara líña quei si Agár ladúga sun lan gürgia ja lábugiñebaña lúrudu ligía idámuni lun jagúnfulirun lúma, quei si idámuni jamá sun tirájüñü Agár. ²⁵ Wúbü le Sinaí lí-daañein fulásu le gíribei Arábia (le ñi lubei jagánoua ladúgawagun tiraú Agár). Agár liyáwaboutun wúbü ligía lúma lúrudu le íchugúbei ñi. Ubúrugú le Jerusalén le guetóbei, ítara líña quei wúbü Sinaí lídan dan le sügú-jalibeí, ladúga ubúrugú ligía jáu sun lílana, ítara jáña quei idámuni lun igáburi lánina lilúrudun Moisés.

²⁶ Ánjeinti Jerusalén le siélubei, máma lánina idámuni quei si máma lan idámuni lúmari Abrahám, áni lirájüñü Jerusalén le siélubei wagía. ²⁷ Taríñajare Lerérun Búngiu.

Gúndaaguabá, wúri maraújeitu, amúrü to maraúboun,

wáguabá láu ugúndani, amúrü to ibídiñebei agáriduni bun,

lugúndun amúrü to áuboun mebéresenwa lan, gíbe-timaabaña birájüñü

sügú táu wúri to garaúboun láu búmari.

²⁸ Nidújeñu, quei sigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía afíñetiña ladúgawagunbaña Abrahám ja uágubaña laríñaga Búngiu lun. ²⁹ Ítara

quei meja dan ligía, isáani le agúriajoubei lídan ában igáburi quei furúmiegurügü agúriajounei eíbaaja lumúti meja isáani le agúriajoubei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eíbaaja jamútiña ja mámabaña lábugiñe lúrudu ligía. ³⁰ ¿Cáteisán taríñagunbei Lerérun Búngiu? Taríñajare. “Bugáboun idámuni láu sun tiraú, lugúndun siñáti gafánran lan tiraú idámuni lídan alágan lúma tiraú to mámaboun idámuni.”

³¹ Nidújeñu, mítaraantiwa lubeíti quei tirájüñü idámuni, ítara wáña quei tirájüñü wúri to mámaboun idámuni.

Míchaaguaya jumá júngua idámunime

5 Furígüda láadiwa Crístu lídaangiñe idámuni wamá lun lúrudu buri lúma igáburigu. Reídeí jumá lubeíti le ní lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun.

³ Naríñagayaali lun furúmiegurügü wügúri le resíbinbalin circuncisión luágu lúnti lan ladúgüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágu richágu jumá ligíbugiñe Búngiu láu jagúnfulirun lúma lilúrudun Moisés, ígira jumáali Crístu, díseedün lueí asálbaruni le láurügüti lareíni Búngiu.

⁵ Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesús, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin lagaambúniwa inárüni jun? ⁸ Mára Búngiu le agúarubei jun adúgúbalin líra. ⁹ Mabúlieida jumeí luágu furése lan lawáraüdagun arúfudajani le maríchatí lun lagúnrinchaguni jafíñen sarágu gürígia queísigubeirügü resígüda lánun murúsun ísi sun to añóundawaguboun láu. ¹⁰ Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteíñein lan gürígia le añáwurijabei jun, labeíchubei Búngiu.

¹¹ Aríñagatiña arúfudajatiña yéetiña jagía luágu apúrichija nan luágu lúnti lan jerésibirun wügúriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga láburujan dimúrei luáguti loúnwen Crístu luágu gurúwa joun. ¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, igúndaatina jamúga lun jíbugunun jawárua gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábugiñegiñe igáburi lánina lilúrudun

Moisés, manúga jumeírügü liñáti líra lun lébume gayára lan jasígiruni ugúndani buri le lánina ubou le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúnfulirun lúma lúrudu le aríñagubei. “Jínsiñelá gürígia bíledi bun queísi bísiñegua búngua”, gúnfulijadün láu sun lilúrudun Moisés. ¹⁵ Goúnigi jumá, ánjaün ageíndagua júmagua, jagúmchaguagüdüba júniwagua.

Ugúndani le lánina ubou, lúma eíbuguni lúma Sífiri Sándu

¹⁶ Niján cátei le naríñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubou. ¹⁷ Ugúndani le lánina ubou máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubou. Gáganiguati ában lúma le ában, ligía lásíñerunbei jadúgüni jugúya cátei le jabúseerúbei yebe jadúgün. ¹⁸ Ánjein Sífiri Sándu lubeí abúgurubadün, mámaadün gíñe lábugiñe lilúrudun Moisés.

¹⁹ Ménreengúnti larijiniwa cátei lán buri cátei le jadúgübei ja afálarubalin ugúndani lánina ubou. Gámariguatiña jámagua mamárieidunga, adáaguatiña buri cátei wíyeti, úati nibúsigari jamá láu jasálufurin, ²⁰ judúguatiña joun sándu, abíñaraja jagía. Níjein iyéeejabuni jádan, gáganiguaü, lúma eméendüni. Ménreengúnti jagáñidun, jawóúgua rügúñein jarítagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Naríñaguñein jun quei naríñaguni lubáramegiwa luágu ja lan adúgúbalin cátei le, mebélurunbaña lídoun larúeijan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni, ²³ manáanguni únguaü, ragúguaü únguaü. Úaraguati buri igáburi le lúma furúmiegurügü lúrudu. ²⁴ Já lánigubaña Crístu, dágua jamáali sun luwámaan cátei le lánina ubou le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti gíñe wígirun lun labúguruniwa Sífiri Sándu lídan le wadúgübei.

²⁶ Moún lumuti wanáangun woúngua, añáwurijatiwa joun wíbirigu ítara, rúti gíñe gimúgaü wádaangua.

Íderagua jumá júmawagua

6 Nidújeñu, ánjaün aríja luágu áburujaali lan ában jídaangiñe lídoun figou, jugúya le eíbugubei lúma Sífiri Sándu lúnti jíderaguni lun lagídarun lídaangiñe figou ligía, adúga jumeí láu maweíriguni. Lúnti gíñe goúnigigua jumá júngua lueí gíñe jáburujan lídoun figou queísi ligía. ² Ídaragua jumá júmawagua lun jawánduni jijúrügü, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña

lúngua. ⁴ Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu, ⁵ lugúndun sun gürígia geféenbaña lun Búngiu jawógu ámu.

⁶ Le únbei larúfudajoúa Lerérun Búngiu lúnti lafánreinjani sun luwúyeri ibíjini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei gürígia, ligíaba gíñe lalúbaja.

⁸ Ánjein ábunagua ában gürígia cátei le íchugubei ugúndani le lánina uboú lun, le méme lábunagubei, líchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina ibágari magúmchaditi lun. ⁹ Moún lumuti lubefti labúchadun wawágu adúgei cátei le buídubei, lugúndun ánjawa ítara méme adúgei, walúbajaba bufti dánme le lachúlürün dan lun werésibiruni. ¹⁰ Ligía, adúga wameí lubefti le buídubei joun súngebei ságü gayára lan, joúntima wadújeñu luefígiñe Crístu.

Ewéridijani lúma lagúmujoún ayoúraguni

¹¹ Aríja jumá luweínamu létera le áubei nabúrüja jun guetó láu nújabu guánarügü. ¹² Ja abúseerúbaña jafósurunün lun jíchaagun júngua lábugiñoun igáburi le

lánina circuncisión jadúgüñein lúnrügü jeréderun buídu jagíbugiñe juríu, lun meíbaajoúniwa jamá luefígiñe jamúga jaríñagun luágu lídaangiñe rügüñein lan loúnwen Crístu wasálbara. ¹³ Ni ja íchaagubaña joúngua lábugiñoun igáburi le lánina circuncisión, madúgün jamúti sun le laríñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina uboú nun áni jiláañu níña gíñe lun cátei le lánina uboú! ¹⁵ Lun Búngiu, ni cáta ánjein ibíja wabálin circuncisión lúmoun mibíjin wamáni, le busénwabei, lun iséri wamá gürígia. ¹⁶ Sun ja abágaridubaña ítara, jagía lánigubaña Búngiu le tímati-maati, resíbi jamá lubefti darángilaü lúma gudémejabu lúmagiñe.

¹⁷ Lúmagiñe dan le ugúñe, mabúseerúntina lun nibíjin lénreengúnga ni ca úmagiñe. Arúfuda lumúti lá-rigi buri bíti le nuágubei luágu ában nan esériwiduti lun Nabúreme Jesús.

¹⁸ Nidújeñu, binílaün Wabúreme Jesucrístu, sun jugúya. Ítaralá.

EFESIOS

Labúrujan Páblo joun tílana ligílisi to Éfesoboun

1 Anája áu Páblo, le láni Jesucrístu apóstolu láu lugúndan Búngiu, nabúrújañoun gárada to jun, jugúya le lánigubei Búngiu ja afiñebaña luágu Crístu Jesúsú lídan ubúrugú le Éfeso. ² Binílaün Wáguchi Búngiu lúma Wabúreme Jesucrístu, ibíja jumá gíñe darángilaü jámagiñe.

Abíniruni le wánibeí lugúndun lídan wamá ában lúma Jesucrístu

³ Rúwama uweírighuni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴ Lubáragiñebeí meja ladúgüni Búngiu uboú, anúadira lumútiwa lun lánigubadiwa lan láu le lúnbei ladúgüni Crístu wawágu, lun weréderun madúnruna ligíbugiñe, derégegüñu woúngua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladúga ligía lan lugúndaanbei woun. ⁶ Ligía súnwandan lubeí wíchugun uweírighuni lun Búngiu luágu luweírín lareíni le áubei labínirawa dan le lídan wamá ában lúma Liraú le jín-siñebeí lun. ⁷ Láu luweírín lareíni Búngiu, sálba láadiwa láu líta Liraú le áwiyurubei wawágu dan le loúnwenbei luágu gurúwa, ferúdnaleí wafígoun. ⁸ Arúfuda láali Búngiu lareíni woun le tímatimaati láu líchugun sun luwúyeri subúdi lúma gunfaráandaü woun, ⁹ sub-údigüda láali layúmajan lé meja arámudaguabei woun, o arítagni lan le lasáminarubei ladúgün. ¹⁰ Según arítagni le, le lúnbei lagúnfulirun quei lubúdubú dánme le lachúlürün lidáni, ladúnraguagüdübei Búngiu sun cátei lábugiñe lagúmadijan Crístu, dándu lé buri siélubei quei le uboúagubei.

¹¹ Láu lídaañadiwa lan ában lúma Crístu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lí-daañein lugúndan Búngiu le adúgübalin sun cátei quei labúseeruni. ¹² Anúadira lumútiwa lun wabágaridun, wagía le afiñebeí luágu Crístu furúmiñe, lun liñurúniwa líri Búngiu luágu luweírighun. ¹³ Jugúya gíñe, dan le jagáambunbalin ugánu le lánina inárüni—ugánu le anúgübalin asálbaruni jun—ába jafíñerun luágu Crístu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sí-firi Sándu le uágubei laríñaga, jun. ¹⁴ Sífiri Sándu ligía ában lichoúrún Búngiu woun luágu werésibirubei lan

alágan le lúnbei líchuguni Búngiu woun dánme lagúmuchuni lasálbaruniwa, wagía le lánigubei, lun liñurúniwa líri luágu luweírighun.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubeí nagáambunbei luágu afiñeni le jí-daanbei luágu Wabúreme Jesúsú, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagnun juágu lídan nayúmragun lun. ¹⁷ Amúriajatina lúma Lubúngiute Wabúreme Jesucrístu, Úguchili Weírighuti, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun gíñe jasúbudirunitima Búngiu buídu. ¹⁸ Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun jasúbudiruni ída líña lan luweírighun lúma lírisin alágan le líchugubei Búngiu joun lánigu. ¹⁹ Amúriajatina gíñe lúma lun lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagía le afiñebeí luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe oúweni, ába lañúragüdüni luegiñe loúnwenren yágüta siélu. ²¹ Rúlumuti loúgiñe sun gumádi, ubáfu, érei lúma arúejani lé buri siélubei, lúma loúgiñe sun le gayáraabei liriúdn, dándu lídan dan le queísi lídan le lúnbei líabin. ²² Rúlumuti sun cátei lábun lubáfu Crístu, rúlei gíñe Crístu guánarügü lun ligíaba lan ichúgüdünaü joun sun gürígia ja lánigubaña, ja gíribaña líligilisin. ²³ Gürígia jagía, ja méme lúgububaña Crístu, buin jáña láu libágarí Crístu (láu lubáfu láni Espíritu), áni Crístu guánarügü adúgübalin sun catei áni ágüda-jaleí.

Sálbaadiwa láu lareíni Búngiu

2 Rújali Búngiu ibágarí magúmuchaditi jun úara lúma Crístu le lásaaragüdübei lídaangiñe oúweni, láu sún meja jiláñugidün lan lun cátei le luáguti Búngiu, lurúma wuríbani lúma figoú buri le gádaan-balün. ² Lídan meja dan ligía, falá jumuti láni uboú le jémpulu, adúgei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi gürígia

garaúwarügütiña. Ligía lúnti lubeí yebe láburuan lanárimel ligáñi Búngiu wawágun queísi ja jíbiri. ⁴Weíriri lugúdemejabu Búngiu, ⁵ába larúfuduni luweírín línsiñejabu woun láu sún meja jiláñugidiwa lan lun cátei le luáguti Búngiu lurúma wafígoun. Ába ladáruni lubéneri íbágarí magúmchaditi woun láu lásaaragüdüni Crístu lídaangiñe óuweni. Sálbatiwa lubeíti láu lareíni Búngiu. ⁶Sarágüda lumútiwa gíñe Búngiu lídaangiñe óuweni lánina figoú láu lásaaragüdüni Crístu lídaangiñe óuweni, ába líchuguni wabára woun lúma Crístu yágüta síelu, lúma uweírigin lánina ubáraü ligía. ⁷Ladúgünbalin líra lun larúfuduni luweírín wínsiñe lun lúma lareíni woun lídan Crístu Jesúsu lídounme dan le lúnbei liábin. ⁸Sálbawádiwa luágu lareíni Búngiu, luágu wafíñen luágu. Mára jamúga ában cátei le wagía guánarügübei adúgübalin, Búngiu íchugubalin wasálbarun woun. ⁹Mára lídaangiñeti cátei le jamúga ladúga mútu, lun úa lan ni ában apántajati lueígiñe. ¹⁰Lugúndun Búngiu adúgübalíwa, iséri gürígia wagía lídan Crístu Jesúsu lun wadúgün cátei buíti, quei larítangun lúmagiñe binárü.

Waráandarun lúma Búngiu lídaangiñe Crístu

¹¹Jarítagua jumá lubeíti luágu ída jíña lán meja furúmiñe. Mára meja lídaangiñetün jarásan juríu, ligía lébubei gürígia ja juríu, ja erésibirubalin circuncisión, ába jagúarunün, “gürígia ja merésibirubalin circuncisión”, o gürígia ja mámabaña lánigu Búngiu. ¹²Lídan meja dan ligía, íbídiñegili meja Crístu jun, mámagidün meja lílana linásiñun Israél, ja lumútu-niñabaña Búngiu, bougudiñadün meja lueí lidáradun Búngiu joun lánigu lúma sun le lúnbei líchuguni joun lábugiñe darádu ligía. Jabágariduná meja ubouágu meménigiga, íbídiñega Búngiu le inárütibeí jun. ¹³Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴Barú laadiwa Crístu lídoun aráandaruni, ladúga adúga láaña juríu jáma ja mámabaña juríu lun ában méme jamá mútu, güríngua lumúti gáganiguaü lé meja afánreinragubaliña. ¹⁵Gumúguagüda lumúti cátei le lílúrudun Moisés láu sún buri gumádi lánina lúrudu ligía láu loúnwen, adúgeina láña juríu jáma ja mámabaña juríu lun ában mémebaña lan lídan. Ítara líña ladúgüni aráandaruni wadaangua. ¹⁶Láu loúnwen Crístu luágu gurúwa, ába lagúmchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña bíangubei lúma Búngiu, adúgeina láña bíangubei lun ábanrügü lan mútu—lumútuniña Búngiu jagía. ¹⁷Ñúbinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu. ¹⁹Ligía mámaadün lubeí teréncha lun larúeijan Búngiu,

lílanaadün larúeijan quei sun ja lánigubaña. Lufámiliangu Búngiu jugúya. ²⁰Sun wagía afíñetiña, dándu juríu quei máma juríu, ítara wáña quei ában ligíli to ligíbuaguboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dúbü le weírigitimaabei lídan ébuu ligía. ²¹Luágu ébuu ligía le Crístubei tiñúrawagua múna tugúya (wagía afíñetiña), aráanseñu sun tumégegün buídu darí lun tiábin lun ában tan ligíli to derégewatu lun Crístu, to gíñe lídaantu ában lúma. Ítara wáña wagía le afíñebeí luágu Crístu. ²²Ítara líña lubeíti, jugúya gíñe le mámabei juríu, lídaañadün ában lúma Crístu, óundaraguatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu láni Espíritu.

Luwádigimari Páblo lun lapúrichijan luágu Crístu joun ja mámabaña juríu

3 Ligía lébubei nayúmuragun, áu Páblo, lun Búngiu juágu. Daúwañu níña lueígiñe luwádigimari Crístu le adúga náalibeí jagánagua, jugúya le mámabei juríu. ²Mósu subúdi jumáli lan luágu rúlaali lan Búngiu wadágimanu le nun láu lareíni, luágu jáni fuleísei. ³Queísi nabúrújan jun, adúga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴Láu jalíjani le nabúrújabei, jasúbudirubei luágu gunfaráanda náni laráansejan Búngiu luágu Crístu, lé meja ligiarügübei asúbudirei. ⁵Masúbudirawagüdünti aráansejani ligía lun ni ában lídan meja dan le sügújalibeí, ánjeinti guetó, láu lubáfu Sífiri Sándu, arúfuda láali Búngiu joun láni apóstolugu jáma profétagu ja derégeguabaña jóungua lun le gumúti. ⁶Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña gíñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷Fuleísei láadina Búngiu láu líchugunina lun napúrichijani ugánu ligía Jáu lubáfu, laú sun madúna náni yebe fuleísei ligía. ⁸Únabutimaatina sügú láu le únabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírín jarísín lídan Crístu le mébejabei. ⁹Rúlaadina Búngiu, le adúgübalin sun cátei, lun nafúraanguagüdüni joun sun gürígia ída líña lan lanúgün aráansejani ligía lé meja arámudaguabei fulásu. ¹⁰Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejabaña síelu lun jasúbudiruni lichú láu Búngiu lídan sun luwýyerigu jádaangiñe afíñetiña, ja líligilisinbaña Crístu. ¹¹Úaraguati sun le lúma larítangun Búngiu le larítagubei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹²Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun. ¹³Ligía nayúmuragunbei jun lun mábu-

rujan lan jarúna lueígiñe le nasúfurirubei juágu, lugúndun weírirügüti cátei líra jun.

Línsiñejabu Crístu

¹⁴ Ligía lubeíti lébubei nájuduragun ligíbugiñe Lúguchi Wabúreme Jesucrístu, ¹⁵ le Jáguchibeí sun lufámilian Búngiu uboúagu lúma siélu. ¹⁶ Amúriajatina lúma Búngiu lun líchugun érei lúma ubáfu jun según luweírín ubáfu le lúmabeí, lun jídin jubáruaguóun láu Sífiri Sándu le jídaanbei. ¹⁷ Amúriajatina gíñe lúma lun jíchugun fulásu tídan janígi lun laganóun Crístu ñi, láu sun jaffíñen luágu, ¹⁸ lun gíñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígífen, lujúlilin lúma líñun línsiñejabu Crístu buídu, jáma sun jíbiri affíñetiña. ¹⁹ Amúriajatina lubeíti lun jasúbudiruni ínsiñejabuni le, le weíríti-maabei lueí sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladúgün gíbe sügú láu le wamúriajabei o le lan wasáminarubei, láu lubáfu le ñadágimeinbei wádan.

²¹ ¡Arijúalá luweírigin Búngiu lídaangiñe sun le ladúgübei jádan lánigu lúma lídan Crístu Jesúsú luágu sun sígulu lúma sun dan! Ítaralá.

Lídaañadiwa ában láu lubáfu Sífiri Sándu

4 Ladúga sun le adúga láalibeí Búngiu jun, ligía namúriajabei júma, áu le adaürúbei lueígiñe luwádigimari Crístu, lun jóuseragun júngua quei lúnti lan jadúgüni ja únbaña wájali lan Búngiu lun lánigu jamá quei lagúarun jun. ² Unabugu jumá, jínsiñejabu, gagúraasun jumá, areída jugúyame joun jíbiri. ³ Jóucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü jú-magua, ítara lúba lídaanbadün lan ában súnwandan. ⁴ Lúnti wanáangun woúngua lídan ában, lúma jáma jíbiri lánigu Búngiu ladúga lumégegün lan ában méme úgubu le gíribeí lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe. ⁵ Ligía méme Abúremein Wabúreme súngebui, ligía méme waffíñen luágu Jesucrístu, badíseitiwa sun wagía lídan líri Abúremein ligía. ⁶ Ában rügúñein Búngiu Jáguchi súngebui, jóugiñeñein súngebui, ñadágimeinti jáu súngebui, áni níjein jádan súngebui.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun. ⁸ Ligía laríñawagunbei tídan Lerérun Búngiu luágu Crístu.

Múdeiti siélu barúina láña adaürútiña lúmagua, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei uboúagu. ¹⁰ Crístu le arárirubei lun uboúagun, ligía méme gíñe le amúdeirubei lídoun líñun-ágei siélu láu sun luweírigin lun labuínchagüdüni súngebui láu guá-

narügü. ¹¹ Ába líchugun ubáfu lun cáda ában já-daangiñe affíñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmu-lugugiñe, jíbiri lun jóudin apúrichijeí ugánu buíti lánina asálbaruni joun ja magáambun jamágilibeí ugánu ligía, jíbiri lun jafádirijan lúma lun jarúfudajani Lerérun Búngiu. ¹² Ítara líña laráanseruniña lánigu lun gayáraabei lan jesériduni buídu, ¹³ lun jedérebudagüdüniña jíbiri lídan Crístu daríme wachúlürün sun wagía lun lídan wamá ában lídan waffíñen luágu Jesucrístu, le Liraú Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴ Mítaraanjádiwame quei irájüñü lun ménreengun lan wasáansijan lun ladúrujaníwa ligábalin furúmieguarügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janúgüniwa lídoun úma le maríchabei. ¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichúgüdünaübei joun sun lánigu ja gíribaña lúgubu. ¹⁶ Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wá-daangiñe gayáraati wíderaguniña ja wíbirigu. Ítara lúba gayára lan wawáanserun súngebui lídan weíbugun lúma Crístu, awáanse wagíame lídan ínsiñeni.

Iséri ibágarí lídan Crístu

¹⁷ Niján lubeíti cátei le naríñagubei jun lídan líri Wabúreme. Lun jebé lan jabágaridun quei ja ibídiñejabubaña lun Búngiu, ja abágaridubaña úragua lúma jasáminan le málabei. ¹⁸ Darúgu líña láu jasáminan, úati ibágarí le ñúbinbei lúmagiñe Búngiu jádan lugúndun ibídiñeti ni cáta joun lurúma tidere janígi. ¹⁹ Féridi jamáali jabúsigari, derégeguaaña jóungua lun wuríbani, adúgatiña sun luwúyeri iwíyei láu ugúndani. ²⁰ Ánjeinti jugúya, máma líña jafúnrendeirun lúmagiñe Crístu, ²¹ ladúga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun. ²² Ánjeinti luágu binádu ligáburí jabágaridun, arúfudajoúati jun lun jígiruni binádu meja jigáburí le mabuídunjalibeí láu jagúnfulirun lúma luríban ayúmajani le gayéeraguadibeí, ²³ arúfudajoúati jun lun iséri jumá lídan jáni espíritu lúma lídan jisáminan, ²⁴ lun iséri lan jigáburí, buíduñu, jarúmañu le gumúti queísi ligáburí Búngiu.

²⁵ Ligía jebé lubei jayéejan, adímureja jumeí inárüni jáma jíbiri lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina afgoujani, moún lumuti gíñe jálüdün sarágu dan arítagua luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagúriaragun lúngua, lun gíñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáam-

bubalün, ibíja jagíame abíniruni lídaangiñe jerérun. ³⁰ Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachúlürün wéyu lun jasálbarun le gumúti.

³¹ Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferúdnagua jumá júmagua ítara quei ferúduna lánün Búngiu lídan Crístu.

Ída lúba lan ligáburi jabágaridun lirájüñü Búngiu

5 Quei lirájüñü jubeí Búngiu ja jínsiñetiña lun, jóucha jumá lun ítara lan jigáburi quei ligáburi. ² Jínsiñegua jumá júniwagua ítara quei wínsiñedun lun Crístu, ába ledéregeregagun lúngua wawágu queísi ában mudún le adágarawagüdüti lun Búngiu. Ítara líña lín-siñejabu Crístu woun queísi cupáli le buíti líjeme, le águdajóubei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu. ⁴ Mawíyelá jiyúma, maríñagun jugúyame libídiouniga áu, ni dimúrei málati, ladúga mabuídunti buri cátei le. Lubáragiñe jadímurejan cátei líbeina líra, yúsu jumeí jiyúma lun jíchugun eteíngiruni lun Búngiu. ⁵ Subúdi jumúti luágu le lan agámariduti mamárieidunga, o ladúgün lán buri cátei wíyeti, o labágaridun lídan luweínamu águu—le queísigubeirügübeí lanúgüni írisini lisándunme—siñáti gafánran lan lídan jarúeijan Crístu lúma Búngiu. ⁶ Mayéedagualaún ni ában láu lagúburi buri dimúrei, lugúndun ladúga buri cátei wuríbati le, láburuja lanárima ligáñi Búngiu jawágun ja magáambadibaña lun. ⁷ Dírei jumá jaweí jíbe gürígia jára.

⁸ Lídaañadún meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi gürígia ja eíbugubaña lídan larúgounga. ⁹ Gürígia jagía, areídatiña, surúti jabágarí, jínsiñeti inárüni joun.

¹⁰ Jóucha jumá jafúnrendeiruni ca lan jínsiñebei lun Wabúreme. ¹¹ Mádanlaún buri cátei málati le jadúgübeí ja lánigubaña lubúriga, sagárügü jumeí lídoun larúgounga láu lubuídun jigáburi. ¹² Rúti busíganu íbini lun ladímurejóuniwa luágu buri cátei le jadúgübeí arámudaguarügü, ¹³ dan le larúfuduni larúgounga luágu wuríba lan jagáburi, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴ Ligía laríñawagúnbeí.

Agáguduabá, bugúya le arúmugubei, sarába jádaangiñe jílaaña, ábame larúgoungadágüdün Crístu báu.

¹⁵ Toúnigi jumá lubeíti buídu ída líña lan jóuserun. Mabágarida jumá quei íbídiougu táu, jabágarida quei chu táu. ¹⁶ Yúsu jumeí jídáani lídan cátei buíti, lugúndun níjein sarágu wuríbani lídoun buri dan le. ¹⁷ Ligía mabídiouniga lubeí jáu, jóucha jumá gunfaráanda jumáni ca lan lugúndaanbei Wabúreme. ¹⁸ Mabácharu-

ada jumá, lugúndun barú lumútiña líra gürígia lídoun féridi, lubáragiñe líra, buínjuma láu Sífiri Sándu. ¹⁹ Adímureja jumá júmagua luágu luweírigan Búngiu, erémuja jumá luágu, jerémuja táu sun janígi lun Wabúreme. ²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburi le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan wúri túngua lun túmari quei lun Wabúreme Jesucrístu, ²³ lugúndun wügúri tichúgüdinabei lúmari ítara quei Crístu lan tichúgüdinabei lílígilisin. Crístu gíñe Jasálbaragülebei gürígia ja gíribaña lílígilisin, ja méme gíñe gíribaña lúgubu Crístu. ²⁴ Ítara quei jagáambadi afíñetiña lun Crístu, ítara líña gíñe lúnti lan gagáambadi jamá wúriña joun jámarigu lídan sun cátei.

²⁵ Jínsiñetá lúmari wügúri lun quei luweírín wínsiñe lun Crístu, wagía le lílígilisin, ába líchuguni libágarí wawágu. ²⁶ Ladúgünbalin líra lun larúmadagüdüníwa lídaangiñe le binádubei láu wabásterun lúma gíñe láu lerérun, ²⁷ lun larúfuduníwa ligíbugiñe queísi ában wúri to ayárafaduboun lun túmari—buídumeraütu, jarúmañu, aráanseñu, ni cáta mégeiti tuágu, ában wúri derégüdaguatú, úraguatú. ²⁸ Ítara líña lúnti lan tínsiñedun lúmari wügúri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladúga ábanjali lan láu jágubu. ²⁹ Úati gürígia mebéresenti láu lúgubu guánarügü, jóugüdarügü lumúti, toúnigileí. Ítara líña gíñe ladúga Crístu tun lílígilisin, ³⁰ ladúga lúgubu tan, áni wagía líbiri úgubu ligía, ábanjadiwa lúma. ³¹ Laríñajare tídan Lerérun Búngiu. “Ligía lígirubei lubeí wügúri lúguchi túma lúguchu lun lamárieidun túma lúmari, ábame jayábin jagía bíangubei lun camá jamá ábanrügü.” ³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúaradagun Crístu jáma lánigu ja gíribaña lílígilisin. ³³ Laríñaguña gíñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun gíñe inébe lan túmari wúri tun.

6 Isáanigu, le lúnbei jadúgüni queísi afíñetiña lun gagáambadi jumá joun jagúbürigu, lugúndun ligía richábei. ² Niján ában gumádi weírítí lídaangiñe ligúmadin Búngiu le anúgübeí buíti woun láu wagúnfuliruni. “Inébelá bóguchi túma bóguchu bun lun buídu lan dan bun, ³ gabágarí amúrúme migífe ya ubouágu.”

⁴ Jugúya agúbürigu, magáñidagüda jumáña jisáanigu, agúriajarügü jumáña buídu lun gagáambadi jamá, arúfudajeina joun lun jafíñerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébeséi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida.

⁶ Seríwi jumáña buídu, mámarügü dan le aríagu jáña lan jun lun jeréderun buídu jáma, seríwi jumáña buídu súnwandan quei esériwidutiña lun Cristu, adúgeina lugúndan Búngiu táu sun janígi. ⁷ Adúga jumeí juwádígimari láu ugúndani, camá jamuga lun Wabúreme jadúgei máma joun gürígia, ⁸ ladúga subúdi jumáli luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladúgübei.

⁹ Jugúya iyúbudirigu, buídulá gíñe jóuseruniña jumúsuníña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanúgüniña Búngiu sun gürígia.

Cátei lé buri áubei wageíndagua lúma Máfia

¹⁰ Guetóti nidújeñu, jére jumá lídaañu ában lúma Wabúreme, láu lére le gabáfubei. ¹¹ Daújumoun sun daúguaü to líchuguboun Búngiu joun sun lánigu lun derégüdagu jumá lueí leyéedagunün Máfia. ¹² Lugúndun máma jáma gürígia ja láutiña úgürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan uboú le wageíndagua. ¹³ Ligía ragújumoun lubei sun daúguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárigiñeme jawánduni, ábame jeréderun derégüdagu. ¹⁴ Derégüdagu jumá lubeíti, daúgu táu láni Búngiu daúguaü queísi ában lisúdaaran. Daúgua jumá láu inárüni queísi láu ában béliti le gürágu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súaara. ¹⁵ Aráanseñu

jumá lun japúrichijani ugánu luágu Wasálbaragüle, le íchuguti darángilaü, queísi laráanserun súaara dan le ladáürunun lisábadun. ¹⁶ Lougiñe sun cátei, barújumei jafíñen quei lárügüdüni súaara cátei láuti gürábu ligíbugiñe, lun jaráramunun sun gimára durúnguatu to lachúüjaboun Máfia juágun. ¹⁷ Barújumei jeménigidun luágu jasálbarun quei ladáüruni súaara lubúnidin lun latoúnigiruni lábulugu, barújumeime Lerérun Búngiu quei efeín to líchuguboun Sífiri Sándu jun. ¹⁸ Adúga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarúna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun giñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mambabaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebei nadaürúwa guetó. Ayúmuragua jumá lun napúrichijani ugánu le láu manúfudei, queísi lubúdubü.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádígimari Wabúreme, ligíaba íchiga ugánu jun nuágu lúma luágu le nadúgübei. ²² Ligía nouñajaanbalin jun lun laríñaguni jun ída wáña lan, lun líchugun gurásu jun.

²³ Rúlá Búngiu Úguchili lúma Wabúreme Jesucrístu darángilaü lúma ínsiñeni láu afíñeni jun, wadújeñu lueígiñe Jesucrístu, ²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

FILIPENSES

Labúrujan Páblo furísunrugugiñe joun tílana ligílisi to Filíposboun

1 Anája áu Páblo lúma Timotéo, esériwidutiña wagía lun Jesucrístu, wabúrújañoun gárada to jun, sun jugúya fádirigu jáma esériwidutiña ligílisirugu ja ubúrugubaña Filípos, jáma jíbiri lánigu Búngiu ja lí-daañabaña gíñe ában lúma Crístu Jesúsu. ² Binílaün Wáguchi Búngiu lúma Wabúreme Jesucrístu, ibíja jumá giñe darángilaü jámagiñe.

Layúmuragun Páblo jawágu affíñetiña

³ Ságü narítangun juágu neteíngiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítangun luágu luweírín jíderangunina abúrchaguagüdei ugánu le lánina asálbaruni lúmagiñe wéyu le jagáambubalin chülú lúmoun wéyu le ugúñebei. ⁶ Chóuru numúti luágu Búngiu lan le agúmeserubei adúgei lubuídun luwádigimari jídan, lasígira mémeba lan adúgei daríme wéyu le liábingüle Jesucrístu. ⁷ Richáti lun narítangun juágu ítara lugúndun weíriri jínsiñe nun, lugúndun gíñe gafánran jumá lídan abíniruni le nánibei dan le furísunruguñadina lan luágu nesériwidun lun Crístu, o dan lan le naráramun ligíbugiñe lúruudu lun nadímurejan lueígiñe loúbadina ugánu le lánina asálbaruni lun nachóururuni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweírídun jínsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában ibágari jarúmati, madúnrun jumámuga dánme liábin Crístu. ¹¹ Amúriajatina lúma Búngiu lun buin jumá láu lubuídun igáburu, láu lubáfu Jesucrístu le jídaanbei, lun líchugúniwa uweíríguni lun Búngiu luágu.

Crístu ibágaribei nun

¹² Nidújeñu, buséntina jasúbudiruni luágu cátei lán buri le susérelibei nun, ñúbinjali lídan linárün lun líderangun lídan lapúrichijoún ugánu le lánina asálbaruni. ¹³ Subúdi jamúti lubeíti sun tisúdaraana lúban urúei jáma sun ja jíbiri luágu nadaürúña lan lueígiñe nesériwidun lun Crístu. ¹⁴ Játi jíbiri idújeñu, láu jaríjin luágu nadaürúña lan lueígiñe napúrichijani ugánu luágu Crístu, ragújaña anígi lun japúrichijani méme

ugánu ligía manúfudeiga, láutima affíñeni luágu Crístu.

¹⁵ Inárüni luágu añájein lan adímurejatiña luágu Crístu ladúga jagímugan, busén jagía janúgüniña gürígia jánigume. Ánjaña jíbiri, japúrichijan luágu Crístu láu lubuídun arítangun. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürúña lan. ¹⁷ Ánjaña ja jíbiri, máma láu janárün japúrichija, lun jaríjiniwa weírigu jadúgei, lúma lun jíchugun líbe samínaü nun guetó le nadaürúña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba gíñe, ¹⁹ lugúndun subúdi numúti luágu buídubei lan nasálirun lídan sun cátei le, ladúga jayúmuragun lun Búngiu nuágu lúma ladúga líderangunina láni Jesucrístu Espíritu. ²⁰ Cátei le nabúseerúbei lúma le nagúrabubei, lun madúgün nan ni cáta lun jamúga nanúgün busíganu luágu, gayáaarügü lámuga nadímurejan manúfudeiga, arijúa mémetima lámuga luweírígün Crístu nuágu guetó quei súnwandan, wínwañu áu yebe, jiláñu áu yebe. ²¹ Lugúndun ánjana abágarida méme, lúnba Crístu nabágarida, ánjana ouwe, buítimaabei nun lugúndun lúmounbadina Crístu. ²² Ánjein gayára lubeí nasígirun ñadágimein luágu láni nabúreme Crístu fuleísei láu nasígirun abágarida, ibídiñeti nun ca lan buítimaabei, ánjein lun lubeí nasígirun wínwañu ódi lun noúnwen. ²³ Jénreenguti nun lun nanúadajan lídan bián cátei le. lídan ában oubaü, buséntina jamúga noúnwen lun nídin erédera lúma Crístu, lugúndun buítimaati jamúga líra nun, ²⁴ lídan le ában oubaü, buítimaati jun lun nasígirun abágarida. ²⁵ Áni quei chóuru náni cátei le, subúdi numúti luágu nerédera mémeba lan júma lun níderangunün lun jasígirun jubáruaguóún, lun gíñe jagúndaaruntima lídan jaffíñen. ²⁶ Ítara lúba jíñúragüdüni líri Crístu Jesúsu luágu lagíribudagüdüni júmoun.

²⁷ Joúcha jumá lun úaragua lan ligáburu jabágaridun lúma larúfudajan Crístu. Ítara lúba, ánjana ñúdüñ aríjaün o ánjein díseñu níña lubeí jueí lun agáambarügü nan juágu, gayára lámuga nasúbudiruni luágu derégüdagu meme jíña lan áni lídaañadün lan gíñe ában, áfaagua súngubei lídan ában lun labúrchagun affíñeni luágu Jesucrístu queísi Wasálbaragüle, ²⁸ mígraguagüdünga júngua lun janúfudedagun jaweí jáganiñu. Ladúga jáganiñu lan gürígia jagía, arúfuda lumúti líra furáangu luágu jóúdiña lan lídoun gürín-guaü, arúfuda lumúti gíñe jasálbarun jugúya le affíñebei, áni lúmagiñe Búngiu liábin cátei le. ²⁹ Ladúga Crís-

tu, gayáraati mámarügü lun jafíñerun luágu, gayáraati gíñe jasúfurirun lueígiñe. ³⁰ Jugúya núma, lídaañadiwa ában méme áfaaguni. Aríja jumáli meja ída líña lan náfaagun, guetó agáambatün luágu ída líña méme lan náfaagun.

Lúnabugun Crístu lúma luweírigan

2 ¿Sandítünsan dúgüdaguaü ladúga lídaañadün lan ában lúma Crístu? ¿Barútünsan gurásu luágu línsiñejabu jun? ¿Eíbugatünsan sun jugúya lúma Sífiri Sándu? ¿Subúdi jumútisan lugúdemejabu Crístu jun lúma lareídun? Afíñetina luágu ítara líña lan. ² Ligía lébubei namúriajan júma lun jaganoún lídan úarani lúma ínsiñejabuni júmawagua, lun ában lan jarítangun, ában lan gíñe jáfaagun luágu buri cátei le lání Crístu. Láu jabágaridun ítara, buin lúba nugúndan jáu.

³ Madúga jumá ni cáta juoúguarügü lun janügúniwa weíri, ni luágu pántaü, adúga jumei cátei láu únabuguni. Buídulá janügüniña ámu gürgia juei guánarügü.

⁴ Mámarügüla cátei le buídubei jun jáluaja, áluaja jumei gíñe le buídubei joun ámu.

⁵ Ítaramemelá ligáburi jasáminarun quei meja ligáburi lasáminarun Crístu Jesúsu. ⁶ Láu sún meja Búngiu Irájü lan ligía, málugunti lárügüdüni lírícha quei Búngiu. ⁷ Lubáragiñe líra, ába lígiruni le lánibeí, ába ladügün quei músu láu lagúriajoun quei wügúri.

⁸ Dánti le ítarañali quei wügúri, ába lúnabudaguagüdüntima lúngua, áni ladúga lagáambadi, ába loúnwen luágu gurúwa láu sun nibúsigaríduna lan ouweni luágu gurúwa. ⁹ Ligía líchugunbalin Búngiu líñun-ágei uweírigan lun lúma íri le weírigitimaabei lídaangiñe súnubei, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun, ¹¹ lun gíñe jasúbudiruni súnubei, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga ubouágu

¹² Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguoun lídan lémeri Crístu láu únabuguni lúma inébasei lun Búngiu daríme jebélurun siélun. ¹³ Búngiu íchugubalin lubuídun ayúmajani jun lun jeíbugun lúma, íderagualaún lun jadúgüni quei labúseeruni.

¹⁴ Adúga jumei sun cátei láu ugúndani, masígenejaanga, ¹⁵ madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürgia wuríbatiña, magáambaditiña lun Búngiu. Jugúya, jarúgoungadagüdatün jagánagua gürgia jagía quei warúguma lídan ában fulásu búrigati, ¹⁶ íchigeina ugánu luáguti ibágarí magúmuchaditi joun. Láu jigáburidun ítara, gúndaabadina juágu dánme le lachúlürün wéyu le liábingüle Jesucrístu, láu nasúbudiruni luágu máma lan luágu ni cáta nuwádigimari jagánagua.

¹⁷ Íbini lun lan níchuguni nibágarí guánarügü lun loústarun jafíñen, le queísibeí ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu. ¹⁸ Lun jamúga lasúseredun ítara lun noúnwen luágu nesériwidun lun Crístu, lúnti gíñe jagúndaarun úara núma.

Timotéo lúma Epafrodító

¹⁹ Ánjein busén lubei Wabúreme Jesucrístu, noúnajabei Timotéo aríjaün madíse, lun gayáraabei lan nagúndaarun dánme le lagíribudun láu ugánu nun juágu. ²⁰ Úati ámu núma le asáminaruti quei áu, le áfaaguti lun buídu lan lídin jun, ²¹ súnubei jawoúgua rügúñein jarítagua, mebéseguntiña láu le labúseerubei Crístu Jesúsu. ²² Ánjeinti Timotéo, subúdi ti ligáburi jun, ída líña lan lesériwidun núma lídan lapúrichijoun ugánu le lánina asálbaruni queísi ában isáani le íderaguti lúguchi. ²³ Agúrabatina lubeíti noúnajani aríjaün lárigiñeme nasúbudiruni ánjein náfuriduba lubei furísunrugugiñe, ²⁴ láu sun afíñe nan luágu niján lan lugúndaanbei Búngiu, lun nídin aríjaün núngua madíse.

²⁵ Genége lumúti gíñe nun luágu lúnti lan noúnajani nibíri Epafrodító lárigoún júmoun. Quei jasúbudirun, ligía noúbabei lídan luwádigimari Crístu lúma lídan áfaaguni, le jounajabei jugúya guánarügü nun lun leténirun lun le nemégeirubei. ²⁶ Weíriti labúseerun laríjinün áni gíbeti larítangun ladúga jagáambun luágu lasándirun. ²⁷ Inárüni luágu sándi lán meja, yaráfa lun loúnwen, ába gudémejabu lan Búngiu lun lúma nun lun mabíjin nan íruni lánwoun le núagubei, ába lareídaguagüdüni. ²⁸ Ligíatima nabúseerünbei noúnajani lun jagúndaarun láu jaríjini. ²⁹ Resíbi jumei láu sun ugúndani queísi idújei lueígiñe Wabúreme Jesucrístu, áni jínsiñe jagíame sun ja ítaraña quei ligía jun súnwandan, ³⁰ quei chúlú lubei yaráfa lun loúnwen ladúga lesériwidun lun Crístu. Derégeguati lúngua, mebésegunga cába lan asúsereda lun, lun lesériwidun nun, cátei le jásiñerubei adúga lugúndun díseñu jíña lan nueí.

Úma le inárüti lun weréderun richágu ligíbugiñe Búngiu

3 Lagúmujoun cátei, nidújeñu, gúnda jumá lídan Wabúreme. Mabúchati nuágu abúrújei le abúrúja náalibeí jun, lugúndun buíti jun. ² Cátei ligía, lun toúnigigua jumá júngua jaweí ja ítaraña ouserun quei oúnli, ja adúgübalin le wuríbabei, ja íbagubalin úgubu. ³ Aríñagatiña yéetiña jagía luágu lúnti lan jerésibiruni wügúriña circuncisión lun lánigu jamá Búngiu, iyéeni líra. Lirájüñü Búngiu le tímatimaati wagía le agúnfulirubei lúma láu lubáfu lání Espíritu le wádaanbei, wagía le gúndaabei láu lánigu wamá Crístu Jesúsu áni míchu wamúti weménigi luágu cátei bougudinti lueí lun wasálbarun. ⁴ Lun jamúga gayára lan wasálbarun luágu cátañañadiwa lan bougudin lueí Jesucrístu, garíchatina jamúga lun neménigidun luágu

buri cátei ligía, úati jamúga ni ában garíchatí nueí lun leménigidun luágu buri cátei ligía. ⁵ Wídü wéyu lueígiñe nagúriajoún, ligía nerésibiruni circuncisión lugúndun jarásan israelítagu áu, jádaangiñetina lufámilian Benjamín, hebréo áu lúmagiñe nagúriajoún, hebréogu gíñe nagúbürigu. Fariséo meja áu lídan ligáburí gunfaráanda náni jalúrudun juríu, ⁶ janárimeti meja neméendün darí neíbaajaniña afíñetiña luágu Jesucrístu. Luáguti lísurun ibágari según jalúrudun juríu, úati meja ni ában lun gayára lan laríñagun ni cáta nuágu. ⁷ Ánjeinti guetó, sún buri meja cátei le, lé meja weírítibeí cátei nun, barú numuti quei ni cáta lun gayáraabei lan nasígiruni Crístu. ⁸ Sügú láu líra, sun cátei le gayáraabei jamúga níjein lan núma, rúnumuti quei ni cáta ligíbugiñe oúnwenbun agáñeiruni le luágubei nasúbudiruni Wabúreme Crístu Jesúsú. Féridi náali sún buri cátei le ladúga nasúbudiruni Crístu, áni barú numuti sun le quei ífei lun nagáñeiruni Crístu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lílúrudun, lugúndun barúlaadina Búngiu richágu ligíbugiñe láu nafíñerun luágu Jesúsú. Richáguáü ligía ában cátei le lídaangiñeti afíñeni, máma adúgüni. ¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdübalin Jesúsú lídaangiñe ouweni nuógu, lúma lun nasúfurirun luágu queísi lasúfurirun nuágu, ¹¹ lun ítara nan quei ligía lídan loúnwen láu eménigini luágu násaaruba lan lídaangiñe ouweni quei ligía.

Áfaaguni lun lachúlürún lídoun lébeja

¹² Máma naríñaguña luágu chülújadina lan lúmoun lébeja lídan sun cátei le, maríñaguntina gíñe luágu buídujali lan nigáburí lídan sun cátei, le nadúgübei, nubáruaguouñadina méme lun ítarabadina lan queísi meja labúseerun Crístu lun ítarabadina lan dán meja le lasálbarúnbalina. ¹³ Nidújeñu, maríñaguntina luágu íbija náali lan sun cátei le, le nadúgübei, nabúlieiduni sun le eréderubei árigi lun náfaagun lun nárügüdüni le nigíbugiñebei, ¹⁴ lun nachúlürún lúmoun lébeja eíbaaguni ligíbuagu uboú le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsú.

¹⁵ Sun wagía le weínamujalibeí lídan wafíñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei gíñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibeí.

¹⁷ Nidújeñu, amúriajatina júma lun ában lan jarítangun lun jafálaruni náni jémpulu, aríja jumáña gíñe ja abágaridubaña según jémpulu le wíchugubei jun.

¹⁸ Aríñaga náali jun sarágu weíyaasu áni naríñagayaali jun láu águiraü, luágu añájein lan sarágu ja aríñagatiña luágu afíñe jamá luágu Crístu, abágaridutiña queísi láganiña Crístu le ouwebei lun larúmadagüdüniwa. ¹⁹ Lídaanme lagúmujoún dan, gürín-

guabei cátei joun—jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei uboúguna jarítagua. ²⁰ Ánjein wagía, siéluna wagía, áni wagúrabuña líabin Wabúreme Jesucrístu le Wasálbaragüle siélugiñe. ²¹ Lídaanme wéyu ligía, lasáansirubei wágubu le emégeirubei sarágu lun ítara lan quei lúgubu, le úabei lemégeirun. Áni ladúgübei láu méme ubáfu le luágubei lun líchuguni sun cátei lábugiñe lagúmadijan.

Gúnda jumá súnwandan lídan Wabúreme

4 Ligíati nidújeñu jínsiñetiña nun, ítara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queísi idújeñu lueígiñe Crístu. ³ Ánjein bun, noúba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noúbagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürúwaali jíri sun jagía tídan líliburuna íbágarí magúmuchaditi.

⁴ Gúnda jumá súnwandan ladúga lídaañadün ában lúma Wabúreme. Aríñagaya numúti. ¡Gúnda jumá!

⁵ Subúdiwa jumá quei gürígia areídatiña ladúga madíseeli líabin Crístu.

⁶ Magíbedalá jarítangun luágu ni cáta, aríñagarügü jumeí sun cátei lun Búngiu súnwandan dan le jayúmuragun lun, amúriaja jumá lúma, mabúlieidagunga lun jíchugun eteíngiruni lun. ⁷ Ábameti líchuguni Búngiu lidárangilan jun, darángilaü le, weírítimaabei lubáfu lun lagídarun jidjjeri sügú láu jubáfu lun jarítanguní cátei le lúnbei jadúgüni, áni darángilaü ligía, loúnigiruboun janígi lúma sun jisáminan lueí idjjeri lídan le jeménigidun luágu Búngiu lídaangiñe Crístu Jesúsú.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibeí, sun le gadúnabei inébesi, sun le richábei, sun le jarúmabei, sun le gúndaawabei láu, sun le uágubei buídu lan ladímurejóua. Samína jumá luágu sun le buídubei lúma sun le gadúnabei uweíríguni.

⁹ Falájumei sun le arúfuda náalibeí jun lúma sun le resíbi jumáalibeí númagiñe. Gúnfuli jumá láu le naríñagubei jun, áyeija jumeí nigáburí. Ábame júma lan Búngiu láu lidárangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu

bulíei jumáadina lán yebe, madárirügü jiñáalin ligáburí ída lúba lan líderagunina. ¹¹ Mabúseerúntina jamúga jarítangun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati, ¹² subúdi numúti labágaridúniwa lídan gudémeín, subúdineí gíñe gámawa lan gíbe. Furéndeijadina lawandúniwa furúmieguarügü igáburí, ilámaü yebe o quimúle, níjeín lan darí lun lígiragún o úa lan ni cáta. ¹³ Úati cátei jénreenguti nun ladúga lídaañadina ában lúma Crístu le íchugubei ubáfu nun. ¹⁴ Láu sun líra, buíti jadúga láu jíderagunina lídan lénreengúnga nun.

¹⁵ Queísi gíñe jasúbudiruni, jugúya Filíposna, lárígiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügúñadün tílana ligílisi oúnaja seínsu nun quei ateíngiragülei luágu nesériwidun jun. ¹⁶ Sun meja anájagua lan ubúrugú Tesalónica, oúnajatün edéweejani nun, mámarügü ában weíyaasu, lun le nemégeirubei. ¹⁷ Máma jamúga nasáminarun lun gubeírügü nibíjin som cátei, le

nabúseerúbei, lúntima lagánwoundun le lúnbei jibíjini lúmagiñe Búngiu. ¹⁸ Áu, resíbi náali súngubei lúma sūgú láu lé yebe lúnbei nerésibiruni, láu le jóunajabei nun lúma Epafrodító ígiraguaali núma. Le jóunajabei nun, ítara líña quei líjeme cupáli le águdajoúti lun Búngiu, ában edéweejani le lerésibirubei láu ugúndani. ¹⁹ Líchugubei lubeíti Nubúngiute sun le jemégeirubei jun queísi buri luweírigun lirísín, lídaangiñe Crístu Jesúsu. ²⁰ ¡Uweíriguni lun Wáguchi Búngiu lun sun dan!

Lagúmujoún buri mábugaü

²¹ Rújumei numábugaü lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun. ²² Sun ja yábaña Róma ja lánigu Búngiu, játima tílana lúban urúei, mábuga jáña gíñe jun.

²³ Binílaün Wabúreme Jesucrístu sun jugúya. Ítaralá.

COLOSENSES

Labúrūjan Páblo joun tílana ligílisi to Colósasboun

1 Anája áu Páblo, le ában lání Jesucrístu apóstolu láu lugúndan Búngiu. ² Úara lúma Timotéo le wadúje lueígiñe Jesucrístu nabúrūjañoun gárada to jun, jugúya le lánigu Búngiu ja gúnfulibaña lúma Crístu le uágubei jafíñera, ja ubúrugubaña Colósas. Binílaün Wáguchi Búngiu, ibíja jumá gíñe darángilaü lúmagiñe.

Layúmuragun Páblo jawágu afíñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucrístu, dan le wayúmuragun lun juágu. ⁴ Agáambaadiwa luágu jafíñen luágu Crístu Jesúsú lúma luágu jínsiñejabu joun sun ja lánigubaña Búngiu, ⁵ ladúga eménigini le juágubei luágu le areidúañubei jubá síelu. Chülütün árügüdei eménigini le lárigiñe jagáambuni ugánu le inárütibe, ugánu le luáguti asálbaruni. ⁶ Ugánu méme le, lé meja apúrichijóubei jun, labúruchaguña lídan sun ubouú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le. ⁷ Ligía cátei le larúfudajabei Epáfras jun, le ñadágimeinjalibe wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua. ⁸ Barújali ugánu woun juágu lúma luágu jínsiñejabu le rúlaalíbe Búngiu jun. ⁹ Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei lání Espíritu jun. ¹⁰ Ítara lúba gayára lan jagáburidun queísi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun gíñe jasúbudirunima Búngiu. ¹¹ Amúriajatiwa lúma lun léredagüdünnún láu luweírin lubáfu lun gayára lan jawánduni sun cátei láu sarágu gurásu lúma ugúndani, ¹² lun gíñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbei líchuguni joun lánigu lídaanme larúeijan le lánina larúgounga. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraú le jínsiñebe, ¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábei jaríjini gürígia, ába líabin ubouágun lídan ában luwúyeri le gayáraati jaríjini gürígia lídan Liraú le Jesucrístu, le weírigutimaabei lídaangiñe sun cátei le níjeinbei. ¹⁶ Lídaangiñe Crístu ladúgei Búngiu sun cátei le siélurugubei lúma le ubouágubei, dándu buri cátei le marijínbei quei le aríjubei. Lídaangiñe Crístu ladúgei arúeijani, gumádi, lúruudu buri lúma buri ubáfu le jáni ánjeligu, áni lun gíñe Crístu ladügúwa. ¹⁷ Lubáragiñebe sun cátei, níjeinjali meja Crístu, áni láu lubáfu, níjein lubeí sun cátei lídan lubára. ¹⁸ Lougiñe sun líra, Crístu jachúgüdinabei lánigu, ja gíribaña lúgubu, ja gíñe gíribaña líligilisin. Ligía le íchugubei íbágarí lun úgubu ligía, ligía furúmiñebe ísaara lídaangiñe ouweni lun mouñwendügüyaali lan, lun ligía lan láu furúmiñeti ubáraü lídan sun cátei. ¹⁹ Ítara líña labúseeruni Búngiu lun níjeinbei lan sun le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun ubouú dayárugubei lúmagua, dándu buri cátei le ubouágubei quei lé buri siélubei, ladügüni aráandaruni ligía láu loúnwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladúga buri cátei wuríbatí le jadügübei. ²² Ánjeinti guetó, aráandaragüda láadün Búngiu lúmagua láu loúnwen Crístu lun larúfudunün jarúmañu, madúrunga, queísi lánigu ligíbugiñe. ²³ Ítara méme lúba gíñe ánjaün asígira derégüdagü lídan jafíñen, ragúñu buídu luágu Crístu, mígirunga jumeí eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijóubei lídan sun ubouú, le gíñe napúrichijabei, áu Páblo.

Rúlumuti Búngiu Páblo lun lesériwidun joun tílana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loustaragüdüniwa le lúngilibei lasúfuriruni Crístu jawágu lánigu, jawágu líligilisin ja lúgubu. ²⁵ Núbinjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le lání Búngiu jun quei lubúdubu. ²⁶ Ugánu ligía, cátei lé meja arámudañu lubeí Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu

Búngiu labúseera lasúbudiragüdüni luweírin irisini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíríguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürígia lun járügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2 Buséntina lubefti lun jasúbudiruni luágu luweírin lidíjeri narítangun juágu, lúma jawágu affíñetiña ja Laodicéabaña, lúma jawágu sun jíbirigu affíñetiña ja maríjin jamágidinabaña. ² Weíríti nayúmajan lun gagúraasun jumá tídan janígi, lun lídan jumá ában láu línsíñejabu Crístu juágu joun jíbirigu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafíñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibeí ában oúnwenbun irisini woun. ⁴ Naríñaguñein buri cátei le jun lun mayéedun lánün ni ában láu buri dimúrei buíduburíti. ⁵ Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafíñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafíñen luágu, lúnti ítara lan jabágaridun lídan ában lúma, ⁷ lun ragúñu lan jibágaru luágu lídan le jídin jubáruaguóun lúma, derégüdagu lídan jafíñen ítara queísi larúfudajoúniwa jun, láu eteíngiruni lun Búngiu súnwandan.

Iséri ibágaru lídan Crístu

⁸ Toúnigi jumá, mígiraguagüda jumá júngua joun ja busénbaña jayéegan láu buri arúfudajani málati. Máma lúmagiñeti Crístu cátei le jarúfudajabei, lúmagiñeti jagáburu binádu mútu lúma buri ligáburu jarítangun gürígia lánina uboú le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le uboúagubei lúma le siélubei. ¹¹ Láu gíñe lídaañadün lan ában lúma Crístu, queísigubeirügü resíbi jumáli lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jibíjubei, máma le adügúbei láu bíti luágu úgubu, jáni circuncisión, láu jasálbarun lídaangiñe figoú le áubei jíabin uboúagun. Niján luwúyeribeí ladügüniwa Crístu lun lánigu wamá Búngiu. ¹² Láu jabásterún, arúfuda jumúti luágu bunáwa jumá lúma Crístu lun ibágaru le binádubei, sarátün gíñe lúma lun ibágaru le iséribei ladúga jafíñerun luágu lubáfu Búngiu le ásaaragüdübalin lídaangiñe oúwení. ¹³ Luágu meja

ában dan, jíñe jíña meja lun cátei lánina Búngiu ladúga jíñe, ladúga gíñe jabágariduña lan queísi gürígia bouguditiña lueí lilúrudun Búngiu, agúnfulireina lúma sun luríban layúmajan júra. Anjeinti guetó, rújali Búngiu iséri ibágaru jun úara lúma Crístu. ¹⁴ Láu loúnwen Crístu, ferúduna láali Búngiu sun wafígoun, ába lagúmochaguagüdüni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágu láni Búngiu lúrudu ligía luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüdüniña ligíbugiñe guríriguaü, ába lanúgüniña quei adaürútiña lun.

Áluaja jumeí buri cátei le lánina siélu

¹⁶ Úa la ni ában añáwarijati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri irúmu, lúma iséri játi, o luágu lan wéyu le eméraguagülei. ¹⁷ Sún buri cátei le, lúntirügü lagúnfulirúniwa lúma darí meja líabin Crístu uboúagun, liyáwa rügúñein le lúnbei líabin, Crístu ligía linárünbei. ¹⁸ Mígiraguagüda jumá júngua joun ja afámurubaña quei únabugutiña, ja ájuduragubaña joun ánjeligu, lun janúgüni jagáñirun jueí. Weíríti jadímurejan luágu nege buri cátei le ayáwadaguti joun, ába buri janáangun jóungua luágu ligáburu jasáminan, le jáni gürígia. ¹⁹ Mámañanu lídan ában lúma Crístu, le ichügüdünaü joun sun lánigu ja gíribaña lúgubu, le ágüdajabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰ Jugúya, ígira jumáli binádu jigáburu, queísi lídaanjadün lan ában lúma Crístu, gidáadün lídaangiñe ligáburu jarítangun gürígia luágu buri cátei. ¿Cáti uágu jabágaridunbei camá jamuga lánigugidün uboú, ²¹ íchaagua júngua lun ligáburu uboú lun jagúnfulirun lúma Búngiu queí buri jamúga lúrudu le aríñagubei. “Magúurabeí le, meígabeí líra, márügüdebeí cátei ligía?” ²² Sún buri gumádi le, luáguti buri cátei le gagúmochaditi láu layúsúrún, áni máma ámu cátei lueí gumádi buri lúma arúfudajani le jáni gürígia. ²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma únabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmagan gürígia.

3 Queísiti jabágariduña lan ában ibágaru iséri ladúga lídaanjadün lan ában lúma Crístu, áluaja jumeí buri cátei le lánina siélu, le ní lubei Crístu ñun lueígiñe loúnwenren Búngiu. ² Samína jumá luágu buri cátei le lánina siélu, máma luágu buri le lánina uboú. ³ Jilátün lúma Crístu lun uboú le, guetó, níjein jibágaru le tímati-maati lúma Crístu le yágütabei siélu lúma Búngiu. ⁴ Dánme lagíríbudun Crístu, le úmabei lídan wamá ában, wachúlaaguba gíñe lúma, ábame gafánran wamá lídan luweírígoun.

Binádu ibágari lúma iséri ibágari

⁵ Ígira jumeí sun le jigáburibei le láninabei uboú le. Úa la ni ában jdaangiñe agámariduti mamárieidunga, madúgün jugúyame cátei wíyeti, mafálara jumeí luríban ayúmajani, maweínamulá jágu luágu cátei le máma jáni, le méme ájuduraguni joun sáandu.

⁶ Lueígiñe buri cátei le, lábujurjan lanárimel ligáñi Búngiu jawágun ja madúgünbaña gásu láu. ⁷ Jugúya, adúga buri jumúti meja cátei le lídan meja binádu jibá-gari, ⁸ ánjeinti guetó, ígira jumeí sún buri cátei le. ígáñi, iyéreejabuni, wuríbani, anábajani, lúma buri dimúrei wíyeti. ⁹ Maríñaga jumá iyéeni júmagua quei ígira jumáali lan binádu jigáburi lúma lé buri meja jadúgübei. ¹⁰ Isérijali jigáburi le isérideinábei quei méme ligáburi Búngiu guánarügü le adúgübalin, daríme jasúbudiruni Búngiu buídu buídu. ¹¹ Iséri ibá-gari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machúlaaguntiña, idámuni, máma idá-muni, Crístu, ligía sun cáteibei, áni níjein gíñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeíti, abágarida jumá queisi lánigu, láu gudémejabu, areíduni, manáanguni ún-guaü, gagáambadi, lúma gagúraasuni. ¹³ Gagúraasun jumá jubáruagua, ferúdunagua jugúyame jú-mawagua, ítara quei ferúduna lánün Crístu, ítaralá gíñe jadúga. ¹⁴ Louígiñe sun cátei, jínsiñejabu jumá, ligía cátei le íchugubalin sun cátei lídan ában, áni jóustagüdaleí lubuídun jigáburi. ¹⁵ Abúguraleí lidárangilan Búngiu sun le jadúgübei, ladúga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteíngiradi jumá gíñe.

¹⁶ Buíngüdalóun láni Crístu ugánu janígi le gumúti. Arúfudaja jumá júmawagua, aríñagagua jugúyame jú-mawagua láu lichú áu. Jerémuja luágu luweírigan Búngiu láu eteíngiruni lun tídan janígi.

¹⁷ Furúmiegurügü cátei le jadúga o le lan jaríñagun, adúga jumeí lídan ában luwúyeri le íchuguti inébesei lun Wabúreme Jesucrístu, eteíngireina Búngiu Úguchili lídaangiñe Jesucrístu.

Igáburi le lúnbei wagáburiduni jáma ja wábiñebaña

¹⁸ Würíña, gagáambadi jumá joun júmarigu, ligía cátei buíti le lúnbei jadúgüni queisi afíñetiña luágu Wabúreme Crístu. ¹⁹ Wügúriña, jínsiñe jamá júmarigu jun, magáñida jumá jáma. ²⁰ Isáanigu, agáamba jumáña jagúbürigu lídan sun cátei, ladúga ligía jínsiñe-bei lun Búngiu. ²¹ Agúbürigu, másügüragualá jagú-madiruniña jisáanigu, ragú jáñein magúraasuni. ²² Es-ériwidutiña, gagáambadi jumá joun jiyúbudirigu lídan sun cátei, mámarügü dan le aríagu jáña lan jun lun jeréderun buídu jagíbugiñe, adúga jumeí súnwandan táu sun janígi ladúga luweírín linében Búngiu jun.

²³ Furúmiegurügü cátei le jadúga, adúga jumeí láu

ugúndani, camá jamuga jadúgüñein lun Wabúreme Crístu máma joun gürígia. ²⁴ Subúdi jumáali luágu líchugubei lan Búngiu alágan jun queisi jafáyeiruaja, ladúga lun Wabúreme Crístu le Jabúreme le tímati-maati jesériwida. ²⁵ Ánjeinti le adúgüti wuríbati, lerési-birubei lafáyeiruaja wuríbati le ladúgübei, áni ában láu lanúgüniña Búngiu sun gürígia.

4 Iyúbudirigu, lúnti buídu lan jigáburi jáma jumú-suniña, ousera jumáña láu úarani lúma íríchaü, jarítagua jumá luágu níjein lan gíñe ában Jabúreme yágü-ta siélu.

² Ítara méme jumá ayúmuragua lun Búngiu sarágu, agáguduañu, eteíngireinei Búngiu. ³ Ayúmuragua jumá gíñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaürúwa. ⁴ Ayú-muragua jumá lun nasúbudiragüdüni furáangu quei lubúdubu.

⁵ Buídulá jóuserun jáma ja maffíñebaña, yúsu jumeí jidáani lídan cátei le buídubei. ⁶ Lúnti gúndaawa lan láu jiyáanu súnwandan, lúnti gíñe semé lan, lúnti gíñe jasúbudiruni ída lúba lan jóunabuniña gürígia.

Lagúmujoún buri mábugaü

⁷ Laríñaguba wadúje Tíquico nuágu jun. Jínsiñeti wügúri ligía woun sarágu, ligía ában ídejati buíti le gíñe esériwidubei lun Wabúreme Crístu núma. ⁸ Ligía nouñajaanbalin jun lun laríñagun jun ída wáña lan, lun gíñe líchugun gurásu jun. ⁹ Níngira gíñe Onésimo lú-ma, wadúje úraguati le jínsiñebei woun, le jupaísanun. Jagíaba abájüdagua jun luágu sun le asúsere-dubei ya.

¹⁰ Mábuga líña Aristárco le nouba furísunrugu jun, mábuga líña gíñe Márcos le lidúje Bernabé jun. Aríñawagúaaali jun luágu Márcos, ánjein ñúdün aríjaün, resíbi jumeí buídu. ¹¹ Mábuga líña gíñe Jesús, le gíñe gíríbei Jústo, jun. Jagía rügúñanu jádaangiñe juríu afíñetiña ja ñadágimeinjáñabaña núma luágu larúei-jan Búngiu, áni jayábin nun quei ában oúnwenbun dügüdaguaü. ¹² Mábuga líña Epáfras le jupaísanun, le esériwidubei lun Crístu, jun. Ligía, súnwandan layú-muragun juágu lídan layúmuragun lun Búngiu lun derégüdagua jumá lídan jafíñen áni derégeguñu júngua buídu buídu lun jadúgüni lugúndan Búngiu.

¹³ Geféentina luágu jarítagua lan Epáfras juágu, lúma gíñe jawágu ja ubúrugubaña Laodicéa lúma Hierápolis. ¹⁴ Mábuga líña Lúcas, le wasúrusian, le jínsiñebei woun, jun, lúma gíñe Démas.

¹⁵ Mábuga níña joun idújeñu lueígiñe Crístu ja ubúrugubaña Laodicéa. Rújuma gíñe mábugaü tun Nínfas lúma joun sunagun juágu lídan layúmuragun lun Búngiu lun derégüdagua jumá lídan jafíñen áni derégeguñu júngua buídu buídu lun jadúgüni lugúndan Búngiu. afíñetiña ja oúndaragubaña túbiñe lun jájuduragun lun Búngiu. ¹⁶ Lásunme jalíjanun gárada to júmagua, jóunajounme lun jalíjanun tílana ligílisi

Laodicéa, alíija jumoúnme gíñe gárada to achúlürüboun jun Laodicéagiñe to nabúrűjaboun.

¹⁷ Aríñaga jumá lun Arquípo lun ladűgüni wadágimanu le rúlaalíbei Wabúreme Crístu lun, buídu.

¹⁸ Niján numábugaü le nabúrűjabei jun láu nújabu guánarű—áu Páblo. Jarítagua jumá luágu nadaürűña lan. Binílaün Búngiu. Ítaralá.

1 TESALONICENSES

Labúrűjan Páblo jáma líbirigu joun tílana ligílisi to ubúruguboun Tesalónica

1 Áu Páblo lúma Silváno láu Timotéo, wabúrű-jañoun gárada to jun, jugúya tílana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumeí abíniruni lúma darángilaü jámagiñe.

Jémpulu lánina afíñeni lé meja jarúfudubei Tesalónicana

²Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³Jarítaguatiwa ligíbugiñe Wáguchi luágu lubuídun jesériwidun lun Jesucrístu ladúga jafíñen luágu, lúma lubuídun jóuseruniña wánigu ladúga buin tíña lan janígi láu ínsiñejabuni, lúma lubuídun jawánduni sun asúfuriruni ladúga jeménigidun luágu Wabúreme Jesucrístu le ídaangiñebei lan jachúlúra siélun. ⁴Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúrui le tímatimaati luágu inárüni lan. Subúdi jumúti lubuídun wóuserun jagánagua, lun ábanbadiwa lan jémpulu buíti jun.

⁶Ába jáyeijani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barú lan jerésibiruni Crístu asúfuriruni jun. ⁷Ítara líña jíabin lun ábanbadün lan jémpulu joun sun afíñetiña ja loúbawagubaña Macedónia lúma Acáya. ⁸Burúguaali ugánu luágu Wabúreme Jesucrístu júmagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afíñeni le jibíjubei luágu Búngiu lídan sun fulásu. Memégeirunwati wabájüdagun luágu jafíñen joun gürígia, ⁹lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruniwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei. ¹⁰Abájüdaguaatiña gíñe juágu luágu jagúrabajañein lan lagíribudun Liraü Búngiu siélugiñe—Jesúsu le lásaaragüdübei Búngiu lí-

daangiñe ouweni, le asálbarubáliwa lueí lanárime afáyeiruañu luágu figoú le lúnbei liábin.

Luwádigimari Páblo Tesalónica

2 Jugúya guánarügü, nidújeñu, subúdi jumúti luágu máma lán meja luágu ni cáta wóudin arí-jañ. ²Queísi jasúbudiruni, wuríbati meja jóuseruniwa gürígia ja Filíposbaña, ába wayábin júmoun ladúgarügü líchugun Búngiu anígi woun lun wadúgüni. Ába wapúrichijani ugánu le lánina asálbaruni jun, mebéresenga wagía láu le lúnbei wasúfuriruni jámagiñe gürígia ja mísiñejabúbaña lun ugánu ligía. ³Máma wapúrichijaña ladúga jamúga bulfeiguaü, queísi jaríñaguni wáganiñu, ni láu luríban arítagini, ni lun wayéedagunün. ⁴Lubáragiñe líra, aríja lumúti Búngiu luágu buídu wamá, ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wáma, wáfaagun lun gúnda lan Búngiu wáma, le asúbudirubarun wanígi. ⁵Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶Máluajantiwa lun wibíjin uweírugini jámagiñe ámu gürígia, ni júmagiñe, láu sun gayára lan jamúga wasándiragüdüni lijúrü wagúmadijan queísi láni Crístu apóstolugu. ⁷Lubáragiñe líra, ouserarügü wamútün láu ában uálini queísi ában úguchuru to agúriajabaliña tirájüñü, oúnigira táña. ⁸Weíríti jínsiñe woun darí lun máma rügúñein lan jamúga láni Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírín jínsiñe woun. ⁹Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Ñadágimeintiwa meja wéyuagu áriebe lun mámbadiwa lan ijúrügu lun ni ában jídaangiñe, sun awánja lan apúrichijei láni Búngiu ugánu jun.

¹⁰Geféentün, geféenti gíñe Búngiu luágu reídei wamá meja láu ában igáburi le jarúmati áni surú jídan, jugúya le afíñebei, míchugunga wagía lúgaaru lun ni ában lun líchugun wadúnrun. ¹¹Subúdi jumúti gíñe ída líña lan wíchugun gurásu jun lúma derégüdaguaü lun jafíñen, cáda ában jídaangiñe, quei ladúga ában úguchili joun lirájüñü. ¹²Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeijan lúma luweírigin.

¹³ Ligía, súnwandan lubeí weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísi ugánu láni Búngiu, máma queísi ugánu jáni wügúriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le affíñebei. ¹⁴ Nidújeñu, dan le jeíbaajanbalün jupaísa-nun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lí-daangiñe Jesucrístu, eíbaaja jamútiña gíñe juríu ja japaísanun. ¹⁵ Juríu, jagía áfarubalin Wabúreme Jesúsú jilágubei, áfaragua jamáña profétagu, áni bugá jamuti-wa gíñe bougudin lueí jageíra. Magúndaanti Búngiu jáu, jáganiñu gíñe sun gürígia. ¹⁶ Dan le wabúseerun wadímurejan joun ja mámabaña juríu lun gíñe jasál-barun, májatiñá yebe juríu lun wadúgüni. Láu igáburi le, gánwoungugüda jamúti jafígoun. Ánjeinti guetó, liábindügúrga lanárima ligáñi Búngiu jawágoun.

Busényati Páblo lídin aríjaña Tesalónica

¹⁷ Nidújeñu, murúsun dan lárigiñe wígirunün (láu sun ajúnja méme lan tídan wanígi) oúnwenbun wabúseerun wouđinya aríjaün. ¹⁸ Joúchatiwá yebe wouđin, áu Páblo, sarágu weíyaasu yebe nouchun nídin, áni ságü nouchun nadúgüni, mígirun lumútina Máfia. ¹⁹ Ladúga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan weménigidun lun werésibiruni wafáyeiruaaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰ Jugúya lébunabei wagúndan, áni rújadün lébuna wadímurejan buíti joun ámu juágu.

3 Dán meja le siñá wamaali awánda masúbudirunga ída líña lan sun cátei júma, ába warítagn luágu buídutima lan lun weréderun Aténas, áu lúma Silváno, ² lúma lun lídin wadúje Timotéo, le ában esériwiduti lun Búngiu lídan lapúrichijóun ugánu luágu Crístu le Wasálbaragüle, aríjaün. Oúnaja wamúti júmoun lun líderagunün arárama buídu lídan jafíñen, ru ligía gurá-su jun, ³ lun úa lan ni ában eíguaduti larúna lueígiñe buri lénreengúnga le lasúfurirubei luágu lafíñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le. ⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵ Ligía lébubei dán meja le siñánaali lan awánda, ába nouñaj-an álügúdaja ída jíña lan lídan jafíñen, ladúga nanúfude lueí jamuga línchajanün Máfia lun jígiruni jafíñen luágu Crístu, ába jamúga liábin wawádigimari jídan lun ni cátime.

⁶ Guetó, giríbujali Timotéo Tesalónicagiñe, áni barúti ugánu buíti woun luágu jafíñen lúma jínsiñejabu. Laríñajare woun luágu jarítagua jumá wawágu láu insiñeni súnwandan, luágu gíñe luweírín jabúseerun jaríjiníwa, itara gíñe quei busén wamá waríjinün. ⁷ Ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le

wasúfurirubei guetó. ⁸ Ítara líña quei iséri ibágari woun wasúbudiruni luágu derégüdagü jíña lan lúma Búngiu. ⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbei woun? ¹⁰ Wéyuagu, áriebe, wayú-muragun lun Búngiu lun gayáraaya lan waríjinün, gúnfuli lámuga le mégeibeí lídan jafíñen.

¹¹ Busétiwa lun líderaguniwa Wáguchi Búngiu lúma Wabúreme Jesucrístu lun gayára lan wouđin aríjaün, ¹² lun gíñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³ Derégeguagüda lámugaün Wabúreme Búngiu júngua lun le gumúti, madúnruna jugúyame ligíbugiñe dánme liábin Wabúreme Jesúsú jáu sun lánigu.

Igáburi le áubei lagúndaara Búngiu

4 Nidújeñu, subúdi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jarítaguatün luágu arúfudajani le wíchugubei jun láu lugúmadin Wabúreme Jesúsú. ³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga, ⁴ lun cáda lan ában láluañanun lúmari lau lubuídun arítagni queísi labúseeruni Búngiu, lídan lubúdubu, ⁵ máma láu luríban ayúmajani quei jadúgüni gürígia ja ibídiñe-jabubaña lun Búngiu. ⁶ Úa la ni ában adúgüti wuríbani lun lidúje láu lagámaridunun lúmari, jéreti labeíchuni Búngiu le adúgüti cátei le, queísi waríñaguni jun. ⁷ Máma lun wabágaridun lídan iwíyeni lagúara Búngiu woun lun lánigu wamá, buséti lun wabágaridun derégeguañu woúngua lun. ⁸ Ítara líña lubeíti, le amájaruti lerésibiruni arúfudajani le, máma lun ni ában wügúri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabúrújani jun lugúndun arúfudajaali Búngiu guánarügü jun lun jínsiñegua jumá, ¹⁰ áni ítara líña jadúgüni joun sun jidújeñu lueígiñe Jesucrístu ja lí-daanbaña sun ubúrgu Macedónia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹ Joúcha jumá jabágaridun darángilañu, beréseguñu lídan le lúnbei jadúgüni. Nadágimein jumá lun janúriragun júngua, quei waríñaguni jun, ¹² inébe jumámuga joun ja mafíñebaña luágu Jesucrístu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, lueí jajírudagun quei ja meménigidunbaña luágu níjein lan ában ibágari lárigiñe ouweni. ¹⁴ Ítara quei affíñe wamá luágu jilá lan Jesúsú áni sará ligía lídaangiñe ouweni,

ítara líña gíñe afíñe wamá luágu lásaaragüdübaña lan Búngiu ja ouwegubaña afíñeñu luágu Jesúsu.

¹⁵ Ligía waríñagunbei jun queísi larúfudajan Wabúreme Jesúsu, luágu wagía lánme le wínwangilibei dánme liábin, mámaba wagía ñúdün jabáragiñe ja jiláguaañabaña. ¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifídun Búngiu. Gürígiameiti ja ouwegubaña afíñeñu luágu Crístu, jagiaba ásaara furúmiñe. ¹⁷ Lá-rigiñeme, ábame wásaarun, wagía afíñetiña ja wínwangiñabaña, ábame wanügúniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábameiti weréderun lúma Wabúreme Jesúsu lun sun dan. ¹⁸ Ligíati rújuma lubei gurásu júngua láu dimúrei buri le.

5 Ánjeinti luágu cába lan dan lasúsereda buri cátei le, nidújeñu, mabúseerúnwati nabúrújan jun. ² Sub-údi jumáali buídu buídu luágu lachúlürüba lan wéyu ligia dánme magúrabúniwa lan, queísi liábin ában íwerujati áriebu. ³ Dánme añája lan gürígia aríñaga. “Lídaañein dan sun cátei áni úati mégeiti”, ligiame liábin gürínguaü jawágun sódini quei liábin agáriduni tun wúri dageínatu, siñábeiti jeséfurun. ⁴ Ánjeinti jugúya, nidújeñu ja afíñebaña luágu Jesucrístu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti. ⁵ Lídaañadün larúgounga sun jugúya, máma wagía lánina áriebu lúma lubúriga. ⁶ Ligía moún lubei lun maráanserun wamá quei ja mafíñebaña luágu Jesucrístu, lúnti deréñuma wamá lubá lagíribudun, lídan wagíame lubuídun wachúgü. ⁷ Ja arúmugubaña, áriebu jarúmuga, ja abácharuadubaña, áriebu jabácharuada. ⁸ Ánjein wagía le lánina wéyuagu, lúnti lídan wamá lubuídun wachúgü. Lúnti wadáuragun woúngua láu afíñeni lúma láu ínsiñeni queísi ladáuragun súdaara láu laníguagu lun loúnigiruni. Lúnti gíñe jeménigi wamá luágu wasálbarun le ítarabei quei bunídi le áubei ladáurei súdaara lóbulugu lun loúnigiruni. ⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucrístu lanúadajawa. ¹⁰ Jiláti Jesucrístu wawágu lun wabágaridun úara lúma, wínwañu wagía yebe, jiláñu yebe wéyume le liábin. ¹¹ Ligía rúmeme

jumá lubei gurásu lúma érei júniwagua ítara quei jadúgüni guetó.

Laríñaguni Páblo joun afíñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Crístu. ¹³ Lúnti jínsiñe jamá jun sarágu luágu wadágimanu le jadúgübei. Abágari-da jumá lídan dan jáma jíbiriugu.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jidéraguniña ja débilibaña lídan jafíñen, lun gíñe gagúraasun jumá jabá súngubei.

¹⁵ Úa la ni ában afáyeiruti wuríbani luágu wuríbani. Joucharügü jumá jadúgün buíti jagánagua, lúma joun sun gürígia.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumei luágu sun le asúsereduti—buíti, wuríbati, niján le labúseerúbei Búngiu júmagiñe, queísi afíñetiña luágu Jesucrístu.

¹⁹ Merédera jumei luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucrístu. ²¹ Joucha jumei sun arúfudajani aríja jumeíme ánjein lúmagiñeti lubei Búngiu, ábame jeréderun lau le in-árünibe. ²² Dise jumá luei sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída loúme juwáni, janígi luma júgubu dayáruugu, jarúmañu, lubá liábin Wabúreme Jesucrístu. ²⁴ Úaraguati Búngiu le agúarubei jun lun lánigu jumá, lagúmuchubei ladúgüni sun cátei buíti le jídan.

Lagúmujoún buri mábugaü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucrístu.

²⁸ Binílaün Wabúreme Jesucrístu. Ítaralá.

2 TESALONICENSES

Labúrujan Páblo jáma líbirigu joun tílana ligílisi to Tesalónicaboun

1 Áu Páblo lúma Silváno láu Timotéo, wabúrú-jañoun gárada to jun, jugúya tílana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu. ² Resíbi jumei abíniruni lúma darángilaü jámagiñe.

Lagúseragüdübaña Búngiu gaffigountiña dánme liábin Crístu

³ Nidújeñu, teínqui wamúti Búngiu súnwandan juágu, queísi lúnti lan wadúgüni, lugúndun laweíriduña jafíñen sarágu, áni ínsiñeni le jídaanbei jubáruagua aweírideinatima líña súnwandan. ⁴ Adímurejatiwa buíti juágu tídan buri lilígilisin Búngiu, luágu gurásu lúma affíñeni le jarúfudubei lídan sun eíbaajoúni lúma idíjeri buri le jasúfurirubei lueígiñe Crístu. ⁵ Arúfuda lumúti lubuídun jawándun luágu úaragua lan Búngiu lídan ligáburu lagúseragüdü, láu lanúgünün quei garíchatíña lun jebélurun lídoun larúeijan, le uágubei jasúfurira.

⁶ Ladúga gíñe úaragua lan Búngiu, lachúlürüba wéyu lun lasúfuriragüdüniña ja asúfuriragüdübalün, ⁷ lúma gíñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachúlaagun Wabúreme Jesúsu siélugiñe lídan wátu geméti jáu láni ánjeligu ja gabáfubaña. ⁸ Liábinba lun labeíchuniña ja masúbudirunbalin Búngiu, madúgün jagía gásu láu ugánu luáguti asálbaruni le wabíjibeí lídaangiñe Wabúreme Jesúsu. ⁹ Agúnrinchawagúni le magúmchaditi, ligíaba jabeichúagüle, jabugúba díse lueí laríjin Búngiu lúma luweírigun lúma lubáfu.

¹⁰ Dánme le liábin Crístu, laríjüba luweírigun jádan lánigu, ábame laweíridun janígi sun ja affíñeñabaña luágu, áni jugúya, jádaanbadün gürígia jagía queísi affíñeedün lan luágu le waríñagubei jun luágu.

¹¹ Ligía lébubei súnwandan lan wayúmragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmraguatiwa gíñe lun Búngiu lun lagúnfulirun sun jayúmagan lun buídu lan jigáburu, láu lubáfu, lúma buri sun wadágimanu le jadúgübei ladúga jafíñen. ¹² Láu igáburu le, líchugúba uweíriguni lun líri Wabúreme Jesúsu lídan jibágari, ábame líchugún uweíriguni jun luágu lareídun Wabúngiute lúma Wabúreme Jesucrístu.

Le lúnbei lasúseredun lubáragiñe lagíribudun Jesucrístu ubouágun

2 Guetóti, nidújeñu, libúgürü liábin Wabúreme Jesucrístu, dánme liábin oúndaraguawa lúma, ² amúriajatiwa júma lun masáansirun jumáni ligáburu jarítangun ítara uménrengun, masústarun jugúyame luágu ni ában ugánu, o dimúrei buri le uáguti laríñawagua luágu lúmagiñeti lan Búngiu, ni tuágu gárada to uáguboun jaríñaga luágu wámagiñetu lan, to aríñaguboun luágu chúlújali lan luwéyuri Wabúreme lun lagíribudun ubouágun. ³ Mígiraguagüda jumá júngua lun jeyeedúniwa ítara. Lugúndun lubáragiñeme lachúlürün wéyu ligía, níjeinbei awúribujani lúma Búngiu, lachúlaaguba gíñe lágani Crístu, le lunbei lagúnrinchawagún. ⁴ Ligía láganibeí Búngiu, liñúraguba lúngua luágu sun cátei le luáguti Búngiu, lachúlürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítangun jumútisan luágu aríñagañaja náni méja buri cátei le jun dán meja le anájeingua lan júma?

⁶ Subúdi jumúti gíñe ida líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáani. ⁷ Luwádigimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe gayára lan láfuridun lídoun larúgounga. ⁸ Ligíaba laríjoiñiwa, áni lagúnrinchagubei Wabúreme Jesúsu ágani ligía láu ában dimúrei, lúma láu luweírigun le áubei liábin.

⁹ Ladúgaba Máfia liábin lágani Crístu ligía, lachúlürüba láu sarágu ubáfu, ladúgüba buri miláguru yéeti lun layéedaguniña gürígia. ¹⁰ Layúsuruba sun luwúyeri wuríbani lun layéejaniña ja lídaanbaña úma lun gürínguaü, quei mája jabeí lun jerésibiruni inárüni luáguti Crístu lun jasálbarun. ¹¹ Ligía líchugunbáliña Búngiu lídoun bulfeiguaü lun jeyeedúniwa lúma lun jafíñerun luágu iyéeni, ¹² lun jasádirúniwa lun máfiougati sun ja májabaña jafíñerun luágu Crístu, jínsiñerügü ligía wuríbani joun.

Anúadajoútiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucrístu, le uágubei jafíñera. ¹⁴ Ligía lagúarunbei Búngiu

jun, lun jasálbarun láu ugánu le wapúrichijabei, lun gafánraanbadün lan lídan luweírigun Wabúreme Jesucrístu.

¹⁵ Ítara líña lubeíti nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalíbei jun láu dimúrei lúma táu gárada.

¹⁶ Wabúreme guánarügü Jesucrístu lúma Wáguchi Búngiu, le arúfuda láalíbei línsiñejabu woun láu lareí-dun, ¹⁷ ru ligía ámalijouni le magúmuchaditi woun lúma ában eménigini buíti, rúla dúgüdaguaü tun janígi, derégüdaguaüda laúnme lun jaríñaguni lúma lun jadúgüni sun le buídubei.

Amúriajati Páblo jáma lun jayúmuragun lun Búngiu luágu

3 Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasál-baragüle furése lídan sun fulásu, resíbiwa ligíame láu ugúndani queísi lasúseredun jagánagua. ² Ayúmuragua jumá gíñe lun gayára lan weséfurun jaweí wügúriña wuríbatíña, lugúndun máma sun gürígia ubouágu afíñetiña luágu Crístu. ³ Ánjeinti Búngiu, gayáraati wafíñerun luágu, luágu lagúnfuliruba lan láu lerérun, lárügüdubadün derégüdagu, goúnigilaúnme tueí lisádarán Máfia. ⁴ Jeménigitiwa luágu Wabúreme Búngiu luágu adúga jumáni le waríñagubei jun áni luágu jadúga mémebei lan. ⁵ Íderagualaún Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le

májati luwádigimaridun, le mabágaridunti úragua lúma arúfudajani le jibíjubei wámagiñe. ⁷ Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebe, lun mámabadiwa lan ában ijúrúgu lun ni ában jídaangiñe. ⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.” ¹¹ Agáambatiwa luágu añájein lan jídaangiñe májatiña jawádigimaridun, jerédera madúgünga ni cáta, eténira lun le moún lubei jeténirun lun.

¹² Waríñaguña joún buri gürígia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adúga buíti. ¹⁴ Ánjein ñi ában le madúgünti gásu láu le waríñagubei tídan gárada to, aríja jumeí cátei lan, memétera jumá lúmoun, barú lámuga busíganu. ¹⁵ Manúga jumeí quei ágani, erérarügü jumá lun queísi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabúrújañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to. ¹⁸ Binílaün Wabúreme Jesucrístu sun jugúya. Ítaralá.

1 TIMOTEO

Labúrjjan Páblo lun Timotéo

1 Áu Páblo, láni Jesucrístu apóstolu áu, noúnajóun láu lugúmadin Búngiu le Wasálbaragüle lúma Wabúreme Jesucrístu, le uágubei weménigida lun webélurun siélun. ² Nabúrüjañoun gárada to bun, Timotéo, niraú le tímatimaati lídan wafíñen luágu Jesucrístu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Queí meja nayúmuragun bun dán meja le nídinbei Macedónia, reídeimemebá ubúругu Éfeso lun baríñagun joun ítaga gürígia lun marúfudajan jamá cátei le maríchabei, ⁴ meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barúrügüti sigénei le málati, ani míderagun lumútiña gürígia lun jesériwiduni Búngiu láu jafíñerun luágu.

⁵ Le lúnbei barúfudajani joun affíñetiña jagía, lun jín-sifíegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafíñerun. ⁶ Añájein, adíreirutiña lueí buri cátei le, ába jíchaagun jóungua lídoun buri sigénei málati. ⁷ Buséñetiña buri lun arúfudajatiña jamá lídan lúru du le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúru du ligía láu sarágu affíñeni.

⁸ Subúdi wamúti luágu buídu lan lúru du, yúsuwarú-gaali ligía quei lubúdubu. ⁹ Lúnti lasúbudirúniwa luágu máma lan joun ja adúgübalin le buídubei ladügúwa lúru du, lúru du jóunti ja wuríbabaña, ja magáambadibaña, ja mebéresenbaña láu Búngiu, ja gáfígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰ joun ja agámaridubaña mamárieidunga o ja agámaridubaña wügúriña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Jóunti gíñe sun ja adúgübaña ámu cátei múaradunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibeí gürígia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanúgünina

queísi ában wügúri derégüdagwati, lúma luágu líchugunina lun nesériwidun lun. ¹³ Adúga láali sun cátei lé buri nun láu sún meja anábagua náni, eíbaaja numútiña meja ja afálarubalin, adúga numúti meja sun le nuáraati lun nagúmochaguagüdüni jafíñen. Ába gudéme nan lun Búngiu lugúndun mámagidina meja affíñeti luágu Jesucrístu áni ibídiñeti meja nun ca lan nadúgübei. ¹⁴ Ligía luweírinbei nasándiruni labíniruni na Búngiu, úara lúma affíñeni lúma ínsiñejabuni le gíñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafíñerun súngubei luágu inárüni lan. Luágu “liábin lan Jesucrístu ubouágun lun lasálbaruniña gáfígountiña”, áu furúmiñeti jádaangiñe. ¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gáfígountiña. Ítara líña niábin lun ábanbadina lan jémpulu joun ja lúnbaña jafíñerun luágu, lun jabíjini ibágari magúmuchaditi. ¹⁷ Ligía rúwama lubeí uweíriguni lúma inébesei lun Búngiu le Warúeitebei lun sun dan, súnwandan, le moúwedadibeí, siñá ligía laríjiniwa, le Búngiu le ábanrügüti, le sábiu! Ítaralá.

¹⁸ Timotéo, niraú, rúnumuti gumádi le bun lun bageíndaguni luwúribun Búngiu buídu, queí meja laríñaguni Búngiu jayúmulugugiñe wadújeñu lueígiñe Jesucrístu bun, ragúñubeí inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jafíñen ladúga madúgün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagun jamáni Búngiu.

Arúfudajani libúgürü ayúmuraguni lun Búngiu

2 Furúmiñeti cátei, amúriajatina lun ladügúniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri. ³ Buíti cátei le, gúndaati gíñe Búngiu le Wasálbaragüle láu, ⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵ Ában rügúñein Búngiu, ában rügúñein gíñe gayára ladímurejan waweígiñe ligíbugiñe Búngiu, wügúri le Jesucrístubei. ⁶ Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában

lasúbudirawagüdün cátei le lídan lidáani. ⁷ Lun cátei le, loúnajana Búngiu lun narúfudajan joun ja mámabaña juríu libúgürü inárüni le, lun gayára lan jafíñerun luágu Crístu queísi jasálbaragüle. Áu, queísi ában affíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmragun wügúriña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmragun lun Búngiu. ⁹ Manárimelá tuwéndegun jadáuragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daúguaü séruburitu, ¹⁰ lun láu lan lubúidun igáburi jadáuragua jóungua quei lúnti lan jadúgün würiña ja derégeguañabaña jóungua lun Búngiu.

¹¹ Lúnti maní jamá würiña dan le larúfudajoúniwa joun, lúnti jerésibiruni arúfudajani ligía láu ában únabuni. ¹² Májatina lun tarúfudajan würi lídan jadámurin affíñetiña, ni lun tagúmadiruni würi wügúri, lúnti teréderun maníñu. ¹³ Lugúndun Adán ladúgübei Búngiu furúmiñe, lárigiñe, ladúgoun Éva. ¹⁴ Máma gíñe Adán leyéedubei Máfia, würi ayeedúaboun, áni láu tayeedúniwa, ába táburujan lídoun figoú. ¹⁵ Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

Ligáburi ída lúba lan jóuserun fádirigu

3 Inárüni cátei le. Ánjein abúseera ában gürígia lun fádiribebei lan, ában wadágimanu buíti labúseerúbei ladúgün. ² Lun fádiribebei lan ában gürígia, lúnti labágaridun ában ibágari le míchuti lúgaaru lun ladeinjouniwa lun. Lúnti túmari lan ábanrügü würi, lúnti gíñe lanúgün ában ibágari sériuti, buíti lichúgü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára láníña tílana lúban agúmadira buídu, lun gíñe ladúgün lun gagáambadi jamá lirájüñü, inébejabu. ⁵ Lugúndun ánjein magúmadirun lubáliña wügúri tílana lúban, zída lubági gayára lan laríjin jáu tílana lilígilisin Búngiu? ⁶ Moún lumuti lubeíti fádiri lan ában iséri affíñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti gíñe inébe lan joun ja mafíñebaña lueí ladímurejóun wuríba luágu, ábame láburujan tídoun lisádarán Máfia lun lagúnrinchawagúniwa lubúidun líri.

Ligáburi ída lúba lan jóuserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügúriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti jarúgüdüni inárüni lánina affíñeni le arúfu-

da lálalibebei Búngiu woun, buídu, lun gíñe jarúma tan janígi. ¹⁰ Lúnti jouchún, lárigiñeme, ánjein úa lubeí mégeiti luágu lubúidun jagáburi, ligíaba gayára lan jesériwidun ligílisirugu. ¹¹ Würiña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü würi, lúnti gíñe lagúmadiruniña lirájüñü buídu jáu sun tílana lúban. ¹³ Lugúndun esériwidutiña ligílisirugu ja adúgübalin jawádigimari buídu, buídubei ladímurejóuniwa jawágu, áni ragútimaatiña anígi lun jadímurejan luágu jafíñen luágu Jesucrístu.

¹⁴ Agúrabatina nídin aríjabu madíse, ¹⁵ nabúrújaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to lilígilisinboun Búngiu le wíwanbei lun sun dan. Lilígilisin Búngiu ágúdajabalin linárün, toúnigitef inárüni ligía buídu. ¹⁶ Siñáti lasígenerúniwa luágu weírugu lan Wasálbaragüle Jesucrístu, le subúdigüda lálalibebei woun.

Arúfudaguati Búngiu lúngua queísi gürígia lídan Jesucrístu, arúfudaleí Sífiri Sándu luágu úaragua lan Jesucrístu. Aríja jameí ánjeligu. Apúrichijouáti luágu joun lílana sun fulásu, affíñewa luágu lídan sun fulásu, resíbiwa ligía siélu.

Ja lúnbaña jígiruni jafíñen

4 Furánguti laríñaguni Sífiri Sándu luágu lídoun lánme lagúmujóun dan, añájeinbaña lan gürígia ígiruti jafíñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. ² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu súti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eígini moún lumuti leigín, láu sun ladúga lan Búngiu eígini buri ligía lun jeígini ja affíñebaña jáma ja subúdíbalin inárüni, láu ateíngiruni lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga lálalibebei, teínqui wameíme luágu. ⁵ Lugúndun láu wamúriajan lúma Búngiu lun labíniruni sun weígin, ñúbinti lun labúidurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágúdajouba buwáni láu buri dimúrei le lánina wafíñen, lúma arúfudajani buíti le falábaalíbei.

⁷ Meféridirabeí bidáani asígeneja luágu buri libídiegun úraga le ni cáta ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun bún-

gua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini. ⁹ Inárúni cátei le, áni lúnti jafíñerun súnigubei luágu. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejaalibei asálbaruni joun sun gürígia, áni ja afíñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu. ¹² Sériulá bigáburu lun manügúniwa ban quei ni cáta lueígiñe ñúraügidibu lan, lubáragiñe líra, lúnti ában ban jémpulu buíti joun ja afíñebaña, lídan ligáburu badímurejan lúma bouuserun, lídan ínsiñejabuni, lídan bafíñen luágu Búngiu, lúma lídan larúma bibágari. ¹³ Rúguabá búngua lun balíjanun Lerérun Búngiu lun adámurini, íchiga gurásu joun daríme lun nachúlürün. ¹⁴ Yúsubei ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Deréguabá búngua lún buri cátei le, lun gayára lan larijiniwa bawáanserun lídan cátei lání Búngiu.

¹⁶ Goúnigiguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame gíñe ja agáambubalibu.

Ída lúba lan ligáburu louuserun Timotéo jáma afíñetiña

5 Madeínjabá lun ában weíriei mútu, lubáragiñe líra, adímurejabá lun camá jamuga lun búguchi, ousera báñame wügúriña ñúbürigiña queísi bamúlenu. ² Oúsera báña weíyaaña würiña quei bouuserunun búguchi, ousera báñame würiña irájüñü quei bitunu, láu lubuídun arítaguni.

³ Íderagua báña würiña ja jiláañabaña úmari, ja arijúabei luágu mégei jamá iderúni. ⁴ Ánjein garájüñü tubeí ában wúri to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati gíñe Búngiu láu. ⁵ Wúri to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebu, wéyuagu. ⁶ Ánjounti to ederegeraguboun túngua lun ugúndani lánina ubou le, jiláñu tíña lun cátei lánina Búngiu láu sun wínwangu lan. ⁷ Aríñagabeí buri gíñe cátei le joun, úa lámuga ni cáta lun ladeinjoún joun luágu. ⁸ Le marítagunti jawágu lánigu, játima lidújeñu, magúnfulinjali lúma lafíñen, wuríbatimáatiti sügú láu ában gürígia le mafíñeti.

⁹ Lun labúrüdúniwa tíri wúri to jiláalibei túmari tídan gárada lánina íderawagúni, to rügúboun níjeinjali lúmagiñe úrúwa-wein irúmu táu, lun gíñe ábanrügügili lán meja túmari. ¹⁰ Lúnti tasúbudirúniwa luágu buíti le tadúgübei queí buri jamúga ánjein meja agúriaja tubáliña tirájüñü buídu, ánjein buídu lubeí touuserun jáma ja achúlürübaña túbiñe, ánjein seríwi tubáliña idú-

jeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguarügü ámu cátei buíti.

¹¹ Würiña ja jiláañu úmari ja ñúbürigiña, mabúrüdabeí jíri tídan gárada, lugúndun lachúlürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun. ¹² Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügu súnwandan. ¹³ Ába jayábin lun jamáqualigudun, mámarügü jamáqualigudun, ába gíñe marásualugu jamá, eméteja lídoun sun cátei, adímureja cátei le moún lumuti.

¹⁴ Ligía nabúseerunbei lun jamárieidunya ja ñúbürigiñebaña, lun garájüñü jamá, lun jounigirunun jában, lun míchugun jamá lúgaaru joun ja mafíñebaña lun jadímurejan wuríba jawágu. ¹⁵ Añájein würiña, ígira jamáli Búngiu, ába jafálaruni Máfia.

¹⁶ Ánjein añájein jabeí würiña ja jiláalibei jámari jádan lufámilian ában afíñeti wúri o wügúri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña tílana ligílisi würiña ja busénbaña jíderawagún.

¹⁷ Fádirigu ja lábugiñeñounboun jaríajaan ligílisi, ja adúgübalin jawádigimari buídu, lúnti inébewa jamá sarágu, játima gafísiutebalin apúrichijani lúma arúfudajani. ¹⁸ Taríñajare Lerérun Búngiu. "Magúragua jumeí liyúma jilügün bágasu le lánina wadágimanu lueí lásíñerun leigin lídaangiñe tubúñe fulúwaaru le uágubei ladúgüragua lun lagídaruni túra." Aríñagatu gíñe. "Garíchatí ñadágimeinti lun libíjin lafáyeiruaja."

¹⁹ Madúgabá gásu luágu líchugún lidúnrun ában fádiri ánjein úa jabeí bíama o úrúwa lun jíchugun fe luágu lidúnrun. ²⁰ Ánjaña ja asígirubaña lídan figoú, lúnti badeínjan joun jagíbugiñe sun afíñetiña lun janúfudedun súnigubei lueí jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügúniwa sun gürígia. ²² Míchigabádúgabá gásu luágu líchugún lidúnrun ában fádiri ánjein úa jabeí bíama o úrúwa lun jíchugun fe luágu lidá ni ában queísi fádiri tídan ligílisi lídan loufudagun, lúnti batúriajani ligáburu buídu lueídügü gaffígoun lan, larijwameti camá gúndaatibu láu líffígoun. Dísebá lueí sun le wuríbabei.

²³ Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴ Lídan le báluajaniña wügúriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein gíñe, marijínti jafígoun darí lárigiñe. ²⁵ Ítara méme líña gíñe, cátei buíti le jadúgübei gürígia, arijúati furáangu, áni íbini marijín lan, siñáti leréderun arámudagu lun sun dan.

6 Afíñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabei. ² Ánjein añájein lubeí esériwidutiña gayúbudiritiña afíñetiña, moún lumuti lougua lan jinében joun ladú-

garügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubuídun jesériwidun, afíñetiña, idújeñu gíñe jínsiñegutiña. Arúfudajabei cátei le, apúrichijabeíme.

Arúfudajani maríchatu lúma irísini inárüniti

³ Ánjein arúfudaja ában gürígia cátei maríchatu áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu, ⁴ ában barúgua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lí-daangiñeti asígenejani le liábin buri gimúgaü, gáñiguaü, anábajani, mafíñeni joun gürígia, ⁵ lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irísini agúnfuliruni lúma Búngiu. Disebá jawéi gürígia ja ítarabaña. ⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei. ⁷ Manúgüntiwa ni cáta wámagua ñájoun ubouágun, siñábei gíñe wanúgün ni cáta yágiñe, ⁸ ánjein geígin wabei, ganáangun, lúnti gufúruma wamá láu líra. ⁹ Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagúbüri ayúmajani le málati, le ásiñeragüdübei gürígia jebélurun siélun, ába jóudin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürígia ladúga jóuchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le láni affíñeni

¹¹ Ánjabuti amúrü, Timotéo, queísi ában ban wügúri derégeñuti lun Búngiu, anúrajabá lueí buri cátei le. Barúba ában ibágari le lánina ísuruni, le lánina gúnfuli lúma Búngiu, le lánina affíñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu

luágu láni wafíñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu.

¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibei ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵ Dánme lachúlürün dan ligía, le lanúadajabei Búngiu, lagíribuduba Crístu ubouágun, Búngiu rügúñein weírigu, Súnti Gabáfu, Jarúeite urúeigu, Jabúreme abúremeinigu. ¹⁶ Ligía rügúñein mouwedadi, le abágaridubei lídan larúgounga le ñíjin lubei mayárafadun lan ni ában. Maríjin lágili ni ában gürígia Búngiu, siñáti gíñe larijiniwa. ¡Rúalá uweírighuni lun, arúfudualá lubáfu lun sun dan! Ítaralá.

¹⁷ Ja gámabaña irísini lánina ubou le, aríñgabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machouúrunti, lun jíchuguni jeménigi luágu Búngiu, le wíwanbei, áni rúlei sun cátei woun gíbe lun wagúndaarun luágu. ¹⁸ Aríñgabá joun lun jadúgüni le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹ Ítara lúba jóundaragun irísini jóungua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tídan gárada to

²⁰ Timotéo, toúnigibeí le íchugúbei lábugiñe baríaa-jan. Magáambabá dimúrei buri le lánina lisúbudin ubou, ni sigénei le lánina cátei le gíridügübei subúdi, ²¹ añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

2 TIMOTEO

Labúrjjan Páblo lun Timotéo

1 Áu Páblo, láni Jesucrístu apóstolu áu, loúnajañad-ina Búngiu láu lugúndan lun gayáraabei lan nídin aríñagei ugánu buíti joun gürígia luágu ibágari le líchugubei joun ja lídaanbaña ában lúma Jesucrístu. ² Nabúrjañoun gárada to bun, Timotéo le nanúgübei queísi niraú le jínsiñebei nun, resíbibá abíniruni, gudémejabu, lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebe lúma wéyuagu, teínqui numúti Búngiu le únbei nesériwida láu tarúma nanígi quei jadúgüni binádu nagúbürigu. ⁴ Súnwandan narítangun luágu bayájun dán meja le nígirunibu, buséntina jamúga naríjinibu lun nabuínchun láu ugúndani. ⁵ Jarítaguatina luágu affíñeni inárüniti le buágubei, Lóida to bagútü, túma Euníce to búguchu, jagía meja gawágubalin affíñeni le furúmiñe, áni choúru numúti luágu níjein lan gíñe buágu.

⁶ Ligía naríñangunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadúgüni furúmieguarügü cátei, ínsiñeni, lúma ubáfu lun wasáminarun buídu líchugubei woun.

⁸ Mabúsigaribá lubeíti lun bapúrichijani le larúfudajabei Crístu, mabúsigaribá gíñe náu, áu le adaürúbei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanúgün ában ibágari le derégewati lun, máma jamúga lueígiñe níjein lan cátei buíti wadúga, ladúga itara líña lan laráanseruni lubáragiñe ladúgüni ubouú lun larúfuduni lareídun lúma línsiñejabun woun lídaangiñe Jesucrístu. ¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagúnrinchaguni lubáfu ouweni, ru ligía ubáfu woun lun wibíjini ibágari magúmuchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, ou-naja lána quei apóstolu lun narúfudajan joun ja mámabaña juríu. ¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níhigei nafíñen, áni choúru numúti luágu gabáfu lan lun loúnigiruni le líchugubei

lábugiñe naríajaan daríme lachúlürün wéyu ligía lun lagíribudun Crístu ubouúagún.

¹³ Mígirabeí luwúyeri arúfudajani jarúmati le níchugubei bun, abágaridabá láu baffíñen luágu Crístu, arúfudeina ínsiñeni joun súnigubei ladúga lídaañadiwa ában lúma Jesucrístu. ¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríajaan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun affíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu weíyaasu, úati gíñe nibúsigari lan láu nadaürúña lan, ¹⁷ lubáragiñe líra, dan le líabinbei ubúругu Róma, merédeti lálujanina darí ladárirunina. ¹⁸ Darí lámugei lugúdemejabu Búngiu lídaanme wéyu ligía le lagíribudagüle Wabúreme Crístu ubouúagun. Subúsiti gíñe bun buídu ída líña lan líderaguníwa ubúругu Éfeso.

Ában lisúdaaran Jesucrístu buíti

2 Ánjeinti amúrü, niraú, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ² Le cátei lánina wafíñen le agáamba báalibeí naríñangun jagíbugiñe sarágu geféentiña arúfudajabei joun wügúriña ja affíñewati jawágu, ja gayáarati jarúfudajani joun ámu.

³ Awándabeí lubeíti súfuri quei ában lisúdaaran Jesucrístu buíti. ⁴ Úati súdaara le esériwiduti ádaraguti lúngua lídoun ámu cátei lueí le lánina súdaara, lugúndun gásu leréderun dayáругu lábugiñe lerénjan lugúmandan. ⁵ Ítara líña gíñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶ Le ábunagubei, garíchatu lun ligía lan furúmiñe ibíjei lufánran lídaangiñe alúbajani. ⁷ Samínabá luágu úrüwa jémpulu le, ábame gunfaráandagüda láni Wabúreme súnigubei bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúei Davíd, áni sarágüda lumúti Búngiu lídaangiñe ouweni. ⁹ Niján ugánu le lánina asálbaruni le napúrichijabei, áni lueígiñe napúrichijani, awándatina asúfuriruni darí lun nagúrawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúadaja láñabaña Búngiu fuleísei, lun gíñe jayábin lun jabíjini asálbaruni lúma uweíriguni magúmuchaditi siélu ladúga lídan jamá ában lúma Jesucrístu.

¹¹ Inárüni cátei le.

Ánjein jiláadiwa lubeí lúma Crístu, wabágariduba gíñe lúma,

¹² Ánjawa awánda súfuri lueígiñe, gafánraanbadiwa lídan larúejan.

¹³ Ánjawa múaran, ligía úaramemebei, lugúndun ítara líña ligáburi Búngiu.

Ában ñadágimeinti buíti

¹⁴ Jarítaguagúdabeí cátei le joun ja affínebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ni cáta, añáwurijarügü lumútiña ja agáambajabaña. ¹⁵ Joúchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurubalin ugánu lánina inárüni quei lubúdubú.

¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, jóúntimaaña lídoun wuríbani, ¹⁷ ábame labúruchagun jarúfudajan quei cánsar. Niján le susérebei lun Himenéu lúma Filéto, ¹⁸ ígira jamáali inárüni, jaríñaga luágu sügújali lan lidáani ásaaruni lídaangiñe ouweni, jagúnrinchaguñeiti jafíñen sarágu gürígia ítara. ¹⁹ Wagía affíñetiña, wagía líligilisin Búngiu láu ébuu derégüdati le rúlaalíbei Búngiu, siñáti lánjingichúniwa. Bürúwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagubaña luágu lánigu jamá Crístu, lúnti jadísedun lueí wuríbani.”

²⁰ Tídan ában múna weírítu, máma rügúñein umégeni gólu o pláta ñi, níjein gíñe le láuti fuláansu lúma láuti múa, níjein lúnti luweírín-ágei ayúsuruni, níjein lúnti furúmieguaügü yúsu. ²¹ Lun lúnti lan ában ayúsuruni weíríguti ában gürígia le derégeguati lúngua lun Búngiu, ju ligía lun, lúnti jarúma lan libágari, díse ligía lueí sun le wíyebéi, ítara lúba ju lan lun furúmieguaügü wadágimanu buíti.

²² Anúrajabá lubeíti lueí jayúmajan wügúriña ñúbürigiña, barúba ában ibágari le lánina ísuruni, affíñeni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña. ²³ Madúgabá gásu láu sigénei málati, subúdi báali luágu barú lan líra wuríbu. ²⁴ Mouñ lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun gürígia.

²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña lúma, lúnti larúfuduni joun táu anígi únabugutu luágu marícha jamá, ladúga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibeí.

²⁶ Gayáraati jadáriragun jóungua lun jeséfurun tídaangiñe sádara to gádaanbaliña lurúma Máfia lun ladúgüni labúseerun jáu.

Ída jába lan gürígia lídoun búrime lagúmujoún wéyu

3 Lúnti gíñe basúbudiruni luágu liábin buríba lan wéyu jénreenguti lídounme lagúmujoún dan.

² Jóungua rügúbei buri gürígia jabúseera buíti, jínsiñe seínsu joun, pánta jagía, barúgua jóungua. Jadímurejaba wuríba luágu Búngiu, magáambun jabáña jagúbürigu, meteíngiradibaña, minébeme cátei lánina Búngiu joun. ³ Mínsiñejabubaña joun jarájüñü, magúdemejabu, marásualugubaña, siñábei jarügüdagun jóungua, janárimebaña, láganibaña sun le buídubei. ⁴ Jalúgurubaña jamádagu, jadúgüba buri cátei mabuídunti mebéresenga jagía cába lan asúsereda lárigiñe, janárimebeí janáangun jóungua, jáluajabei jagúndan guánarügü lubáragiñe jamúga jáluajani Búngiu. ⁵ Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe gürígia ja. ⁶ Jádan buri gürígia ja, añájein já buri ebélorubaña jábiñoun mútu ayéedaña wúriña ja débilitiña, já buri buínbaña láu figoú lúma láu sun luwúyeri ayúmajani. ⁷ Ába jafálaruniña yéetiña jagía lun jafúnrendeiun isérei cátei, siñáti jayábin lun gunfaráanda jamáni inárüni.

⁸ Ítara quei jawúgürijoun Jánes lúma Jámbres, ja gabíñarajadibaña, lun Moisés, ítara líña gíñe jawúgürijoun wügúriña ja lun inárüni. Wügúriña buri ja, wuríbati jasáminan, garábaguaaña luágun wafíñen.

⁹ Mawáanserunbaña sarágu, ladúga geféenbei sun ubou luágu ibídiougua lan jáu, quei lasúseredun joun bián jagúra ja awúgürijoubaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Ánjein amúrü, falábaali narúfudajan buídu lúma ligáburi nagáburidun. ¹¹ Subúdi báali narítagnun lúma nafíñen, aríja báali nugúraasun lúma nísíñejabu, lúma ída líña lan nawánduni eíbaajouni lúma súfuri lúma líbiri lénreengun le nasúfurirubei lídan buri fulásu quei buri ubúrugu Antioquía, Icónio lúma Lístra. Subúsiiti gíñe bun ída líña lan leséfurunina Wabúreme Búngiu lídaangiñe buri sun cátei le. ¹² Inárüni luágu jeíbaajouba lan sun ja busénbaña jabágaridun derégeguañu jóungua lun Jesucrístu. ¹³ Ánjaña ja wuríbabaña jáma ja gayéejadibaña, jaríbadatimaaba, ítara mémejaba ayéjea lúma ayeedúa.

¹⁴ Ánjein amúrü, ítaramemebá derégüdagun lídan le bafúnrendeirubei, le uágubei affíñeedibu lan. Subúdi bumúti luágu inárüni lan le bafúnrendeirubei ladúga gayára lan bafíñerun jawágu ja arúfudajabalin bun.

¹⁵ Subúdi bumúti Lerérun Búngiu lúmagiñe ñúraügídibu. Tídan Lerérun Búngiu, ladárirúa sun lichú áu le busénwabei lun gayára lan jasálbarun gürígia, láu jafíñerun luágu Jesucrístu. ¹⁶ Sun le bürúwañubei tídan Lerérun Búngiu, Búngiu guánarügü íchugubalin jarítagnunrugun wügúriña lun jabúrüdüni. Jútu líburu tugúya lun tarúfuduni le inárünibeí lúma gíñe lun tarúfuduni le maríchabei, adúgatu lun jígiruni gürígia cátei le mabuídunbei luágu le buídubei, arúfudajatu joun gürígia lun jabágaridun surúñu. ¹⁷ Líburu tugúya, jemégenboun gürígia ja esériwidubaña lun Búngiu lun jadúgüni sun luwúyeri wadágimanu le lúnbei jadúgüni lun.

4 Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wíngangiña jáma jiláguaaña, nariñaguña bun lun bapúrichijani Lerérun Búngiu, ² aráanseñubá lun bapúrichijani, busén jagía gürígia jagáambuni, mabúseerun. Afíñegüda báña, adeñjabá, eréa amúrúme, arúfudajabá joun láu gurásu. ³ Lugúndun lachúlürüba dan dánme le mawándun jamáni gürígia arúfudajani jarúmati, lubáragiñeme líra, jáluajabei arúfudajani le gúnfulibe lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerubei jagáambun joun. ⁴ Jíchugubei janágan luágun inárüni, ábame jadúgün gásu láu sun luwúyeri úraga. ⁵ Anjein amúrü, buídulá bisáminan súnwandan, awándabei asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶ Áu, sandíguatina núngua luágu nadúgüñein lan lagúmujoún le nuáraati lun Búngiu, yaráfaali lórate noúnwen. ⁷ Ageíndagua náali luwúribun Crístu buídu, efbaguaadina chülú lúmoun lébeja, adúga náali sun le rúlaalíbei Búngiu nun lun nadúgüni, areída náali arúfudajani le lánina wafíñen jarúmañu. ⁸ Guetó, lagúrabuñadina nafáyeiruaja le lebégi ában ibágarí le lánina ísuruni, afáyeiruajaú le lúnbei líchuguni Nabúreme nun, le agúseragüdüti le úaraguabei, lídaanme wéyu ligía. Áni mámarügüba nun líchigei afáyeiruajaú ligía, líchugubei gíñe joun sun ja agúrabajabaalin liábin láu ínsiñejabuni lun.

⁹ Jouchabá biábin aríjana furése. ¹⁰ Ígira láadina Démas, jínsiñetimaati cátei le lánina uboú le lun, ñúdünjati ubúrugun Tesalónica. Ñúdünja Crescénate loúbawagun Galácia, ñúdüñ Títo loúbawagun Dalmácia. ¹¹ Lú-

cas rügüñein núma ya. Áluajabei Márcos, banúgeime búmagua, gayáraabei líderagunina lídan wadágimanu. ¹² Oúnaja nan Tíquico ubúrugun Éfeso. ¹³ Dánme biábin, banúgounme cápa to nígiruboun lúbiñe Cárpo yágüta Tróas nun, barúbounme gíñe buri líburu, nigáradan burítima. ¹⁴ Adúgaali Alejandro, le ñadágimeinbei gürábu, sarágu wuríbani nun, lafáyeirubei Búngiu quei ligáburí cátei le ladúgübei. ¹⁵ Toúnigiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ni ában íderagutina, ígira jamútina súngubei. Agúrabatina lun mabájüdüñ láni Búngiu cátei le joun. ¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdanef joun sun gürígia ja mámbabaña juríu. Ítara líña leséfurunina Nabúreme lueí yebe oúweni, ¹⁸ áni leséfurubadina lueí sun wuríbani, areída láname lubá larúeijan siélu. ¡Rúalá uweírighuni lun súnwandan! Ítaralá.

Lagúmujoún buri mábugaü lúma abíniruni

¹⁹ Mábugaü tun Prísca lúma lun Aquíla lúma joun lufámilian Onesíforo. ²⁰ Reídeija Erásto ubúrugun Corínto, ígira numúti Trófimo láu sándi Miléto. ²¹ Jouchabá biábin lubáragiñe laríbougadun. Mábuga líña Eubúlo bun, Pudénate, Líno, Cláudia jáma sun wadújeñu lueígiñe Jesucrístu. ²² Búma lámuga Wabúreme Jesucrístu, biní laúnme Búngiu sun jugúya ja alíjibarun gárada to. Ítaralá.

TITO

Labúrjjan Páblo lun Títo

1 Áu Páblo, le abúrjjarun gárada to, ában eséri-widuti lun Búngiu áu, ában gíñe láni Jesucrístu apóstolu. Oúnaja lumútina lúntima níchugun dúgüdaguaü lun jafíñen ja anúadaja láñabaña Búngiu quei lánigu, lun gíñe gayáraabei lan jasúbudiruni in-árüni lánina wafíñen, gayára lámuga jabágaridun ában ibágari derégewati lun. ² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéjanbei, aríñaga lumúti luágu líchugubei lan ibágari magúmchaditi le woun lúmagíñe lubáragiñe ladúgüni uboú. ³ Guetóti, queísi chüljiali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía. ⁴ Nabúrú-jañoun gárada to bun, Títo, le nanúgübei queísi niraú le tímatimaati, lídan ában wafíñerun luágu Crístu. Ayú-majatina lun bibíjin abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu le Wasálbaragüle.

Luwádigimari Títo luágu uboúju Créta

⁵ Lébubei nígirunibu luágu uboúju le gíribei Créta, lun baráanseruni le mégeigilibei lun laráanserún, lúma lun bíchugun fádirigu lídan ságü fulásu queísi naríñaguni bun. ⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti afíñe jamá lirájüñü luágu Crístu, gagáambadi, lun gíñe buídu lan jóuserun lirájüñü luei gayára lan líchugúniwa jadúnrun. ⁷ Lábugiñeñein laríajaan fádiri luwádigimari Búngiu, ligía lúnti lubei labágaridun ában ibágari le úaraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuríbu, mínsiñelá seínsu lun sarágu. ⁸ Lubáragiñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wüğüri le jínsiñejabuti lun le buídubei, lun buídu lan lichúgü, buídume loúseruniña sun güriña, derégeguañu lúngua lun Búngiu, láu ubáfu lun lárügüdagun lúngua. ⁹ Lúnti lárügüdün luágu ugánu inárüniti le uágubei gayára lan weménigidun, le arúfudajoúbei lun, lun gayára lan líchugun dúgüdaguaü joun ámu láu arúfudajani le richábei, lun gíñe lafíñer-agüdüniña ja asígenerubalin.

¹⁰ Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña güriña. ¹¹ Lúnti ladaurúniwa jayú-

ma ja, ladúga chagáguagüdatiña sarágu famíliá láu jarúfudajani le moún lubei, lun jagáñeirun seínsu láu múarani.

¹² Aríñagatí meja ában chu táu Crétana, le ñí bubei guetó, jawágu lupaísanun. “Gürígia Crétana, súnwandan yé jama, machúlaaguntiña, jalíluatiña, magúali.”

¹³ Áni inárÜni laríñagubei. Ligía lubeíti, badeínja joun jére, lun jóudin láu arúfudajani le richábei luágu wafíñen, ¹⁴ lun gíñe mebéresen jamá láu buri úraga le jadáagun juríu, ni láu le jaríñagubei güriña, játima íchugubalin janágan luágun inárüni.

¹⁵ Queísi laríñawagúniwa, jarúmati sun cátei joun ja jarúmabaña anígi, ánjein joun güriña ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyetei jasáminan, wíyetei gíñe janígi. ¹⁶ Aríñagatiña luágu subúdi lan Búngiu joun, láu buri cátei le jadúgübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadúgüni le buídubei.

Arúfudajani inárüniti rúti ibágari buíti

2 Ánjeinti amúrü, Títo, lúnti barúfudajani luwúyeri igáburi le lúnbei jagáburiduni afíñetiña luágu Crístu, ában ibágari le úaraguabei lúma inárüni le lúmagiñebei Búngiu. ² Lúnti mátun jamá wüğüriña weiyaaña mútu, inébewa jagíame, buídu jachúgü, derégdagu lídan jafíñen luágu Crístu, buin láu ínsiñejabuni lúma gurásu. ³ Würíña gíñe ja weiyaaña, lúnti gíñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti jíchugun jémpulu buíti láu jabágaridun lúma jerérun, ⁴ lun jarúfudajan joun würíña ñübürigiña jaweí lun jínsiñe jamá jámari joun, jínsiñe jarájüñü joun, ⁵ lun buídu lan jachúgü, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágarí würíña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu afíñeruni luágu Jesucrístu.

⁶ Arúfudajabá joun wüğüriña irájüñü lun buídu lan jachúgü, ⁷ rúba ában jémpulu buíti joun lídan sun cátei. Arúfudajabeí lérügü inárünibeí joun láu ában igáburi derégdüdati, ⁸ adímurejeina láu ában igáburi magádieta le uáguti lásiñera ladárirún mégeiti. Ítara lúba janúgüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun

jamáñame, lun buídu lan jesériwidun joun, ¹⁰ lun míwerujan jamá, lun jarúma lan jagáburi le gumúti jáma jayúbudirigu lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le idaangiñebei gayára lan jasálbarun sun gürígia lídaangiñe luríban jagáburi.

¹² Arúfudaja láali Búngiu woun láu lareídun lun wígiruni wuríbani lúma ayúmajani lánina uboú, lun wabágaridun ában ibágari le buíti ligíbuagu uboú le, ragúguañu woúngua, derégeguañu woúngua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuídun cátei le uágubei laríñaga Búngiu—lagíribudun Wabúngiute, Wasálbaragüle Jesucrístu uboúagun láu sun luweírigin. ¹⁴ Derégeguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun láni wamá, aráanseñu lun wadúgüni le buídubei.

¹⁵ Ligía buri cátei le lúnbei barúfudajani, íchigeina dúgüdaguaü, arérejeina láu sun ubáfu. Míchigabá lúgaaru lun banügúniwa quei ni cáta.

Cátei lé buri lúnbei jadúgüni afíñetiña

3 Jarítaguagüda báña afíñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadúgün furúmieguaügü cátei buíti, ² lun madímurejan jamá wuríba luágu ni ában, lun dilí lan jóuserun, areída jagíame, lun únabugu jamá lídan jóuserúniwa sun gürígia.

³ Lugúndun wagía afíñetiña, ibídiouguati meja gíñe wáu, magáambadi wagía meja lun Búngiu, barútiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adúga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Ánjeinti dan le larúfudunbalin Búngiu

Wasálbaragüle lareíni lúma línsiñejabu joun gürígia, ⁵ ába lasálbaruniwa, máma jamúga ladúga wadúgün som cátei buíti, ladúga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucrístu, lun wámabei lan láu sun luweírigin lubáfu. ⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu. ⁸ Inárüni cátei le.

Buséntina lun barúfudajani buri cátei le láu ában éregu, lun ja lan afíñebaña luágu Búngiu, lun súnwandan lan jíchaagun jóungua lun jadúgüni cátei le buídubei. Buíti cátei le, áni buíti lanúgün joun sun gürígia. ⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manúgünti buíti lun ni ában.

¹⁰ Ánjein ní lubei ában tílana ligílisi le adúgübalin fáreinguaü, erérabá lun ában o bián weíyaasu, ánjein madúgün gásu báu, ígirabei lúngua. ¹¹ Subúdi báali luágu ígira láali lan wügúri ligía úma le surúbei láu luwúyeri labágaridun.

¹² Dánme noúnajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügürei lidáni luríbouga. ¹³ Íderaguabei Zénas, le subúdijabúbei lun lúrudu, lúma Apólos lídan sun le buáraati, rubeíme le jemégeirubei joun lun jasígiruni jaweíyasun. ¹⁴ Furéndei jamá gíñe sun wánigu lun jadúgüni cátei le buídubei, ídeja jagíame dan le mégeiwa lan, ju lámuga jabágarí lídan Crístu.

Mábugaü

¹⁵ Mábuga jáña sun ja núbabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjabarun gáradato. Ítaralá.

FILEMÓN

Labúrjjan Páblo lun Filemón

1 Áu Páblo, le nadaürúñabei lueígiñe napúrichijan luágu Jesucrístu, nabúrújañoun gárada to, úara lúma Timotéo, le wadúje lueígiñe Crístu, bun, Filemón, le weírabei ínsiñe woun, le gíñe woúba lídan wadági-manu. ² Gárada to, jóuntu gíñe tílana ligílisi ja oún-daragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafiñen

⁴ Teínqui numúti Búngiu súnwandan lídan le narítangun buágu lídan nayúmuragun lun, ⁵ lugúndun agáambaadina luágu ínsiñejabuni lúma affiñeni le buágubei lun Jesúsú lúma joun sun ja lánigubaña Búngiu. ⁶ Amúriajatina lúma Búngiu lun ja lan affiñeñabaña luágu Crístu ladúga baffiñen, lun jayábin lun gunfaráanda jamáni sun abíniruni le wabíjibe lúmagiñe Jesucrístu, buídu. ⁷ Nidúje, oúnwenbun nugúndan lúma dúgúdaguau le nídaanbei luágu bínsiñejabu, lugúndun darángilajaru janígi ja affiñebaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun naríñaguni le lúnbei badúgüni bun, ⁹ jímeín numúti ayúmuraguárügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürúña lueígiñe napúrichijan luágu Jesucrístu. ¹⁰ Amúriajatina ában fuleísei búma lun Onésimo, le ítarajalíbei queísi niraú lídan Jesucrístu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügújalibeí, ában meja idámuni moúnti Onésimo bun, ánjeinti guetó, gebégiti bun queísi nun. ¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun,

queígubeirügü jamúga noúnajañoun lan nanígi, le luweírín línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürúwa lueígiñe napúrichijani ugánu le lánina asálbaruni. ¹⁴ Mabúseerúntina nadúgün ni cáta magúndaga amúru láu, lun máma lan láuti afósuruni fuleísei le badúgübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúurunbei Onésimo bueí luágu átiri dan lun búmabei lan guetó lun sun dan, ¹⁶ guetó mámarügü queísi ában idámuni, queísi cátei buítimaati lueí idámuni—queísi ában idújei jínsiñeguti. Weíríti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barú bubálina queísi ában bouba lídan wesériwidun lun Crístu, resíbibeí queísigubeirügü jamúga áu lan berésibirubei. ¹⁸ Ánjein adúgaali lubeí dáñu bun, o ánjein dúwei lubálibu, agúburaja bána. ¹⁹ Áu Páblo, nabúrújañein murúsun cátei le láu nújabu lúma nilétüran. nafáyeirubei bun, láu sun, gayára lan jamúga narítaguagüdüñibu luágu dúweigua ban gíñe búngua nun lugúndun áu lan asúbudiragüdübalin Wasálbaragüle bun. ²⁰ Ánja, nidúje, adúgabeí fuleísei le nun queísi affiñeti luágu Crístu, ámalijaboún nanígi queísi idújei lueígiñe Crístu.

²¹ Nabúrújaña bun lugúndun choúru nan luágu bagáambadi, áni subúditi nun luágu badúgüba lan sügú láu le uágubei namúriaja búma. ²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le noúba furísunrugu lueígiñe lapúrichijan luágu Jesucrístu, ²⁴ mábuga líña gíñe Márcos bun, Aristárco, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

HEBREOS

Adímurejaali Búngiu lídaangiñe Liraú

1 Lídan meja dan le sügújalibei, adímurejati meja Búngiu joun binádu wagúbürigu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujoún dan le, adímurejaali woun lídaangiñe Liraú. Lídaangiñe Liraú le, ladúgei uboú, áni rúlaali sun cátei lun. ³ Arúfuda lumúti Liraú Búngiu luweírigun Lúguchi luoúgua, ligía méme Búngiubei, ligía ágüdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraú Búngiu sügú jáu ánjeligu

⁴ Núbinjali Liraú Búngiu lun weírigubei lan jaweí ánjeligu, resíbijali ában ubáraü íñugutimaati jaweí queísi lalágaante queísi Liraú Búngiu. ⁵ Maríñagunti Búngiu ni ában weíyaasu lun ni ában ánjeli.

Niraú amúrü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amúrúme nisáani.

⁶ Ánjeinti dán meja le loúnajaabalin Liraú le ábanrügüti uboúagun, aríñagati.

Judúgua jamá sun náni ánjeligu lun.

⁷ Laríñaga jawágu ánjeligu.

Adúgatina lun ítara jamá náni ánjeligu camá garábali,
adúga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraú aríñagati Búngiu ítara.

Búngiu, lúntibei súnwandan bañúurun luágu bála lun barúeijan,

láu ában úaraguni bagúmadija.

⁹ Jínsiñeti le richáguabei bun, iyéreeguti le wuríbabei bun,

ligía níchugunbei, áu le Bubúngiute, gíbetima ugúndani bídoun sügú jáu bíbirigu.

¹⁰ Áriñagati gíñe.

Amúrü le Abúremein, lídan lagúmeseja, adúga bumúti uboú,

láu bújabu badúgei siélu.

¹¹ Lagúmuchuba siélu lúma uboú, ánjein amúrü, beréderuba lun sun dan.

Liábiba siélu lúma uboú lun laweíyadun quei anáanguni,

¹² babáruchagubaña quei ában daúguaü,

jasáansirúaba quei anáanguni.

Ánjein amúrü, ában mémebadibu, magúmuchunbei bibágari.

¹³ Maríñagunti Búngiu ni ában weíyaasu lun ni ában ánjeli.

Nurúba lueígiñe noúnwenren darí lun nagáñeiragüdünibu jawágu báganiñu,
ru náñame bújaburugun.

¹⁴ Sun ánjeligu, espíritugu esériwidutiña lun Búngiu jagía, oúnajoútiña lun jíderaguniña ja lúnbaña jerésibiruni asálbaruni lídaangiñe jafígoun.

Lúnti woúnigiruni wasálbarun

2 Queí ítara líña lubeí luweírigun Liraú Búngiu, lúnti lubeí weténiruntima lun ugánu le agáamba wamálibei luágu, lun madíreirun wamá lueí úma.

² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madúgün jagía gásu láu, áburujati ligáñi Búngiu jawágun láu íríchaü. ³ Gúbuméti wafáyei-ja luágu wafígoun ánjein moúnigirun wamá oúnwenbun asálbaruni le resíbi wamálibei lúmagiñe Jesucrístu le Wasálbaragüle. Wabúreme Jesucrístu guánarügü adímurejabei luágu asálbaruni le furúmiñe, lárigiñe, ja agáambubalin, ában jásügüragüdüni woun láu ában achoúruruni luágu inárüni lan. ⁴ Núrügüda lálali gíñe Búngiu ugánu ligía woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu quei libíriña

⁵ Míchugun lumúti Búngiu uboú líte le uágubei wadí-mureja lábun jagúmadijan ánjeligu, ⁶ lubáragiñe líra, laríñajare tídan Lerérun.

Búngiu, ¿cáteiñeinsan wügúri lun barítaguba lan luágu?

¿Cáteiñein wügúri goúwedaditi badíjeridunbei láu?

⁷ Rúbumuti únabu jaweí ánjeligu luágu murúsun dan, daúguagüda bumúti láu uweíriguni lúma inébesei, ru amúrü ubáfu lun luágu sun cátei le badúgübei,

⁸ rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñúdünti láu le lubeíbei wügúri. ⁹ Ánjeinti lídan Jesucrístu, aríja wamúti lagúnfulirun sun dimúrei le, ligía meja ában gürígia le líchugubei Búngiu únabu

jaweí ánjeligu luágu murúsun dan. Láu luweírin lín-siñejabu Búngiu woun, ánjati lun loúnwen Crístu jawágu sun gürígia, áni guetóti, daúgu líña láu uweír-guni luágu oúweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirájüñü lídan luweírigun. Ligía lúnti lubeí buga lasúfurirun Liraú Búngiu, le Jesucrístu, queísi ában gürígia lun ligíaba lan ában asálbaragülei gumúti láu asúfuriruni. ¹¹ Ja edéregerúabaña jarúma lun Búngiu lúma Liraú le edéregerubaliña ítara, sun jagía ában meme Úguchili—Búngiu. ¹² Ligía úa lubeí nibúsigari lan Liraú Búngiu lun lagúaruniña lamúlenu jáma lítunu dan le laríñagun lun Búngiu, queísi bürúwañu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigun lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában família, ában meme jítaü jagía, ítara gíñe, wügúri meja gíñe garaúwarügüti Jesúsu, lun meja gayáraabei lan loúnwen, gayára lámuga lagúnrinchaguni lubáfu Máfia le ídaangiñebei liábin oúweni joun gürígia. ¹⁵ Ítara líña gidá lumuti Jesucrístu janúfude gürígia, já meja aganoúbaña quei idámuni lun anúfudei lueí oúweni. ¹⁶ Masáliragunti Crístu queísi ánjeli lun líderaguniña ánjeligu, salíti queísi wügúri garaúwarügüti lun líderaguniña gürígia líledi, ja linébaanfaangu Abrahám, ja lúnbaña jafíñerun luágu. ¹⁷ Lúnti líra, gásu meja ítara lúba lan queísi libíriña, lun liábinba lan lun ábanbei lan fádiri íñutimaati, le úaraguati, láu gudémejabu joun gürígia, lun gíñe lachíbuni jafígoun gürígia láu ledéregeragun lúngua luágu gurúwa. ¹⁸ Áni queíti súfuri lan, áni oúchagualei Máfia, guetó gayáraati gíñe líderaguniwa lídan le wóuchawagún.

Weírigutimaati Jesúsu lueí Moisés

3 Ítara líña lubeíti, nidújeñu derégeguatiña jóun-gua lun Búngiu, quei jádaangiñetün lan ja únbaña wájali lan Búngiu lun jaganoún lúma siélu, téni jumá buídu lun Crístu le loúnajabei Búngiu, le gíñe fádiri íñutimaati le lánina afíñeni le wawágubei. ² Úaraguati Jesúsu lúma Búngiu lídan sun wadágimanu le únbei lanúadirei, queísi meja gíñe úaragua lan Moisés lídan sun lesériwidun jádan lufámilian Búngiu. ³ Gadúnati-maati Jesúsu uweír-guni sügú láu Moisés ítara quei resíbitima lan le adúgübei ában múna uweír-guni sügú táu múna to ladúgüboun. ⁴ Sun múna adúgarügü lumútu som gürígia, áni Búngiu adúgübalin sun cátei le níjeinbei. ⁵ Ítara liñáti, úaraguati meja Moisés lídan lesériwidun jádan lufámilian Búngiu queísi ában eséri-widuti lun Búngiu, wadágimanu lé meja ladúgübei, ában liyáwa inárüni le lúnbei lasúbudiragüdúniwa lídan dan le lúnbei liábin. ⁶ Ánjeinti Crístu, úaraguati queísi isáani jádan lufámilian Búngiu, áni jádaangiñeti-

wa família jagía ánjawa derégüdagu méme, ánjawa gíñe afíñe darí lúmoun wóunwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le laríñagubei Sífiri Sándu tídan Lerérun Búngiu.

Ánjein jagáamba le laríñagubei Búngiu ugúñe,

⁸ medéreatá janígi quei meja tedérerun janígi magáambaditiña ja oúchagubalin Búngiu lídan fulásu mageírawati.

⁹ Lídan bián-wein irúmu le jáubei ñi, jóuchagua jamútina binádu jagúbürigu lídan fulásu ligía, líña Búngiu,

láu sun aríja jamáni buri cátei le nadúgübei.

¹⁰ Ligía nagáñidunbei jáma gürígia jagía, ába naríñagun. “Súnwandan charárañu jamá tídan janígi,

májatiña jafálaruni úma le narúfudubei joun.” ¹¹ Ligía nagáñidunbei jáma,

ába náfiñurun luágu mebélubaña lan lídoun fulásu lé yebe aráanse náalibei jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wínwanbei láu mafíñerun jumá luágu. ¹³ Lubáragiñe líra, rújuma gurásu júni-wagua ságü wéyu, sun níjangua lan dan. Toúnigi jumá lueí leyéedagunün figóu, edéreragüdownme janígi, ¹⁴ lugúndun ánjawa ítara méme derégüdagu darí wóunwen lídan afíñeni le wawágubei lúmagiñe furúmiñeti, gafánraanbadiwa lúma Crístu.

¹⁵ Níjangua dimúrei le, le gíñe wóunbei, wagía le wínwanbei lídoun buri dan le.

Ánjein jagáamba le laríñagubei Búngiu guetó, medéreatá janígi quei jagúra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagüdüni láu luríban jagáburi? Sun ja laságarubaña Moisés Ejíptogiñe. ¹⁷ ¿Cáti úma lagáñida Búngiu bián-wein irúmu? Jáma ja afígounjabaña, ja oúwegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse láalibei joun lun jeméraagun ñi? Joun ja adúraagubalin le lubeíbei.

¹⁹ Ítara líña lubeíti, goúnigi jumá lun jafíñerun meme darí lúmoun jóunwen, lugúndun ladúga mafíñeni le jawágubei binádu wagúbürigu, siñá lubeí meja jebélurun lídoun fulásu le aráanse láalibei yebe Búngiu jabá.

4 Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibei Búngiu woun siélu, lúnti goúnigi wamá, siñádügü liñeín lebéllurun ában wadaangiñe, dánme lachúlürün óra lun wóunwen. ² Lugúndun apúrichijóuali gíñe ugánu luáguati asálbaruni woun queísigubeirügü joun binádu wagúbürigu, mesériwinti lun ni cáta joun jagáambuni ugánu ligía lugúndun agáamba jamúti, mafíñerunga luágu. ³ Ánjeinti wagía le afíñeelibei, wagíaba ebélura lídoun eméraaguni le, le uágubei laríñaga Búngiu.

Ligía nagáñidunbei jáma, ába náfiñurun joun luágu mebélubaña lan lídoun fulásu le aráanse náalibei yebe jabá lun jeméraagun. Ítara líña lerérun Búngiu jawágu binádu wagúbürigu. Aráanserúati fulásu lánina eméraaguni joun lúmagiñe wéyu le lagúmuchuni Búngiu ladúgüni uboú, ⁴ queísi labúrüdúniwa tídan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Aríñawagúaya ligía tídan Lerérun tugúya ítara.

Mebélubaña lídoun fulásu le aráanse náalibei yebe jabá lun jeméraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméraaguni jabá gürígia, ja binádu wagúbürigu, ja furúmiñebaña agáambeigánu lánina asálbaruni, mebélutiña ladúga mafíñeni le jawágubei lun Búngiu. ⁷ Ligía laráanserunbei Búngiu ámu dan lun gayáaraabei lan jebélurun iséri gürígia lídoun jeméraagun, lugúndun adímurejati Búngiu lídaangiñe lé meja laríñagubei David sarágu dan larígíñe, tídan Lerérun Búngiu.

Ugúñe, láu jagáambuni le laríñagubei Búngiu, medéreratá janígi lun.

⁸ Lun jamúga fulásu lan lé meja ñíjin lubei lanúgaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu irúmu larígíñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun.

⁹ Ítara líña lubeíti, níjeingua ában eméraaguni le gumúti joun lánigu Búngiu, ¹⁰ lugúndun le ebéluruti eméragua lúma Búngiu siélu, eméraguati lueí luwádigimari ítara quei leméraagun meja Búngiu lueí luwádigimari larígíñe ladúgüni uboú. ¹¹ Lúnti lubeíti wafíñerun le tímatimaati luágu Jesucrístu lun gayára lan webélurun lídoun eméraaguni siélu, faládügü liñálin ában wadaangiñe jáni já meja mafíñerunbaña jémpulu, ábame leféridirun.

¹² Lugúndun mítaraantu Lerérun Búngiu queísi ában cátei le jiláalibei, lubáragiñe líra, gabáfuti lun lasáansiraguni wagáburi. Belútu tídoun wanígi queísi ában efeín to biángua tamána, belú tugúya chülú túmoun wawáni lúma wáni espíritu. Furáangugüda tumúti sun warítagn lúma sun wayúmajan, arúfuda tugúya cátañañadiwa lan. ¹³ Úati ni ában gürígia le ladúgübei Búngiu lun gayára lan larámudagun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiríñebei le tímatimaati

¹⁴ Jesúsu le Liraú Búngiu, ligía wafádiríñebei le tímatimaati, le belújalibei siélun lun laráramun ligíbugiñe Búngiu abúyeija luágu wafúleisein. Ligía lunti lubei derégüdagu méme wamá lídan ligáburi wafíñen.

¹⁵ Gayáaraati gudémejabu lan Jesucrístu le wafádiríñebei woun luágu wadébilin, lugúndun ligía guánarügü súfuriti sun luwúyeri oúchwaguni quei wagía, mafí-

gounjaanti. ¹⁶ Ligía lúnti lubei wayárafadun lun Búngiu le jínsiñejabúbei woun, láu afíñeni, lun gudémejabu lan woun, íderagua lówame láu lareíni lídan wemegeirun.

⁵ Según wagáburi, wagía juríu, ságü ában fádiri le íñutimaabei anúadajouáti wadaangiñe lun ligíaba lan wachúgüdüna ligíbugiñe Búngiu, lun gíñe líchuguni edéweejani lun Búngiu lueígiñe jóubadina gürígia, lúma adágaragüdüni luágu lífígoun lúma luágu jafígoun jíbiri gürígia. ² Quei débili lan fádiri guánarügü quei furúmieguarügü gürígia, gayáaraati gudémejabu lan joun gafígountiña jáma acháragadutiña, ³ áni ladúga lidébilin guánarügü queísi furúmieguarügü gürígia, gásu gíñe ladágaragüdüni luágu lífígoun guánarügü queígubeirügü luágu jafígoun jíbiri gürígia.

⁴ Siñáti ladáagun ában gürígia lúngua fádirime le íñutimaabei láu láni lúngua, Búngiu anúadirubalin, rúlei ubáraü le lun queísi meja lasúseredun lun Aarón lé meja furúmiñeti fádiri le íñutimaabei. ⁵ Ítara líña lasúseredun lúma Crístu, máma ligía íchaagubei lúngua fádirime íñutimaati láu láni lúngua, Búngiu íchugubalin ubáraü weíriguti le lun quei buga laríñaguni lun.

Niraú amúrü, rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu. Fádiri amúrü lun sun dan, le líbe Melquisedéc.

⁷ Dán meja le laganoúnbei Crístu ya uboúagu, ayúmuraguati meja láu umálali jéreti lúma sarágu águirau lun Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagáambuni Búngiu ladúga derégeguñu líña lan Crístu lúngua lun lugúndan Búngiu. ⁸ Láu sun Liraú lan Búngiu Crístu, chülúti dan lun larúfuduni lagáambadi láu lawánduni asúfuriruni. ⁹ Ñúbinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñúdüntiña láu le lubeíbei. ¹⁰ Ába lanúgüni Búngiu Crístu quei fádiri íñutimaati líbe Melquisedéc.

Wuríbani le líchugubei lígirúniwa afíñeni

¹¹ Gíbeti lúnti waríñaguni jun luágu Crístu lúma Melquisedéc, jénreenguti laríñawagún furáangu, lugúndun siñá lan gunfaráanda jamáni. ¹² Sügújali sarágu dan lúmagiñe jasálbarun, lúnti jamúga gayáaraajali lan jarúfudajani Lerérun Búngiu joun ámu, áni busén mémegidün narúfudajaniya buri cátei létima ménreengúnbei lídaangiñe Lerérun Búngiu jun. Irájüñügüdüni lídan jafíñen, queísi irájüñü ja gásubaña játnun míligi lubáragiñe jamúga jeígin eígin le dúgüdati. ¹³ Afíñetiña ja buséngiñebaña larúfudajouniwa cátei létima ménreengúnbei tídaangiñe Lerérun Búngiu joun, ítara jáña quei irájüñü ja gurágiña—úagili gunfaráanda jamáni Lerérun Búngiu buídu. ¹⁴ Ja weínamujañabaña lídan jafíñen, subúditi Lerérun Búngiu joun buídu, subúdi jameí arúfudajani le buídubei lúmoun le mabuídunbei.

6 Queímoun méme lubeíti wabáruaguóun lídan wasúbudin luágu Lerérun Búngiu, ígira wamá-mugei arúfudajani le ménreengúnbei libúgürü Crístu lun watúriajani lujúlilin-ágei. Marítagua wamá luágurügü lébu wafíñen, queí buri ligirún binádu igáburi le málati, lúma buri afíñeni luágu Búngiu, ² arúfudajani luágu badísei, líchugúniwa újabu jábu-lugu afíñetiña, jásaarun jiláaña lídaangiñe oúweni, lúma lagúmujoún lagúseragüdüniña Búngiu gürígia, ³ queímoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu. ⁴ Gürígia ja resíbi jamáalibeí larúgounga ában weíyaasu, resíbi jameí Crístu queísi jasálbaragüle, resíbi jameí gíñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya uboúagu— ⁶ ánjein íchiga janágan luágun Crístu lárigiñe sun cátei líra, ába jagíribudun járigoún lídoun binádu jagáburi, siñáalime jaságürrija, siñáalime gíñe lánigu jamá Crístu. Lun jamúga íchuguni janágan luágun Liraú Búngiu lárigiñe jafíñerun luágu, queisigubeirügü jamúga já-daraguñeinya lan luágu gurúwa, jéjerajaña gíñe láu jagíbugiñe gürígia. ⁷ Gürígia ja ebugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágimeinbalin, ladúga binílaali lán buga Búngiu múa ligía. ⁸ Gürígia ja íchugubaña janágan luágun Crístu, ítara jáña quei múa le ñí lumuti lájücha jíyu lúma lagúbüri jíduru, úati ju lan lun ni cáta. Láburujaba lábun líñaragun Búngiu, ábame lagudún.

Eménigini le adúgübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, afíñetiwa luágu ítara júba lan queí múa le íchugubei inádiri buíti, áni jibíjubei sun abíniruni le ñúbinbei woun luágu wasálbarun. ¹⁰ Lugúndun úaraguati Búngiu, áni mabúlieidun lubeí le adúga jumáalibeí, lúma ínsiñejabuni le arúfuda jumáalibeí lun láu jíderaguniña jidújeñu luágu afíñeni, cátei le an-júnjaguabei adúgei. ¹¹ Buséntiwa lun ítara méme lan cáda ában jídaangiñe, arúfudei afíñeni le darí lúmoun jounwen, lun gayáraabei lan jibíjini le jagúrabubei—lun jebélurun siélun. ¹² Mabúseerúntiwa lun jamáqualigudun lídan cátei le láni Búngiu, busén-rügütiwa lun jáyeijani jagáburi já meja afíñebaña buídu buídu luágu Búngiu, awánda jameí sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guánarügü líri ladúga úa lan ámu weírigutimáati lueí lun láfiñurun luágu, ¹⁴ ába laríñagun. “Nabínirubadibu sarágu, níchuguba gíñe sarágu adúgawaguni bun.” ¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun. ¹⁶ Dan le jáfiñurun gürígia, luágu ában le weírigutimáati jaweí jáfiñura, áni choúrujaña ligíati ában cátei láu fiñún, úaali ámu cátei lun

laríñawagún. ¹⁷ Ligía lachoúrurunbalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúnfulirubei lan lerérun luágu wasálbarun, masáansirunga ni cáta lídaangiñe.

¹⁸ Rúlaali Búngiu lerérun woun, rúleí láfiñurun luágu, bián cátei ligía, gayáraati weménigidun luágu, ladúga siñá lan leyéejan Búngiu. Áni láu cátei ligía, sun ja ñúbinbaña lun Búngiu lun jasálbarun, gayáraati janúgün gurásu, gayáraati jasúbudiruni le tímatimaati luágu jasálbaruba lan áni jebéluruba siélun. ¹⁹ Ágüdaja lumútu eménigini le wawáni derégüdagu, choúruñu, queísi lágüddajanun oúnguru ugúnein derégüdagu. Choúruwañu líña eménigiruni le wabíjibeí buídu buídu, ragúñu líña luágu Búngiu lídan fulásu sándutimáati siélu, ²⁰ le ñíjin lubeí lebélu Jesúsú ában weíyaasu wawágu lun ladáranuni úma wabá. Níjein ñi guetó afádirija wawágu ligíbugiñe Búngiu queísi ában fádiri iñutimáati le líbe Melquisedéc.

Jesúsú fádiri líbe Melquisedéc

7 Melquisedéc le, urúei lídan meja fulásu le gíribei Sálem, lufádirinein gíñe Búngiu le iñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” queí mejati lurúeite lubeí Sálem, áni “darángilaü” míni lan Sálem, ítara líña lubeíti “lurúeite darángilaü” Melquisedécbei. ³ Ibídiñewati ca lan lagúbüri gubaña, ibídiñeti gíñe ca lan linébaanfaangubaña, ibídiñewati ni cáta libúgürü lagúriajoún ni libúgürü loúnwen, liyáwa Liraú Búngiu ligía, ában fádiri lun sun dan.

⁴ Aríja jumeíti luágu weírigu lán meja Melquisedéc. Abrahám guánarügü lé meja binádu wadúje, rulumuti ában lídaangiñe cáda díisi lun lídaangiñe le lagídarubei jaweí urúeigu lídan wuríbu. ⁵ Según lílúrudun Moisés, fádirigu ja linébaanfaangu Leví lúnti jagúbura-jani ában lídaangiñe cáda díisi jamagiñe gürígia lídaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei lueí Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñáti lasígeneruni ni ában luágu weírigutima lan le abínijabei sùgú láu le abínirúabei. ⁸ Ya wádan, fádirigu ja erésibirubalin cáda lidíisin cátei, wügüriña goúwedaditiña, ánjeinti luágu Melquisedéc, tadímurejan Lerérun Búngiu luágu quei luágu ában le wínwangili. ⁹ Áni gayáraati laríñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni gíñe lun Melquisedéc lídan óra le lafáyeirunbalin Abrahám lun, ¹⁰ lugúndun lídan ában oúbaü, barú lumutiña buga Abrahám linébaanfaangu ja

magúriaжоúngiñabaña lídan lúgubu dan le láfuridun-bei Melquisedéc lubároun.

¹¹ Jádaangiñe fádorigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibeí jafádirin. Gürígia ja afálarubalin lúrudu ligía, lun jamúga gayára lan jasálbarun le tímatimaati lueígiñe, memégeirunwali jamúga lachúlaagun ámuya fádori, máma líbe Aarón, líbe Melquisedéc. ¹² Lugúndun dan le liábin fádori lídaangiñe ámu adúgawaguni, sáansiwati gíñe lúrudu lé buga lábugiñebei lafádirija. ¹³ Wabúreme Jesucrístu, queísi fádori lídaangiñe ámu adúgawaguni queísi Melquisedéc, sáansiguati gíñe lúrudu le lábugiñebei lafádirija. Tariñajare Lerérun Búngiu luágu lídaangiñeti lan ámu liraú Israél lueí Leví liábin Crístu—ában adúgawaguni le úagilibei ni ában jádaangiñe afádirijati. ¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni maríñagunti Moisés ni cáta jawágu adúgawaguni ja dan le ladímurejaanbei jawágu fádorigu.

¹⁵ Áni furáangutimáati le dan le liábin Jesucrístu lun lafádirijan queísi Melquisedéc, ¹⁶ máma láu ában lúrudu le aríñagubei cába lan ídaangiñe adúgawaguni liábin, liábin lun fádoriabei lan lugúndun gabáfu lan lun labágaridun lun sun dan. ¹⁷ Niján le laríñagubei Búngiu luágu Jesucrístu.

Ában fádori amúrú lun súnwandan, le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebei jafádirijan Levítagu, lugúndun nírein lan mégeiti luágu, ¹⁹ mabáfuti lúrudu ligía lun lasálbaruniña gürígia lídaangiñe jafígoun. Lewéñeguati, níjein ában iséri aráanseruni le buítimaati, le ídaangiñebei gayára lan wayárafadun lun Búngiu.

²⁰ Áni láu ában fiñún ladúgei Búngiu aráanseruni le lun Jesúsuba lan wafádiríñe. ²¹ Ja jíbiri fádorigu, máfiñurunwati dan le líchugunbei jafúlasun joun, ánjeinti luágu Jesúsú, le láubei fiñún líchugúa lufúlasun lun, laríñajare tídan Lerérun Búngiu.

Áu Búngiu le Abúremeinbei, fiñújadina bun, masáansiragun nubeí narítagn.

“Ában fádori amúrú lun súnwandan, le líbe Melquisedéc.”

²² Ligía Jesúsú lubeí achoúrurubei ában darádu buítimaati lueí le furúmiñeti. ²³ Já meja jíbiri fádorigu, chúlútiña agíbedagua lugúndun quei ába lán buri jóunwen, siñáti jasígirun, ²⁴ ánjeinti Jesúsú, quei mouñwen lan, másügürünbei lífisiute queísi fádori lúmoun ámu. ²⁵ Ligía gayára lubeí lasálbaruniña ja ayárafadubaña lun Búngiu lídaangiñe le tímatimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsú lubeíti fádoriabei íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gafígountiña, iñurúa ligía íñutima lueí sun cátei siélu lun lañúurun lúma Búngiu. ²⁷ Mítaraanti quei jíbiri fádorigu íñutimaatiña ja gásubei jáfarun aní-

maalu lun jadágaragüdüniña quei sacrificísiu ságü wéyu, furúmiñe luágu jafígoun guánarügü, lárigiñe luágu jafígoun jíbiri gürígia. Lubáragiñe líra, adúga lumúti Jesúsú sacrificísiu ábanrügü weíyaasu dan le líchaagunbei lúngua lun loúnwen luágu jafígoun gürígia. ²⁸ Wügúriña ja débilibañe, jagía líchugubaña lilúrudun Moisés queísi fádorigu, ánjeinti lárigiñe lidáani lúrudu, ába láfiñurun Búngiu luágu Liraú lun ladúgüni fádorigu, le buídubei adúgün le gumúti lun súnwandan.

Jesúsú búyei lun ában iséri darádu

8 Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduña queísi fádori lídan fulásu le sándutimáabei le ladúgübei Wabúreme Búngiu yágüta siélu, máma fulásu le sándutimáabei le jadúgübei gürígia ya ubouágu. ³ Sun fádori íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubeí gíñe níjein lan som cátei lúnti ladágaragüdüni Jesucrístu lun Búngiu. ⁴ Lun jamúga yáñein lan Jesucrístu ubouágu, mámañein jamúga fádori, lugúndun añájeingua fádorigu adágaragüdütiña le uágubei laríñaga lilúrudun Moisés. ⁵ Fádorigu ja, jadúgüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladúgünun Moisés lúban Búngiu, ába laríñagun Búngiu lun. “Adúgabeítia sun cátei queísi iyáwaü to narúfuduboun bun luágu wúbü.” ⁶ Weíriguti lafádirijan Jesucrístu sügú láu jafádirijan fádorigu ubouágu, queísigubeirügü buítima lan darádu le uágubei labúyeija lúma Búngiu luágu jáni gürígia fuleísei ubouágu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladúgübei Búngiu jáma binádu wagúbürigu lídaangiñe Moisés, memégeirunwati jamúga ábanya libíaman darádu. ⁸ Magúndaatí buga Búngiu laú furúmiñeti darádu ladúga mabáfu jamá binádu wagúbürigu lun jagúnfulirun lúma darádu ligía. Ába laríñagun tídan Lerérun.

Laríñajare Jabúreme Búngiu. Lachúlürüba wéyu lun nadúgün iséri darádu jáma buri linásiñun Judá lúma Israél.

⁹ Mítaraanbei quei darádu le nadúgübei jáma binádu jagúbürigu

le wéyu le nárügüdünbalin jájabu lun naságaruniña Ejíptogiñe, magúnfulirun jamúti meja nidáradun ligía, ligiati nígirunbáliña jóungua, líña laríñagun Búngiu.

¹⁰ Niján darádu le lúnbei nadúgüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítagn, ábame nabúrújani tídan janígi.

Áubati Jabúngiute, jagíame nánigu.

¹¹ Memégeirunwabei lun larúfudajoúniwa nuágu,

maríñagunbei wügúri ni lun lidúje ni lun libíri lun jasúbudiruni Búngiu le Jabúremebei, lugúndun jasúbudirubadina súngubei, lúmagiñe le ñúraütimaabei darí lúmoun le weírítimaabei jádaangiñe.

¹² Ferúduna nubeí wuríbani le jadúgübei, nabúlieidubei jafígoun lun sun dan.

¹³ Adímurejaali ligía Búngiu luágu ában iséri darádu, rúlaalírgü líña le furúmiñeti quei binádu, áni cátei le binádujalibe, mayúsurunwadügüyaali.

Lúban Búngiu to ubouáguna túma Lúban Búngiu to siéluna

9 Lídan meja le furúmiñeti darádu le ladúgübei Búngiu jáma binádu wagúbürigu, rúlumuti meja gumádi joun ída lúba lan jájuduragun lun, ñíñoun gíñe ában múna to sánduboun ya ubouágu to lúbanboun Búngiu. ² Ítara líña ligáburi taráanserún múna tugúya. Múnada, ñíñein bián rúmu, lídan furúmiñeti rúmu le gíribei Fulásu Sándu, ñíñein lébu sanúdelu lúma dábu-la le ñí tubei fein to biníwaboun. ³ Ñíñoun ában bélu labádinagua bián rúmu ligía, Fulásu le Sándutimáabei líribei libíaman rúmu. ⁴ Lídan rúmu ligía, ñíñein ában latárü gólu lun lágudajoun cupáli ñi, túma bágüsi to lánina darádu, gólu sun touba. Turágeirugu bágüsi tugúya, ñíñein ában ágeidinaú gólu le gádaanbalin eígini le gíribei maná, ñíñein gíñe luwénwen Aarón le ájüchagubei, lúma dúbü le uágubei labúrújoua dísi gumádi le líchugubei Búngiu lun Moisés. ⁵ Tougiñe bágüsi tugúya, ñíñoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ñíñein lan Búngiu lídan fulásu ligía. Darúguatiña táu bágüsi tugúya, le ñí lubei ferú-dunawa lan figou, láu jarúna. Mabúseerúntiwa wadí-murejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lí-doun Fulásu le Sándubei ságü wéyu lun jafádirijan. ⁷ Ánjeinti lídoun Fulásu le Sándutimáabei, fádiri rügüñein íñutimáati ebélura ñíjin ában weíyaasu lídan irúmu, áni dan le lebélorun, gásu lanúgün játa aní-maalu lun ladágaragüdün luágu líffigoun guánarügü lúma luágu jafígoun gürígia. ⁸ Láu cátei le, larúfuda-jaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügübei ñi, madárarúngili úma lídoun Fulásu Sándutimáati. ⁹ Sun igáburi lé meja adügüwabei lábugiñe binádu lídarádun Búngiu, liyáwa iséri lídarádun Búngiu wáma le seríwigilibei lídan dan le. Cátei lé buri meja íchugübei lun Búngiu, lúma cátei le adá-garawagüdúwabei lun lábugiñe binádu darádu, siñáti meja larúmadagüdünun jawáni ja agúnfulirubaña lú-ma Búngiu ítara. ¹⁰ Lúrudu buri lánina binádu darádu luágu jagúnfulirun lúma Búngiu, luáguti eígini le lún-bei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáan-siruni Búngiu sun cátei láu liábin Crístu.

¹¹ Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügú láu le binádubei. Lúban Búngiu le ñí lubei lafádirija, buítimaatu sügú táu tó meja ubouáguuboun. úati mégeiti tuágu, ladúga máma jadúga gürígia múna to siéluboun, to uáguboun nadímureja. ¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñúbürigiña luágu jafígoun gürígia, dagágüda lumúti lí-ta guánarügü. Láu ábanrügü lebélorun, ligía ibíjaali asálbaruni magúmuchaditi woun. ¹³ Inárüni luágu lábugiñe lan binádu darádu, gabáfuti meja játa bága-su jáma gábara, lúma jabálgín bágasu ñúbürigiña, lé buri áturawagübei jawágun ja marúmanbaña, lun ledéregeruniña lúma lun larúmadagüdüniña bougudigiñe jabíti ligíbugiñe Búngiu. ¹⁴ Áni ánjein ítara líña lubei, igúbumégia gabáfutima lan líta Crístu! Lí-daangiñe Sífiri Sándu le magúmuchadibe, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri arítaguni luágu wagúnfulirun lúma binádu darádu, adúga lumútiwa lun wabúseerun wesériwidun lun Búngiu le wíwanbei.

¹⁵ Ligía Jesucrístu lubei búyeibe lun ában iséri dará-du le adúga lálíbe Búngiu wáma. Loúnwenbei Crístu lun ferúdnawa lan figou le adügübei lábugiñe binádu darádu, lun gíñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei luágu líchugubei lan queísi alá-gan. ¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfutu gára-da tugúya darí lun lasúbudirúniwa luágu jiláali lan gürígia ligía. ¹⁷ Mebégitu gárada tugúya dan le wín-wangili gürígia ligía, darí dan le jiláali. ¹⁸ Ligía gíñe láu lubei léserun jítaü ladügüwa furúmiñeti lídarádun Búngiu jáma lumútuniña. ¹⁹ Subúdigüda lumúti Moisés sun lugúmadina lúrudu joun sun gürígia, lárigiñe, ába lanúgün gamísa funátu lúma lílímun isópo, ába ladúduragüdüni lídan dúna lúma játa bágasu ñúbü-rigiña jáma gábara, ába labájichagunun lílíburuna lúrudu jáma gíñe sun gürígia. ²⁰ Ábati laríñagun joun. “Niján jítaü le achoúrurubalin lídarádun Búngiu júma.” ²¹ Bajígua lumútu gíñe Moisés Lúban Búngiu lúma sún buri cátei le ayúsurubei lídan jájuduragun lun. ²² Según lúrudu ligía, jarúmagüdúwati sun líbe-ágei cátei láu jítaü, áni úati ferúdnawa lan figou ánjein úa láwiyurun jítaü.

Lachíbuni loúnwen Crístu wafígoun

²³ Busénwati lubei mejati ladágaragüdúniwa játa aní-maalu lun larúmadawagüdün buri cátei le, sun líra, iyáwaü rügüñein lun cátei le inárüniti le siélubei, le ñí tubei Lúban Búngiu tímatimaatu, áni busénwati ladá-garagüdúniwa jítaü le buídutimaati sügú láu játa aní-maalu luágu cátei lánina siélu. ²⁴ Mebéluti Crístu tí-doun Lúban Búngiu tugúra to jadúga wügúriña ya ubouágu, to meja tiyáwarügüuboun Lúban Búngiu to tí-

matimaatu siélu, siélun méme lebélera, le ñi lubei larúfudagua lúngua guetó ligíbugiñe Búngiu lun lafádirijan luágu wafúleisein. ²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan irúmu lun ladágaragüdüni jítaü le máma líta, ánjeinti Crístu, míchaagunti lúngua quei adágaragüdüni sarágu weíyaasu lun lachíbuni figoú. ²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügún uboú. Masúseredunti ítara, lubáragiñe líra, dan le lagúnfuliruña lán buri dan, chúlúguaali Crístu ábanrügü weíyaasu, íchaagueina lúngua lun lagídaruni figoú. ²⁷ Ítara quei sun lan gürígia lúnti lan joúnwen ábanrügü weíyaasu, lárigiñeme ábame jagúserawagüdüni, ²⁸ Ítara líña gíñe líchaagun Crístu lúngua ábanrügü weíyaasu lun lagídaruni jafígoun gürígia. Lachúlürüba wéyu lun lagíribudun Crístu uboúagun, mámaalime lun lagídaruni figoú liábin, liábinba lun lanúgüniña sun ja agúrabubalin liábin siélun lun jabíjini sun cátei lánina jasálbarun.

10 Lilúrudun Moisés liyáwa rügüñein méja buri cátei buíti lé meja lúnbei lanúgüni Crístu joun gürígia, le lásíñerubei lúruđu íchiga joun. Ja lubeíti ayárafadubaña lun Búngiu lídaangiñe játa anímaalu le adágaragüdüwabei lun Búngiu según lilúrudun Moisés, lé buri adágaragüdüwabei ságü irúmu, siñáti meja jadáriruni jabuídurun le gumúti ítara. ² Lun jamúga gayára lan labuíduragüdüniña lúruđu le gumúti ligíbugiñe Búngiu, ába jamúga madügúnjali lan adágaragüdüni buri le, lugúndun ja adúgübalin, láu jamúga jarúmadun ában weíyaasu lídaangiñe jafígoun lun súnwandan, masándiragunjaña jamúga jóungua láu dúru luágu figoú. ³ Seríwiti adágaragüdüni buri le lun larítaguagüdüniña luágun jafígoun ságü irúmu, ⁴ quei siñá lubei lagídaruni játa bágasu lúma játa gábara figoú.

⁵ Ligía laríñagunbei Crístu lun Búngiu dan le lebélerunbei uboúagun.

Mabúseerúntibu adágaragüdüni ni anímaalu íchugúti bun,

aráanserügütibu ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárü bun,

ní buri láu adágaragüdüni lun ladáuragun figoú.

⁷ Ábati naríñagun. “Ñúbinjadina uboúagun lun nadúgüni bugúndan, Nubúngiute,

ítara queísi bürúwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdüni, ni jáu anímaalu íchugúti lun, ni anímaalu gudáwati luágu latárü, ni adágaragüdüni lun ladáuruni figoú, láu sun lán buri cátei le uágubei laríñaga Búngiu lídaangiñe Moisés joun gürígia lun jadúgüni. ⁹ Laríñaga Crístu lárigiñe. “Ñúbinjadina lun nadúgüni bugúndan, Búngiu.”

Laníchigu líra, ñúbinjali Crístu uboúagun lun lagúmuchaguagüdüni igáburi le ladágaragüdüniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüdüniwa

ligíbugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádorigu juríu, ságü wéyu jadúgüni buri ában méme adágaragüdüni, láu sun siñá lan lagídaruni adágaragüdüni ligía figoú. ¹² Ánjeinti Jesucrístu, ában rügüñein weíyaasu líchaagun lúngua luágu figoú lun sun dan, ábati lagíribudun siélun, ába lañúurun lueígiñe loúnwenren Búngiu. ¹³ Níjein ñi guetó agúrabaja líchuguniña Búngiu láganiñu lábugiñoun lubáfu. ¹⁴ Láu loúnwen ábanrügü weíyaasu, ába labuíduragüdüniña lánigu Búngiu, le gumúti, lun sun dan. ¹⁵ Choúru lumúti gíñe Sífiri Sándu cátei méme ligía woun, lugúndun laríñaga le laríñagunbei Búngiu.

¹⁶ Darádu le lúnbei nadúgüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi, ábame nabúrüdüni jarítangunrugu.

¹⁷ Lárigiñe laríñaga.

Marítagundügüyaadináme luágu jafígoun ni luágu wuríbatu buri le jadúgübei.

¹⁸ Dan lubeíti le ferúdnawaali figoú lun sun dan, memégeirunwali ámu adágaragüdüni luágu figoú.

Lúnti wayárafadun lun Búngiu

¹⁹ Ligía lubeíti nidújeñu, láu loúnwen Crístu luágu wafígoun, gayáraajali wayábin ligíbugiñe Búngiu manúfudeiga. Úaaru bélu lun teréderuniwa lueí webélurun lídoun Fulásu le Sándutimáabei, le ñi lubei Búngiu, gidá lumutu Crístu bélu tugúya láu loúnwen. Junrénti ában iséri úma woun lúmoun Búngiu, ában úma le anúgübalíwa lídoun ibágari magúmchaditi.

²¹ Jesúsu wafádiríñebei íñutimaati tídan Lúban Búngiu siélu, ²² ligía lúnti lubei wayárafadun lun Búngiu láu tarúma wanígi, lúma láu sun wafíñen derégüdagu luágu. Jarúmagüda láaru wanígi lun masándiragun wamá woúngua láu dúru luágu figoú lárigiñe lachíbuniwa, badíseijadiwa láu dúna jarúmati. ²³ Ítara méme wamá derégüdagu lídan wafíñen, masáansiragúnga, lugúndun gayára lan weménigidun luágu Búngiu lun lagúnfuliruni lerérun lun líchuguni ibágari magúmchaditi woun. ²⁴ Lúnti gíñe wáfaagun wíderaguniña wíbirigu lun jínsiñejabu jamá, lúma lun jadúgüni le buídubei. ²⁵ Moún lumuti wafálaruni jém-pulu jáni ja jéchubaña lun mídin jamá lídan wadámuridagun, wagía afíñetiña, le lúnbei wadúgüni, lun wíchugun gurásu joun wíbirigu, guetótima láu aríja wamáni luágu yaráfaali lan luwéyuri Wabúreme Jesucrístu lun lagíribudun uboúagun.

²⁶ Lugúndun ánjawa afígounja láu wíchuguni wanágan luágu Crístu lárigiñe wasúbudiruni luágu ligía rügüñein lan agídarei figoú, úaali ámu luwúyeri lun wasálbarun lídaangiñe wafígoun. ²⁷ Ában rügáli cátei lun wagúrabajani, lun lagúseragüdüniwa Búngiu láu ában lanárimé igáñi, ábame wagúnrichawagún jáu sun jíbiri láganiñu Búngiu lídan wátu geméti. ²⁸ Dan le ladúraaguni ában gürígia lilúrudun Moisés, áni añájein bíama o úrúwa geféentiña luágu, ába laríñagun lilúrudun Moisés luágu lúnti lan loúnwen gürígia ligía,

magúdemejabuti lúrudu lun. ²⁹ Weírítimaati súfuri le jadúnabei ja mebéresenbaña láu Liraú Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achoúru-rubalin lidáradun Búngiu wáma, le adúgúbaliwa jarúma ligíbugiñe. ³⁰ Subúdi wamúti ligáburi Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagati gíñe. “Nagúseragüdübaña numútuniña.” ³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítagua jumá luágu buri wéyu le sügújalibei dán meja le jerésibirubalin larúgounga luágu Jesucrístu. Weírítu meja jasúfurirun lídoun meja dan ligía, áni awánda jumúti sun cátei láu gurásu. ³³ Añájein jí-daangiñe, anabúatiña, ouserúa jagía wuríba ligíbugiñe guríríguaü ladúga jeíbugun lúma Crístu, jíbiri, súfuritiña larúga gamádagua jamá jáma ja wuríbabaña ouserúniwa. ³⁴ Gudémejabutün meja joun ja furisunrugubaña, ásta láu ugúndani ígiraguagüdatün júngua lun lagídarún le júmabei jueí, subúdiñu jumeín luágu níjein lan cátei júma siélu le buítimaati, le siñábei lagídarún jueí. ³⁵ Guetóti, meféridira jumeín lubeíti jeméni-gi luágu Búngiu, lugúndun jerésibiruba lan ában oúnwenbun afáyeiragülei siélu. ³⁶ Gagúraasun jumá, lun lárígíñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu. ³⁷ Taríñajare Lerérun Búngiu luágu lagíribudun Crístu uboúagun.

Málüjali ánjein ñúbin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafíñerun nuágu, líña laríñagun Búngiu.

Ánjein leféridira lafíñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafíñen luágu Búngiu, ába jeféridirun, wasígiruba láu sun wafíñen luágu daríme woúnwen, belú támuga wawáni siélun.

Luáguti affíñeni

11 ¿Cáteigi afíñenibei? Afíñeni, achoúrurúni le gumúti luágu wabíjibei lan le wagúrabubei, lúma wachoúruruni le gumúti luágu nírein lán buri cátei láu sun maríjin wamáni. ² Niján luwúyeribei meja jafíñen jádaangiñe binádu wagúbürigu luágu Búngiu, ába lagúndaarun jáma.

³ Láu wafíñen, wasúbudirei luágu Búngiu lan adúgúbalin uboú láurügü lerérun, le lubeíti uboú le waríjubei guetó, máma lídaangiñe cátei lé meja aríjubei ladúgúwa.

⁴ Láu lafíñen Abél, dagágüda lumúti le labúseerúbei Búngiu sügú láu le ladágaragüdübei Caín, ligía lerésibirunbalin Búngiu queísi richáguati, ába lerésibiruni ladágaragüdüni lun. Láu sun lubeíti jilá lan Abél, niján-gua luwúyeri lafíñen queísi jémpulu woun.

⁵ Láu lafíñen Enóc, lanügúwa siélun moúnwenga, áni madárirúnwati lúgubu lugúndun barú lani meja Búngiu. Áni taríñajare Lerérun Búngiu luágu, luágu

lubáragiñebei lán meja lanügún Enóc, gúndan lan Búngiu láu ya uboúagu. ⁶ Ánjeinti wagía, siñáti gúndan lan Búngiu wáu ánjein maffíñen wabeí luágu, lugúndun lun wayárafadun lun, gásu wafíñerun luágu níjein lan áni líchuguba jafáyeiruája ja áluajabalin.

⁷ Láu lafíñen Noé, dan le lawísarunbalin Búngiu luágu ladágaruba lan ában oúnwenbun gúnran, láu sun maríjijajagili lan gúnran, ába ladúgüni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian. Arúfuda lumúti lafíñen Noé oúnwenbun maffíñeni le jawágubei jíbiri gürígia uboúagu. Ába lanügüni Búngiu Noé queísi ában wügüri richáguati lúma, luágu lafíñen.

⁸ Láu lafíñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei lán lan, ába ladúgüni le lubeíbei Búngiu, ába láfuridun lageíragiñe, ibídiñounga lun jalíñounbei lan.

⁹ Ába laganoún lídan iséri fulásu ligía, láu sun teréncha lan ñi, ladúga lafíñen luágu lerérun Búngiu lun luágu líchugubei lan fulásu ligía lun. Laganoúa tídan múna adúgútu láu jára anímaalu, ligía méme gíñe jadúgübei Isáac, le liraú, lúma Jacób, le libári, ladúga jalágaante lan fulásu ligía lúmagiñe Búngiu. ¹⁰ Adúga lumúti Abrahám sun líra ladúga agúrabaja lan lebéllurun lídoun lubuídun ubúrugu siélu le ladúgübei Búngiu, le adúrarubei lun sun dan.

¹¹ Láu gíñe taffíñen Sára, láu sun meja weíyaaru tan lun tagáraüdüni, resíbi tumúti ubáfu lúmagiñe Búngiu lun tagáraüdüni, garaútu ában irájü ladúga taffíñerun luágu lagúnfulirubei lan Búngiu le laríñagubei. ¹² Láu sun lubeíti weíyaali lan Abrahám lun garaú lan, ñúbinti lun ganébaanfaangubei lan sarágu, quei warúguma ja siélubaña, quei gíñe lágu buri ságoun le lárubei béya le siñábei labájüdüni.

¹³ Jiláguatiña Abrahám jáma lirájüñü láu jafíñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra uboú le, jayábin rügúña ebéluja queísi teréncha ya. ¹⁴ Gürígia ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵ Lun jamúga fulásu lan le ñígíñe lubeí jáfurida ageíraübei le jáluajabei, gayáraayati jamúga jagíribudun járigoún ñíjin. ¹⁶ Ában buga ageíraü buítimaati jabúseerúbei, ageíraü le siélubei. Ladúga níjein lan jarítagun luágu cátei le lánina siélu, ligía úa lubeí nibúsigari lan Búngiu lun Jabúngiutebei lan, ába laráanserun ában fulásu joun siélu.

¹⁷ Dán meja le loúchagunbalin Búngiu Abrahám láu laríñagun lun lun láfaruni liraú le Isáac jilágubei lun ladágaragüdüni lun, affíñe mémeti luágu Búngiu, rúguatí yebe lúngua lun ledéregeruni liraú le ában-rügüti, ¹⁸ láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac.

¹⁹ Subúdirügü liñáali Abrahám luágu gabáfu lan Búngiu ásta lun lásaaragüdüni Isáac lídaangiñe

ouweni, áni ítagaraýebe ladúgüni Búngiu láu líchuguni Isáac lárigoún lun Abrahám lubáragiñe yebe láfaruni.

²⁰ Afíñeti Isáac luágu ladúgübei lán Búngiu le laríñagubei, ába laríñagun joun lirájüñü ja Jacób lúma Esaú luágu labínirubaña lan Búngiu lídan dan le lúnbei liábin. ²¹ Laú lafíñen Jacób, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luweírigan Búngiu, ragúñu luágu lígiri lubádun. ²² Láu lafíñen José, lubáragiñe loúnwen, aríñagati luágu jáfuriduba lan Israelítagu Ejíptogiñe, aríñaga ligía lun janúgüni lábu jáma dánme le jígiruni fulásu ligía.

²³ Láu jafíñen lagúbürigu Moisés, dan le lagúriajouñbei, ába jarámuduni luágu úrúwa játi, ladúga jaríjin luágu buídumeraü lan, janúfudetiña lueí lúrudu le líchugubei urúei lun jañáradawagüdüniwa wügúriña irájüñü. ²⁴ Láu lafíñen Moisés, dan le wügúrijali, májati lun lanügúniwa queísi tiraú liraú lurúeite Ejípto, ²⁵ jímein lumúti lasúfurirun jáma lánigu Búngiu lubáragiñe laganoún buídu tídan lúban urúei, to lánina figoú. Subúdi lumúti luágu madúra lan luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun únabuni lueígiñe Crístu le lúnbei liábin, sügú láu laganoún lídan sun lirisin Ejípto, lugúndun luágu afáyeiruaajaü le lúnbei líchuguni Búngiu lun, líchigei larítangun. ²⁷ Láu lafíñen Moisés luágu Búngiu, ába lígiruni Ejípto, manúfudeiga lueí ligáñi urúei, reídeiti derégüdagu lídan larítangun camá jamuga aríagu líña lun Búngiu le marijinbei.

²⁸ Láu lafíñen Moisés ladúgei fédu le gíribe pásqua, ába loúnajan abájichaguei tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraú Israelítagu le íbugañaü. ²⁹ Ladúga jafíñen Israelítagu luágu Búngiu, ába ladúgün Búngiu úma joun lídaangiñe dúna le gíribe Barána Funáti, lun gayára lan jásügürün eíbugeina camá jamuga múa le mábeiti. Dánti le jabúseerúnbei Ejíptona lun gíñe jásügürün quei jagía, ába ladáuragun dúna jáu, ába jañáradagun.

³⁰ Láu jafíñen Israelítagu luágu Búngiu, ába jamácharun geyégua láu lubárierun ubúruyu Jericó ságü bináafin luágu sédü wéyu, ába leíguadun louba lubárierun ubúruyu ligía. ³¹ Afíñetu Raháb, tó meja jóru, luágu Búngiu, ába tarámuduniña Israelítagu aríajatiña túbiñe. Ladúga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

³² ¿Cába ámu cátei naríñaga? Louguabei dan nun lun nabúrjan luágu Gedeón, Bárac, Sansón, Jefté, Davíd, Samuél luma jawágu profétagu. ³³ Láu jafíñen, siríguatiña buri fulásu, agúmadija jagía buídu, íderagua lumútiña Búngiu queísi laríñaguni joun. Darú lumuti Búngiu jayúma liñún jaweí, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jeredun ja mérebaña, ñúbintiña lun gabáfubaña lan wuríburugu, ába jásiiragúniña já-

ganiñu. ³⁵ Níñanu wúriña ásaaragüdüwatiña jadújeñu lídaangiñe ouweni joun.

Añájein gíñe jíbiri, jiláguatiña lídan luweírín asúfuriruni ladúga jamájan jíchuguni janágan luágun Búngiu lun jamúga gayáraabei lan jígirawagüdüniwa. Jímein jamúti jáfarawagún jilágubei luágu líri Búngiu lun gayáraabei lan jásügürün lídaangiñe ouweni lídoun ában ibágari le buídutimaati siélu. ³⁶ Jíbiri, áfagatiña léjerajouñ jáu, abeichúni, agúrawagúni láu güringüri, lúma adaürúni furísunrugu.

³⁷ Áfarawagúatiña láu dúbü, asíarajouatiña jamídan jámagua, ouchawagúatiña lun jígiruni Búngiu, áfarawagúatiña táu efeín, anúrajatiña jábiñegiñe, ába jeréderun eíbugañajádügü, darúgu jougua láurügü jára mudún lúma jára gábara, fugiábugu, láu idíjeri, ouserúa wuríba. ³⁸ Gürija buri jagía ja ní lubei ubou madúna lumútiña, eíbugañajádügü jáña buga lídan buri fulásu mageírawati, áraabu, lídan buri lilúlan dúbü weínamuti lúma lídan buri júyu le múaruguti. ³⁹ Sun jagía, láu sun buídu lan afíñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladúga machúlü lan Wasálbaragüle ubouagun lídan jadáani, ⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

Rúwamei waríjin luágun Jesúsu

12 Ítara líña meja jagáburidun sun jíbe gürija jagía lídan dan le sügújalibei, láu jafíñen luágu Búngiu. Ában jémpulu jagía woun lun ítara méme lan wagáburi. Ibágari le, queísigubeirügü ában eíbaaguni, gidáwamei sun le erédejabaliwa wawáriuwa, lúma figoú le agúragubaliwa, adúga wameí eíbaaguni le wabáragiñebei láu gurásu, láu sun wafíñen luágu Jesucrístu. ² Rúwamei waríjin luágun Jesúsu, le ídaangiñebei liábin wafíñen, le gíñe abuíduragüdübalin wafíñen le gumúti. Súfuriti Jesúsu luágu gurúwa, mebésesenga ligía láu nibúsigarídüna lan luwúyeri ouweni ligía, lugúndun subúdi láni luágu lásun lánme lasúfurirun, lagúndaaruba lan, ába lañúurun lueígiñe loúnwenren Búngiu.

³ Lídan le jóuchawagúniwa, samína jumá lubeíti luágu láni Jesúsu jémpulu, luágu lawánduni sarágu súfuri jámagiñe gafígountiña, ligía mabúchadalá lubeí juágu, máburujan ligíame jarúna. ⁴ Machúlügüdün lúmoun ouweni lídan jageíndagun lúma figoú quei ligía. ⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tídan Lerérún.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi,

máburujan ligíame barúna dan le ladeínjan bun.

⁶ Lugúndun arúfudajati Búngiu joun ja jínsiñebaña lun,

beílumutiña gíñe ja lerésibirubaña queísi lirájüñü.

⁷ Áfaga jumeí abeichúni lúmagiñe Búngiu, lugúndun louseruñadün queísi lirájüñü. ¿Níjein funági isáani

mabeíchun lumúti lúguchi? ⁸ Ánjaün mabeíchun lan Búngiu, queísi labeíchuniña sun lisáanigu, mámarügü jíña lisáanigu ja tímatimaatiña, bástadi jugúya. ⁹ Dán meja le ñúbürigidiwa, beíjamutiwa meja wagúbürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan. ¹⁰ Jabeíchuniwa meja wagúbürigu ya ubouágu lúnügü murúsun ibágari le, lun jagúriajaniwa buídu según jabáfu, ánjeinti Búngiu, lun waságarun buíti lídaangiñe labeichuniwa, labeíchawa lun ladúgüniwa lun buídu wamá ítara quei buídu lan. ¹¹ Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, ibíjatiña ában ibágari lánina ísuruni lúma darángilaü lídaangiñe abeichúni ligía, lárigiñe.

Mamájara wamá lun Búngiu

¹² Rújuma lubeíti iséri érei lun jarúna le bucháalibei uágu lárigi asúfuriruni, lúma lún buri jigáchürügü le débíliljalibei, ¹³ áluaja jumeí úma le surúbei. Mígira jumá lébuna chugéguau lídan úma lueí jeíguadun ja débiligíñabaña lídan jafíñen, íderaguarügü jumáña lun jóudin jabáruaguouñ lídan jafíñen.

¹⁴ Jóucha jumá lun lídan jumá darángilaü jáma sun gürígia, abágarideina ában ibágari le jarúmati, lugúndun le wíyebeli igáburu, siñábei lachúlürün lúmoun Búngiu. ¹⁵ Tounigi jumá lueí níjein lan ában jídaangiñe meíbugunti buídu lúma Búngiu, ábame leféridiragüdüni jafíñen jíbiri queísi ladúgüni jíduru gífiti le abíñaragubalin sun le agúurubei luágu. ¹⁶ Úa la ni ában jídaangiñe agámariduti mamárieidunga, míchugun ligíame mebéseni luágu cátei le lánina Búngiu. Ligía cátei le meja ladúgübei Esaú, ába láluguruni lirícha queísi íbugañaü luágu ában asíedu eígin. ¹⁷ Subúsiti jun luágu lárigiñe lán buga ladúgüni, buséngili yebe lerésibiruni labínirun lúguchi queísi íbugañaü, mabíjin láali, siñáali lasáansiraguni lúguchi le adúga lálalibei láu sun layájuañ Esaú láu igárigu.

¹⁸ Jugúya, mayárafaduntün lun cátei le gayáraabei jasándiruni queísi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wúbü le Sión, le durúngubei láu wátu geméti, le ñí lubei níjein lán meja lubúriga lúma luríbouga, ¹⁹ magáambun jumúti gíñe lamúri fídu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun. ²⁰ Jadúgünbalin líra lugúndun luweírin janúfude lueí lagúmadíjan Búngiu, ladúga laríñajare. “Le íchuguti lugúdi luágu wúbü, afarúalá jilágubei láu dúbü o táu lan ában efeín, íbini ában lan anímaalu”, ladúga fulásu ligía, níjein Búngiu ñi.

²¹ Weíruti lanúfunejabu cátei le jaríjubei, darí lun laríñagan Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, ñúbinjadün lun cátei weíruti sügü láu le únbei jayábin já buga lábugiñebaña binádu darádu. Yaráfaadün lun wúbü Sión le siélubei, lílanaadün lubúrugute Búngiu le wín-

wanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweíriguni lun Búngiu. ²³ Lídaañadün jadámurin lirájüñü Búngiu ja búruwañubaña íri siélu. Lun Búngiu le agúseragüdübalíña sun gürígia jayárafada, lídaañadün ában jáma ja ouwegubaña ja buídubaña igáburu ubouágu, áni buíngüda lumúti Búngiu lubuídun jagáburu siélu. ²⁴ Núbínjadün lun Jesúsú, le búyei lun iséri darádu, bajíwaguadün láu líta Jesúsú lun lachibúniwa jífígoun, le ábanbei cátei weírítimaati sügü láu le labúseerubei líta Abél—lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubeí jagáambuni Búngiu. Meséfujaña ligía meja Israelítagu ja mebésenbaña láu Búngiu, dán buri meja lerérunbei joun lídaangiñe Moisés, le ábanbei lílana ubou, gúbume siñá lan weséfurun ánjein wíchiga wanágun luágun Búngiu lídan le ladímurejan woun lídaangiñe Liraú, le lílana siélu.

²⁶ Jíngígüda lumúti meja lumálali Búngiu ubou lídan dan ligíra, ánjeinti guetó laríñajare. “Nán-jíngichagüdübeiya mámarügü ubou, ásta gíñe siélu.” ²⁷ Dan le laríñagun “nánjíngichagüdübeiya”, míni lan luágu lagídarúba lán buri cátei le márügüdüñbei luágu ébuu derébuguti, ábame leréderun le siñábei lán-jíngichúniwa. ²⁸ Arúejani le líchugubei Búngiu woun siñáti lánjíngichún. Rúwama lubeíti etéingiruni lun Búngiu luágu líra, judúgua wamá lun láu inébesi lúma gúnfuli queísi labúseerun, ²⁹ lugúndun lagúmuchaguagüdübei Wabúngiute sun cátei le mabuidunti queísi lagúmuchaguagüdüñ wátu geméti cátei.

Ída lúba lan wagúndaaragüdüni Búngiu

13 Jínsiñegua méme jumá júmagua queísi idújeñu lueígiñe Jesucrístu. ² Mabúlieida jumeí lun jebélaagüdüniña achúlürütiña júbiñoun láu ugúndani. Sarágu jáña gürígia, rújaña ubáraü joun ánjeligu láu jadúgüni cátei le, íbídiñoun joun.

³ Jarítagua jumá jawágu adaürútiña, queísigubeirügü jamúga gíñe jadaürúña lan jáma. Jarítagua jumá jawágu ja ouserúabaña wuríba, quei níjein lan gíñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmagua jumá darí lun jóunwen. Ja asáansijatiña jámari lagúseragüdübaña Búngiu, lagúseragüdübaña gíñe ja adúgübaña salúfuri.

⁵ Míchiga jumeí jínsiñejabu luágun seínsu, gúnda jumá láu le júmati, lugúndun líchugubei Búngiu le jemégeirubei jun. Aríñagaali. “Natoúnigirubadibu, mígirun nábume.” ⁶ Gayáraati lubeíti waríñagun láu afíñeni.

Nabúreme Búngiu íderagubalina, manúfudebadina. Siñáti jadúgün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu láni Búngiu jun, samína jumá luágu buíti le ñúbinjalibei lídaangiñe jabágari, falájumei jémpulu le láni jafíñen.

⁸ Masáansiragunti ligáburu Jesucristu, ligía meme gúñaarü, ugúñe, lúma súnwandan. ⁹ Mafálara jumá arúfudajani le ámuñegueinarügüti lueí le larúfudajabei Jesús. Resíbitá wawáni érei lúmagiñe línsiñe-jabu Búngiu, siñáti terésibirun wawáni ni cáta lúmagiñe lúrudu buri luáguti eíini. Igáburu ligía, miábinti lun ladúgüba lan buíti joun ja afálarubalin.

¹⁰ Wagía afíñetiña luágu Crístu, ibíjatiwa gíñe ában latárü, le gurúwabei le uágubei louwe Crístu luágu wafígoun. Ja asígirubaña láu binádu jagáburu juríu, siñáti gafánran jamá lídan le líchugubei loúnwen Crístu. ¹¹ Jafádirin juríu le íñutimaabei belúgüda lumúti játa anímaalú lídoun Fulásu Sándutimaati quei adágaragüdüni luágu figoú, jágubu anímaalugu jagía, boúgudi lueí ubúrugu lágudúa. ¹² Ítara líña gíñe jiláti Jesús boúgudi lueí ubúrugu lun lachíbuni wafígoun láu líta guáñarügü. ¹³ Queímoun lubeíti lun Jesús, asúfurireína únabuni luágu líri queísi lasúfurirun wawágu. ¹⁴ Lídan uboú le, úati ni ában fulásu wáma le adúruruti lun sun dan, wáluajañein ubúrugu le lúnbei ñíjinbadiwa lan lárigiñe ibágari le. ¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucristu le wafádiriñebei. Eteíngiruni ligía, ligía luwúyeribei adágaragüdüni le labúseerúbei Búngiu wámagiñe. ¡Rúwama lubeíti uweírighuni lun láu wayúma! ¹⁶ Mabúlieida jumá jadúgüni le buídubei, lúma lun jafánreinruni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúni-girubarun juwáni, áni quei jasúbudiruni, gásu

jagúserun ligíbugiñe Búngiu luágu jatoúnigirunün. Joúcha jumá lun medéreragüdüni jumáni jawádigimari, lugúndun mabuídunbei jamúga gíñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan warítagnun quei busén wabeí buídu lan woúserun lídan sun cátei.

¹⁹ Amúriajatina júma lun jayúmuragnun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugaü

²⁰ Ayúmuraguatina lun Búngiu, le íchugubalin darángilaü, le gíñe ásaraagüdübalin Wabúreme Jesucristu lídaangiñe oúweni, lun líchuguni sun ubáfu le busénwabei jun, lun jadúgüni lugúndan. Wabúreme Jesucristu ában le atoúnigiruti lumútuniña buídu queísi ában atoúnigiruti mudún. Ítara líña ladúga líta, le achoúrurubalin lídaradun Búngiu, le adúrurubei lun sun dan, wáma. ²¹ Ayúmuraguatina gíñe lun Búngiu lun luwádigimaridun jídan, lídaangiñe Jesucristu, lun gayáraabei lan jíchugun ugúndani lun. ¡Uweírighuni lun Crístu lun sun dan! Ítaralá.

²² Nidújeñu, ayúmuraguatina jun lun jerésibiruni dimúrei le abúrüja náalibei jun tídan murúsun gárada to. ²³ Niján ában ugánu jun— ¡furíjali wadúje Timotéo furísunrugugiñe! Ánjein ñúbin yájoun, nanúgübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lídan wafíñen. Mábuga jáña wadújeñu ja Itálianu jun.

²⁵ Binílaün Búngiu sun jugúya, ítaralá.

SANTIAGO

Labúrŭjan Santiágo joun tílana ligílisi buri ja chagágubaña

1 Áu Santiágo, esériwiduti lun Búngiu lúma lun Wabúreme Jesucrístu áu, mábuga níña joun ja jadúgawagubaña dúusu lirájüñü Israél ja chagágubaña lídan sun uboú.

Subúdi le ñúbinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü oúchawagúni. ³ Subúdi jumáali luágu dan lan le loúchawagún jafíñen, furéndeitimaatün gagúraasuni. ⁴ Ítara líña lubeíti, maríbadalá jarítangun lueígiñe jóuchawagún, lubáragiñe líra, ígira jumeí oúchawagúni ligía lun líchugun lánwoun jugúraasun, lun loústarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadúga lídan ában lénreengunga, amúria ja jumá lúma Búngiu, ábame lasúbudiragüdüni jun cába lan jadúga. Rúlumuti Búngiu subúdi le jamúria ja lánigu lúma joun, quei jamúria ja, maríñagunga ni cáta joun luágu. ⁶ Lúnti jamúria ja láu afíñeni luágu líchugubei lan Búngiu le jemégeirubei jun, máma láu liloúguan afíñeni, le loúgua taffíñen, ítara líña quei ában lugúdi barána le lanúgübei garábali lueígiñe ában oúbaü lun luágun ámu. ⁷ Gürígia le medéraaguagüdünti lafíñen, marítagalá luágu libíjuba lan ni cáta lúmagiñe Wabúreme. ⁸ Lugúndun gürígia le afíñe líñabei, maffíñen, siñáti lasígirun ában igáburi le derégüdaguati luágu ni cáta.

⁹ Idújei le gudémebei, majírudalá luágu, gúndaalá luágu irísini le siélubei lubá. ¹⁰ Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lirísini lun ni cáta lídan cátei le lánina siélu. Lugúndun ítara líña rísiti quei lufúlurin jídurun, le siñábei ladúrurun. ¹¹ Dan le láfuridun wéyu, ába lásüdün sarágu, ába lásäürün jídurun, ába leíguadun lufúlurin, ába lagúmunchun lubuídunmeraü. Ítara lúba gíñe rísiti. lachúlürüba wéyu lun loúnwen, ábame lígiruni sun láfaagun luágu seínsu.

Oúchawagúni lúma adúndeijoúni lun wuríbani

¹² Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libíjubei ibágari magúmchaditi le uágubei laríñaga Búngiu luágu líchugubei lan joun ja jínsiñejabúbaña lun, queísi ában afáyeiruajaü, queísi ában rídi. ¹³ Dan le lebélorun lun ában gürígia lun ladúgün cátei wuríbati, marítagalá luágu Búngiu lan ádarubalin cátei

ligía lídoun, lugúndun mebéluti lídoun Búngiu lun ladúgün wuríbani, máda lumúti gíñe jádoun gürígia lun jadúgüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladúgün le wuríbabei. ¹⁵ Lídaangiñe buri luríban ayúmajani le, liábin figoú, ában ibágari lánina figoú barúti oúweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugúbei woun, le úabei mégeiti luágu, lúmagiñe Búngiu le adúgübalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei. ¹⁸ Ligía lugúndaabei lun ladúgüniwa lirájüñüme láu wafíñerun luágu lerérun le inárünibei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladúgübei.

Ligáburi agúnfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰ lugúndun gürígia le gáñibei, madúgün lumúti le áubei lagúndaara Búngiu. ²¹ Ígira jumeí lubeíti sun iwíyeni lúma luríban igáburi le jídaangilibei, resíbi jumeí ugánu le bunáwaalibei tídan janígi láu únabuni, lugúndun gabáfuti ugánu ligía lun lasálbarunun juwáni.

²² Adúga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágu buídurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügübalin, madúgün lumúti le lubeíbei, ítara líña quei ában gürígia le arítagubei lúngua tídan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti gürígia le jéchubei atúria jei Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adúga lumúti le laríñagubei Lerérun Búngiu áni gúndaati le tímatimaati.

²⁶ Gürígia le jarítagubei luágu gúnfuli lan lúma Búngiu áni siñá lumutu liñéñe erédera, leyéedaguña lúngua áni úati ju lan ligáburi lagúnfulirun lun ni cáta. ²⁷ Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magúbürigujaaña jáma wúríña ja jílaaña úmari lídan jadíjeri, lúma lun

madáseirun wamá láu buri cátei wuríbati le láni uboú le.

Lúnti ában lan láu janügún sun gürígia

2 Nidújeñu, queísi jugúya lan gürígia ja affínebaña luágu Wabúreme Jesucrístu le weírigubei, moún lumuti ámu lan janügún ában gürígia jaweí jíbiri.

² Queí buri jamúga, lun jamúga lebélurun ában wügúri lídoun jadámurin láu bágü gólu túma anáanguni fínutu, belú ligía gíñe ában gudémeti táu anáanguni juchécheeru, ³ ánjaün eténira lun le fínubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amúrü, reídeibá rára, o ñurúba ya múarugu”, ⁴ janügüña ában gürígia ámu lueí le ában, áni jagúseragüdüña láu luríban arítagni.

⁵ Nidújeñu jínsiñetiña nun, agáamba jumeí cátei le. anúdaja láaña Búngiu ja gudémebaña lídan uboú le lun rísi jamá lídan jafíñen, lun gíñe jerésibiruni arúejani le uágubei laríñaga Búngiu joun ja jínsiñejabúbaña lun luágu líchugubei lan joun queísi jalágaante. ⁶ Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei jóuserunün, áni barújamaün adúruujeina ligíbugiñoun lúrudu? ⁷ ¿Máma jagía adímurejabaña wuríba luágu líri Crístu, le inébebei jun, le únbei jedéregeraqua júngua?

⁸ Ánjein inárüni lubeí luágu gúnfuli jumáni líñun-ágei lúrudu queísi taríñaguni Lerérun Búngiu. “Jínsiñelá gürígia bíledi bun quei bínsiñegua búngua”, buíti jadúga. ⁹ Ánjein máma lubeí ában láu janügüniña sun gürígia, jadügüña figoú, dúrúgua jumúti lílúrudun Búngiu.

¹⁰ Lugúndun ánjein agúnfulira ában gürígia láu sun lúrudu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúrudu. ¹¹ Lugúndun Búngiu méme le aríñagubei. “Madúgabá salúfuri”, aríñagati giñe. “Máfarajabá.” Ánjein lubeíti madúgün gürígia salúfuri, áni áfarajati, mídinti láu le lubeíbei lúrudu. ¹² Jugúya, lúnti jadímurejan, agáburida jugúyame queísi lúntiña jagúserawagüdüñ láu lúrudu le furáangugüdbaliwa lueí lubáfu figoú. ¹³ Ja magúdemejabubaña joun ámu, magúdemejabubei gíñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáani agúseruni.

Affíneni lúma wadágimanu

¹⁴ Nidújeñu, ¿cásan ju lan laríñagun gürígia luágu affíne lan luágu Crístu ánjein madúgün ni cáta lun larúfuduni? ¿Gayáraati funági lasálbaruni affíneni ligía?

¹⁵ Quei jamúga guetó, níjein ában idújei wügúri o wúri emégeiruti anáanguni lúma eíginí, ¹⁶ laríñaga ában jídaangiñe lun. “Buídulá lídin bun, darúguabá boúgua, jou amúrúme,” áni míchu lumúti le lemégeirubei lun, ¿cági ju lan líra? ¹⁷ Ítara líña lasúseredun lúma affíneni. ánjein marúfudun jamá gürígia láu cátei le jadügübei, affíneni lábuguarügü, ítara líña quei ában cátei jiláali.

¹⁸ Fágua níjeinbei aríñaguti. “Amúrü affíñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti bafíñen nun boúgudin lueí buíti le badügübei, narúfudeime nafíñen bun láu buíti le nadügübei.” ¹⁹ Affíñetibu luágu ában rügüñein lan Búngiu, buíti badúga, affíñetiña gíñe máfianu luágu líra, adádagara jagía láu anúfudei lueí. ²⁰ ¿Májatibu bafíñerun, ibídiougua táu amúrü le, luágu jiláñu líña lan lafíñen gürígia ánjein marúfudun lan láu le ladügübei? ²¹ Resíbi lumúti Búngiu Abrahám, le binádu wáguchi, queísi richáguati ligíbugiñe luágu le ladügübei dan le lánjarun lún yebe láfaruni Isáac le líraü jilágubei queísi adágaragüdüni lun Búngiu. ²² Aríja báali luágu arúfuda lání Abrahám lafíñen láu cátei le ladügübei, áni ñúbinti lafíñen lun dayárubei lan láu cátei le ladügübei. ²³ Ítara líña lagúnfulirun le bürúwañubei tídan Lerérun Búngiu. “Affíñeti Abrahám lagú Búngiu, áni luágu lafíñen, ába lerésibiruni Búngiu queísi wügúri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáali lubeíti, luágu resíbi lání gíñe Búngiu wügúri luágu buíti le ladügübei, úara lúma lafíñen, áni mámarügü luágu lafíñen. ²⁵ Ligía méme meja asúsere-dubei tun Raháb, to jóru lídan dan le sügújalíbei. resíbi lumútu Búngiu queísi richáguatu ligíbugiñe dán meja le tarúfuduni tafíñen luágu láu cátei le tadügübei—safá tumútiña loúnagülegu Josué, ába tíderaguniña lun jagíribudun lídaangiñe ámu úma. ²⁶ Ítara quei jiláñu líña lan úgubu ánjein úa tubeí uwáni lídan, jiláñu líña gíñe jafíñen ánjein marúfudun jumá láu cátei buíti le jadügübei.

Lúnti wabúgurunun wañéñe wayúmulugu

3 Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáali luágu wagía lan le arúfudajabei, derégüdatimaabei lan wagúserawagüdüñ. ² Sun wagía adúgatiwa cátei charáti, ánjein níjein lubeí ában gürígia madúgünti ni murúsun charáti lídan le laríñagubei, ában wügúri buíti le gumúti ligía, le gíñe gayáraabei labúguruni sun lúgubu. ³ Dan le wagúrüni jayúma anímaalugu lun jagáambuniwa, gayáraati wabúguruni sun jágubu. ⁴ Aríja jumoún buri gíñe ugúnein, láu sún buri weínamu tan áni jéburiti garábali le ádajabarun, abúgura lumútu abúguruti láu ában liraúraü simúnu le ñíjin lumúti labúseera. ⁵ Ítara líña gíñe lasúseredun lúma wayúma, ában cátei ñúraúraüti, áni gayáraati ladügün sarágu buri cátei weínamuti. ¿Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati wadügün sarágu wuríbani láu, gayáraati lagádeiruni sun le wagíabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügúri jagáñi sun jawúy-eri anímaalugu gáñitiña—dunúru, jéwe, jáma anímaalugu baránajana—áni adúga láali. ⁸ Uati ni ában lun gayára lan lagídaruni ligáñi wayúma. Ában wurí-

bati ligía le mígiraguagüdünbei lúngua, áni buin líña láu peisini le gáfarajati. ⁹ Láu méme wayúma wadí-mureja buíti luágu Wáguchi Búngiu, láu gíñe wíñaraguaña gürígia ja ladúga Búngiu lenége. ¹⁰ Lí-daangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagiindun ában tídibu figi fáluma, ódi gayáraati tagiindun tídibu beíbei figi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibei

¹³ Ánjein níjein lubeí ában chu táu jídan, gunfaráanda ligía, arúfudaleí láu lubúidun loúserun, láu únabugubuni le líchugubei lisúbudin lun. ¹⁴ Ánjein níjein lubeí gimúgaü tídan janígi, áni jadúgüni cátei láu jarítangun juágun guánarügü, moún lumútiti janáangun júngua luágu jisúbudin, lugúndun iyéeni líra. ¹⁵ Máma niján luwúyeri subúdi le ñúbinbei lúmagiñe Búngiu, ában subúdi le lánina uboú líra, le lánina jasáminan gürígia, le láni méme Máfia. ¹⁶ Lugúndun le ñí lumuti gimúgaü lúma marítawaguni jawágun ámu, níjein chagáguau ñi lúma sun luwúyeri wuríbani. ¹⁷ Ánjaña ja gámabalin subúdi le lúmagiñebei Búngiu, furúmiñe níjein ában ibágari jarúmati jawágu, gálumatiña, areídatiña, gagáambaditiña, gudémejabutiña, adúga jamúti le buídubei, ában lábu janúgüniña sun gürígia, furángutiña. ¹⁸ Ja áluajabalin darángilaü, bunáguatiña ílaü lun lalúbajouniwa ában ibágari le richáguati jádan, lúma jádan ámu.

Gamádaguaü lúma uboú

4 ¿Cá buri ueígiñe jabúseera jawúribujan, lúma jageíndagun? Ladúga buri lagúbüri ayúmajani le jídaanbei súnwandan. ² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni lúma Búngiu. ³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagúbüri jugúndan. ⁴ ¿Gürígia múaraantiña! ¿Ibídíñetisan jun luágu ánjein lan gamádagua jubeí lúma uboú, jáganiñein lan Búngiu? ⁵ ¿Jarítaguatünsan luágu mála lan le taríñagubei Lerérun Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Taríñajare Lerérun Búngiu. “Rúlumuti Búngiu lanágan jawágun ja barúguabaña jóungua, áni íderagua lumútiña ja únabugubaña, láu lareíni.” ⁷ Rúgua jumá júngua lágugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸ Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu lúma lun

uboú, gafígounjadün, ítara líña lubeíti, jarúmagüda jumeí jigáburi túma gíñe janígi. ⁹ Lídan le jayárafadun lun Búngiu, aságüríja jumá luágu jifígoun láu águiraü. Gáritá janígi luágu luríban jigáburi lúma Búngiu, sáansigualá jugúndan lun íruni luágu jifígoun. ¹⁰ Ünabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbiriugu. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Crístu le aríñagubei luágu moun láni ladügüniwa, áni ladáriruña mégeiti luágu. Ánjein jadúga líra lubáragiñe jadúgüni le lubeíbei lúruudu, jíchaaguña júngua queísi agúseragüdüti. ¹² Ában rügüñein agúseragüdüti, le íchugubalin lúruudu ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadíbugi lun badárirun lidúnrun ámu?

Machoúrurunwalá luágu jarúga

¹³ Guetó, agáamba jumeí cátei le, jugúya le aríñagubei. “Ugúñe o jarúga wóudíba lídan ítaga fulá-su, ábame webélujan ñi ában irúmu, wawádigimaribei waseínsun lun wabíjin lánwoun.” ¹⁴ ¿Ída liñásan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméereedu le asáliragubei luágu murúsun dan, lárigiñe ába lagúmuchagun. ¹⁵ Aríñagarügütün jamúga. “Ánjein busén Búngiu, wabágariduba, ábame wadúgüni le o líra.” ¹⁶ Ánjeinti jugúya, jadímurejan láu pántaü luágu cátei le jarítagubei lun jadúgüni, áni sun pántaü le, mabuídunti. ¹⁷ Afíñetina luágu ánja jumá lun sun le, wel, le subúdi-jabubei lun ladúgün buíti áni madúgün lumúti, ladúgüña figoú.

Ewéridijani joun rísitiña

5 ¿Agáamba jumeí cátei le, jugúya rísitiña le wuríbabei igáburi! Chülújali óra lun jayájuaan, wágu jugúyame luágu buri lamíselu le lúnbei jasúfuriruni. ² Ñaláli buri jírísín, jou jamáaru jamútiri janáangun to fínuboun. ³ Gájüjali jigólun lúma jáni plá-ta, áni láu cátei méme le, arijúati jarúgüren, ábame jagúnrinchawagún lueígiñe camá jamuga láu wátu geméti. Oúndaraguaadün sarágu írísini lídoun buri lagúmujoún dan le. ⁴ ¿Ánti fáyeiti le míchu jubeí joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba lálali Búngiu jamúriajan ñadágimeintiña jagía juágu. ⁵ Rúguaadün júngua lun ában ibágari lánina wéndeí lúma ugúndani ya uboúagu, ibíja jumáali sun le jabúseerúbei quei jadíbunedagüdúniwa anímaalu lubá jáfarun, yaráfaali gíñe jagúnrinchawagún sun jugúya. ⁶ Rújadün jadúnrun ja madúnrunbaña, áfaragua jumáña jilágubei, madúgünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesúsu. Ábunaguti le agúrabubei ladúgün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸ Gagúraasun jumá gíñe, máburujan ligíame jarúna, lugúndun madíseeli liábin Wabúreme. ⁹ Nidújeñu, mequéjera jumá jawágu jidújeñu lueígiñe Jesucrístu, magúserawagüdüñ jumámuga, yaráfaali lidáni Búngiu lun lagúseragüdüñ.

¹⁰ Nidújeñu, barú jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹ Wagía, barú wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáli gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Lougiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachóururuni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu. ¹⁴ Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵ Dánmeti le jayúmuragun láu afíñeni, ábame lareídagun sánditi, áni ánjein gíñe afígounjaali lubeí, ferúdunawabei lifígoun. ¹⁶ Ligía, gúfese jumeí lubeí jifígoun joun jidújeñu lueígiñe Jesucrístu, áni ayúmuragua jugúyame jawágu lun jareídagun. Weíríti lubáfu ayúmuraguni lun Búngiu le ladúgübei gürígia le buíti táu sun lanígi. ¹⁷ Proféta Elías ában meja wügúri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga úrúwa-irúmu-dimí. ¹⁸ Lárigiñe, dányá le layúmuragun, ábaya lájuyun júya, ábaya tájüchün sun inádirigu ubouágu.

¹⁹ Nidújeñu, ánjein egéyeda ában jídaangiñe lueí úma le richábei, liábin ámu lun lagíribudagüdüni, ²⁰ subúdi jumeí luágu furúmieguarügü lan agíribudagüdüti le afígounjabei lídaangiñe luríban lémeri, lasálbaruboun lan luwáni afígounjati ligía lueí tídin máfiougati, áni ferúdunagüdaleíme sarágu lifígoun gürígia lé yebe acháragadubei.

1 PEDRO

Labúrjan Pédro joun affiñetiña ja chagágubaña boúgudi lueí jageíra

1 Áu Pédro, ában lání Jesucristu apóstolu áu, nabúrjañoun gárada to jun, jugúya lánigu Búngiu ja chagágubaña boúgudi lueí jageíra loúbawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachúlürüba lan ában wéyu lun ítara lúba lan, ladúga ligía lan lugúndaanbei. Ligía larúmadagüdañajañoun lubeí Sífiri Sándu janígi láu líta Jesucristu, adúgalaún lun gagáambadi jumá. Ibíja jumá lubeíti sarágu abíniruni lúma darángilaü lúmagiñe Búngiu.

Loúchawagúba jafíñen, ábame liábin buíti lídaangiñe

³ Rúwama uweíriguni lun Búngiu, le Lúguchibeí Wabúreme Jesucristu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe ouweni lúnya labágaridun. ⁴ Queísi lirájüñü wabeí, gayáraati weménigidun le gumúti luágu wabíjubei lan ubuíduni le aráanse láalibeí wabá, gayáraati weménigidun luágu werésibirubei lan alágan le areídañu lubeí Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféridiruni lubuídun. ⁵ Goúnigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina ubou le, le aráanseñu lubeí wabá lárigiñeme lagúmunchun ubou.

⁶ Ligía lébubei buin jíña lan láu ugúndani, láu sun lúnti lán funa jasúfurirun sarágu ouchawagúni luágu murúsun dan. ⁷ Lúnti jasúfuriruni ouchawagúni ladúga ítara líña lan jafíñen quei gólu—lúnti louchúniwa láu wátu geméti lun larijiniwa ca lan luwúyeribeí. Afíñeni le awánduti ouchawagúni ligía, buíti sügú láu gólu, lugúndun gagúmuchaditi gólu. Láu lubeíti jawánduni loúchawagún jafíñen, ladímurejaba Jesucristu buíti juágu dánme le lagíribudun ubouágun, jibíjuba gíñe uweíriguni lúma inébesi lúmagiñe.

⁸ Jínsiñeti Jesucristu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában ounwenbun ugúndani le siñá jumuti aríñaga láu dimúrei. ⁹ Ladúga méme luweírin jafíñen luágu Crístu, jerésibiruñein tasálbarun juwáni.

¹⁰ Lídan meja dan le sügújalibeí, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútija lání Crístu Espíritu joun wügúriña jagía le lúnbei lasúfuriruni Crístu lubáramegiwa, lúma uweíriguni le lúnbei liábin lárigiñe. Jagíati, ábaja jóuchun jasúbudiruni cátei lan gürígia ligía, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáani lagúnfulirúa buri cátei le, luágu lídaanba lan wadáani. Asálbaruni lé meja uágubei jadímureja, ligía méme le uágubei japúrichija gürígia jun lídoun buri dan le, láu lubáfu Sífiri Sándu le ñúbinbei siéluigiñe. Ásta ánjeligu, buséntiña jamúga gíñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubeí jerésibiruni jalágaante siélu, gidájumei samínaü málati jarítangunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucristu ubouágun. ¹⁴ Queísi isánigu gagáambaditiña, mabágarida jumá quei meja ligáburi jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Taríñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janúgüni Búngiu quei Júguchi, Búngiu le ábanbei lábu ligáburi lagúseragüdüni jagáburi sun gürígia, lúnti júaradun lúma láu ában goúnigi sun dan le lúnbei jabágariduni ya ubouágu. ¹⁸ Sálba láadün Búngiu lídaangiñe lagúburi ibágari lé meja jafúnrendeirubei jámagiñe binádu jagúbürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi buri gólu o pláta, ¹⁹ láu líta Crístu le gebégibeí sügú láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámu. ²⁰ Lúmagiñe lubáragiñe buga ladúgüni Búngiu ubou, ába laráanserun lun Crístuba lan Wasálbaragüle, luágu lubeíti wafúleisein lachúlaagua Crístu lídoun lagúmujoun dan le, lun lasálbaruniwa. ²¹ Lídaangiñe Crístu, ába jiyábin lun

jafíñerun luágu Búngiu le ásaaragüdübalin Crístu lí-daangiñe oúweni, ru ligía uweíriguni lun, ítara líña jiyábin lun jafíñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatimaati. Lúnti lubeíti jínsiñegua jumá júngua láu sun tarúman janígi, lúma láu sun jére, ²³ lugúndun iséri gürrígia jugúya. Mámaadün jasáanigu agúbürigu ja goúwedaditiña, lirájüñüjadün Búngiu láu jagáambuni lerérun le íchugubei ibágari, le gíñe adúrarupei lun sun dan. ²⁴ Taríñajare Lerérun Búngiu.

Ítara jáña sun gürrígia quei jíduru, liábin jaweírigun quei lufúlurin jíduru. Dan le lásaurün jíduru, ába láburujan lufúlurin, ²⁵ ánjein Lerérun Búngiu, duráti lun sun dan. Áni dimúrei le, ligía ugánu le lánina asálbaruni le uágubei laríñawagúa jun.

2 Ligía, queísi lirájüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igibu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítara lá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafíñen luágu Crístu. ³ Subúdiadün murúsun luáguti luweírin lubúidun loúseruniwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribe. Rútiña gürrígia mebéseni luágu, ánjeinti lun Búngiu, ítara líña Crístu quei ában dúbü le gebégiti sarágu, le lanúadirunbei lun ligíaba lan ébuu tun lílígilisin, áni sun ja afíñebaña luágu Crístu, jagía lílígilisinbaña Búngiu. ⁵ Ítara líña lubeíti, ígiraguagüda jumá júngua lun Crístu le rúlaalíbei ibágari magúmchaditi jun, lun tadügúniwa ában témpulu buítu lun Búngiu jidaangiñe, lun gíñe ítara jumá quei fádírigo ja derégeguaatiña jóungua lun Búngiu, ja íchugubalin cátei le áubei lagúndaara lun, lídaangiñe Jesucrístu.

⁶ Ligía gíñe taríñagunbei Lerérun Búngiu.

Noúnajañein Crístu lun ligíaba lan dúbü le weíriguti-maabei tuágu nilígilisin lídan fulásu le gíríbei Sión.

Áni ja afíñerutiña luágu, buídubei lídin joun.

⁷ Weíríti lebégi Crístu jun, jugúya le afíñebei luágu, ánjeinti joun ja mafíñebaña, mebégiti quei dúbü le únbei jamájara ábunagutiña. Láu sun líra, gúnfulijali le taríñagubei Lerérun Búngiu.

Dúbü le únbei jamájara ábunagutiña, ñúbinja lun ligíaba lan furúmiñeti lídan bunáguä.

⁸ Joun ja mafíñebaña luágu Crístu, gúnfuliti gíñe le aríñawagúbei.

Ában dúbü achúgeraguágülei ligía, le eíguadagüdüti gürrígia.

Ja madúgünbaña gásu láu ugánu lánina asálbaruni lí-daangiñe Crístu, chugéguatiña luágu, fériditiña gíñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le afíñebei luágu Crístu, ában familia anúadajoúatiña jugúya, fádírigo ja eseríwidutiña lun urúei le Búngiu, gürrígia lánigu Búngiu ja derégeguaaña jóungua lun. Ítara líña cátei le, lun jadímurejan luágu buri cátei buíti le ladúgübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigu-jadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jeseríwidun lun Búngiu

¹¹ Nidújeñu jínsiñetiña nun, jugúya queísi teréncha lídan uboú le, aganoútiña bougudi lueí jageíra, ayúmuraguátina jun lun mígiraguagüdü jumá júngua lun lagúburi buri ayúmajani le ageíndagubei túma juwáni. ¹² Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadúgübei, ábame jíchugun uweíriguni lun Búngiu dánme lachúlürün wéyu lun lagúseragüdü.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya uboúagu. Gúnfuli jumá lúma lugúmadin urúei, quei ligía lántima íñubei ufúlasun, ¹⁴ gúnfuli jumá gíñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúrudu, lúma lun jíchugun uweíriguni joun ja adúgübaña buíti. ¹⁵ Busénti Búngiu lun jadúgüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, oúsera jumá queísi gürrígia ja mámabaña idámuni lun ni ában gürrígia, máma lueígiñe líra lun jadúgüni le wuríbabei, lubáragiñe líra, abágarida jumá queísi lidámun Búngiu. ¹⁷ Inébe jamá sun gürrígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

¹⁸ Umúsuniña, inébe jamá jiyúbudirigu jun queísi lubúdubu, mámarügü ja buídubaña júma, ásta gíñe ja wuríbabaña. ¹⁹ Lugúndun labínirubei Búngiu gürrígia le awándubei asúfuriruni le mébunati láu larítagnun luágu Búngiu. ²⁰ Ánjaün adúga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadúgün cátei buíti, ába jawánduni láu gurásu, buíti líra ligíbugiñe Búngiu. ²¹ Lun luwúyeri igáburi le lagúara Búngiu juágu, quei sáfuri lubeí Crístu juágu láu gurásu, íchiga ában jémpulu jun lun jafálaruni. ²² Madúgünti Crístu ni ában figoú, meyéeragun ligía gürrígia ni ában weíyaasu. ²³ Dan le janábuni, moúnabunti láu anábajani, dan le jasúfuriragüdüni, masádirun lumútiña, lubáragiñe líra, derégeguarügüti lúngua lun Búngiu le agúseragüdübei lau ísuruni.

²⁴ Barú lumuti Cristu guánarügü wafígoun luóúgua luágu gurúwa lun weréderun quei jiláñu lun figou, lun wabágaridun ában ibágari le lánina isuruni. Buleísei-wati lun wareídagun. ²⁵ Ítara jíña meja quei mudún ja féridijaña, ánjein guetó, ñúbinjadün lun Cristu le oúni-girubalün quei si jouniri mudún, toúnigilóun juwáni.

Ligáburi jabágaridun maríeitiña

3 Ítara gíñe jugúya wúriña gámaritiña, derégegua jumá júngua joun júmarigu, lun ánjein lan mánjagiña lubeí lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni, ² láurügü jarjini lubuídun jouseruniña láu inébesi lúma larúman igáburi. ³ Mámalá láu buri cátei bouguditi jibíti jewéndeda, quei buri lanátime aouraguni, argeilaü lúma buri bángüli le gólu, anáanguni wéndegutu, ⁴ tídaanlá janígi jewéndeda, le ábanbei ubuíduni le meféridi-rawadibei. Ában igáburi bímeti, darángila, ligía cátei gebégibei sarágu ligíbugiñe Búngiu. ⁵ Ítara líñá meja ligáburi jewéndedun wúriña já meja derégeguañaña jóungua lun Búngiu lídan meja dan le sügújalibei. Jeménigitiña meja luágu Búngiu, derégegua jagía jóungua joun jámarigu. ⁶ Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadúga le buídubei, manúfudeiga lueí ni cáta.

⁷ Jugúya gíñe wügúriña, áfaagua jumá lun gun-faráanda jumániña júmarigu. Rújumei jafúlasun joun, mámarügü lueígiñe mére tántima wúri, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adúga jumeí ítara, úa lámuga ni cáta lun leréderunün lueí jayúmuragun lun Búngiu.

Ja asúfurirubaña lueígiñe jadúgüni le buídubei

⁸ Abágarida jumá sun jugúya lídan úarani lúma láu gudémejabu jídaangua, jínsiñegua jugúyame júngua quei si idújeñu lueígiñe Jesucrístu. Areída jumá, únabu ligíame janáangun júngua. ⁹ Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun taríñajare Lerérun Búngiu.

¹⁰ Le busénti labágaridun ában ibágari buíti, lúma gíñe ában ibágari lánina ugúndani, lúnti loúnigiruni liyúma lueí ladímurejan wuríbani, maríñagun ligíame iyéeni.

¹¹ Lúnti ladísedun lueí wuríbani lun ladúgüni buíti, lálujani darángilaü lun labágariduni súnwandan.

¹² Lúnti ítara lan ligáburi, ladúga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adúgübaña wuríbati, magúndaati Búngiu jáu.

¹³ ¿Cábagi gayára ladúgün wuríbati jun, ánjaün íchaagua júngua lun jadúgüni buíti súnwandan? ¹⁴ Áni íbini jasúfurirun ladúga lísurun jibágari, gúnda jumá ladúga fuleíseiwa jumá lídan le jasúfurirun luágu Crístu. Manúfude jumá lueí ni ában, madíjeri ligíame jarítagun. ¹⁵ Derégegüarügü jumá júngua le gumúti lun Crístu quei Jabúreme, aráanseñu jumá súnwandan lun jóunabuniña ja álügüdütün ca lan ueígiñe jeménigida luágu Crístu, láu maweíruguni lúma láu inébesi. ¹⁶ Buídulá jouserun, darángilañu támuga janígi, lun ja lan adímurejabaña wuríba luágu lubuídun jigáburi quei si afíñetiña luágu Crístu, nibúsigari jamámuga luágu jerérun guánarügü. ¹⁷ Buítimaati lun jasúfurirun lueígiñe jadúgün buíti, ánjein ítara líña lubeí labúseeruni Búngiu, sügú láu lun jasúfurirun lueígiñe jadúgün wuríbati.

¹⁸ Jarítagua jumá luágu luweírín lasúfurirun Crístu dán meja le loúnwenbei luágu wafígoun ában weiyaa-sun lun sun dan. Buíti meja Crístu, ába lasúfurirun wawágu, wagía le wuríbabei, lun lanúgüniwa lun Búngiu. Áfarúati jilágubei, wínwantu láni Espíritu.

¹⁹ Quei Espíritu, ñúdünti gíñe apúrichija joun espíritugu ja lídaanbaña jafúlasun jiláaña. ²⁰ Espíritugu jagía, gürígia ja wínwambaña lídan meja lidáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírín lugúraa-sun joun lídan le lagúrabajani tagúmuchún árca to ladúgüboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírín gún-ran ligía. ²¹ Dúna ligía, ítara líña quei lidúnarina badísei guetó, le ídaangiñebei wanúgúwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe oúweni lúnya labágaridun. ²² Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

Wesériwidun láu ubáfu le líchugubei Crístu woun

4 Ligía, ítara quei sáfuri lubeí Crístu ya ubóúagu wawágu, lúnti gíñe aráanseñu wamá lun wasúfurirun láu gurásu luágu. ² Le sáfurijalibei luágu Crístu, ígira láali figou lun labágariduni líbiri libágari quei si lugúndan Búngiu, máma lun líchugun ugúndani lun lagúbüri ayúmajani. ³ Lídan meja dan le sügújalibei, adúga jumúti meja luríban buri cátei le jínsiñebei joun ja ibídiñejabubaña lun Búngiu, jaganoúña meja lídan ibágari nibúsigarídünati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladúgüni-wa. Buídurügaali dan le abágarida jumáalibei ítara.

⁴ Guetó, weíriri janígi já meja jumádagubaña láu mafála jumáaña lan lídan lagúbüri ibágari le, ligía jadímurejanbei wuríba juágu. ⁵ Ánjeinti jagía, jagúfeseruba ligíbugiñe Búngiu, le aráanseñubei lun lagúser-agúdüniña wínwangiña jáma jiláguaaña, madíse.

⁶ Ligía apúrichijoúa lubeí meja luáguti asálbaruni joun

ja jiláguañábaña guetó, lun gayáraabei lan gabágaritan jawáni láu libágarin Búngiu, láu sun jilá lan jágubuei lasúseredun joun sun gürígia.

⁷Yaráfaali lagúmochun ubou, ligía lúnti lubei aráanseñu jumá, ragúgua jugúyame júngua, derégegua jugúyame júngua lun ayúmuraguni lun Búngiu. ⁸Lougiñe sun cátei, níjeinlá sarágu ínsiñeni jídan joun jíbiri, lugúndun ánjaün jínsiñejabu, ferúduna jubei jafígoun ámu juágu, láu sun gíbe lan. ⁹Resíbi jumáña gürígia júbiñe láu sun jugúndan. ¹⁰Rújali Búngiu ában ubáfu lun ságü afíñeti luágu Crístu, ítara líña lubeíti, seríwi jumá joun jíbiri luágu ubáfu le rúlaalíbei Búngiu jun, queísi oúniri buítiña lánina ubáfu buri le líchugubei Búngiu. ¹¹Le gabáfubei lun lapúrichijan, lúnti ladúgüni queísi ában le adímurejati dimúrei lúmagiñe Búngiu. Le esériwiduti, adúgalei láu sun érei le líchugubei Búngiu lun. Sun cátei le jadúgübei, adúga jumei lídan ában igáburin le lúnti líchugúniwa uweírigin lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweírigin lun sun dan. Ítaralá.

Wasúfurirun queísi lánigu Crístu

¹²Nidújeñu jínsiñetiña nun, maweíridalá janígi láu buri lidíjeri ouchawagúni le jibíjubei, camá jamuga ába cátei ámuti asúseredubei jun. ¹³Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu ubouágoun láu sun luweírigin.

¹⁴Fuleiseiwatün ánjaün anabúa lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weírigubei, jídan. ¹⁵Ánjein asúfurira ában jídaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúrudu, ni lueígiñe leméterun lídoun cátei le miábinti lun, mídin. ¹⁶Ánjeinti asúfurira mútu lueígiñe lánigu lan Crístu, mouñ lumuti lanúgün busíganu, lúnti líchugun eteingiruni lun Búngiu luágu lánigu lan Crístu.

¹⁷Chúlújali dan lun lagúmeserun luweírín asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubei asúfuriruni ítara wámagiñe, weírítimaabei jasúfurirun ja mánjabaña jerésibiruni lerérin Búngiu. ¹⁸Ánjeinti jénreengu lubei jasábarun ja buídubaña, ¿cábagi asúsereda joun ja wuríbabaña, jáma ja gafígounbaña? ¹⁹Ja lubeíti asúfurirubaña queísi labúseeruni Búngiu, lúnti ítara méme jamá adúgei le buídubei, derége jamóunme jawáni lújaburugun Búngiu le adúgübalíña, lugúndun gayáraati weménigidun luágu Búngiu lun lagúnfulirun láu lerérin.

Lerérin Pédro joun afíñetiña

5 Níchuguñein nerérin jun, jugúya ja ábutigubaña lídan jadámurin afíñetiña, queísi ábuti lan gíñe áu quei jugúya, áni geféentina gíñe luágu lasúfurirun

Crístu, áni gabárabadina gíñe quei jugúya lídan uweírigin le lúnbei líabin. ²Touñigi jumáña lirájüñü Búngiu ja labugiñebaña jaríaajan queísi jóunigiruniña jóuniri mudún mudún. Adúga jumei láu ugúndani queísi labúseeruni Búngiu, máma ladúga jafósuruña lan, adúga jumei ladúga busén jumá jesériwidun lun Búngiu, máma ladúga línsiñegu seínsu. ³Mousera jumá camá jamuga jabúriña ja labugiñebaña jaríaajan jugúya, jóucharügü jumá lun ában jumá jémpulu buíti joun. ⁴Ítara lúba, dánmeti le líabin Jesucrístu, le jóuniri mudún le tímatimaati, jibíjuba ában uweírigin le weíriguti le ladúraruba lun sun dan, le mítaraanbei quei rídi le láuti ubánaü le gásaürati.

⁵Jugúya gürígia ñúbürigiña, rúgua jumá júngua lábun jagúmadin weíyaaña mútu. Lúnti jesériwidagun súngebui jóunigua láu manáanguni únguaü, lugúndun taríñajare Lerérin Búngiu.

Magúndaanti Búngiu jáu ja barúguabaña jóungua, áni íderagua lumútiña ja manáangunbaña jóungua, láu lareíni.

⁶Rúgua jumá lubeíti júngua únabu labugiñe lújabu Búngiu le gabáfubei, lun gayára lan líchuguni uweírigin jun dánme le lachúlürün dan ligía. ⁷Madíjeri jumá luágu ni cáta, ígira jumei sun cátei lun Búngiu, lugúndun laríjiña jáu le tímatimaati.

⁸Agáguduañu jumá, ragúguañu jumá júngua, lugúndun eibugañajádügü líña Máfia le jágani queísi líñün gáñiti áluaja cába lan lagúnrinchagua. ⁹Mígiraguagüda jumá júngua lun, derégüdagu jumá lídan jafíñen, subúdiñu jumei luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰Lárigiñeme súfurijadün lan luágu murúsun dan, ladúgübadün Búngiu lun úa lan mégeiti luágu lubúndun jigáburin, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírigin le magúmuchadibe, lídan ában lúma Jesucrístu. ¹¹Ligía le Súnti Gabáfu lun súnwandan. Ítaralá.

Lagúmujoún buri mábugaü

¹²Noúnajañoun tiraúraü gárada to jun lúma Silváno, le nanúgübei queísi ában idújei úaraguati, lun níchugun dúgüdaguaü lun jafíñen, geféen áme jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá luei línsiñejabu Búngiu ligía.

¹³Mábuga jáña afíñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü. ¹⁴Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

2 PEDRO

Labúrűjan Pédro joun affñetiña

1 Áu Simón Pédro, ában esériwiduti lun Jesucrístu áu, ában gíñe lání apóstolu. Nabúrűjañoun gáradan to jun, jugúya le ñűbinjalibei lun gafánran jumá lídan luweírín asálbaruni le wabíjubei lídaangiñe Wasálbaragűle Jesucrístu, le méme Wabúngiute, lugúndun úaragua lan. ² Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesús.

Igáburi le lúnbei jóuseruni affñetiña

³ Rúlaali Búngiu sun le wemegeirubei woun lun wabágaridun lúma lun wesériwidun lun, láu lasúbudiragűdüni Jesucrístu le agúarubei woun lun gafánran wamá lídan luweírigin lúma lubuidun cátei le ladúgűbei. ⁴ Gúñfuliti Búngiu láu lerérún, lídaangiñe Jesucrístu, láu líchuguni le buídutimaabei lúma le weírítimaabei woun. Láu líra, gabáfu wamá lun wanúrajan lueí lagűbüri ayúmajani lánina ubou le, ibíja wamámugei ligáburi Búngiu wádan. ⁵ Ligía lúnti lubei jáfaagun lun jíchugun lubuidun igáburi lánwoun jaffíñen, ⁶ subúdi luágu Búngiu lánwoun lubuidun jigáburi, ragűguaü únguaü lánwoun jisúbudin luágu Búngiu, gurásu lánwoun ragűguaü únguaü, edéregeraguni únguaü lun Búngiu lánwoun gurásu, ⁷ areíduni lánwoun edéregeraguni únguaü lun Búngiu, íñsiñejabuni lánwoun areíduni.

⁸ Ánjein níjein buri lubei igáburi líra jídan le tímati-maati, mámabei luágu ni cáta jisúbudin luágu Crístu, áni líchuguba jibágari sarágu cátei buíti lun Crístu. ⁹ Ánjeinti le mítaraanbei ligáburi, ítara líña queísi ában maríjinti o ában lan madíse taríjin, buléilá luágu chibáwaali lan binádu líffgoun. ¹⁰ Ligía lubeíti nidújeñu, quei wájali lubei Búngiu jun, anúadajalaún lun lánigu jumá, áfaagua jumá lun lájűchűn buri cátei le jídan, ánjein jadúga ítara, máburujabadűn lídoun féridi.

¹¹ Ítara lúba úa lan ni cáta ásiñeragűdüti jebélurun lídoun larúeijan Wabúreme Wasálbaragűle Jesucrístu, le magúmuchadibei.

¹² Ligía narítaguagűda mémebadűn lubei luágu, láu sun subúdi jumáali lan, áni jeibuguña lan lídan inárűni ligía. ¹³ Láu sun líra, sun wíñwangidina lan, affñetina luágu buídu lan lun nagúaruni jarítangun lun luwúyeri ibágari le lúnbei jabágariduni queísi lánigu Crístu.

¹⁴ Subúdigűda láali Wabúreme Jesucrístu nun luágu yaráfaali lan wéyu lun noúnwen, ¹⁵ ítara líña lubeíti,

nadúgűbei nuáraati lun íbini lánme lárigiñe jiláadina lan, lun súnwandan lan jarítangun luágu buri cátei le.

Já buri aríjubalin luweírigin Crístu

¹⁶ Arúfudajani le wíchugubei jun luágu lagíribudun Wabúreme Jesucrístu ubouágun láu sun luweírín lubáfu máma meja úraga, aríja wamúti meja luweírigin láu wágu. ¹⁷ Aríja wamúti dan le líchugunbei Búngiu Úguchili inébesei lúma uweírigin lun, ába laríñagun lumálali Búngiu lun lídaangiñe uweírigin lánina siélu. “Niraü le jíñsiñebei nun le, le áubei oúnwenbun lan nugúndan.” ¹⁸ Agáamba wamúti ladímurejan Búngiu ítara luágu Wabúreme Jesucrístu dán meja ñíñadiwa lan lúma Wabúreme luágu wűbü le biníwabei.

¹⁹ Níjein gíñe ában cátei choúrútimaati wáma luágu liábin Wasálbaragűle ubouágun—ligía ugánu le jabúrűjabei profétagu. Buíti jadúga lun jatúriajani jerérún wűgűriña jagía, ladúga líchuguba lan larúgounga tun janígi queísi ában lámpu le adúnraaguti lídan ában fulásu le búrigati. Lesériwiduba jerérún woun ítara daríme dan le lagíribudun Crístu ubouágun, le ítara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía. ²⁰ Lougiñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le búrű jamaalíbei profétagu láu lání lúngua. Busénwati lubáfu Sífiri Sándu lun gunfaráandawa lan, ²¹ lugúndun madímurejaantiña meja wűgűriña jagía láu jáni jóungua. Jagía, quei meja wűgűriña jabei derégeguaatiña jóungua lun Búngiu, dimúrei buri lúmagiñeti Búngiu jadímurejabei lugúndun Sífiri Sándu lan adúndejabaliña.

Ja arúfudajabaña iyéeni

2 Añájein meja yéetiña jádan warásan ja aríñagubaña luágu profétagu jamá, ítara lúba gíñe añájeinbaña lan jídan, jádaruba iyéeni lagánagua arúfudajani le inárűnibei lun lagádeiruni jaffíñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janúgűba agűnrichaguni furése joun guánarűgű. ² Gíbeebaña afálarutiña lídan liwíye jémeri, áni ladímurejóba wuríba luágu úma le inárűnibei jadúga. ³ Láu líñsiñe seínsu joun, jaságaruba seínsu juei láu jarúfudajan le málabei, le ñűbinbei lídaangiñerűgű jachűgű, choúruti luágu jagúseragűdűwaba lan luágu luríban jadúga, yaráfati

jeféridirun queísi laráanserúniwa jabá lúmagiñe binárü.

⁴ Úati ferúduna lániña Búngiu ánjeligu já meja aff-gounjabaña, ába lachágaraguniña máfiougatin, ába lí-giruniña adaürúwa lídan lubúriga ñi agúrabajei wéyu lánina lagúseragüdúniña. ⁵ Úati gíñe ferúduna lániña Búngiu mútu wuríbatiña já meja aganoúbaña uboúagu lídan lidáani Noé. Ába loúnajani gúnran jawágu gürígia jagía, Noé rügúñein le apúrichijabei joun gafígountiña lun jasáansiruni jagáburi, jámaya sédú gürígia lánwoun asálbara. ⁶ Darí lumuti gíñe meja jadúnrun gürígia ja aganoúbaña ubúrugu Sodóma lúma Gomorra. Ába láguduni fulásu buri ligía darí lun ladáagun balígime, lun larúfudajan joun gürígia wuríbatiña ja lúnbaña jayábin jarígiñe ca lan lafáyeijabei figoú. ⁷ Séfu lumúti meja Lot, ában meja wügúri buíti, le weírabei lidíjeri luágu liwíye jagáburi gürígia wuríbatiña lídan fulásu ligía. ⁸ Ságuja wéyu lasúfurirun wügúri buíti ligía tídan lanígi láu laríjini lúma lagáambuni cátei buri wuríbati le jadúgubei. ⁹ Sun le, ában jémpulu luágu ligáburi lasálbaruniña Búngiu ja deréguabaña jóungua lun lueí oúchwagúni, ígira láña ja wuríbabaña lábugiñe asúfuriruni lubá jasiadirúniwa lun sun dan lídaanme wéyu lánina agúserawagüdúni.

¹⁰ Lasúfuriragüdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagá-naguabaña, barúguatiña jóungua, mebéresentiña láu ni cáta, marúfudun jagía inébesi joun ja weírígubaña, anábarügü jamáña. ¹¹ Ánjañati ánjeligu, láu sun jéretima jamá, gabáfu jagía sügú jáu arúfudajatiña jagía, míchuguntiña jadúnrun ánjeligu wuríbatiña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi aní-maalugu úati gunfaráanda jamá, jagúriajoun lun jarügüdún lun jafarún. Adímurejatiña wuríba luágu buri cátei le úati gunfaráanda jamáni, jóúweguba queísi jóúwegun anímaalugu, ¹³ asúfurireina lueígiñe jasúfuriragüdún ámu. Nibúsigarídunati jabágaridun, adáagua jamúti lagúburi jayúmajan lídan larúgounga, ligíbugiñe laríjin sun uboú, darí lun júaradagun júma lídan jufédun queísi jamúga gürígia buítiña, wíyetei jabágarí.

¹⁴ Síñáti jaríjin ában wúri lun úa lan suámei jamánun, mabúchati jawágu adáagua figoú. Acháwaja jamútiña débilitiña lídoun figoú, bíbutiña luágu meménijabuni. Choúruti luágu jagúnrinchagúba lan. ¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraú Beór, jémpulu, lé meja álugubei lagáñeirun seínsu láu ladúgüni le wuríbabei. ¹⁶ Ábati ladeínjan ában burígü maríñagaditi lun luágu lifígoun, adímureja ligía lun láu jamálali gürígia, ába mígirun láni lun lasígirun láu lilúlun láu.

¹⁷ Ítara jáña arúfudajatiña yéetiña ja queísi w-élu mábeiti, queísi buri juánriñu le lanúgün garábali, síadi-waaña lun jasúgürün sun dan lídan luweírín-ágei lubúriga máfiougati. ¹⁸ Lugúndun aríñagatiña dimúrei

buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adúga jameí furúmieguaügü iwíyei le jabúseerúbei. Ítara líña jacháwajaniña ja sun líñabei jaséfurun lí-daangiñe binádu luwúyeri jabágaridun lánina bulíeiguaü, lun jagíribudun jarígoún lídoun liwíye ibá-gari. ¹⁹ Aríñagatiña joun jánigu luágu jabágariduba lan ában ibágarí le ñí lumuti gayára lan jadúgüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámuñein cátei le árügüdúbalin. ²⁰ Ja subúdi jamáalibei Wabúreme Jesucrístu le Wasálbaragüle, ani séfujaña lídaangiñe iwíyei le lánina uboú le, ánjañaya áburuja lídoun buri cátei le lúnnya lárügüdúniña, wuríbatimaabei le lúnbei gádan lánina sügú láu meja furúmiñe. ²¹ Buitimaati jamúga meja joun lun masúbudirungubei jamáni úma le surúbei, sügú láu lárígiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewéran, léchun búiruju le sun líñabei lágoun jarúmati, lúnnya lá-goun lídan gubégubeti.”

Lagíribudun Wabúreme Jesucrístu uboúagun

3 Nidújeñu jínsiñetiña nun, nuján tibíaman gárada nabúrújan jun. Tídan biángubei gárada, jóúchati-na lun narítaguagüdúnun luágu arúfudajani inárüniti le furéndeí jumáalibei, lun gayáraabei lan jasáminarun buídu luágu. ² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warú-fudajabei wagía apóstolugu jun.

³ Lídaangiñe sún buri cátei le waríñagubei, rútima jumeí le jarítangunrugun. Luágu lídoun lánme lagúmu-joun dan, añájeinbaña gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun, ⁴ ábame jaríñagun. “¿Másan jaríñajare luágu liábinyaba lan Crístu uboúagun? ¿Jalíñañeinsan? Lúmagiñe jóúwegun furúmiñetiña afíñetiña luágu Jesucrístu, ítara mémegili sun cátei queí meja lúmagiñe ladúgúnbei uboú.” ⁵ Mabúseeruntiña jasúbudiruni luágu ladúgüni Búngiu sun cátei lídan lidáani lun ladúgúniwa. Adúga lumúti meja siélu lúma uboú lúmagiñe binárü láu lugúmadin, adúgaleí múa lí-daangiñe dúna, geyégu líña gíñe múa ligía láu dúna. ⁶ Ába lachúlürün dan lun lagúnrinchaguni Búngiu uboú meja ligíra láu lidúnarina gúnran. ⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdún. Lídaanme wéyu ligía, lágudubei Búngiu siélu lúma uboú le gumúti láu lugúmadin. Ja madúgünbaña gásu láu Búngiu, jágudúba lí-dan wátu ligía.

⁸ Mabúleida jumeí gíñe, nidújeñu jínsiñetiña nun, luágu ítara líña lan ában wéyu ligíbugiñe Búngiu quei mílu irúmu, mílu irúmu quei ában wéyu. ⁹ Máma jamú-gatia lugúndun ladárasarun lagúnfulirun Búngiu láu lerérun, queísi jarítangun sarágu, gagúraasunrügüti jabá gürígia lugúndun mabúseerúnti lun leféridirun ni

ában jádaangiñe, labúseerun lun jaságüríjan sun gürígia lídaangiñe jafígoun, gayára lámuga jasálbarun.

¹⁰ Lachúlürüba wéyu ligía lun lagíribudun Wabúreme Jesucrístu uboúagun dánme le magúrabúniwa lan, queísi lachúlürün jíweruti áriebe. Ábanmeti lagúmuchagun siélu láu ában lanárime ireíni, rúrüguağüdaleíme wátu geméti sun cátei le ñíbei—játi, warúguma, wéyu—gudáme uboú láu sun cátei le lídaanbei.

¹¹ Queísiti lagúnrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumeí lachúlürün luwéyuri Búngiu, adúgañu jumeí le juáraati lun jóufudajani. Lídaanme wéyu ligía, lagúnrinchaguba siélu láu wátu geméti, ábame larúrüdagun sun cátei. ¹³ Ánjeinti wagía, agúraba wamúti iséri siélu lúma iséri uboú le uágubei laríñaga Búngiu woun, sun cátei ñi, úaraguabei, áni buídubei gíñe.

¹⁴ Ligía lubeíti, nidújeñu jínsiñetiña nun, sun anjúnja lan agúrabajeí buri cátei le, jóucha jumá lun ladárirunün Búngiu lídan úaraguni ligíbugiñe, jarú-

mañu, úouga mégeiti juágu. ¹⁵ Subúdi jumeítia luágu lagúrabaja rügúña lan Wabúreme Jesucrístu jasálbarun gürígia lubá lagíribudun uboúagun. Ítara líña gíñe labúrújan wadúje Páblo le jínsiñebei woun sarágu, jun, láu subúdi le líchugubei Búngiu lun. ¹⁶ Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfaráandawa tan. Játi ibídouguabaña áu jáma ja loúguabaña afíñe, garábaguati laníchigu labúrújan Páblo según jagía, ítara quei jadúga tún buri tíbiri líburu to Lerérun Búngiu. Jeféridiruba lun sun dan ladúga cátei le.

¹⁷ Ligía lubeíti, nidújeñu jínsiñetiña nun, queísi subúdi jumáali lubeí buri cátei le lubáramegiwa, toúnigigua jumá júngua lueí jeyéedunün gürígia wuríbatiña, ígiragüdei arúfudajani le inárüniti luágu Búngiu jun.

¹⁸ Jóucha jumá lúntima jasúbudiruni Wabúreme Jesucrístu le Wasálbaragüle, awáanse jugúyame lídan lín-siñejabu. ¡Uweíriguni lun, guetó lúma súnwandan! Ítaralá.

1 JUAN

Dimúrei le lánina ibágari

1 Wabúrűjaña jun luágu Búngiu Irájű lé buga ní-jeinjalibei dan le lagúmeserunbei sun cátei. Ába libin Búngiu Irájű ubouágun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladúgübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíribei “Dimúrei”. ² Ába liábin ubouágun, quei nubeíbei jun, aríja wamúti, geféen wagía luágu, áni guetó wabúrűjaña jun luágu. Níñein Búngiu Irájű lúma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni. ³ Wafúraanguagüdüñein lubeíti jun le aríja wamáalibei ladúgün, lúma le agáamba wamáalibei laríñagun, lun gayáraabei lan jafíñerun le tímatimaati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájű, queísi wagía. ⁴ Ítara lúba dayárubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabei Crístu woun, le gíñe wíhugubei jun guetó. Luágu ítara líña lan Búngiu queísi ában lámpu, mánti ni cáta lúma lubúriga. ⁶ Ánjawa aríñaga luágu lídaañadiwa lan ában lúma áni madúgün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün. ⁷ Ánjein úaragua lubeí wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchatí le waríñagubei. ⁹ Ánjein wagúfesera wafígoun, gayáraabei weménigidun luágu Búngiu luágu ladúgübei lan le úaraguabei—ferúduna lubeí wafígoun, jarúmagüda lówame lídaangiñe sun wuríbani. ¹⁰ Ánjawa aríñaga luágu madúgüngidiwa lan figou, wadúgüñein Búngiu camá yéeti, áni merésibirun wamágili lerérun tídan wanígi.

Adímurejati Crístu lueígiñe wafúleisein ligíbugiñein Búngiu

2 Nirájűñü, nabúrűjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúlei-

sein ligíbugiñe Wáguchi Búngiu, ladúga ligía rügüñein richágua ligíbugiñe Búngiu. ² Lídaangiñe Jesucrístu ferúdnawa lan wafígoun, áni mámarügü wafígoun, ferúdnawati gíñe jafígoun sun ja afíñebaña luágu.

³ Ánjein wagúñfulira lugúmadin Búngiu, wasúbudirubei luágu chúlűjadiwa lan asúbudirei Búngiu. ⁴ Ánjein aríñaga ában gürígia. “Subúdi numúti Búngiu”, áni magúñfulirunti táu lugúmadin, yéeti gürígia ligía, ibídiñegili Búngiu lun. ⁵ Ánjeinti gürígia le adúgübalin le lubeíbei Búngiu, chúlűjali Búngiu ínsiñe-da lun buídu buídu, ítara líña wasúbudiruni luágu lídaañadiwa lan ában lúma. ⁶ Le aríñaguti luágu lídaañein lan ában lúma Búngiu, lúnti labágaridun quei meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabúrűjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úaragua lúma ugánu ligía. ⁸ Guetó narítaguagüdüñadün luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá woúniwagua. Ítara líña meja labágaridun Jesucrístu, jabágariduña gíñe ítara lugúndun jeíbuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucrístu, lídaañein larúgounga, subúditi Crístu lun, áni úati ni cáta lun láburegüdüni lídoun figou. ¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájűñü, nabúrűjaña jun lugúndun ferúduna láali Búngiu jifígoun ladúga Crístu. ¹³ Agúbürigu, nabúrűjaña jun lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Núbürigiña, nabúrűjaña jun lugúndun gáñei jumáli lan wuríbu luágu Máfia.

Nabúrűjanbei jun, nirájűñü, lugúndun subúdi jumáli lan Búngiu Úguchili. ¹⁴ Nabúrűjaña jun, agúbürigu, lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nabúrűjanbei jun, núbürigiña, lugúndun jére jumá, áni resíbi jumáli lerérun Búngiu tídan janígi, lugúndun gíñe gáñei jumáli lan wuríbu luágu Máfia.

¹⁵ Mínsiñedalá ligáburu uboú jun, ní buri cátei le lánina uboú. Siñáti lajnsiñedun cátei lánina uboú jun, jínsiñeme Búngiu jun, ¹⁶ lugúndun úati ni cáta lídaangiñe cátei le líchugubei uboú ñúbinti lúmagiñe Búngiu, lúmagiñe guánarügü uboú liábin. Luríban jayúmajan gürígia, ayúmajani lun jabíjini cátei le jaríjibe le uágubei jarítagua luágu buídu lan, lúma pántaü luágu cátei le jabíjibe, ligía buri cátei le líchugubei uboú. ¹⁷ Áni uboú, agúmucheina líña láu buri sun luríban ayúmajani le lídaanbei, ánjeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülújali lagúmujoún dan. Agáambaadün luágu iníte lan Lágani Crístu, quei chülúguaaña lubeí sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun laríjiniwa furáangu luágu máma lan wánigu le tímatimaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun. ²¹ Nabúrüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ni murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesús Crístubei le loúnajabei Búngiu uboúagun lun lasálbaruniña gürígia, jagía láganibaña Crístu, mafíñetiña ni luágu Búngiu Úguchili, ni luágu Búngiu Irájü. ²³ Sun ja májabaña lun jasúbudiruni Jesús queísi Búngiu Irájü, ibídiñegili Búngiu Úguchili joun, ja aríñagubaña luágu Jesús lan Búngiu Irájü, subúdi gíñe Búngiu Úguchili joun.

²⁴ Ligía, areída jumeí lubeí ugánu le jagáambubei lúmagiñe furúmiñeti, tídan janígi. Ánjein jadúga ítara, jeréderuba gíñe lídan ában lúma Búngiu Irájü lúma lúma Búngiu Úguchili, ²⁵ jerésibiruba gíñe ibágari le magúmuchaditi, queísi laríñaguni Jesús woun. ²⁶ Ligía nerérunbei jun jawágu láganiñu Crístu jagía já yebe busénbaña jayéedagunün. ²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe. ²⁹ Queísi subúdi jumáni luágu richágua lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

Lirájüñü Búngiu

³ Aríja jumá luweírin wínsiñe lun Búngiu Úguchili, darí lun gayára lan lagúarúniwa woun "lirájüñü Búngiu", áni inárüni luágu lirájüñü wamá. Ligía siñá jabáliwa lánigu uboú gunfaráanda lugúndun ibídiñeti meja Jesucrístu joun lídan linárün cátei dán meja le ya lan uboúagu. ² Nidújeñu jínsiñetiña nun, lirájüñü-jadíwa Búngiu guetó, áni marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíribudun Crístu, ítara wába lan quei ligía, lugúndun waríjubei ítara quei lubeí. ³ Áni sun le agúrababajálin buri cátei le, jarúmagüda lumúti ligáburu ítara quei jarúma lan ligáburu Crístu.

⁴ Ánjeinti sun le afígounjabei, dürúgua lumúti lilúrudun Búngiu, lugúndun luágu cátei figoúbei ladúraawagún lilúrudun Búngiu. ⁵ Subúdi jumáli luágu lun lan lagídaruni Jesucrístu wafígoun liábin uboúagun, luágu gíñe úa lan ni murúsun figoú luágu. ⁶ Sun lubeíti le lídaanbei ában lúma, máma lídaañein figoú, áni sun le lídaanbei figoú, maríjin lágili Jesucrístu, masúbudirun lágili gíñe. ⁷ Nirájüñü, mayéedawagua jumá, ában gürígia richáguati ligíbugiñe Búngiu adúga lumúti le richábei, queísi richágua lan Jesucrístu. ⁸ Ánjeinti le eíbugubei lídan figoú, lánigu Máfia, lugúndun afígoujati Máfia lúmagiñe furúmiñeti dan, ába liábin Liraú Búngiu lun lagún-rinchaguni luwádigimari Máfia.

⁹ Úati ni ában le liraúti Búngiu asígiruti lídan figoú, lugúndun níjein ibágari le líchugubei Búngiu lun lídan, siñáti lasígirun lídan figoú lugúndun liraú lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madúgünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Niján ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Moún lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuríba lán meja le ladúgübei Caín, áni buíti le ladúgübei lamúlen, ligía lagímugajanbei.

¹³ Nidújeñu, maweíridalá janígi ánjaün eyéereguda joun lánigu uboú. ¹⁴ Wagía, ítara wáña meja queísi jiláaña, guetó ibíjaadiwa ibágari magúmuchaditi, áni subúdi wamúti lira lugúndun jínsiñetiña wadújeñu lueígiñe Jesucrístu woun. Le mínsiñejabuti lun lidúje, jiláñu mémegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. ¹⁶ Subúdi wamúti cátei lan ísiñenibe. luágu líchuguni Jesucrístu libágari wawágu. Lúnti giñeti wánjarun lun wíchuguni wabágari jawágu wíbirigu. ¹⁷ Ánjein níjein lubeí lúma ában gürígia lun lawínwandun, áni laríja

luágu níjein lan lemégeirun lidúje áni míderagun lumúti, zída lubági níjein lan ínsiñeni tídan lanígi lun Búngiu? ¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjín lídan cátei le wadúgübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibeí, gayáraabei gíñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu weménigi luágu, ²² luágu líchugubei lan sun le wamúriajabei lúma woun, lugúndun gúnfulijadiwa láu lugúmadin áni adúga wamáali le áubei lagúndaara. ²³ Lugúmadin Búngiu, lun wafíñerun luágu Jesucrístu le Liraú, lun gíñe jínsiñegua wamá wámagua queísi meja laríñaguni Jesúsu woun. ²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

Láni Búngiu Espíritu lúma láni lágani Crístu espíritu

4 Nidújeñu jínsiñetiña nun, mafíñera jumá joun sun ja aríñagubaña luágu Búngiu lan adímurejabei jayúmulugugiñe, jóúcha jumáña lun jaríjini ánjein Sífiri Sándu lubeí le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. ² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, níjein Sífiri Sándu lídan áni láu lubáfu Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibeí Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouúagu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagúdnün lueí arúfudajani le inárüntibeí, gáñei jumáña lugúndun gabáfutimaati Sífiri Sándu le jídaanbei sügü láu láni Máfia espíritu le jádaanbei. ⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja gíñe lánigubaña ubouú. ⁶ Ánjein wagía, lánigu Búngiu wagía. Le subúdijabubei lun Búngiu, agáamba lumútiwa, le mámabei lánigu Búngiu, májati lagáambuniwa. Ítara líña lubeíti gayáraati wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburi Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñe-

jabuni. Sun le jínsiñejabubei, liraú Búngiu, áni subúdi gíñe Búngiu lun. ⁸ Le mínsiñejabuti, ibídiñegili Búngiu lun, lugúndun ligáburi Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraú le ábanrügüti ubouúagun lun loúnwen, lun gabágari wamá lídaangiñe. ¹⁰ Niján ínsiñenibeí. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraú le ábanrügüti lun loúnwen, lun lébuname ferúdnawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti gíñe jínsiñegua wamá wámagua. ¹² Úagili ni ában aríjiti Búngiu, láu sun líra, ánjawa jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachoúrurun luágu lídaañadiwa lan, áni wádaañein lan gíñe. ¹⁴ Wagía guánarügü aríja wamáali Liraú Búngiu, aríñaga wameí luágu lun lan lasálbaruniwa loúnajei Búngiu ubouúagun. ¹⁵ Furúmieguarügü le afíñerubei luágu Liraú lan Búngiu Jesúsu, labágariduña lídan Búngiu, áni labágariduña gíñe Búngiu lídan.

¹⁶ Ítara líña wayábin asúbudirei lúma afíñera luágu jínsiñe wamá lun Búngiu. Ligáburi Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña gíñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragúdnüña Búngiu sun gürígia ladúga wagáburiduña lan ya ubouúagu queísi Jesucrístu. ¹⁸ Ánjein jínsiñe Búngiu woun le gumúti, manúfudebadiwa luágu le lúnbei ladúgüni woun, láu luweírín línsiñe Búngiu woun, gidáti sun anúfudei waweí. Ánjein janúfude wabeí lueí Búngiu, ladúga wagúrabajaña lan láburujan ligáñi wawágun. Ligía, ánjein janúfude lubeí ában gürígia, machúlügilirügü líña Búngiu ínsiñeda lun le tímatimaati.

¹⁹ Wagía, jínsiñeti Búngiu woun lugúndun wínsiñe-dun lun furúmiñe. ²⁰ Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei gíñe jínsiñe lan Búngiu lun, le maríjin lubeí. ²¹ Rúlaali Crístu gumádi le woun. le jínsiñejabuti lun Búngiu, lúnti gíñe jínsiñe lan libíri lun.

Wagáñeiruni wuríbu lúma ubouú

5 Sun ja afíñebaña luágu Jesúsu lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña gíñe joun lirájüñü Wáguchi Búngiu. ² Subúdi wamúti luágu dan lan le jínsiñe lan Búngiu woun áni adúga wameí le lubeíbei, jínsiñe jamá gíñe lirájüñü Búngiu woun. ³ Ladúgüniwa le lubeíbei Búngiu, ligía ínsiñejabunibeí lun, áni majúruti lugúmadin, ⁴ lugúndun sun le liraúbei Búngiu, mabáfuti cátei lánina ubouú luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubouú. ⁵ Le afíñebeí

luágu Jesúsu lan Liraúbei Búngiu, ligía rügúñein gayára lagáñeirun luágu cátei lánina uboú.

Geféenwa lan luágu Liraú Búngiu

⁶ Jesucrístu ligía ñúbinbei láu bián seíni luágu ligía lan Liraúbei Búngiu. bián seíni ligía, dúna le lánina labásterun, lúma jítaü le lánina loúnwen. Mámarügü láu dúna, láu dúna lúma jítaü. Áni Sífiri Sándu guá-narügü geféenti luágu cátei le, ligía arúfudubalin sun inárüni woun. ⁷ Añájein úrúwa geféentiña luágu cátei le siélu. Búngiu Úguchili, Búngiu Irájü, lúma Búngiu Sí-firi Sándu, áni ában méme jagía, ⁸ níjein gíñe úrúwa cátei geféenti múarugu luágu Jesúsu lan Liraúbei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen. ⁹ Resíbi wamúti le jaríñagubei wügúriña, gúbuméti lúnti lan werésibiruni le laríñagubei Búngiu guánarügü luágu Liraú lan Jesu-crístu. ¹⁰ Le afíñeti luágu cátei le, choúru lumúti tídan lanígi luágu inárüni lan, le mafíñebei, adúga lumúti Búngiu camá yéeti, lugúndun mafíñen lan luágu le laríñagubei Búngiu luágu Liraú. ¹¹ Le laríñagubei Búngiu, luágu rújali lan ibágari magúmuchaditi woun, áni lídaangiñe lan Liraú liábin ibágari ligía. ¹² Le níjein-bei Liraú Búngiu lúma, níjein gíñe ibágari le lúma, án-jeinti le úabei Liraú Búngiu lúma, úati gíñe ibágari le lúma.

Lagúmujuún buri lerérun Juan tídan gárada to

¹³ Nabúrüjañein cátei le jun, jugúya le afíñebei luágu Liraú Búngiu, lun jasúbudiruni luágu gabágari jumá le magúmuchaditi.

¹⁴ Jeménigitiwa luágu Búngiu, lugúndun subúdi wamúti luágu ánjawa lan amúriaja furúmieguarügü cátei queísi labúseerun, lagáambubadiwa. ¹⁵ Áni ítara quei wasúbudiruni luágu agáamba láni Búngiu wayú-muragun, subúdi wamúti gíñe luágu loúnabubadiwa lan.

¹⁶ Ánjein aríja ában gürígia luágu ladúgüña lan ában libíri ában figoú le mámabei lúnti lanúgüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figoú anúgüti gürígia lídoun féridi magúmuchaditi, málati lun layúmurawagúniwa lun Búngiu luágu figoú ligía. ¹⁷ Sun wuríbani figoú, máma sun figoú lun lanúgüni gürígia lídoun féridi magúmuchaditi.

¹⁸ Subúdi wamúti luágu gürígia lan le anúgübalin Búngiu queísi Lúguchi, meíbugunti lídan figoú, lugúndun toúnigi lumúti Liraú Búngiu, siñáti ladúgün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña uboú.

²⁰ Subúdi wamúti gíñe luágu ñúbinjali lan Liraú Búngiu uboúagun, áni rújali lan gunfaráandaü woun lun wasúbudiruni Búngiu le tímatimaati. Wabá-gariduña le tímatimaati lídan ában lúma Búngiu, queísi lídaañadiwa lan ában lúma Liraú, le Jesucrís-tubei. Ligía Búngiubei le tímatimaati, ligía gíñe le íchugubei ibágari le magúmuchaditi woun. ²¹ Nirájüñü, mafálara jumáña búngiugu ja mámabaña Búngiu. Ítaralá.

2 JUAN

Inárüni lúma ínsiñeni

1 Áu le weíriei mútu, nabúrújañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu. ²Jínsiñetün woun ladúga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³Búngiu Úguchili, lúma Wabúreme Jesucrístu le Liraú Úguchili, jabínirubadún, jíchugubei jagúdemejabu lúma jadárangilan jun lídan jabúruchaguagüdüni larúfudajan Crístu lúma ínsiñejabuni. ⁴Oúnwenbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun. ⁵Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabúrújabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷Añájein sarágu ayéejatiña ubouágu ja mafíñebaña luágu quei lan gürígia tímatimaati liábin Jesucrístu ubouágun. Le ítarabei, ligía le yéebai, le láganibei Crístu. ⁸Duári jumá jaweí, lueí jeféridiruni le ñúbinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰Ánjein achúlúra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹lugúndun le abúsuruti lun, gádan lumúti gíñe wuríbani le ladúgübei.

Lagúmujuún buri dimúrei

¹²Níjein sarágu cátei lúnti naríñaguni jun, mabúseerúntina abúrújarügü nání jun, agúrabatina nídin aríjaün lun nayánujan júma, lun lagúnfulirun wagúndan.

¹³Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

3 JUAN

Buíti ladímurejoún luágu wügúri le gíribei Gáyo

1 Áu le weíriei mútu, nabúrűjañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun gíñe magádie ban ítara queísi buídu lan lídin bun lídan beíbugun lúma Crístu. ³ Oúnwenbun nagúndaarun dan le jayábin-bei jádaangiñe wadújeñu lueígiñe Jesucrístu, ába jabájűdagun nun luágu bugúnfulin quei babágariduña lubei úaragu lúma larúfudajan Crístu. ⁴ Úati ámu cátei agúndaaraguagűdűtina queísi dan le nagáambun luágu jabágariduña lan nirájűñű lídan úarani lúma larúfudajan Crístu.

⁵ Numáda jínsiñeti nun, buíti bouserun lídan eséri-widuni le badűgűbei joun wadújeñu lueígiñe Jesucrístu, joúntima ja lílana ámu fulásu. ⁶ Abájűdaguatiña ligíbugiñe adámurini le yábei luágu bínsiñejabu joun. Adűgabei fuleísei le. Íderagua báña láu le jemégeirubei lun jasígiruni jaweiyasun lídan ában igáburi le áuti lagúndaara Búngiu. ⁷ Furítiña lun jeséri-widun lun Crístu, merésibiruntiña ni cáta jámagiñe ja ibídiñejabubaña lun Búngiu. ⁸ Ligía lúnti lubei weténirun joun, lun wíderaguniña lídan lapúrichijoún lerérun Búngiu.

Luríban loúserun Diótrefes

⁹ Abúrűjatina buga ában gárada joun tílana ligílisi, májati Diótrefes lídin láu le wabeíbei lugúndun busénti

ábuti lan jádan súnwandan. ¹⁰ Ánjana lubeíti ñűdűn, neréruba lun luágu le ladűgűbei, adáagua marásu-alugu lúma iyéeni wawágu. Bougudin lueí líra, merésibirun lumútiña wadújeñu ja achűlűrűtiña, áni mája ligía lun jerésibiruniña ámu, ja erésibirutiña, ába labűguniña lídaangiñe adámurini le táni ligílisi.

¹¹ Numáda jínsiñeti nun, mafálarabei jémpulu wuríbati le, adűgamemebei le buídubei. Le adűgűti buíti, lánigu Búngiu, ánjein le adűgűti wuríbati, ibídiñegili Búngiu lun.

Lubuídun láni Demétrio jémpulu

¹² Buíti jadímurejan sűngubei luágu Demétrio, áni in-árűni luágu buídu lan ligáburi. Geféentiwa gíñe luágu cátei le, áni subűdi jumúti luágu inárűni lan le waríñagubei.

Lagúmujoún buri dimúrei

¹³ Gíbeti yebe lúnti naríñaguni bun, mabúseerűtina abúrűjarűgű náni, ¹⁴ lugúndun agúrabatina naríjinibu madíse, ábameti wayánujan.

¹⁵ Darángilabá. Mábuga jáña umádagu yána bun, rűbei wamábugaű lun cáda ában jádaangiñe wamádagu ja ñíbaña.

JUDAS

Labúrüjan Júdas joun ja únbaña wájali lan Búngiu lun lánigu jamá

1 Áu Júdas, esériwiduti lun Crístu áu, áni lamúlen gíñe Jacóbo, nabúrüjañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucrístu séfuñu luei buri cátei lánina uboú le. ² Resíbi jumá sarágu gudémejabu, darángilaü, lúma ínsiñeni lúmágiñe Búngiu.

Ja arúfudajabaña iyéeni

³ Nidújeñu jínsiñetiña nun, weírjali nabúseerun nabúrüjan jun luágu asálbaruni le wabíjibe, dándu jugúya queísi áu, guetó sandíguatina núngua luágu lúnti lan nabúrüjan jun lun nayúmuragun jun lun jáfaagun luágu afíñeni le ledégerubei Búngiu ában weíyaasu lun sun dan joun lánigu. ⁴ Naríñagubalin le jun lugúndun añájein lan arúfudajatiña yéetiña ádaragutiña jóungua jagánaguoun. Gürígia buri jagía, arúfuda táña Lerérun Búngiu lúmágiñe binárün luágu lúnti lan jasúfuriruni lafáyeiragüle jaríban, buídu. Wügúriña wuríbatíña jagía, minébenti Búngiu joun, arúfudaja jagía luágu gayára lan jadúgün gürígia furúmieguarügü cátei mabuídunti, mabeíchun lubáña lan Búngiu lueígiñe, ladúga luweírín lareíni, ayéedagua jagía gíñe luágu Jesucrístu, Wabúreme le ligíarügüti, le únbei wesériwida.

⁵ Láu sun subúdi jumáali lan, buséntina narítaguagüdünnun luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmchaguagüdüniña ja mafíñerunbaña jádan. ⁶ Ánjeligu ja mareídunbalin jabára, ígírarügü jameí jábiñe síelu lun jagárabaagun luágun Búngiu, añájein adaürüwañu lurúma Búngiu, gürágu lídan lubúriga láu güríngüri magúmchaditi, agúrabajei oúnwenbun wéyu le lánina agúseruni. ⁷ Ja lílana buri ubúru Sódoma luma Gomorra, lúma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun jóungua lun salúfuri, ába jígiraguagüdünnun jóungua lun sun luwúyeri wuríbani darí lun lagámaridun wügúri wügúri líledi, wúri wúri tíledi. Ába lagúmchaguagüdüniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburi ida lúba lan lafáyeijan Búngiu luágu figoú.

⁸ Ánjeinti láu sun jémpulu líra, wügúriña buri gíñe ja jagánaguabaña, láu jafálaruni arúfudajani le maríchabei, wíyedaguatiña jóungua, májatiña lun lugúmadin

Búngiu, anába jamáña ubáfu buri ja íñugutimaabaña. ⁹ Ánjeinti arcánjel méme Miguél, dan le lasígenejanbei lúma Máfia lueígiñe lúgubu Moisés, mouchunti lun líñaragun láu anabúni, aríñagarügüti lun. “Ébecha lábu Wabúreme Búngiu.” ¹⁰ Ánjaña wügúriña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queísi jasúbudiruni anímaalu úouga gunfaráanda jamá, ligía buri cátei le jadúgübei, ába janúgün gürínguaü jawoúguoun láu jóuserun.

¹¹ ¡Fugíabugu jagía! Falá jamaali lání Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le ouwebei luágu lumágaambadin lun lerérun Búngiu. ¹² Nibúsigaridünatiña lídan buri jufédun le lánina jínsiñegua júmagua, le ní lubei jeíga, gurá jagía láu ugúndani, minébenejábuga. Ítara jáña queísi jóuniri mudún ja jóunguarügübei jóunigiragua. Ítara jáña queísi juánriñu magánati dúna le lanúgübei garábali, tídi bu wéwe to magíinduntu lídan tidáani, ítara jáña queísi tídi bu wéwe to ájulutu láu sun tílagüle, úaali ju jamá. ¹³ Ítara jáña queí lanárime buri lugúdi barána, arúfudei jagáburigu le nibúsigaridünati quei jacútaü. Ítara jáña quei warúguma buri ja féridi jamáali jémeri, íñarawagúaaña lun jeréderun lídan líwurín-ágei lubúriga lun sun dan.

¹⁴ Enóc gíñe le jasédün gürígia lárigiñe Adán, adímurejaali dimúrei lúmágiñe Búngiu jawágu arúfudajatiña yéetiña ja dan le laríñagunbei. “Aríja numúti Nabúreme líabin jáma sarágu mílu jádaangiñe lání ánjeligu ¹⁵ lun lagúseragüdüniña sun ja wuríbabaña luágu sun wuríbani le adúga jamáalibe, lúma luágu buri dimúrei deréti le aríñaga jamáalibe luágu. Lasíadirubaña sun gafígountiña jagía luágu le jadúgübei.” ¹⁶ Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadúgübei ámu, lún rügúñein jagúfulirun lúma lagúbüri jayúmajan jabúseera. Aríñagatiña dimúrei buri íñuguti, adímureja jagía bufti jawágu buri gürígia lúnrügü jaságarun cátei bufti jóungua jádaangiñe.

Lererún joun afíñetiña

¹⁷ Jugúyati nidújeñu jínsiñetiña nun, jarítagua jumá luágu le laríñagubei Jesucrístu jádaangiñe lání apóstolugu luágu buri cátei le lúnbei lasúseredun. ¹⁸ Jaríñajare. “Lídoun buríme lagúmjuoun dan, añájeinbaña gürígia éjerajatiña láu buri cátei le lání Búngiu, agá-

nawa jagíame úaragua lúma jagúndan le wíyebai.”

¹⁹Jadúga buri ja, níjein lubeí fánreinguaü, falá jamuti jagúndan le lánina uboú, úati Sífiri Sándu jádan.

²⁰Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu.

²¹Mabúlieida jumeí luágu jínsiñe jumá lun Búngiu, agúraba jumeí wéyu le lúnbei líchuguni Wabúreme Jesucrístu íbágarí magúmuchaditi woun láu lugúdemejabu.

²²Afíñegüda jumáña ja loúguabaña afíñe. ²³Sálba jumáña jíbirigu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígountiña jun, láu sun, goúnigi jumá lueí jadúgüni

wuríbani le jadúgübei, iyéeregulá jaríban jun queisi gamísa wíyetu, lueí gíñe jeíguadun lídoun luríban úma quei jagía.

**Lagúmujoún buri ladímurejoún luágu luweírigun
Búngiu**

²⁴Búngiu le ábanrügübei, le sábiubei, le Wasál-baragüle lídaangiñe Wabúreme Jesucrístu, gabáfuti lun loúnigirunün lueí jeíguadun lídoun figoú, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucrístu, méja, guetó, lúma súnwandan. Ítaralá.

APOCALIPSIS

Cátei arúfudúati buri lun Jesucrístu

1 Niján buri cátei le larúfudubei Búngiu lun Jesucrístu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucrístu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu luma luágu le aríñaga láalibei Jesucrístu.

³ Gúndaatiña gürígia ja alíjabin jáma ja agáambubalin lalijóun ugánu le, le erésibirúabei lúmagiñe Búngiu, adúga jagía gásu láu cátei le bürúwañubei ya, ladúga yaráfaali dan lun lasúseredun.

Labúrujan Juan joun tílana sédügubei ligílisi

⁴ Áu Juan, nabúrújaña joun tílana sédú ligílisi to Ásiaboun. Resíbi jumá abíniruni luma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá gíñe abíniruni luma darángilaü jámagiñe sédú espíritugu ja ligíbugiñebaña lála, ⁵ luma lúmagiñe Jesucrístu le aríñagubalin cátei le inárüti, le furúmiñebelei ásaaruti lídaangiñe ouweni áni gabáfu ligía jawágu urúeigu ja ubouágubaña. Jínsiñetiwa lun Crístu, áni chibá laadiwa lídaangiñe wafígoun láu líta, ⁶ adúga láadiwa urúeigumé luma fádirigumé lun wesériwidun lun Lubúngiute, le méme Lúguchibei. ¡Rúalá uweíríguni luma ubáfu lun, lun súnwandan! Ítaralá.

⁷ ¡Aríja jumá, liábinba Crístu juánriñurugu, jaríjubei sun gürígia ásta gíñe ja áfarubalin! Jayájuba sun gürígia ja ubouágubaña dánme le jaríjini luágu wuríbani le adúga jamáalibe. Ítara lúba.

⁸ “Áu lagúmesejabei sun cátei, áu lagúmuchagübelei, quei létüra ‘A’ luma ‘Z’”, líña laríñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Crístu lun Juan

⁹ Áu Juan, jidúje lueígiñe Jesucrístu áu, gafánraantina júma lídan larúeijan Búngiu, súfurijadina úara júma luágu Crístu, resíbijadina gíñe gurásu lúmagiñe Crístu. Reideitina adaürúwa luágu ubóju le gírubei Pátmos lueígiñe napúrichijani Lerérun Búngiu, luma lueígiñe napúrichijan luágu Jesucrístu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu,

ába nagáambun ában umálali reínti nanáangiñe quei lumálali fídu, ¹¹ laríñaga umálali ligía nun.

—Áu furúmiñebelei luma agúmujóuni, quei létüra ‘A’ luma ‘Z’. Abúrújabelei sun le baríjubei, ábame bouñajanun gárada tugúya joun tílana sédú ligílisi to loúbawaguboun Ásia. Éfeso, Esmírna, Pérgamo, Tiatíra, Sárdis, Filadélfia luma Laodicéa.

¹² Ába nagáragun lun naríjin ca lan adímurejabei nun, ába naríjin sédú lébu sanúdelu gólu, ¹³ labádinagua sédú lébu sanúdelu ligía ába naríjin ában camá jamuga Wügúri Garaúwarügüti—le Jesucrístubei—táu ában anáanguni chÜlútu luágun lugúdi, luma ában béliiti gólu yaráfa lun laníguagu. ¹⁴ Jarúti lídiburi quei líyu mudún, quei móuru, ítara líña lágu quei wátu geméti. ¹⁵ Miríti lugúdi quei brónse le íríchawagúaaali, le dáwaali lídoun órno, reínti lumálali quei lireín leíbaagun sarágu dúna. ¹⁶ Níñanu sédú warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjinbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen ouweni núma, luma ligélen fulásu le ní jabei jiláguaaña. ¹⁹ Abúrújabelei lubeíti le baríjubei, le guetóbei luma le lúnbei liábin. ²⁰ Niján laníchigubei jawáguti sédú warúguma ja baríjubaña lídan nújabu le noúnwenren, luma sédú lébu sanúdelu gólu. sédú warúguma, jagía sédú jóuniri tílana sédú ligílisi, sédúti lébu sanúdelu, jagía sédú ligílisi.

Ugánu joun tílana sédú ligílisi. Ugánu joun tílana ligílisi Éfeso

2 ‘Babúrúja lun jóuniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña naríñagun, áu le jáubei sédú warúguma lídan nújabu le noúnwenren, le gíñe eíbugubei labádinagua sédú lébu sanúdelu le gólu. ² Subúdi numúti sun le jadúgübelei, subúdi numúti lidére juwádigimari luma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádigimari nuágu, mabúcharunga

juágu. ⁴ Láu sun líra, níjein ában cátei jadúga magúndaantina láu. maweírinjali nínsiñe jun queí meja furúmiñe. ⁵ Ligía lubeíti, jarítagua jumá ída jíña lán meja, sáansi jumeí jigáburi, adúga jumeí cátei lé meja jadúgübei furúmiñe. Ánjein madúgün jumá ítara, níd-inba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilgílisin, ánjein gubeírügü jasáansira jigáburi, ligíaba madúgün náni ítara. ⁶ Láu sun líra, luáguñein jáni fuleísei, liyéeregun cátei lé buri jarúfudajabei nicoláitagu jun lúma buri cátei lé jadúgübei, le gíñe iyéeregubei nun. ⁷ Le garígeirugubei lun lagáambun, agáambaleí le laríñagubei Sífiri Sándu joun tílana buri ligílisi. Ja ási-iragúbalin wuríbani, neígagüdúbaña lídaangiñe lin tídi bu wéwe to lánina ibágari, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babúrüja lun jouniri tílana ligílisi to Esmírnaboun, baríñagame lun lun laríñaguni joun gürígia jagía. “Ítara líña naríñagun, áu le furúmiñeti lúma agúmu-jóuni, lé meja ouwebei áni wínwanyaali. ⁹ Subúdi numúti sun le jadúgübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun louchwagúniwa jafíñen sun jugúya, áni jasúfuriruba sarágu luágu dísi wéyu. Derégüdagun jumá lídan jafíñen nuágu darí jounwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le laríñagubei Sífiri Sándu joun buri tílana ligílisi. Ja ási-iragúbalin wuríbani, másügürünbaña lídaangiñe libíaman ouweni.”

Ugánu joun tílana ligílisi to Pérgamoboun

¹² ‘Babúrüja lun jouniri tílana ligílisi to Pérgamoboun, baríñagame lun lun laríñagun joun gürígia jagía. “Ítara líña naríñagun, áu le gámabarun efeín to gágiriboun, to biánguaboun amána. ¹³ Subúdi numúti sun le jadúgübei, subúdi numúti gíñe luágu Máfia lántima gabáfubei jádan gürígia ja ní lubei jagánawa, áni láu sun líra, númamemeñadün. Mígirun jumágili jafíñen nuágu, ni íbini lídan dan le láfarúnbei Antipás le geféenbei buíti nuágu ní lídan fulásu le ní jubei, le ní lubei lagúmadija Máfia. ¹⁴ Láu sun líra, níjein buri cátei jadúga, magúndaantina láu. luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafígoungüdüniña Israelítagu láu jeígin eígin le adágarawagüdüti joun sándu, lúma láu jabágaridun lídan salúfuri. ¹⁵ Ítara méme gíñe, añájein ja májabaña jígiruni cátei lé buri jarúfudajabei nicoláitagu júma ní, cátei le iyéeregubei nun. ¹⁶ Ligía, sáansi jumeí lubeí

jigáburi, ánjein madúgün jumá ítara, nídiba juágu madíse, ábame nageíndagun jáma gürígia ja adúgübalin cátei buri le, táu efeín to áfuriduboun niyúmulugugiñe. ¹⁷ Le garígeirugubei lun lagáambun, agáambaleí le laríñagubei Sífiri Sándu joun buri tílana ligílisi. Le ásiiraguti luágu wuríbani, neígagüdúba lídaangiñe maná le arámudúañubei lun lun líchugun érei tun luwáni, ábame níchugun ában dúbü jarúti lun láu ában íri iséri búruwañu luágu le ibídiñeti ni ca un lueídügüya lun le eresibirubalin.”

Ugánu joun tílana ligílisi to Tiatíraboun

¹⁸ ‘Babúrüja lun jouniri tílana ligílisi to Tiatíraboun, baríñagame lun lun laríñagun joun gürígia jagía. “Ítara líña naríñagun, áu le Liraú Búngiu, le ítara bei águu quei wátu geméti, liábin lugúdi quei brónse le írichawagúaaali. ¹⁹ Subúdi numúti sun le jadúgübei, subúdi numúti jísiñejabu, jafíñen, jesériwidun láu jugúraasun, subúdi numúti gíñe luágu jadúgüña lan cátei buíti guetó lueí meja furúmiñe. ²⁰ Láu sun líra, níjein ában cátei jadúga magúndaantina láu. Jígirunun Jezabél to aríñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganóun lídan salúfuri lúma lun jeígin eígin le adágarawagüdüti joun sándu. ²¹ Rújadina dan tun lun tasáansiruni tigáburi, májagiru tígiruni tisálufurin. ²² Ninárün jáu luágu náburugüdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ ábame náfaraguniña tirájüñü jilágubei, ítara lúba jasúbudiruni sun nánigu luágu subúdi náni lében arítagni lúma tében anígi, ábame nafáyeiruni cára ában jídaangiñe según le ladúgübei. ²⁴ Ja jíbiri ja Tiatíraña, ja mafálarubalin arúfudajani ligía, machúlügiña gíñe asúbudirei le únbei jagúara lujúlilin láni Máfia cátei le arámudaguabei, míchubadina ámu anúgüni jawágu. ²⁵ Ragújumei lubuídun jigáburi darí niábin. ²⁶ Ja ási-iragúbalin wuríbani, adúga méme jameíme le nabúseerúbei ladúgün darí lun jounwen, níchuguba ubáfu joun luágu buri fulásu, ²⁷ ítara quei líchugun Nóguchi Búngiu ubáfu nun. Ábame jedéaagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queisi soúdiere le láuti múa. ²⁸ Níchuguboun gíñe warúguma to lánina bináafin joun. ²⁹ Le garígeirugubei lun lagáambun, agáambaleí le laríñagubei Sífiri Sándu joun buri tílana ligílisi.”

Ugánu joun tílana ligílisi to Sárdisboun

3 ‘Babúrüja lun jouniri tílana ligílisi to Sárdisboun, baríñagame lun lun laríñagun joun. “Ítara líña naríñagun, áu le jáubei sédü espíritu láni Búngiu jáma sédü warúguma. Subúdi numúti sun le jadúgübei, subúdi numúti luágu jiláñu jíña lan lún buri cátei le nuáguti, láu sun aríñawagú lan luágu wíwan jumá. ² Agágudúma jumá, rújuma érei lún buri cátei le níjeinguabei, lubáragiñe louñwen, aríja náali luágu múaran

lan le jadúgübei ligíbugiñe Búngiu. ³Jarítagua jumeí lubeíti le arúfudajoubei jun, falájumei, sáansi jumeíme jigáburí. Ánjaün magágudun, nídba juágu quei liábin ában jíweruti ibídiñoun óra jun. ⁴Láu sun líra, añájein fiú gürígia jagánagua ñi Sárdís ja múaradungiñábaña lúma wuríbani, jagía jeíbuguba núma táu anáanguni jarútu ladúga yúuti joun. ⁵Ja ásiiragúbalin wuríbani, jadáuraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini ibágari magúmchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiboun

⁷Babúrja lun jóuniri tílana ligílisi to Filadélfiboun baríñagame lun lun laríñagun joun. “Ítara líña naríñagun, áu le sándubei, le gíñe inárünibeí, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸Subúdi numúti sun le jadúgübei. Rújadina ában béna júnren jigíbugiñe le lásiñerun ni ában adáura, ladúga láu sun loúgua lan jére, adúgaadün gásu láu nugúmadin, áni meyéeraguntün luágu nánigu jumá. ⁹Aríja jumá, nadúgüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jín-siñetiña nun, ninárün jáu. ¹⁰Areída jumáli nugúmadin lun gagúraasun jumá, ligía nareídubadún lubeí lueí lidáani ouchawagúni le lúnbei liábin luágu sun ubou lun jouchúniwa sun ja ubouagubaña. ¹¹Madísebei niábin, mígira jumeí ni ában lun lagídaruni jaffíñen nuágu, meféridirun jumámuga ni cátei lídaangiñe le lúnbei níchuguni jun. ¹²Ja ásiiragúbalin wuríbani, níchugubaña quei wagábu tidan Lúban Nubúngiute, máfuridundügüyaañame nígiñe, ábame nabúrüdüni líri Nubúngiute jawágu lun lasúbudirúniwa luágu lánigu jamá, lúma líri ubúru le láni Nubúngiute, le iséri Jerusalén le ñúbinbei siélugiñe lúmagiñe Nubúngiute, nabúrüdübei gíñe iséri níri jawágu. ¹³Le garígeiruguti lun lagáambun, agáambaleí le laríñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴Babúrja lun jóuniri tílana ligílisi to Laodicéaboun, baríñagame lun lun laríñagun joun. “Ítara líña naríñagun, áu le inárünibeí, le gaféenbei buídu, le aríñagubalin inárüni, le ídaangiñebei liábin sun cátei le ladúgübei Búngiu. ¹⁵Subúdi numúti sun le jadúgübei, subúdi numúti luágu madíli jumá lídan jesériwidun nun, másü jugúya. ¡Dilígubeijadün jamúga o sújuma! ¹⁶Quei bachárügü jubeí, madílitün, másü, newérebajadün niyúmulugugiñe. ¹⁷Aríñagatün luágu rísi jumá, luágu buídu lan dan jun, luágu memégeirun

jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña. ¹⁸Ligía níchugunbei dimúrei jun lun jagáñijan gólu le afínujóaali láu wátu geméti númagiñe, lun rísi jumá le tímatimaati, lun gíñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburí. ²⁰Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹Ja ásiiragúbalin wuríbani, níchuguba ubáraü joun númagua luágu nála le lála urúei, ítara quei násiiraguni wuríbani, ába nañúurun lúma Núguchi luágu lála. ²²Le garígeiruguti lun lagáambun, agáambaleí le laríñagubei Sífiri Sándu joun tílana buri ligílisi.”

Ájuduraguni lun Búngiu, siélu

4 Lárigiñe sun cátei le, ába naríjin ában béna júnren siélu, liábinti umálali le ítarabei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé buri lúnbei lasúseredun lárigiñe buri le bun.

²Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³Ítara líña camá ában dúbü miríti, le jáspe o cornalína, ñíñoun ában jerémuuru geyégu láu jalaú ligía, mirítu quei ában dúbü le esmerálda. ⁴Geyégu láu lála urúei ligía aríjayatina ában wein-gádürü lála urúei, ñíñanu wein-gádürü gürígia ja weirigutiña ñun luágu, táu jadáuragun jarútu lúma rídi gólu jábulugu.

⁵Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñíñein sédü lámpu geméñu, jagía sédü láni Búngiu Espíritugu. ⁶Ñíñein gíñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégu lála lála Búngiu, ñíñanu gádürü cátaña gabágaritiña buin láu águu, dándu jagíbugiñe quei janágangiñe. ⁷Le furúmiñeti jádaangiñe, ítara líña quei ában liñún, le jabíaman, ítara líña quei ában bágasu wügúri, le júrwán, ítara líña quei ában ágila ájamajatu. ⁸Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebe jáu agúaraja.

Sándu, sándu, sándu,

Wabúreme Búngiu, le Súnti Gabáfu, le wíwanbei lúmagiñe lubáragiñe furúmiñeti dan, wíwan ligía guetó, wíwan ligíame sun dan.

⁹Ságüti jíchugun cátaña gabágaritiña ja inébesi lúma eteíngiruni lun Búngiu le ñúnbei luágu lála, le gabágaribeí lun sun dan, ¹⁰ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaribeí lun sun dan, ába jíchuguni jarídin ligíbugiñe, ába jagúarajan.

¹¹Wabúreme, Wabúngiute, garíchatibu lun berésibiruni uweiriguni, inébesi, lúma ubáfu,

ladúga Amúrü adúgübalin sun cátei,
láu bugúndan badúgei, láu gíñe bugúndan níjein
lubei sun le níjeinbei.

Líburu lúma Mudún

5 Ábati naríjin ában líburu lújaburugu Búngiu le
ñúnbei luágu lála, abúrújóuatu líburu tugúya
turágeirugu lúma tigíbuagu, darúatu láu sédú séyu.
² Ába naríjin ában ánjeli gabáfuti, ába lálügüdajan láu
umálali reínti.

—¿Ca garíchabei lun ladárunun líburu lúma lun la-
jeíridunun tiséyun?

³ Úati ni ában garíchatu lun ladárunun líburu
tugúya, ni íbini lun laríjin tuágun, ni siélu, ni múarugu,
ni lábugiñe múa, úati ni ában garíchatu. ⁴ Ába nayájun
sarágu ladúga úa lan ni ában garíchatu lun ladárunun
líburu tugúya, ni lun lalíjanun, ni íbini lun laríjin-
un. ⁵ Ábati laríñagun ában jádaangiñe weíyaaña mútu
nun.

—Jebé bayájun, ladúga Jesucrístu, le “líñún” le já-
daangiñebei ladúgawagun Judá, le linébaanfan urúei
Davíd, sirígua lálali wuríbani lun gayára lan ladárunun
líburu lúma lun lajeíriduni sédú tiséyun.

⁶ Lamídaanguati lála Búngiu jáma gádürü cátaña
gabágaritiña jagía jáma weíyaaña mútu jagía, ába
naríjin ában Mudún rára, camá jamuga áfarúaaali.
Sédüñein ligáanchun, sédú lágu, águu buri ligía, lání
Búngiu sédú Espiritugu ja oúnajóubaña lídoun sun
ubóu. ⁷ Níbinti Mudún ligía, le Jesucrístubei, ába
lanúgünun líburu tugúya lújaburugugiñe Búngiu.
⁸ Dan le lárügüdünbarun líburu, ába jájuduragun
gádürü cátaña gabágaritiña jagía jáma wein-gádürü
weíyaaña mútu jagía ligíbugiñe. Cáda ában jádaangiñe
weíyaaña mútu jagía, níñoun ában gidára lúma, lúma
cópu le gólu buin láu cupáli, le liyáwabei jayúmuragun
lánigu Búngiu. ⁹ Niján urému iséri le jerémujabei.

Garíchatibu lun banúgünun líburu, lun bajeíridunun
tiséyun,

ladúga áfarúa ban, ába bagáñijaniña gürígia lí-
daangiñe sun rása, sun luwúyeri dimúrei, fulásu lúma
néchaani.

¹⁰ Adúga báña urúeigumé jáma fádirigumé
lun jesériwidun lun Wabúngiute,
lúma lun jagúmadijan ubóuagu.

¹¹ Lídan le naríagun, ába nagáambuni jamálali
sarágu ánjeligu geyégu láu lála lúma geyégu jáu cá-
taña gabágaritiña jagía, jáma weíyaaña mútu jagía.
Níñanu míñun míñun ánjeligu, ¹² jaríñaga láu umálali
jéreti.

Yúuti ubáfu lúma irisini, subúdi lúma érei,
uweírighuni lúma inébesi, lúma eteíngiruni lun Jesu-
crístu, Mudún le áfarúbei.

¹³ Agáamba numúti gíñe jaríñaguni sun cátei le
ladúgübei Búngiu siélu, le múarugubei, le lábugiñebei
múa, lúma le baránajabei, lúma sun cátei lé buri lí-
daanbei.

Rúalá eteíngiruni, inébesi, uweírighuni, lúma ubáfu
lun Búngiu le ñúnbei luágu lála,

lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.
—¡Ítaralá!

Ába jájuduragun wein-gádürü weíyaaña mútu jagía
ligíbugiñe le gabágaribebei lun sun dan.

To sédú séyu

6 Ábati naríjin dan le lajeíridünbarun Mudún
furúmiñetu tídaangiñe sédú séyu tugúya, ába
nagáambun laríñagun ában jádaangiñe cátaña gabá-
garitiña jagía láu ában umálali camá lumálali wayúju-
ruru.

—¡Jigábu baríja!

² Ába naríjin ában gabáyu jarúti, le waríñubei luágu,
níñoun ában arco lújaburugu to áboun lageíndagua.
Rúati ában rídi lánina ásiiraguni lun ladúga lúnbei lan
lagáñeiriña láganiñu. Furíti ageíndagua, ába lásiira-
gun lídan sun cátei.

³ Dan lajeíridünbarun Mudún tibíaman séyu, ába
nagáambun laríñagun jabíaman cátaña gabágaritiña
jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa
ubáfu lun le waríñubei luágu gabáyu ligía lun lagí-
daruni darángilaü ubóuagugiñe, lúma lun lá-
faraguágüdüniña wügúriña jámagua jilágubei, ába
tíchugún ában oúnwenbun efeín lun.

⁵ Dan lajeíridünbarun Mudún túrüwan séyu, ába
nagáambun laríñagun júrüwan cátaña gabágaritiña
jagía.

—¡Jigábu baríja!

Ába naríjin ában gabáyu wuríti, níñein ában baláan-
su lújaburugu le waríñubei luágu. ⁶ Ába nagáambun
laríñagun ában umálali jamídaanguágiñe cátaña gabá-
garitiña jagía.

—Ábanrügüla kílo türígu luágu lebégi ában wéyu
wadágimanu, úrüwa kílo sebáda ligía méme ebégi, áni
tounigi jumeíme aili lúma bínu buídu.

⁷ Dan lajeíridünbarun Mudún tigádürün séyu, ába
nagáambun laríñagun jagádürün cátaña gabágaritiña
jagía.

—¡Jigábu baríja!

⁸ Ába naríjin ában gabáyu amaríyu, le waríñubei
luágu, ouweni líribei, lárígi lárígi líabin jafúlasun
jiláaña. Ába libíjin ubáfu luágu ligádürün murúsun lí-
daangiñe ubóu lun láfarajan láu wuríbu, láu ilámaü,
láu sándi, lúma jáu anímaalugu janárimetiña ja
ubóuagubaña.

⁹ Dan lajeíridünbarun Mudún tiseíngün séyu, ába
naríjinun jawáni ja áfarawagúbaña lueígiñe japúrichi-
jani Lerérun Búngiu, lúma luágu jadímurejan buíti
luágu Jesucrístu, lábugiñeñanu latárü. ¹⁰ Jaríñaga láu
umálali jéreti.

—¿Darísan ídame, Wabúreme le gúnfuliti láu lerérun,
darísan ídame bagúseragúdaña ja mísiñejabúbaña
bun ubóuagu, luágu wóunwen? ¿Ídamésan bafáyeigü-
daña luágu jáfaruníwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan darí jóústarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeíridunun Mudún tisísín séyu, ába ladágarun ában oúnwenbun járabaganáli. Ába láuridun wéyu quei lúdu, ába láfunadun játi camá jítaü, ¹³ ába jeíguadun warúguma ja siélubaña lun múarugun quei táburujan mángu tueígiñe tídi bu dan le lánjingichunun garábali. ¹⁴ Ába lagúmuhagun siélu quei ában gárada dan le tabáruchawagún, ába ladíñuragunga sun wúbü lúma ubóju lídáangiñe jabára. ¹⁵ Ába jarámudagun urúeigu ja lánina ubóu lídan júyu lúma buri labádinagua dúbü le luágubei wúbü, úara jáma ja weírígubaña, gurúnelugu, rísitiña, gabáfutiña, jáma sun idámuni, jáma wúgúriña ja mabúremetiña. ¹⁶ Jaríñagati lun wúbü lúma lun dúbü. —Jeígua jumá wawágun, arámuda jumáwa lueí laríjin Búngiu le ñúnbei luágu lála, lúma lueí lanárime ligáñi Mudún.

¹⁷ Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawágu ti Israelítagu

7 Lárigiñe sun cátei le, ába naríjin gádürü ánjeligu rára luágu gádürü larígei ubóu, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídi bu wéwe. ² Aríjatina gíñe ábanya ánjeli ñú binti lueígiñe óubaü le ñígiñe lubei láfuara wéyu láu liséyun Búngiu le wínwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadúgün wuríbani lun múa lúma barána.

³ —Madúga jumá wuríbani lun múa, ni lun barána, ni lún buri tídi bu wéwe daríme wíhuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-weingádürü mílu jádaangiñe linébaanfaangu Israél.

⁵ Dúusu míluñanu jádaangiñe ladúgawagun Judá, dúusu mílu jádaangiñe ladúgawagun Rubén,

dúusu mílu jádaangiñe ladúgawagun Gad,

⁶ dúusu mílu jádaangiñe ladúgawagun Áser,

dúusu mílu jádaangiñe ladúgawagun Neftalí,

dúusu mílu jádaangiñe ladúgawagun Manasés,

⁷ dúusu mílu jádaangiñe ladúgawagun Simeón,

dúusu mílu jádaangiñe ladúgawagun Leví,

dúusu mílu jádaangiñe ladúgawagun Isacár,

⁸ dúusu mílu jádaangiñe ladúgawagun Zabulón,

dúusu mílu jádaangiñe ladúgawagun José,

jáma dúusu mílu jádaangiñe ladúgawagun Benjamín.

Sarágu gürígia jarútu jadáuragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdü, jarútu jadáuragun táu tubána

fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíríti Búngiu, le ñúnbei luágu lála, weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagíbu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteingiruni, inébesei, ubáfu lúma érei lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáuragun? ¿Jalíag-iñésan jayábin?

¹⁴ Naríñaga lun.

—Amúrü jamúga aríñagei nun.

Laríñaga nun.

—Ja súfurijañabaña sarágu ja, ja chibá jamaalíbei jafígoun láu líta Mudún, jarúmagüda jamóun janígi láu. ¹⁵ Ligía ligíbugiñeñanu lubei lála Búngiu esériwida lun, wéyuagu árie bu tídan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame láruga, ¹⁷ ladúga loúnigirubaña lan Mudún le lubádubei lála Búngiu, ábame lanúgüniña lárun dúna le íchugubei ibágarí magúmuchaditi, ábame larágajani Búngiu sun águiraü lueígiñe jágu.

Tisédün séyu lúma lágei cupáli le gólu

8 Dan lajeíridúnbarun Mudún tisédün séyu to tuáguboun líburu, ába ñi lan maníguaü siélu quei buri luágu dimí óra. ² Ába naríjiniña sédü ánjeligu ja ráraña ligíbugiñe Búngiu, ába líchugúniwa sédü fídu joun. ³ Lárigiñe, ábaya liábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún bürúbün cupáli lun, lun ladágaragüdüni úara lúma jayúmuragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴ Ába lamúdeirun lugúmulalin cupáli ligía úara lúma jayúmuragun lánigu Búngiu lun ligíbugiñoún Búngiu. ⁵ Ábati lanúgüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachúrüni luágun ubóu, ába lagaambún wayújururu, ireíni, labírijaníga, lúma ában járabaganáli.

Lé buri fídu

⁶ Ábati jaráanserun sédü ánjeligu ja láubaña sédü fídu lun jínwiruni.

⁷ Ába línwiruni furúmiñeti ánjeli lífidun, ába lasáliragun lúbara júya le deréguati lúma wátu geméti, láu gíñe jítaü, ába lachágarúniwa luágun ubóu. Ába lágudun lúrúwan murúsun lídaangiñe ubóu, ígirúati

bián murúsun mágudúnti, gudáwati gíñe lúruwan murúsun lídaangiñe buri tídibu wéwe lúma jíduru.

⁸ Ába línwiruni jabíaman ánjeli lífidun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasálriragun lúruwan murúsun lídaangiñe barána jítaüme.

⁹ Jiláguatiña sun úduraü ja lídaanbaña barána le asálriragubei lun jítaüme, gürínguatu gíñe sun ugúnein to ñiboun lídan barána ligía.

¹⁰ Ába línwiruni júruwan ánjeli lífidun, ába teíguadun ában oúnwenbun warúguma siéluigiñe, durúngu quei ában tóchi. Táburuja luágun lúruwan murúsun lídaangiñe dúna lúma líseesen dúna. ¹¹ Igífi tíribei warúguma tugúya, ába lagífidun lúruwan dúna, ába jóúwegun sarágu gürígia ladúga lagífidun dúna ligía.

¹² Ába línwiruni jagádürün ánjeli lífidun, ába lagürinchagun lúruwan murúsun lídaangiñe líbiri wéyu, láu sun játi, jáma warúguma. Le oúbaü le agúrinchagubei jawágu, ába labúridun, marúgoundadunti wéyuagu ni áriebeu.

¹³ Lárigiñe, ába naríjin ában dunúru weíríti ámajaja lamídaangua siélu, aríñageina ligía láu umálali jéreti.

—¡Fugiábugume ja aganoúbaña uboúagu luágu úruwa lanárimeníga lé buri lúnbei láburuja jawágun dánme jínwiruni ja jíbiri úruwa ánjeligu jafidun!

9 Ába línwiruni jaseíngün ánjeli lífidun, ába naríjin ában warúguma eíguadutu siéluigiñe lun múarugun, ába líchugún ligélen júyu le mébejabei tun. ² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³ Lídaangiñe gumúlali ligía ába jachúlaagun chigángaru, ába jájamajani sun uboú, ába jabíjin chigángaru jagía ubáfu líbe jabáfu águru ja uboúagubaña. ⁴ Ába laríñawagún joun lun madúgün jamá wuríbani lun jíduru le uboúagubei, ni lún buri nádü, ni lun tídibu wéwe, lueídügü joun gürígia ja úabei líseíni Búngiu jeréberugu. ⁵ Majoúati lun jáfaraguniña chigángaru jagía gürígia, lueídügü lun jásjüjaniña gürígia luágu seíngü játi, ítara líñati ligári jásjüjan quei jásjüjan águru. ⁶ Lídaanme buri wéyu ligía, jáluajabei gürígia oúweni, madárijabei, busén jagía yebéme jóúwegun, ladíseduba oúweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügúri.

⁸ Ítara líña jádiburi quei jádiburi würíña, liábin jári, quei lári liñún. ⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Ñíñein ubáfu luágu jáli lun jadúgün wuríbani joun gürígia luágu seíngü játi. ¹¹ Ñíñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agúnrinchaguti.

¹² Sügúja furúmiñeti lanárimeníga, mégeigili bián.

¹³ Ába línwiruni jasísín ánjeli lífidun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligía lun jasísín ánjeli le láubei fídu.

—Farára báña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jafáragadún gádürü ánjeligu jagía lun jáfara-gun ában jádaangiñe cáda úruwa gürígia jilágubei, ladúga aráanserúaña lubá óra ligía, wéyu ligía, játi ligía, lúma irúmu ligía. ¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburi jayáwadagun gabáyu jagía jáma ja waríñubaña jawágu nun. Ñíñein ában cátei janíguagu, funáti licólorun, dínnguti, lúma amaríyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe. ¹⁸ Ába láfaraguniña úruwa wuríbani le áfuridubei jayúmulugugiñe gabáyu jagía ában jádaangiñe cáda úruwa gürígia jilágubei, úruwa wuríbani ligía. wá-tu geméti, gumúlali, lúma súfuru. ¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu gíñe jadúga wuríbani.

²⁰ Ja jíbiri gürígia ja moúwegunbaña láu wuríbani le, mígirun meme jamúti jadáguni cátei lé buri meja jadúgübei, mígirun jameí jájuduragun joun espíritugu wuríbatiña lúma joun sándu ja gólu, pláta, brónse, dúbü, wéwe—ja siñáti jaríjin, ni jagáambun, ni jeíbugun. ²¹ Mígirun jameí jáfarajan, jabíñarajan, jasálufurijan, lúma jíwerujan.

Ánjeli táu tiraúraü líburu

10 Ábati naríjin ábanya ánjeli gabáfuti, ába larárirun siéluigiñe lídan juánriñu táu ában jeré-muru loúgiñe lichúgü. Miríti ligíbu quei wéyu, liábin lúruna camá durúngu líña. ² Ñíñoun ában tiraúraü líburu junréngu lújaburugu. Ába líchuguni lugúdi le loúnwenren loúgiñe barána, le lubaúna loúgiñe múa. ³ Ábati lagúaragun láu umálali jéreti quei ában liñún dan le lówoujan, dánti le lagúaragunbei, ába lagaambúniwa ladúrügüdün sédü wayújururu. ⁴ Lárigiñe ladúrügüdün sédü wayújururu ligía, ába yebe nabúrú-jaali lan le laríñagubei, ába nagáambun laríñagun ában umálali nun siéluigiñe.

—Maríñagabeí le laríñagubei sédü wayújururu, mabúrújabeí gíñe.

⁵ Ánjeli bugáti le naríjubei loúgiñe barána lúma loúgiñe múa, ába liñúruni lújabu le loúnwenren siélu, ⁶ ába láfíñurun luágu le gabágaribeí lun sun dan, le adúgübalin uboú láu sun siélu, barána lúma sun cátei le lídaanbei, ába laríñagun.

—Uadügüyáali darásaü. ⁷ Dánme le lachúlürün dan lun lagúmeserun jasédün ánjeli ínwirei lífidun, gúnfuli-jalíme laráansejan Búngiu lé meja arámudaguabei, quei le laríñaguni meja joun profétagu ja eséri-widubalin.

⁸ Ábaya ladímurejan umálali lé buga nagáambubei siéluigiñe, ába laríñagun nun.

—Beíba, banúgounme tiraúraü líburu to daráguboun, to lújaburuguboun ánjeli le rárabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jóuboun, bímebei basándirunun biyúmulugu, tagífidame burágeirugu.

¹⁰ Ába nanúgünun tiraúraü líburu tugúya lújaburugugiñe ánjeli ligía, ába neiginun, bímeti nasándirunun niyúmulugu camá síruudu, lárigiñe neiginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

Ja bián geféentiña

11 Ábati líchugúniwa ában mabúru nun lenége ában wéwe le amísuraagülei, ába laríñagun Búngiu nun.

—Sarába, amísurajaboutun lilgílisin Búngiu lúma latárü, abájüda báñame átiriñanu lan ja ájuduragutiña ñi. ² Mamísurajabei бүрүрү le bougudibei tibíti ligílisi ladúga derégewaali joun ja terénchabaña lun Búngiu, ja lúnbaña jagúnrinchaguni ubúrugugu le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san úrúwa-wein wéyu, táu jadáuragun lúdu.

⁴ Bián geféentiña jagía, jagía gayáwabalin bián tídibu wéwe to olívo lúma bián lébu sanúdelu le ligíbugiñebei Búngiu, le Labúremebei sun ubouú. ⁵ Ánjein ñi abúseerúti ladúgün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguaügü le busénti ladúgün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña gíñe lun jadúgüni dúna jítaüme, lun gíñe jasúfuriragüdüni ubouú láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúrugugu le Jerusalén le ñi lubei ládarawagúa Jesúsú luágu gurúwa, fulásu meme le, camá Sodóma lúma Ejípto.

⁹ Ábame jariaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu úrúwa wéyu dimí, mígirunbaña lun jábunún.

¹⁰ Ábame jagúndaaragun ja ubouúagubaña láu jóúwegun, daríme lun jedéweegun cátei jámagua, le jagúndan, ladúga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan úrúwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíriri janúfudedagun. ¹² Ába jagáambun bián geféentiña jagía ában umálali jéreti siélugiñe le aríñagubei.

—Weíjuma ñájoun siélun.

Ába jamúdeirun siélun lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun járabaganáli, ába tagúluludun ában múna tídaangiñe ságü díisi to ubúruguboun, ába jóúwegun sédü mílu gürígia ladúga járabaganáli ligía. Ja jíbiri gürígia, ába jíchugun inébesi lun Búngiu le siélubei ladúga luweíriri janúfude.

¹⁴ Sügúja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lífidun, ába lagaambúniwa laríñagun umálali buri jéreti siélugiñe.

Chúlújali lidáani Wabúreme Búngiu lúma lidáani Crístu

lun jarúeijan lídan sun ubouú, áni jarúeijaba sun dan.

¹⁶ Ábati jélemuchunga weín-gádürü gürígia ja weírigitíña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu, amúru le Súnti Gabáfu, amúru le wínwanbei lúmagiñe lubáragiñe furúmiñeti dan, wínwan amúru guetó, wínwan amúrúme sun dan.

Teínqui wamútibu ladúga ragúbaali lan oúnwenbun bubáfu.

áni guméseedibu arúeija.

¹⁸ Gáñiburija néchaanigu, chúlúja wéyu lun babeijan, chúlúja gíñe dan lun bagúseragüdüniña jiláguaaña, ábame bíchuguni jafáyeiruaa báni profétagu joun, jáma jíbiri ja derégeguabaña jóungua bun, jáma sun jawúyerigu gürígia ja íchubaña inébesi lun bíri.

Chúlúja óra lun bagúnrinchaguniña ja agúnrinchagubalin ubouú.

¹⁹ Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumú-tuniña ñi tídan lúban. Ába ñi lan labíríjaníga, ireíni, wayújururu, ában járabaganáli, lúma láburujan lúbara júya deréguati le weínamuti.

Wúri lúma anímaalu le dragón

12 Ábati lasáliragun ában oúnwenbun seíni siélu. ában wúri darúgu líña wéyu táu camá jamuga ában dínugu, láu játi lábugiñe tugúdi, lúma ában rídi jáu dúusu warúguma tábulugu. ² Wúri tugúya dageí-nañoun, tagúaraja láu igári le lánina agáriduni, ladúga súfuritu lun tagúriajan. ³ Ábaya lasáliragun ábaya seíni siélu. ában oúnwenbun anímaalu le dragón funáti, sédüñein lábulugu, díisi ligáanchun, lúma ában rídi luágu cáda lábulugu. ⁴ Ába ladúrugudun dragón ligía ában jádaangiñe ságü úrúwa warúguma láu líli, ába lájúnruniña múarugun. Ába laráramun dragón ligía tigíbugiñe wúri to lúnboun tagúriajan, lun leígini tiraú dánme le tagúriajan. ⁵ Ába tagúriajan wúri tugúya ában wügúri irájü le lúnbei ledéraagüdün lagúmadijan

lídán sun fulásu queísi láu ában murúsun gürábu. Ába lagídarúniwa tiraú tueí, ába lanügúniwa lun Búngiu luágun lála. ⁶ Ába tanúrajan wúri tugúya lídoun fulásu mageírawati le ní lubei aráanseeli lan Búngiu ubáraü tubá, lun toúnigirúniwa ní luágu mílu bián-san úrúwa-wein wéyu.

⁷ Lárigiñe, ába ní lan ában wuríbu siélu, ní lubei lageíndagua árcanjel Miguél jáu lání ánjeligu lúma dragón. Ageíndaguati dragón jáu lání ánjeligu, ⁸ ába jeféridiruni wuríbu, ába mabáaraña lan siélu. ⁹ Ába lubeíti laságarún oúnwenbun dragón, le binádu jéwe ligíra le gíríbei Máfia, o Satanási, le ayéejabalin sun uboú, siéluigiñe. Ligía jáu sun lání ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siéluigiñe.

—Gáñei láali Búngiu Máfia láu luweírín lubáfu. Chülújali asálbaruni joun gürígia uboúagun, chülújali larúeijan Búngiu lúma lagúmadijan Crístu, ladúga sagáwaali le íchugubei jadúnrun wadújeñu lueígiñe Jesucrístu, le íchigañajábei jadúnrun wéyuagu, árieibu ligíbugiñe Wabúngiute. ¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu lání Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügútiña lun joúnwen. ¹² Gúndaalá lubeíti siélu, gúnda jumá jugúya le aganoúbei ní. ¡Áni fugiábugu ja aganoúbaña uboúagu, lúma baránaja! Níúdnja Máfia júmoun láu oúnwenbun igáñi, ladúga subúdi lumúti luágu murúsun rügáli lan lidáni.

¹³ Dánti laríjinbei dragón luágu fíwaali lan uboúagun, ába leíbaajanun wúri tó buga agúriajaboun. ¹⁴ Ába líchugún bián larúna dunúru le weínamuti tun wúri tugúya lun gayára lan tájamarun lídoun fulásu mageírawati díse lueí dragón ligía, le níba lubeí toúnigirúa luágu úrúwa irúmu dimí. ¹⁵ Ába lewérajan dragón ligía sarágu dúna liyúmulugugiñe lun lañáradaguagüdünun wúri tugúya. ¹⁶ Ába líderagunun múa wúri tugúya, ába lánjunrenchun múa, ába lachúrini sun dúna le lígiragüdübei dragón liyúmulugugiñe. ¹⁷ Gáñitimaati dragón túma wúri tugúya, ába lídin ageíndagua jáma tirájüñü ja níúdübaña láu le lubeíbei Búngiu, falájamei ugánu le lání Jesucrístu.

Ja mónsturugu

13 Ába naráramun láru béya, ába naríjin lamúdeirun ában mónsturu baránajagiñe, sédüñein lálbulugu, díisi ligáanchun. Níñein rídi luágu cáda ligáanchun lúma ában íri le áubei lanábaguei Búngiu luágu cáda lálbulugu. ² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Níñein ában chaúnti luágu ában lídaangiñe lálbulugu mónsturu ligía, weíríti lún yebe láfaruni jilágubei, ába lareídagun lichaúntin. Weíríti janígi sun gürígia láu mónsturu ligía. ⁴ Ába jájuduragun lun dragón luágu

líchugun gumádi lun mónsturu, ába gíñe jájuduragun lun mónsturu, ába jaríñagun.

—Úati ní ában quei mónsturu le, ¿cába gayára láfaruni?

⁵ Ígirúati gíñe mónsturu ligía lun ladímurejan dimúrei buíti luoúgua lúma lun lanábaguni Búngiu, lúma lun lagúmadijan luágu bián-wein-bián játi. ⁶ Ába ladúgün ítara, adímurejati wuríbati luágu Búngiu, anábaleí líri, lúban, jáma ja siélubaña. ⁷ Ígirúati gíñe lun lageíndagun jáma lánigu Búngiu darí lási-iragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸ Ába jájuduragun sun ja aganoúbaña uboúagu lun mónsturu ligía, ja úbaña jíri bürúwañu lúmagiñe ladúgün uboú tídan líburu to lánina íbágari, to lúmaboun Jesucrístu, le Mudún le ouwebei.

⁹ Le gargeiruguti lun lagáambun, agáambalá. ¹⁰ Ja adáürütiña ámu, jadáürawagúba gíñe, ja áfarajatiña táu efeín, jáfarawagúba gíñe táu efeín. Ligía busén jabeí lánigu Búngiu gurásu lúma affñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Níñein bián gánchu luágu camá ligáanchun mudún, áni ítara líña ladímurejan camá ában dragón. ¹² Níñein sun ubáfu le lání furúmiñeti mónsturu lúma lun ladúgüni cátei lueígiñe loúbadina furúmiñeti mónsturu. Ába ladúgün lun jájuduragun sun gürígia ja uboúagubaña lun furúmiñeti mónsturu, le lareídaguagüdübei lueígiñe chaúnti le luágubei. ¹³ Adúgati gíñe oúnwenbun buri miláguru, áburujagüdati wátu geméti siéluigiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugú ubáfu lun ladúgüni lueígiñe loúbadina furúmiñeti mónsturu, ába leyéeduniña ja aganoúbaña uboúagu, ába ladúgagüdü ában liyáwa mónsturu le gawágubalin chaúnti ába lareídagun, joun. ¹⁵ Ába libíjin jabíaman mónsturu ubáfu lun líchugun íbágari tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adúgati gíñe lun sun lan gürígia—weínamujaña, níúbürigiña, rísitiña, gudémetiña, idámuni, máma idámuni—lun labúrüdún líri mónsturu luágu jájabu le joúnwenren o luágu lan jerébe. ¹⁷ Úati ní ában gayáraati lagáñijan ní cáta ní lalúgurajan ánjein úa líri mónsturu o linúmerun líri luágu. ¹⁸ Buséntitia cátei le líchú áu, le gunfaráandati, atúriajaleí linúmerun mónsturu, le ábanbei quei líri wügúri, áni níján número le asálirubei lídaangiñe lílétürana íri ligía. sísi-san úrúwa-wein-sísi.

Jerémujan ja san bián-wein-gádürü mílu

14 Lárigiñe líra, ába naríjini Jesucrístu, le Mudún, rára lálbulugu wúbü le Sión, le siélubei. Níñianu san bián-wein-gádürü mílu gürígia lúma, ja bürúwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri níúbinti siéluigiñe camá lamúri barána, camá gíñe ladúrügüdü ában wayújururu le jéreti, ítara líña gíñe camá jamuga tamúri sarágu gidára. ³ Ába jerémujan

gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jaweidügüya san bián-wein-gádürü mílu ja asálbarúabaña jádaangiñe ja ubouágubaña—⁴ jagía ja mádaragúnbaña jóungua jámoun würíña, reídeitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma jun Mudún.⁵ Madárirúnwati ni murúsun iyéeni luágu jayumáru ladúga jarúmatiña ligíbugiñe Búngiu.

Ugánu buri le jíchubei úrúwa ánjeligu

⁶ Ábati naríjin ábaya ánjeli ájamaja lamídaangua siélu, ñíñein ugánu le magúmuchaditi lúma lun lapúrichijani joun ja aganoúbaña ubouágu—joun sun néchaanigu, rása, luwúyerigu dimúrei lúma sun fulásu.⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chúlúja dan lun lagúseragüdün. Judúgua jumá lun le adúgübalin siélu lúma ubou, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíríguboun, ladúga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya júrwun ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labúrüdúniwa líri mónsturu luágu lújabu o leréberugu,¹⁰ látubei bínu le lánina lanárimelígáñi Búngiu le lúnbei lábujurjan le gumúti luágun, ábame lasúfurirun láu wátu lúma sáfuru ligíbugiñe Jesucrístu lúma jagíbugiñe ánjeligu ja sándubaña.¹¹ Laweínruba lugúmulalin wátu le asúfuriragüdúbaliña lun sun dan, úabei eméraaguni ni wéyuagu ni áriebe joun ja ájuduragubaña lun mónsturu lúma tun liyáwa, o ja búrwuñubei líri jawágu.¹² Ligía lébubei lúnti lan gagúraasun jamá lánigu Búngiu ja ñúdünbaña láu le lubeíbei áni falájamei Jesúsú surúñu, lun ítara meme jamá derégüdagu lídan jafíñen darí lúmoun jóunwen.

¹³ Ábati nagáambun laríñagun ában umálali ñúbinti siéluigiñe nun.

—Abúrújabeí le. “¡Gúnda jamá ja ouwetiña láu jafíñen luágu Jabúreme Jesucrístu!” Lúmagiñe óra ligía, jeméraaguba lídaangiñe jawádigimari, ábame lídin le jadúgübei úara jáma, líña Sífiri Sándu.

Lalúbajouniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügúri Garaúwarügüti. Ñíñein ában rídi gólu lúblugu túma ában alúbagülei jamánatu lújaburugu.¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladúga chúlúja dan lun alúbajani, ladúga funáli nádü.

¹⁶ Ába lásügüragüdünun le ñúnbei luágu juánriñu lalúbagüle múarugugíñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu.

¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboun tirésini beíbei to múaruguboun, ladúga funáaru.

¹⁹ Ába lásügüragüdünun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weíríti lun taríbichawagúniwa. (Míni lan líra, lanárimelibeícheíni le lúnbei liábin lúmagiñe Búngiu.)²⁰ Ába taríbichawagún beíbei bougudi libítu ubúrugu, ába láfuridun jítaü lídaangiñe tágei chúlú lúmoun líñun jafúrenun gabáyu, úrúwa-san kilómetro geyégu.

Ánjeligu jáma jagúmujoún sédú ígei

15 Ába naríjin ábanya óunwenbun seíni siélu, weírígudati anígi. sédú ánjeligu jáu jagúmujoún sédú ígei, ja áubaña lagúmucha ligáñi Búngiu.

² Aríjatina gíñe camá jamuga ában barána le bídiriu láu wátu geméti lídan, ñíñanu ja agáñeirubaliña luágu mónsturu, túma liyáwa, lúma luágu linúmerun líri, rára jáña lubádu barána le bídiriu ligía táu gidára to líchuguboun Búngiu joun.³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weírítu áni buítu sun le adúga báalibeí, Wabúreme Búngiu, Súnti Gabáfu, surúñu líña sun le badúgübei, úaragua, amúrü le Lurúeitebei sun néchaani.

⁴ ¿Cábasan manúfude bueí, Wabúngiute? ¿Cábasan madímurejan buítu buágu?

Amúrü rügúñadibu mafígounjan, jayábinba lílana sun fulásu, ábame jájuduragun bun, ladúga arijúaaali luágu buídu lan sun le badúgübei.

⁵ Lárigiñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri.⁶ Ába jáfuridun sédú ánjeligu ja jáubaña sédú ígei jagía, ñígiñe. Táunanu janáangun líno to jarúmatu, mirí, liábin jabélitin, gólu luágu janíguagu.⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédú ánjeligu jagía, buin líña cáda cópu láu luweírín ligáñi Búngiu le gabágaribeí lun sun dan.⁸ Ába labuínchun fulásu le sándutimaabei láu gumúlali le ñúbinbei lídaangiñe luweírigin Búngiu lúma lubáfu. siñátiti lebéllurun ni ában ñíjin darí jagúmuchun sédú ígei ja jámabaña sédú ánjeligu jagía.

Cópu buri le lágei ligáñi Búngiu

16 Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturai cópu buri láu lanárime ligáñi Búngiu uboúagun.

² Ába lídin furúmiñeti ánjeli, ába láturuni licópun uboúagun, ába lasáirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasáiragun barána queísi játa jiláaña, ába jóúwe-gun sun cátaña ja gabágaribaña lídan.

⁴ Ába láturuni júruwan ánjeli licópun luágun buri dúna lúma líseesen dúna, ába lasáiragun jítaüme. ⁵ Ába nagáambun laríñagun láni dúna ánjeli.

—Úaragatibu láu bagúseragüdün ítara, Búngiu sándu, amúrü le wíwanbei lúmagiñe lubáragiñe furúmiñeti dan áni wíwan amúrü guetó, ⁶ ladúga jagía, aseíñeigüda jamúti játa profétagu jáma ja derégeguabaña jóungua bun, guetóti gurágüdaadibu jítaü joun, yúuti joun.

⁷ Agáambatina gíñe laríñawagun lueígiñe latárü.

—Ánja Wabúreme Búngiu le Súnti Gabáfu, agúser-agüdaadibu láu ísuruni lúma úaraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísi, ⁹ ába jachúrarun súngebui. Láu sun lira, masáansiragunti jagáburi, madímurejan jagía buíti luágu Búngiu, anábagnarügü jameí Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lálá mónsturu, ába leréderun larúeijan lábugiñe lubúriga. Ába buri jágüragunun gürígia jañéñe láu igári. ¹¹ Ni ítara, masáansiragunti jagáburi lun jígiruni wuríbati léñaja jadúgübei, anábagnarügü jameí Búngiu le siélubei luágu jagárigu lúma jagúmeín.

¹² Ába láturuni jasísín ánjeli licópun luágun óunwenbun dúna le Eufrátes, ába lamábeidun lun ñi lan úma lun jásügürün urúeigu ja ñúbinbaña lueígiñe óubaü le ñígiñe lubei labóucha wéyu.

¹³ Ábati naríjin jáfuridun úruwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yéebui, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun óundaragúaña sun urúeigu ja uboúagubaña lubá wuríbu le lánina óunwenbun luwáyuri Búngiu le Súnti Gabáfu. ¹⁵ (“Toúnigi jumátia ladúga sódinibei niábin quei liábin jíweruti árieibu. Gúndaabei le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubei lun jaríjini luágu,” líña laríñagun Jesucrístu.) ¹⁶ Ábati jóundaraguniña urúeigu lídan fulásu le giríbei Ar-magedón lídan dimúrei le hebréo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le

sándutimaabei le siélubei. Lumálali Búngiu ligía, le ñúnbei luágu lálá ñi, laríñaga.

—Adügúwaali.

¹⁸ Ába ñi lan labíríjaníga, ireíni, lúma wayújururu, ába lánjingichun múa láu ában jarabaganáli, jéreti sügú láu sun jarabaganáli le dagáalibei lúmagiñe ñi jamá gürígia ligíbuagu uboú. ¹⁹ Ába lafánreinragun ubúrugú weíríti le Babilónia lídan úruwa murúsun, ába buri lagúluludun ubúrugú le uboúagubei, ába larítangun Búngiu luágu ubúrugú weíríti le Babilónia lun láju-luchagüdüni bínu le lánina abeichúni le loúnajabei lun lídan ligáñi. ²⁰ Sun uboúju lúma sun wúbü, ába lagúmuchagun. ²¹ Ába gíñe láburujan óunwenbun buri lúbara júya deréguati siélugiñe jawágun gürígia, júruburiti chúlú lúmoun san líburu, ába janábaguni gürígia Búngiu luágu, ladúga ában lan abeichúni janárimeti.

Tasiádirúniwa óunwenbun jóru

17 Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún óunwenbun jóru to ñúnboun ligíbuagu barána bun. ² Agánawaaña urúeigu ja uboúagubaña lídan salúfuri túma, bachárúa jagía ja uboúagubaña láu bínu le lánina tisálufurin.

³ Ába lanúgünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában wúri waríñu luágu ában mónsturu funáti, búruwañu líña sun luwúyeri dimúrei le anábaguti Búngiu tuágu, sédüñein lichúgü mónsturu le uágubei tañúura, dísi ligáanchun. ⁴ Wúri tugúya, gúchu lúma funáti ticólorunbei tanáangun, liábin tuwénden, gólu, dúbü buíduburiti, lúma pérta. Níñein ában cópu gólu tújaburugu buin láu tisálufurin lúma liwíye tadáagun. ⁵ Búruwañu líña ában íri teréberugu láu ában aníchigu arámudaguati. Íri le teréberugubei. “Babilónia to weíríboun, jáguchu jóru lúma sun luwúyeri iwíyeni uboúagu.” ⁶ Ába nasúbudiruni luágu bachárúañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinbalin cátei le, ába laweíridun nanígi. ⁷ Ábati laríñagun ánjeli ligía nun.

—¿Cá uágu laweírída banígi? Nasúbudiragüdaali míni tan wúri to bun, láu sun mónsturu le anúgübarun, le sédübei ichúgü, dísi ligáanchun.

⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujoún loúnwen. Ja aganoúbaña uboúagu, ja úabei jíri búruwañu tídan líburu to lánina ibágarí lúmagiñe ladúgün uboú, laweíriduba janígi dánme jaríjini mónsturu lé meja gabágaribei áni úaali, ábaya liábin.

⁹ Níñein cátei ja joun ja gayáraabei gunfaráanda jamáni. Sédü ichúgü ligía, míni lan sédü wúbü le uágubei ñun tan wúri tugúya, ¹⁰ sédü méme ichúgü ligía, míni lan gíñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe,

larúeijaña guetó, le ában, miábingili. Dánme liábin jagúmujoún, larúeijaba murúsurügü dan. ¹¹ Le mónsturu lé meja gabágaribei áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujoún loúnwen.

¹² Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu. ¹⁴ Jageíndaguba lúma Jesucrístu, láfaragubaña jilágubei, ladúga Jabúreme sun abúremein ligía, Jarúeite gíñe sun urúeigu, áni jagáñeiruba gíñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába gíñe laríñagun ánjeli ligía nun.

—Barána le baríjubei, le igibuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le baríjubei luágu mónsturu, le méme díisibei urúeigu, seyéereguduba jóru joun, ábame jígirunun fíwañu, surúsu, jeígubei túgürügü, ábame jágudunun láu wátu geméti. ¹⁷ Rúlaali Búngiu tídoun janígi lun jadúgüni le labúseerubei láu júaradun lun jederegeruni jabáfu queísi urúeigu lun jíderaguni mónsturu daríme lagúnfulirun le laríñagubei Búngiu. ¹⁸ Wúri to baríjuboun, tugúya weírítu ubúrugú le agúmadirubaliña lurúeitegu uboú, le gíribei Babilónia.

Teíguadun Babilónia

18 Lárigiñe sun cátei le, ába naríjin ábanya ánjeli larárirun siéluigiñe láu sarágu ubáfu, ába larúgoungadun uboú láu límirin. ² Lagúaraguati láu umálali jéreti.

—Gumúgua, gumúgua Babilónia to weíríboun, guetó jábiñejaru máfianu, jarámudaguagüle sun jawúyeri espíritugu wuríbatiña, jádibu dunúru wíyetiña queísi wadúbi. ³ Ladúga sun lan néchaanigu bacháruaaña láu bínu le lánina tisálufurin, áni agánawaaña lurúeitegu uboú túma lídan tisálufurin, alúgurajatiña buri ja uboúagubaña, rísijaña lídaangiñe luwénden touseragun túngua.

⁴ Ábayati nagáambun laríñagun ábanya umálali ñúbinti siéluigiñe.

—Furíjuma Babilóniagiñe, jugúya le nánigu, mafánran jumámuga lídan tíffigoun lúma lídan tabeichúniwa. ⁵ Gíbeguaali tíffigoun darí lun lachúlürün siélu, áni jarítaguaali Búngiu luágu luríban touserun. ⁶ Adúga jumá tun Babilónia quei tadúga joun ámu, fáyei jumoún dóbüli lueí le tadúgübei. Rújuma ában uníñein le jéretimaati bián weíyaasu tun sùgú láu le tíchugubei joun ámu. ⁷ Súfurigüda jumoún quei méme tederegeragun túngua lun anáanguni únguaú lúma lun agúnrinchaguni, ladúga aríñaga tan tídan tanígi. “Ñun nína ya quei ában urúei, máma nugúya ában jiiñaru mámaritu, masúfurirubadina gíñe.” ⁸ Ligía liábinba lubeí tabeichún lídan ában meme wéyu—oúweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asíadirubarun.

⁹ Lurúeitegu uboú ja aganoúbaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún. ¹⁰ Ábame jeréderun díse, le janúfudei lueí tabeichún, ábame jaríñagun.

—¡Fugiábu Babilónia, ubúrugú le weíríbei, Babilónia ubúrugú le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja uboúagubaña, ayájuatiña gíñe, gudémegua ligía ubúrugú ligía joun ladúga úaaña lan cába lan agáñijeí ebégidinaü le janájabei—¹² ebégidinaü lé buri gólu, pláta, dúbü buíduburitu, périlas, gamísa to líno to fínutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dúbü miríti, ¹³ canéla, cátei lé buri jémeti, cupáli, mirra, ibíñei, bínu, aáli, fulúwaaru fínutu, lúma túrigu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún. ¹⁴ Jaríñaguba lun ubúrugú ligía.

—¡Úaaru fráta buri to seméboun búma to jínsiñeña-jáboun bun sarágu, féridi báali gíñe sun irisini lúma wéndei le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúrugú le, jeréderuba díse le janúfude lueí labeichún, ayájuajeina, aságürijeina. ¹⁶ Ábame jaríñagun.

—¡Fugiábu ubúrugú weírítu! Ítara liñá meja quei ában wúri táu tadáuragun to líno fínutu túma anáanguni to colóru gúchu lúma funáti, láu tuwénden gólu, dúbü buíduburiti lúma pérla. ¹⁷ ¡Lídan murúsun óra gumúja sarágu irisini!

Sún buri tarúne ugúnein, pasajérugu, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúrugú, ába jagúaragun.

—¿Cásan meja ámu ubúrugú ñíbei quei oúnwenbun ubúrugú le?

¹⁹ Ába jíchaagun múa jábulugu, ayájuaja, aságürija, agúaragua.

—¡Fugiábu Babilónia lé buga weíríbei! Rísijañá yebe sun ja gagúnebaña wapóru baránaja láu lirísin, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amúrü siélu, júma jugúya apóstolugu, jáma profétagu, jáma sun ja lánigu Búngiu, ladúga adúgaali Búngiu gúsei jun láu lasíadiruni.

²¹ Ábati liñúrún ában ánjeli gabáfuti ában dúbü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdúniwa Babilónia, ubúrugú le weíríbei, maríjindügüyáwalime. ²² Magaambúndügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magaambúnjalime gíñe lamúri dúbü le mulí bídan.

²³ Madúnraagúnjalime larúgounga lámpu bídan, magaambúndügüyáwalime areínjani le lánina maríei bídan, láu sun gabáfugüda bániña meja báni alúgura-

jatiña lídan sun uboú, eyéedagua báña sun néchaani láu babíñarajan.

²⁴ Dariwaali játa profétagu, jáma ja lánigu Búngiu, lúma játa sun ja áfarawagúañabaña uboúagu, dariwaali játa sun jagía lídan ubúru le meja Babilónia.

19 Lárigiñe cátei le, ába nagáambuni jamálali sarágu gürígia, jagúarajan.

¡Alelúya! Weíruti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru oúnwenbun jóru to agádeirubalin uboú láu tisálufurin,

águyugüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü gürígia ja weírutiña, jáma gádürü cátaña gabágaritiña jagía, ába jélemuchun chülú múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu.

Rújuma uweírugini lun Búngiu,

sun jugúya ja esériwidubalin,

áni inébelá jun,

weíyaaña, ñúbürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu dúna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buínwama láu ugúndani, ru wagíame uweírugini lun,

ladúga chülúja óra lun lídan jamá ában lánigu Jesucrístu lúma, le gumúti.

Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babúrüja. “Gúnda jamá ja amísurajoúbaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüniti le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madúgabei le, esériwiduti áu lun Búngiu quei amúrü jáma bibíriña ja afálarubalin láni Jesúsú ugánu derégüdagüña, lun Búngiu lun bájuduragun.

Ugánu le lanúgübei Jesúsú lídoun larúgounga, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junréñu, ába lasáliragun ában gabáyu jarúti, léti aweínjabalin, Gúñfuliti lúma Inárüni,

ligía líribei, ladúga láu ísuruni lagúmadija, láu gíñe ísuruni lageíndagua. ¹² Ámirijati lágu camá ligémeri wátu, níñein sarágu rídi lábulugu, níñein gíñe ában íri bürúwañu luágu, ligía rügüñein asúbudirei. ¹³ Anáangun to luáguboun, feíndiwatu láu jítaü. Lerérun Búngiu líribei. ¹⁴ Jafálareiti súdeara ja siélubaña táu jadáuragun líno to fínutu, jarútu, jarúma, waríñu jagía jawágu gabáyu jarútiña. ¹⁵ Níñoun ában efeín jamá-natu liyúmulugugiñe lun láchaünguniña néchaani táu, ábame ledéragüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. ¹⁶ Bürúwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, óundaragua jumá lun oúnwenbun ladín-eragüdüni Búngiu, ¹⁸ jou jumámuga jágürügü urúeigu, gumádimatiña, jáma wügüriña ganígitiña, jágürügü gabáyu jáu sun ja aweínjabaliña, jágürügü sun jawúy-eri wügüriña dándu ja jóunguatiña quei ja idámuni, dándu ñúbürigiña quei weínamujaña.

¹⁹ Ábati naríjini mónsturu jáma lurúeitegu uboú jáu jánigu óundaraguaaña lun jageíndagun lúma le waríñubei luágu gabáyu jarúti jáma lánigu. ²⁰ Ába ladaürún mónsturu úara lúma proféta yéeti lé buga adúgübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígíraguagüdübaña jóungua lun labürüdüni líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún wínwañu lídoun lagúnu le láubei wátu geméti lúma súfuru. ²¹ Ja jíbiri, ába jáfarawagún táu efeín to liyúmuluguboun le waríñubei luágu gabáyu, ába jaquímuledun sun dunúru buídu láu jágürügü.

Le mílu irúmu

20 Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güríngüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagúraguni luágu mílu irúmu. ³ Ába láguruni lídoun júyu le mébejabei le ní lubei ladáürei. Ába lichugún ában séyu luágu béna lun mayéejandügüya láaña lan néchaanigu darí lásügürün mílu irúmu. Lárigiñeme mílu irúmu ligía, ligíragüdüwaba luágu murúsun dan.

⁴ Ába naríjini jála buri ja ibíjubaña ubáfu lun jagúseragüdüni, ñun jáña luágu. Aríja numútiña gíñe jawáni já meja adúrürúbaña ichügü lueígiñe japúrichijani Lerérun Búngiu lúma lueígiñe jadímurejan luágu Jesucrístu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe oúweni lúnya jabágaridun, ába jagúmadijan úara lúma Crístu luágu mílu irúmu. ⁵ Ánjeinti ja jíbiri jiláguaaña,

máaaruntiña lídaangiñe oúweni daríme lárigiñe mílu irúmu. Niján furúmiñeti ãsaaruni lídaangiñe oúweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ãsaaruni lídaangiñe oúweni! Mabáfuti libíaman oúweni jawágu, lubáragiñe líra, fádirigubaña lání Búngiu lúma lání Crístu, ábame jagúmadijan úara lúma Crístu luágu mílu irúmu.

⁷ Dánme sügújali mílu irúmu ligía, ligíame lígírawagüdún Máfia lídaangiñe júyu le mébejabei, ⁸ ábame láfuridun lun layéejaniña néchaanigu lídan sun uboú. Láfuriduba ayéedaña ubáfu buri le Gog lúma Magóg, ábame loúndaraguniña jánigu, ja gíbebaña quei liságounte barána, lun wuríbu. ⁹ Ítara líña lubeíti, ába jáfuridun súaara jagía lídaangiñe sun uboú, ába jegéyedaduni fulásu le ñí jabei lánigu Búngiu lúma ubúrugu le jñsiñebei lun Búngiu, le Jerusalénbei. Ába loúnajan Búngiu wátu geméti siélugiñe, ába láguduniña gumúgubei. ¹⁰ Máfíati le ayéedubaliña, ába lágurúniwa lídoun lagúnu le láubei wátu geméti lúma súfuru, le ñíjin lubeí jágurúa mónsturu lúma proféta yéeti. Jasúfuriruba ñi wéyuagu, áriebu lun sun dan.

Wísiyu ligíbugiñe oúnwenbun jalaú jarúti

¹¹ Ábati naríjin ában oúnwenbun jalaú jarúti, ñíñein Búngiu ñun luágu. Ába lagúmuhagun siélu lúma uboú ligíbugiñe, ába maríjñjali lan. ¹² Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágari. Ába jagúserawagüdún jiláguaaña luágu buri cátei lé meja jadúgübei, según le bürúwañubei tídan líburu buri tugúya. ¹³ Sarátiña sun ja añáradagubaña dúnarugu, sun ja jiláguañabaña, ába jásaarun lídaangiñe oúweni, ába jagúserawagüdún luágu buri cátei lé meja jadúgübei. ¹⁴ Ába lágurúniwa oúweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei oúweni, ¹⁵ ñíjin jagurúa ja úabei jíri tídan líburu to lánina ibágari lun jasúfurirun ñi gumúgua dan.

Iséri siélu lúma iséri uboú

21 Lárigiñe, ába layáwadagun iséri siélu lúma ában iséri uboú nun, gumúgua buga furúmiñeti siélu lúma furúmiñeti uboú áni úaali buga barána. ² Áu Juan, aríja numúti ubúrugu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári. ³ Ába nagáambun laríñagun ában umálali jéreti siélugiñe.

—Arijabá, agánawati Búngiu jádan gürígia guetó. Laganóuba jáma, jagíaba lánigu, Búngiu mémeba jáma lun ligía lan Jabúngiute. ⁴ Larágajabei sun jáguira, úaalíme oúweni ni ayájuni ni íruni ni igárigu, ladúga sügúja sún meja cátei le níjeinbei.

⁵ Ábati laríñagun Búngiu.

—Arijabá, adúga numúti sun cátei isérimé.

Aríñagati gíñe.

—Babúrúja, ladúga inárüniti dimúrei buri le, áni gayáraati lafíñerún luágu.

⁶ Lárigiñe, ába laríñagun nun.

—Súnja nadúgüni sun cátei le. Áu lagúmesejabei sun cátei, áu gíñe lagúmujoúnbei, quei létüra 'A' lúma 'Z'. Le mágürabuti, níchuguba lun lun látun lídaangiñe líseesen dúna le íchugubei ibágari, mafáyeijaanga luagu. ⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸ Ánjañati ja janúfudebaña, ja mafíñebaña, ja iyéreejabúbaña, ja gáfara-jadibaña, ja adáagubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le súbéi láu wátu geméti lúma súfuru, le libíamabei oúweni, ligíaba jalágaante.

Iséri Jerusalén

⁹ Ábati liábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagüdüni Sífiri Sándu ában wúbü nun, weíríti, íñu, ába larúfuduni oúnwenbun ubúrugu biníwati le Jerusalén nun, larárirun siélugiñe lúmagiñe Búngiu. ¹¹ Ámiríjati ubúrugu ligía láu larúgounga Búngiu, ítara líña límirin quei límirin ában dúbü buídumeraüti, quei dúbü le jáspe, jarúgoungati quei bídiriu. ¹² Níñein ában baríeru weíríti, íñu, láu dúusu béna geyégu láu ubúrugu ligía, ában ánjeli luágu cáda béna, lúma jíri dúusu türíbu ladúgawagun Israél bürúwañu luágu buri béna. ¹³ Úrúwañein béna lueígiñe le ñígiñe lubeí laboúcha wéyu, úrúwa lueígiñe nóрте, úrúwa lueígiñe sur lúma úrúwa lueígiñe oúbaü le ñígiñe lubeí lálüda wéyu. ¹⁴ Baríeru ligía, ligíbugañein dúusu dúbü lidérebugañein, láu jíri dúusu lání Crístu apóstolugu bürúwañu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúrugu, lubéneri, lúma lubárierun. ¹⁶ Ubúrugu ligía, ába lábu lidábuberen lúma limígífen. Ába lamísurajani ánjeli ligía ubúrugu láu lumáburu, bián-mílu bián-san kilómetros luweírín, ába lábu limígífen lúma líñun, lúma lidábuberen. ¹⁷ Lárigiñe, ába lamísurajani baríeru, úrúwa-wein-gádürü métros luweírín según jamísuraagüle gürígia le layúsurubei ánjeli ligía.

¹⁸ Láu dúbü le jáspe ladúgúwa baríeru ligía, ubúruguti ligía, láuti gólu le tímatimaati, miríti queísi bídiriu le jarúmati. ¹⁹ Wéndegüdáwati lébu baríeru ligía láu sun luwúyeri dúbü buíduburíti. le furúmiñeti, láu jáspe, le libíaman, láu safíro, le lúrúwan, láu ágata, le ligádürün, láu esmerálda, ²⁰ le liseíngün, láu ónise, le lisísín, láu cornalína, le lisédün, láu crisólito, le liwídün, láu berílo, le linéfun, láu topásio, le lidíisin, láu criso-prása, le liúnsun, láu jasínto, léti lidúusun, láu amatísta. ²¹ Dúusugubei béna ligía, dúusu pérlas, cáda béna láu ábanrügü pérla ladúgúwa. Léti úma buri lání ubúrugu ligía, láuti gólu jarúgoungati quei bídiriu.

²² Maríjintina ni ában ligílisi lídan ubúru lu lídan, ladúga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu ligílisi le ñi jabei. ²³ Memégeirunti ubúru lu ligía larúgounga lúmagiñe wéyu ni lúmagiñe játi, ladúga le guánarú larúgounga Búngiu rúti larúgounga lun, léti Jesucrístu, ligía lilámpunbei ubúru lu ligía. ²⁴ Jeíbuguba sun néchaanigu ja sálbawañabaña lídan lilámpun ubúru lu ligía, ábame janúgüni lurúeitegu ubóu jaweírigin ñíjin, lun jíchuguni lun Búngiu. ²⁵ Madáurawangunbei lubéneri wéyuagu, úabei gíñe áriebe ñi. ²⁶ Lanügúba jaweírigin néchaanigu ñíjin, láu sun jarísín, ²⁷ mebélubei ni cáta wíyeti ñíjin, ni le adúgüti cátei le wuríbati o gayéeraguati. Ja rügúbaña bürúwañabaña íri tídan líburu to lánina íbágarí to lúmaboun Jesucrístu, jagía rügúbaña ebélura.

22 Ábati larúfudun ánjeli ligía ában dúna jarúmati nun, le íchugubei íbágarí, jarúgoungati quei bídiri, lídaangiñe lála Búngiu lúma lála Jesucrístu láfurida. ² Ñíñein dúna ligía lamídaangua lémeri ubúru lu ligía, áni luágu bián louba dúna ligía ñi laweírída buri tídibu wéwe le íchugubei íbágarí, le agíndubei dúusu weíyaasu lídan írúmu. Ságu játi lagíindun, léti lubána, seríwiti lun lagáranijóun joun néchaanigu. ³ Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúru lu ligía, ábame jájuduragun lánigu lun. ⁴ Jagágibudaguba lúma Búngiu, ñíbei gíñe líri jeréberugu. ⁵ Úaalíme áriebe ñi, ja aganoúbaña ñi, memégeirunbaña ligémeri lámpu ni ligémeri wéyu, ladúga larúgoungadagüdüba Wabúreme Búngiu jáu, ábame jagúmadijan sun dan.

Madíseeli liábin Jesús

⁶ Lárigiñe, ába laríñagun ánjeli ligía nun. —Inárüniti dimúrei buri le, áni gayáraati laffíñerúni-wa luágu, áni Wabúreme Búngiu méme le íchugubei dimúrei joun profétagu óunaja láadina lun narúfuduni le lúnbei lasúseredun joun lánigu madíse. ⁷ —¡Aríja jumá! ¡Anáte madíse! líña laríñagun Jesucrístu. ¡Gúndaalá le adúgübei gásu láu ugánu le láni Búngiu le bürúwañubei tídan líburu to! ⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába laríñagun nun. —Madúgabei le, esériwiduti lun Búngiu áu quei amúrú jáma bibíriña ja profétagu, jáma sun ja

adúgübaña gásu láu le bürúwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabei láni Búngiu ugánu le bürúwañubei tídan líburu to ladúga yaráfaali dan lun lagúnfulirún. ¹¹ Ígirabei le wuríbabei lun lasígirun adáagua wuríbani, le wíyebei, lun lasígirun lídan liwíye, ánjeinti le buídubei, buídumemelá, áni le wügüri le derégeguabei lúnga lun Búngiu, gúnfulimemelá.

¹² —Ánja, madíseeli niábin, líña laríñagun Jesucrístu, áni barú numuti afáyeiruaaja le lúnbei níchuguni lun cáda ában según buri cátei le ladúgübei. ¹³ Áu furúmiñetabei lúma agúmujoúni, lagúmeseseja sun cátei lúma lagúmujoún quei létüra 'A' lúma 'Z'.

¹⁴ Gúndaatiña ja achíbubalin jáfígoun lun garícha jamá lun jeígin lídaangiñe lin tídibu wéwe le íchubei íbágarí, gayára lámuga jebélurun lueígiñe lubéneri ubúru lu. ¹⁵ Ánjaña ja mafíñeradibaña luágu Jesucrístu, ja abíñarajabaña, ja adáagubaña salúfuri, ja gáfara-jadibaña, ja ájuduragubaña joun sándu, jáma sun ja jínsiñejabúbaña lun eyéeraguni, jeréderuba boúgudi.

¹⁶ —Áu Jesús, óunaja náali náni ánjeli lun lasúbudiragüdüni sún buri cátei le jóun buri tílana ligílisi. Áu linébaanfan urúei David, áu gíñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucrístu.

—Jigábu lun Jesucrístu lun basálbarun.

Le gíñe agáambubei, aríñagalá.

—Jigábu lun Jesucrístu, sálba bámuga.

Le mágürabubei, ánjein busén, ñúbinlá, gurála lídaangiñe dúna le íchugubei íbágarí, mafáyeijaanga luágu.

¹⁸ Sun ja agáambubalin láni Búngiu ugánu le bürúwañubei tídan líburu to, wéridi numútiña lueí cátei le. le íchuguti lánwoun cátei le, lagán-woundagüdübaña Búngiu ígei ja uágubaña labúrújoúa tídan líburu to, luágu. ¹⁹ Le gíñe agídaruti som cátei lídaangiñe láni Búngiu ugánu le bürúwañubei tídan líburu to, lagídarubei gíñe lufánran lídaangiñe lin tídibu wéwe le íchugubei íbágarí, lúma lídaangiñe ubúru lu sándu lé buri bürúwabei uágu tídan líburu to.

²⁰ Le asúbudiragüdübalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesús!

²¹ Binílaün Wabúreme Jesucrístu sun jugúya. Ítaralá.